



Manatu Mai le Mauga o Fa'amanuiāga

Su'esu'ega o le Tusi Pa'ia

Su'esu'ega o le Tusi Pa'ia Mai le

Manatu Mai le Mauga o Fa'amanuiāga

Copyright (C) 2018 by Revelation Publications. All rights reserved world-wide.

Tulaga mo le Fa'aaogāina

Fa'amolemole ia fa'asoa atu lenei su'esu'ega o le Tusi Pa'ia i isi, ina ia mafai ai fo'i ona maua e i latou se fa'amanuiāga. E mafai ona talosagaina i se fausaga fa'apenei po o se ata lolomi (kopi), e leai se tau. E lē mafai ona toe fafauina fa'atusi, suia se vaega, po o le tufa atu i se isi lava fausaga vagana le ata kopi, po o le fa'atau atu fo'i a e le'i fa'ataga mai e se tusi e le 'au lomitusi. Ia tumau lenei fa'aaliga i le aiā-fa'alomiga i so'o se kopi. Pe a e fia fa'atonuina lau matā'upu i lenei fausaga, e mafai ona e maua matā'upu fou, o fa'amatalaga, ma ia talosagaina e ui mai i le tuātusi o lo'o i lalo. Matou te naunauta'i ina ia fa'amalosi atu i nisi lomitusi, fa'apotopotoga laua'itele, vaevaega o le ekalesia, po o fa'alapotopotoga i fafo atu o le malō o Amerika ina ia lolomia ma tufatufa atu nei su'esu'ega. Ia maua se tusi o lo'o fa'ataga mai ai e le lomitusi, a e le'i fa'aliliuina, toe fausia, pe toe lolomia lenei galuega mo le fa'aaogāina.

www.RevelationPublications.com
PublisherForGod@gmail.com

Upusi'i mai le Tusi *O Manatu Mai le Mauga o Fa'amanuiāga*
tusia e E.G. White.

Fesili ma le Fa'amaopoopoina e Merlin Beerman
Ata o le Fa'ava'a - (C) Weston Young
Ata i Totonu - (C) Larry Gessele
www.facebook.com/LGNaturephotos
Fafauina le Fa'ava'a ma Fa'atonu Matā'upu - Merlin Beerman
Fa'a-Samoaina e Abbie Leala Watt
Fa'atonu o le Fa'a-Samoa - Florence Lam Yuen Voigt

ISBN 978-1-934924-15-0

FA'ASINO MATĀ'UPU

Fa'atomuaga - I Autafa o le Mauga

Lesona	Itulau
1. Amu'ia ē Loto Maulalo	1
2. Amu'ia ē Fa'anoanoa	5
3. Amu'ia ē Agamalū	9
4. Amu'ia ē Fia 'A'ai ma Fia Inu	13
5. Amu'ia ē Alolofa Atu	17
6. Amu'ia ē Loto Mamā20	20
7. Amu'ia ē Fa'atupuina le Filemū	24
8. Amu'ia ē Sauāina	26
9. Amu'ia Outou pe a 'Upu Leagaina	29
10. O le Masima o le Lalolagi	33
11. O le Malamalama o le Lalolagi	36
12. O le Tulaga Fa'ale-Agaga o le Tulafono	41
13. O le Uiga o le Amiotonu	46
14. Tu'uloto o le Lotoleaga ma le 'Ino'ino	49
15. Alofa ma le Toe Fa'aleleiga	52
16. O le Amataga o le Agasala	55
17. O Masaniga Leaga ma le Loto	57
18. O le Manuia o le Tulaga Fa'aipoipo	60
19. Ia 'Aua Lava Ne'i Tautō	64
20. O le Maila Fa'asili	67
21. Ia Fa'apei o Lou Tamā i le Lagi	72
22. O le Ala Moni o le 'Au'aunaga	75

23.	O le Tatalo	78
24.	O i Fea Lau 'Oa	82
25.	Sa'ili le Malamalama ma 'Au'auna i le Matai e Tasi	85
26.	'Aua le Popole i se Mea e Tasi	88
27.	Ia Mua'i Sa'ili le Malō o le Lagi	92
28.	O le Tatalo a le Ali'i	95
29.	E lē o le Fa'amasino a o le Faia	110
30.	'Aua Ne'i Lafo a Outou Penina i Luma o Puā'a	115
31.	Ia Ōle atu, Sa'ili ma Tu'itu'i atu	117
32.	O le Tulafono Fa'a-Auro	121
33.	E Vāapiapi le Faitoto'a	125
34.	Taumafai mo le Faitoto'a Vāitiiti	128
35.	Fa'aeteete i Perofeta Pepelo	132
36.	Fa'avae i Luga o le Papa	135

I Autafa o le Mauga

E sili atu i le sefulu fā (14) seneturi a e le'i fanau mai Iesu i Petele'ema, sa fa'apotopoto ai le fanauga a Isara'elu i le vanu matagofie o Sekema, ma latou fa'alogoina mai itū mauga e lua leo o faitaulaga o lo'o alagaina fa'amanuiāga ma fetu'u - "fa'amanuiāga pe a usiustita'i i poloa'iga a le Ali'i lou Atua...ma se fetu'u pe a lē usita'i" (Teuterenome 11:27, 28). Sa fa'aigoaina le mauga lea na laugaina ai 'upu fa'amanuia o le mauga o fa'amanuiāga. Peita'i e lē o luga o Keresema na alagaina ai 'upu fa'amanuia i le lalolagi fa'anoanoa ona o agasala; ua matuā pa'ū Isara'elu mai se tapula'a maua luga sa fa'atūina i o latou luma. Sa tatau ona ta'ita'i Ōna tagata e se tasi e 'ese mai iā Iosua, i le malolōga moni o le fa'atuatua. Ua lē toe ta'ua Keresema o le Mauga o Fa'amanuiāga, a o lea mauga i talane o le Vaituloto o Kenesareta, le mea sa fetalai ai Iesu i 'upu fa'amanuia i Ōna so'o ma le motu o tagata.

Se'i o tatou toe tepa i tua i lea va'aiga, ma a o tatou nonofo ma le 'au so'o i luga o le itūmauga, ia i ai i o tatou mafaufau ma lagona mea sa fa'atumulia ai o latou loto. Ia malamalama i uiga o fetalaiaga a Iesu i ē sa fa'alogo i ai, atonu o le a iloa manino ai le matagofie ma atonu o le a maua ai mo i tatou lava ia ni a'oa'oga loloto.

Ina ua amata le galuega a le Fa'aola, sa matuā 'ese lava le manatu a le to'atele e fa'atatau i le Mesia ma Lana galuega ua lē talafeagai ma le taliaina o Ia e tagata. Ua latou fa'atauva'aina le agaga moni o tapua'iga mo tū fa'aleaganu'u ma mea taulesauniga, a o valo'aga ua fa'amatalaina e fa'atatau i fa'atonuga a ē loto mimitavale ma e malosi le fa'alelalolagi. Sa tepataula'i Iutaia mo Lē o le a afio mai, o ia o se ali'i sili o le a fa'apotopotoina malō uma i lalo o le pule'aga a le Leona o le itu'aiga o Iuta, a e lē o le Fa'aola mo ē agasala. Sa vala'au i latou e Ioane le Papatiso ina ia salamō, fa'apei fo'i ona faia e perofeta o aso anamua, a e latou te le'i fa'alogo. Sa ia fa'asino iā Iesu i tafatafa o le Ioritana, o Ia o le Tama'i Mamoe a le Atua e 'ave'esea agasala a le lalolagi, a e le'i i ai se aogā. Na sa'ili le Atua ia fa'atosina o latou mafaufau i le valo'aga a Isaia e fa'atatau i le Fa'aola ua puapuagātia, a e sa latou lē fia fa'alogo.

Pe ana gaua'i a'oa'o ma ta'ita'i o Isara'elu i Lona alofa tunoa e fa'aliliu loto, semanū ua faia i latou ma Ōna sui i tagata. Sa mua'i tala'i iā Iutaia le o'o mai o le malō, ma na avatu le vala'au ina ia salamō. Ina ua tutuli i fafo le 'au faimea lētaupulea mai le malumalu i Ierusalem, sa fa'ailoa atu e Iesu o Ia lava o le Mesia - o Lē e tatau ona fa'amamāina le agaga ina ua fa'aleagaina e le agasala ma suia Ōna tagata e 'avea ma malumalu pa'ia mo le Ali'i. Peita'i e le'i fa'amaulaloina uiga o ta'ita'i Iutaia ia latou talia ai le A'oa'o agamalū mai Nasareta. Sa tu'ua'ia o Ia i luma o le Fono Faitulafono i Lana asiasiga fa'alua i Ierusalem, a e ona o le fefefe i le motu o tagata sa lē mafai ai e nei ta'ita'i ona taumafai e taupulepule i Lona soifua. E mai lenei lava mea, ina ua afio'ese mai Iutaia, sa Ia amata loa Lana galuega i Kalilaia.

Sa faia ma fa'aauau pea Lana galuega a e le'i tu'uina mai le Lauga i luga o le Mauga. O le fe'au na Ia folafola i lea itūmalō atoa, "Ua latalata mai le malō o le lagi" (Mataio 4:17), sa tosina mai ai vasega 'ese'ese uma, ma na fa'amalosia ai o latou fa'amoemoe. Sa matuā lautele le ta'uta'ua o le A'oa'o fou ua o'o i tua atu o 'a'ai o Palesetina, ma e ui i uiga lē taupulea o ta'ita'i, e to'atele ua lagona atonu o Ia lenei o le Fa'aola sa fa'amoemoe i ai. E mat'utia le motu o tagata na vevesi ma femulimulia'i i la'asaga o Iesu.

Ua o'o nei i le taimi e tatau ai ona fa'apotopoto le 'au so'o o lo'o latalata iā Keriso e galulue ma Ia i Lana galuega, mo le tausiga o lenei lalolagi o tagata, ina ia lē fa'apei o mamoe e leai se leoleo mamoe. O isi o nei so'o sa fa'atasi ma Ia mai le amataga o Lana galuega, ma o le tele o le to'asefulu ma le to'alua sa 'au'aumea fa'atasi latou i le aiga o Iesu. Peita'i sa fa'asesē fo'i latou i a'oa'oga a a'oa'o o le malumalu, ma le talitonuga i se malō fa'alelalolagi; e latou te le'i malamalama i fegaoioia'iga a Iesu. Ua fa'alētonu ma popole o latou mafaufau ona e le'i taumafai Ia e fa'aeaina Lona tulaga e ala i le tosina mai o faitaulaga ma a'oa'o ia lagolago Āna fuafuāga, e lē

o faia se mea ia atina'e ai Lana pule ma 'avea o se tupu fa'alelalolagi. Sa mana'omia e faia se galuega tele mo nei so'o ia saunia ai mo le galuega pa'ia o le a 'avea ma o latou tofi pe a afio a'e Iesu i le lagi. E ui ina telegese ona talitonu i o latou loto, a e sa latou talia le alofa o Keriso, ma na Ia silafia i latou e Na te mafai ona a'oa'o ma fa'atonu mo Lana galuega tele. Ua tau tele nei se taimi talu ona latou fa'atasi ma Ia, ma ua tupu lo latou fa'atuatua i le pa'ia o le uiga o Lana galuega, ua talia e tagata le fa'amaoniga o Lona mana ma ua lē fa'afesiligia, ua saunia loa le ala mo le fa'aaogāina o ta'iala o Lona malō ma o le a mafai ai ona latou malamalama i Lona uiga moni.

A o i ai Iesu na o Ia i luga o le mauga e lata i le Sami o Kalilaia, sa tatalo Ia i le pō atoa mo lenei 'au filifilia. i le tafa o ata, sa latou fa'apotopoto ane iā te Ia, ma ina ua mae'a le tatalo ma 'upu fa'atonutonu, sa Ia tu'u Ōna 'a'ao i o latou ūlu ma fa'amanuia atu, ua vavae'ese mai latou mo le galuega o le tala lelei. Sa latou tu'umuli atu ma Ia i 'autafa o le sami, a e ua amata ona potopoto mai le motu o tagata i lenei taimi o le taeao pō.

E le'i na o le motu o tagata e masani ai mai 'a'ai o Kalilaia, a e sa matuā to'atele ē mai Iutaia ma Ierusalemava lava ia; mai Perea, ma tagata fa'apaupau o tala atu o le Ioritana, o Itumaia, o le itu i saute o Iutaia, ma Turo ma Saitonu. "Ina ua latou fa'alogo i ia mea sa Na faia," ua latou "ō mai e fa'alogologo iā te IA, ma ia fa'amalolōina o latou ma'i...auā ua alu ane le mana nai iā te Ia, ua fa'amalolō ai i latou uma" (Mareko 3:8; Luka 6:17, 19).

Ona e vāapiapi le matāfaga o lo'o tumu ai le fa'apotopotoga ma ua leai se avanoa mo ē o fia fa'atasi atu e fa'alogologo, sa ta'ita'i e Iesu le ala aga'i i le itumauga. Ua latou taunu'u i se laulelei e mafai ona potopoto ai le motu o tagata e to'atele, ua nofoia o Ia i le maupu'epu'e ma sa fa'apea fo'i ona faia e Ōna so'o ma le motu o tagata.

Sa nonofo le 'au so'o ua fa'alatalata atu ma si'omia lo latou Ali'i, ua latou lagona ifo peiseā'i e i ai se mea fa'apitoa o le a tupu e lē o masani ai. Mai gaoioiga o le taeao, sa latou talitonu o le a aumaia se fa'aaliga e fa'ataua i le malō ua lata ona Ia fa'atū, e pei ona latou fa'amoemoe i ai.

A o fa'atalitali mo se fetalaiga mai fofoga o le A'oa'o pa'ia, sa fa'atumulia o latou loto i mafauauga o le mamalu o i lumana'i. Sa fa'atasi ai o tusi'upu ma Faresaio o lo'o tepataula'i i le aso o le a mafai ona latou maua ai le pule i luga o le malō o Roma, a e maise le 'oa ma le matagofie o le malō sili o le lalolagi..Ua naunau ē tulaga maulalo ma le 'au faifaiva ia fa'alogo i le ta'utinoga manino i le taimi e o'o mai ai aso lelei ma le faigofie, o le a lē toe ōi i le leai o se mea'ai, se olaga galue e leai se malolō, ma le tele o mana'oga e lē taunu'u. Ua latou naunauta'i ia avatu e Keriso la'e'i tautele a o latou fili, e suia ai o latou 'ie palapalā ma le tālatala.

Sa fa'atumulia o latou loto i le fa'amoemoe o le a fa'amamaluina Isara'elu, lē na filifilia e le Atua, i luma o malō uma, ma o le a fa'aeaina Ierusalemava e 'avea ma ūlu o se malō tauleatulaulau.

Amu'ia ē Loto Maulalo

Lesona 1

O lenei lesona e fa'avae i luga o le Mataio 5:2, 3.

(1) O LE Ā LE ALA SA FA'AAOGĀ SO'O E KERISO E FOFOLA MAI AI A'OA'OGA FA'ALEAGAGA MA MEA LILO O LE LAGI i LE MOTU O TAGATA O LO'O FIA FA'ALOGOLOGO?

Ina ia taunu'u ai o le 'upu a le perofeta, ua fa'a'apea mai, 'Ou te tautala atu i fa'ata'oto, 'Ōu te ta'u atu mea na lilo talu ona fa'avaeina o le lalolagi. Mataio 13:35

O Mau e Tau i ai: Mareko 4:33, 34; Salamo 78:2; Roma 16:25, 26

(2) O LE Ā LE MANATU 'ESE FOU SA TU'U FA'ATASI E KERISO MA SE FOLAFOLAGA NA IA MUA'I AUMAIA i LEA ASO i LUGA O LE MAUGA?

Amu'ia ē loto maulalo; auā e o latou le malō o le lagi. Mataio 5:3

Mau e Tau i ai: Salamo 9:12; 10:17; Fa'ata'oto 29:23; Isaia 57:15

O ni mea e fou ma le 'ese nei 'upu ua fa'alogoia e taliga o le motu tagata. O ia a'oa'oga ua 'ese i mea uma sa latou fa'alogo ai mai faitaulaga ma a'oa'o o le malumalu. Peita'i o lenei A'oa'o fou ua si'osi'omia e se mana ma ua tosina mai ai latou iā te Ia. O le alofa fa'a-Atua ua tafe mai ona o Lona fa'atasi ai fa'a'pei o le manogi o se fugāla'au. O Āna fetalaiga e pa'ū mai pei o le "ua i le mutia ua seleseleina, e pei o le timuga e sūsū ai le 'ele'ele" (Salamo 72:6). Sa tatalaina loto o tagata uma iā te Ia, ma a o latou fa'alogologo, sa latou lagona ua fofola mai e le Agaga Pa'ia iā te i latou le uiga o lea a'oa'oga sa mana'omia ia malamalama i ai le aigā tagata o augātupulaga uma.

(3) i LE TATALO A LE FARESAIO, O LE Ā LE 'UPU NA FA'AĀTA MAI AI LE UIGA FA'AFIAAMIOTONU MA A'OA'OGA A TA'ITA'I FA'ALEAGAGA O LE MALŌ i LE TAIMI O KERISO?

Na tula'i le Faresaio, ua tatalo lemū atu i nei 'upu, Le Atua e, 'ou te fa'afetai atu iā te 'Oe, ina ua 'ou lē pei o isi tagata, o ē fao mea, o ē amio leaga, o ē mulilulua, e lē pei o lelā telona fo'i. Luka 18:11

Mau e Tau i ai: Mataio 6:5; Issaia 65:1-5; Esekielu 33:31

I ōna pō o Keriso sa manatu ta'ita'i Iutaia o latou lava ua mau'oa i 'oloa fa'aleagaga. O le tatalo a le Faresaio, "Le Atua e, 'ou te fa'afetai atu iā te Oe, ina ua 'ou lē pei o isi tagata" (Luka 18:11), sa fa'a'ailoa atu ai le lagona a tagata o lana vasega, a e fa'a'apea fo'i le malō atoa.

(4) E PEI O LE TAGATA AO LAFOGA, O LE Ā LE TATALO MAI LE LOTO MA GALUEGA A Ē O LO'O LAGONA MA ILOA LO LATOU MATIVA FA'ALEAGAGA?

O le telona fo'i, ua tū mamao atu, e lē mafaia ona tepa a'e ona mata i le lagi, a ua pōpō lona fatafata, ua fa'a'apea atu, Le Atua e, ia e alofa mai iā te a'u le tagata agasala. Luka 18:13

Mau e Tau i ai: Luka 7:6, 7; Salamo 51:1-3; 40:12; Esera 9:6; Eperu 4:16

I le motu o tagata na fa'atasi ma Iesu sa i ai isi na iloa lo latou mativa fa'aleagaga. Sa fa'aalia le mana fa'aAtua o Keriso ina ua faia le vavega na fa'atele ai i'a, ma na fa'apa'ū ai Peteru i 'a'ao o le Fa'aola, ma fa'a'apea atu, "Le Ali'i e, inā maliu 'ese atu ia Oe iā te a'u, auā o a'u le tagata agasala" (Luka 5:8); sa fa'a'apea ona i ai agaga i le motu o tagata sa fa'apotopoto atu i luga o le mauga, o ē sa lagona Lona uiga mamā ma le ato'atoa, a e iloa lo latou "malaia, ma le pagātia, ma le mativa, ma le tauaso, ma le lē lavalavā" (Fa'aaliga 3:17); ma sa naunauta'i latou mo "le alofa tunoa o le Atua e aumai ai le olataga" (Tito 2:11). O nei agaga sa fafaguina o latou fa'amoemoe i fetalaiga fa'afeiloa'i a Keriso ma sa latou va'aia ua i lalo o fa'amanuiāga a le Atua o latou olaga.

(5) O LE Ā LE LAPATA'IGA UA TU'U MAI E LENEI MAU IĀ i LATOU O LO'O MALOSI LE UIGA MITAMITAVALE MA UA MANATU E LATOU TE LĒ MANA'OMIA SE MEA LAVA E TASI?

E muamua le fa'amaualuga i le malaia; e muamua fo'i le loto fa'asiasia i le paū. Fa'ata'oto 16:18

Mau e Tau i ai: Fa'ata'oto 11:2; 16:5, 19; 17:19; 18:12; 21:4; Salamo 138:6

Sa tu'u atu e Iesu le ipu o fa'amanuiāga i ē na lagona o latou e "mau'oa ma ua fa'atamāo'aigaina" (Fa'aaliga 3:17), ma ua lē mana'omia se mea, a e ua liliu'ese ma le agaga 'a'amu mai le meaalofo e sili le ofoofogia. O le tagata ua lagona o ia lava e ato'atoa, e manatu o ia e lelei, ma e fiasia i lona tulaga o lo'o i ai, o le a lē sa'ili ia tofusua i le alofa tunoa ma le amiotonu o Keriso. O le mimitavale e lagona ai e lē mana'omia lava se mea, ma o le a tapunia le loto iā Keriso ma fa'amanuiāga e lē gata na Ia afiō mai e aumai. O lea o le a leai se avanoa mo Iesu i le loto o se tagata e fa'apea le manatu. O ē manatu ifo lava o latou e mau'oa ma e mamalu, e lē ōle atu ma le fa'atuatua ia maua ai fa'amanuiāga a le Atua. E manatu ifo o latou ua fa'atumulia, ona ō 'ese atu lea a e o lo'o gaogao.

(6) O LE Ā LE FOLAFOLAGA NA FAIA E IESU IĀ i LATOU UA FULITUA MAI LE AGAGA O LE MIMITAVALE i LE FA'AFIAAMIOTONU, A E TALIA LANA ŌFO O LE FA'AMAGALOGA?

Amu'ia le tagata ua fa'amagaloina lona solitulafono, ma ua ufitia lana agasala. Amu'ia le tagata e lē ta'usalaina e Ieova, e leai fo'i se 'ole'olega i lona loto. Salamo 32:1, 2

Mau e Tau i ai: Salamo 1:1, 2; 40:4; Isaia 1:18; Romans 4:6-8

O i latou e iloa e lē mafai e le tagata ona fa'asao ia lava, po o le faia e le tagata lava ia o se mea e ta'uamiotonu ai,, o i latou ia e fiasia ma talia le fesoasoani e mafai ona tu'u mai e Keriso. O latou ia e loto maulalo, o ē sa Ia fa'amanuia.

(7) E FA'APEFEA ONA VA'AI LE TAGATA IĀ TE IA LAVA PE A UA NA ILOA LONA TULAGA FA'ALEAGAGA?

Tou te manatunatu ai i a outou amio uma, ma a outou mea uma na fai, sa leaga ai outou; ona 'ino'ino ai lea o outou iā te outou ona o a outou mea leaga uma ua outou faia. Esekielu 20:43

Mau e Tau i ai: Esekielu 36:31; Levitiko 26:40-42; II Korinito 7:11

O le tagata e fa'amagalo e Keriso, e na te muamua fa'asalamō, a e o le Agaga Pa'ia e fa'atalitonu o ia e agasala. O i latou ua fa'apa'ia loto e ala i le ta'usalaina e le Agaga o le Atua ua iloa e leai se lelei iā i latou lava, ma ua iloa e pau le mea ua latou faia o le ō fa'atasitasi ma le agasala. A e fa'apei o le telona, ua latou tū mamao atu, sa lē mafai ona si'i a'e mata aga'i i le lagi, ma ua tagi atu, "Le Atua e, ia e alofa mai iā te a'u le tagata agasala" (Luka 18:13). E fa'amanuiaina i latou. E i ai le fa'amagaloga mo lē ua salamō; auā o Keriso o "le Tama'i Mamoe a le Atua, na te 'ave'esea le agasala a le lalolagi" (Ioane 1:29). O le folafolaga a le Atua e fa'apea: "E ui lava ina pei o ofu mumū a outou agasala, e sisina ia e pei o le kiona; e ui lava ina mumū ia e pei o le 'ie 'ula'ula, e 'avea e pei o le fulufulu mamoe" (Isaia 1:18). Ma "'Ou te avatu fo'i iā te outou le loto fou....'Ou te tu'uina atu Lo'u Agaga i totonu iā te outou" (Esekielu 36:26, 27).

(8) E FA'APEFEA ONA ILOA OLA FA'ATATAU i LE MALŌ O LE ATUA i LATOU E LOTO MAULALO A O i AI i LENEI LALOLAGI?

Auā o le malo o le Atua, e lē o mea e 'ai ma mea e inu; a o le amiotonu, ma le filemū, ma le 'oli'oli i le Agaga Pa'ia. Roma 14:17

Mau e Tau i ai: Luka 17:20, 21; Mika 6:8; Mataio 19:14; 6:33

Ua fetalai Iesu i lē e loto maulalo, "E o latou le malō o le lagi" (Mataio 5:3). O lenei malō e lē pei ona fa'amoemoe i ai le 'au fa'alologologo a Keriso, se malō fa'alelalolagi e lē tumau. Sa tatala mai e Keriso i tagata le malō fa'aleagaga o Lona alofa, Lona alofa mutimutivale, o Lona amiotonu. O le fu'a o le nofoa'iga a le Mesia e lauiloa ona e fa'apei o le Atali'i o le tagata. O Ōna tagata e loto maulalo, e agamalū, o ē sauāina ona o le amiotonu; e ō latou le malō o le lagi. E ui ina e le'i uma ona fa'ataunu'uina nei, a e ua amata iā i latou le galuega e "saunia ai ia tatau ona tofusua i le tofi o le 'au pa'ia o i le malamalama" (Kolose 1:12).

(9) INA UA ILOA LO TATOU TULAGA MAULALO FA'ALEAGAGA, E FA'APEFEA LE MAFAI ONA TATOU MAUA LE MALŌLŌGA I LE AMIOTONU, O LE MALOSI, MA 'OA O LE ALOFA TUNOA O KERISO?

*Ia outou ō mai iā te A'u, o outou uma o ē tigāina ma mafatia i 'avega, o A'u fo'i e malōlō ai outou. Ia outou amoina La'u amo, ma ia outou fa'aa'oa'o iā te A'u, auā o A'u lē agamalū ma le loto maulalo; ona maua lea e outou o le malōlōga mo outou agaga. **Mataio 11:28, 29***

Mau e Tau i ai: Isaia 45:22; 55:1-3; Ioane 6:37; 7:38; Fa'aaliga 22:17

O i latou uma o lo'o lagona le loloto o le tulaga mativa o le agaga, e lagona e leai lava se lelei o iā i latou, e latou te maua le amiotonu ma le malosi e ala i le tepa iā Iesu. Ua Ia mai ia fa'afesua'i lou tulaga mativa ma 'oa o Lona alofa tunoa. E lē talafeagai lo tatou aogā ma le alofa o le Atua, a e o Keriso o le mea e mautinoa, o Ia e silisili'ese, ma e mafai ona fa'asao i tatou uma e ō mai iā te Ia. Po o ā lava mea sa e faiai taimi ua mavae, po o ā fa'afitauli o le taimi nei e tau fa'avaivai ai, pe a e sau iā Iesu i so'o se tulaga o lo'o e i ai, e mana'omia le fesoasoani, ma ua leai se fa'amoemoe, o le a fa'afeiloa'i mamao atu 'oe e lo tatou Fa'aola tigāalofa, ma o le a fusi 'oe i Ōna 'a'ao alofa ma fa'aofu i Lona la'e'i o le amiotonu.

(10) O LE Ā LE MEA SA FAIA MA LE FIAFIA E KERISO I LUMA O LE TAMĀ MO I TATOU INA UA UMA ONA FESUIA'I LO TATOU TULAGA MATIVA FA'ALEAGAGA MO LONA OFU O LE AMIOTONU?

*O lenei, ia iā te Ia na te mafaia ona leoleo iā te outou ina ne'i pa'u'ū ma tu'uina atu iā te outou ua lē ponā i luma o Lona lava mamalu ma le fiafia tele. **Iuta 1:24***

Mau e Tau i ai: Isaia 41:10; 54:17; Efeso 3:20; 5:27; Ioane 10:29

E Na te tu'u atu tatou i le Tamā a o 'o'ofu i la'e'i papa'e o Lona lava uiga moni. O lo'o fai talosaga Ia mo i tatou i luma o le Atua, e fa'apea, Ua 'Ou 'avea le tulaga o le tagata agasala. Ia e lē silasila i lenei atali'i (afafine) ua sē 'ese, a e ia silasila mai iā te A'u. Pe 'ai'oi leo tele atu Satani mo o tatou agaga, ma tu'ua'ia ua agasala, ma ta'u atu o tatou ua pa'ū i āna mailei, a o le toto o Keriso o lo'o fa'atoga ma se mana e aupito silisili atu.

(11) INA UA ILOA LE TULAGA MAULALO O I AI A UA OLA I 'OA O LE ALOFA TUNOA O KERISO, O LE Ā SA LATOU MOLIMAU?

*E fai mai se tasi, Ua na o Ieova ua 'ou maua ai le amiotonu ma le malosi; e sau o ia iā te Ia; a e mamā i latou uma o ē ua ita iā te Ia. O Ieova e ta'uamiotonuina ai ma mitamita ai le fanau uma a Isara'elu. **Isaia 45:24-25***

Mau e Tau i ai: Isaia 61:10; II Korinito 12:9, 10

A o o'u fa'atasi ma Iesu, faitau Lana Afioga, ma mafaufau loloto i le ato'atoa o Lona uiga, ua ou iloa ai le 'ese'esega o mea e ta'u e le lalolagi o mea fa'aleagaga ma le soifuāga fa'aa'oa'o na soifua ai o Ia.

Li'o le Tali: **Ioe** **Lē Mautonu**

Ou te va'ava'ai atu i le asō ma ua 'ou iloa atu le fa'afiaamiotonu ma uiga mimitavale lava e tasi o lo'o i ai i le to'atele o ē e ta'ua o Kerisiano, e fa'apei lava ona i ai i loto o i latou fo'i i ōna pō o Keriso.

Li'o le Tali: **Ioe** **Lē Mautonu**

E fa'apei o Peteru, ua 'ou va'ai o lo'u lava tulaga o le mativa lea fa'aleagaga. Ou te iloa o a'u e leaga, mativa, tauaso, ma lē lavalavā.

Li'o le Tali: **Ioe** **Lē Mautonu**

O la'u tali e fa'apei fo'i o Peteru, ona tatalo lea, "Ia alu 'ese atu mai iā te a'u, le Ali'i e, auā o a'u o le tagata agasala." A e ia 'ou filifili e tatalo fa'apea, "Le Ali'i e, ia e fa'alatalata mai iā te a'u, ma ia 'ave'ese mai iā te a'u le mimitavale o le fa'afiaamiotonu. Fesoasoani mai ia 'ou lē pei o le Faresaio - ua fiafia i lo'u nei tulaga. Fesoasoani mai ia 'ou pei o 'Oe."

Li'o le Tali: **Ioe** **Lē Mautonu**

Li'o le Tali: **Ioe** **Lē Mautonu**

Tali o Tatalo

[illegible]

Amu'ia ē Fa'anoanoa

Lesona 2

Fa'avae lenei lesona i luga o le Mataio 5:4.

(1) O LE Ā LE MANATU 'ESE LONA LUA MA LE FOLAFOLAGA SA TU'U MAI E KERISO i LENĀ ASO i LUGA O LE MAUGA O FA'AMANUIĀGA?

Amu'ia ē fa'anoanoa, auā e fa'amafanafanaina i latou. Mataio 5:4

Mau e Tau i ai: Salamo 30:7-11; 32:3-5; Ieremia 31:9

O le fa'anoanoāga ua tu'u mai nei o le loto momomo lea ona o le agasala. Ia fetalai Iesu, "O A'u fo'i, afai e si'itia A'u ai le 'ele'ele, 'Ou te tosina uma mai tagata iā te A'u" (Ioane 12:32). Ma a o tosina atu se tasi ia tepa iā Iesu a o si'itia i luga o le satauro, o le a ia malamalama i le tulaga agasala o le aigātagata. Na te iloa ai o le agasala na fa'apuapuagātia ma fa'asatauroina le Ali'i o le mamalu. Ua ia va'aia le alofa e matuā fa'apalepale, a o le va'aiga e faifaiepa, o le fouvale ma le lē fa'afetai o lona olaga. Ua ia fa'agalo lana Uō e aupito sili ma so'onafai le meaalofo e sili ona tāua a le lagi; ua ia fa'asatauro pea lava le Ālo o le Atua ma tu'ia pea le finagalo mafatia. Ua vavae'ese ia mai le Atua e ala i se vanu o le agasala e lautele ma loloto ma e pogisā, ma o lo'o fa'anoanoa lava ia i le mafatia o lo loto.

(2) E FA'APEI O LE TUPU O TAVITA, O LE Ā LE TATALO A i LATOU E Ō MAI i LALO O LE SATAURO MA LE LOTO SALAMŌ, A O LO'O FA'ANOANOA ONA O A LATOU AGASALA?

A o 'Oe le Ali'i e, lo'u Atua, ia e agalelei mai iā te a'u ona o Lou suafa; auā e lelei Lou alofa, ia e lavea'i mai iā te a'u.

Auā o a'u ua puapuagātia ma le mativa, ua manu'a lo'u loto i totonu iā te a'u. Salamo 109:21, 22

Mau e Tau i ai: Salamo 69:29, 30; 51:1-15; 38:18; 40:12

O le fa'anoanoaga lenei o le "a fa'amafanafanaina." E fa'aali mai e le Atua lo tatou solitulafono ina ia tatou ō atu iā Keriso, e Na te fa'asa'oloto i tatou mai le pologa o le agasala, ma fa'afiafia ai i le sa'olotoga a le fanau a le Atua. Pe a salamō moni, o le a tatou ō atu i lalo o le satauro ma tu'u ai a tatou avega uma.

(3) O LE Ā LE MEA NA AFIO MAI KERISO i LE LALOLAGI E TU'U IĀ i LATOU O LO'O FA'ANOANOA ONA O AGASALA?

E tala'i le tausaga e talileleia mai ai e Ieova, ma le aso e tau'i ai ma sui e lo tataou Atua; e fa'amatalaloto i ē fa'anoanoa uma lava; e avatu le fiafia i ē fa'anoanoa i Siona; e foa'aiina atu iā i latou le matagofie e sui a'i le lefulefu, o le u'u o le'oli'oli e sui a'i le fa'anoanoa, o le ofu e fai a'i vi'iga e sui a'i le loto fa'avaivai; e igoa i latou, O La'au o le amiotonu, o le Fa'ato'aga a le Atua, e fai mona vi'iga. Isaia 61:2, 3

Mau e Tau i ai: Isaia 57:18; 25:8; Salamo 30:11; Ieremia 31:13

(4) AISEĀ E FA'ATAGA AI E LE ATUA ONA A'OA'I TATOU i ISI TAIMI MA LE FA'ANOANOĀGA E O'O MAI PE A TOFOTOFOINA LO TATOU FA'ATUATUA?

Auā o i latou na a'oa'i mai iā i tatou i nai aso itiiti i lo latou faitalia; peita'i ane o Ia, ua a'oa'i mai o Ia e aogā iā i tatou, ina ia tofusua i tatou i Lana amio lelei. Eperu 12:10

Mau e Tau i ai: Eperu 12:11; i Peteru 4:12; Fa'ata'oto 17:3; Isaia 48:10, 11; Ieremia 9:7

O fetalaiaga a le Fa'aola e i ai le fe'au fa'amafanafana mo i latou fo'i o lo'o mafatia i puapuagā po o le loto fa'avauvau. E lē oso a'e mai le 'ele'ele o tatou fa'anoanoāga. O le Atua "E lē fiafia o Ia ona fa'apuapuagāina pe fa'atigāina tagata" (Auēga 3:33). Pe a Ia fa'ataga tofotofoga ma mafatiāga, e aumai "e aogā iā i tatou, ina ia tofusua i tatou i Lana amio lelei" (Eperu

12:10). Pe a talia ma le fa'atuatua, o tofotofoga atonu e foliga mai e faigatā ma mamafa, o le a 'avea ma fa'amanuiāga. O le tui tigā e fa'amalaiaina ai le lalolagi o le a 'avea o se ala e tatou te tepataula'i ai i le lagi. E to'afia i latou semanū o le a lē iloa Iesu pe ana lē o'o mai fa'anoanoāga ma ta'ita'iina ai i latou e sa'ili se fa'amafanafanaga mai iā te Ia!

(5) PE A O'O MAI TOFOTOFOGA MATA'UTIA, O LE Ā LE MEA O LO'O TOFOTOFOINA; MA PE AFAI E TATOU TE FA'ATAGAINA, O LE Ā LE I'UGA O LE A O'O i AI?

O le tofotofoga fo'i o lo outou fa'atuatua, e silisili ona aogā i le auro e fa'aumatia, e ui lava ina tofotofoina i le afi, e 'avea ma mea e i'u i le vi'iga, ma le mamalu, ma le manuia pe a fa'aalia mai Iesu Keriso. I Peteru 1:7

Mau e Tau i ai: Iopu 23:10; Salamo 66:10-12; Sakaria 13:9; Malaki 3:3; Roma 5:3, 4; Iakopo 1:3, 4, 12

O tofotofoga o le olaga o mea faigaluega ia a le Atua, e 'ave 'esea 'ele'elea ma mea gaoā mai o tatou amioga. O se fa'agaoioiga e tigā le tipi i lalo, tofitofi, fisifisi, fa'asa'osa'o, fufulu ma fa'a'i'ila; e faigatā ona fa'amafola i lalo e le ma'aooloolo. Peita'i, a saunia lenei ma'a o le a fa'aofi lelei i lona tulaga i le malumalu i le lagi, auā e lē faia ma le fa'aeteete se galuega i se mea e lē aogā. E na o Āna ma'a tāua o le a fa'amamā ma saunia lelei e talitutusa ma le maota i lugā.

(6) O LE Ā LE FOLAFOLAGA MO i TATOU PE A TEPATAULA'I LA TATOU VA'AI O LE FA'ATUATUA i LUGA O KERISO?

E te leoleoina ia fīfilemū lava lē ua mausalī lona loto; auā ua ia fa'atuatua iā te 'Oe. Isaia 26:3

Mau e Tau i ai: Salamo 9:10; 36:7; 40:4; 59:15, 16; Nauma 1:7; Fa'ata'oto 3:5, 6; 29:25; 30:5

O le a galue le Ali'i mo i latou uma e fa'atuatua iā te Ia, ma o le a fa'aopoopo manumalō mo le 'au fa'atuatua. O le a maua a'oa'oga tāua; o le a iloa fa'atinoga aogā.

(7) PE A TATOU Ō MAI i LE ATUA MA LE LOTO SALAMŌ. MA LE MAFAUFAU UA TIGĀ ONA O LE AGASALA, O LE Ā LE FOLAFOLAGA E MAFAI ONA TATOU TAPA i AI?

Ua latalata mai Ieove i ē ua loto momomo; ua Ia fa'aola fo'i i ē ua loto nutimomoia. Salamo 34:18

Mau e Tau i ai: Salamo 51:17; Isaia 57:15; II Korinito 7:10

E lē fa'agaloina e lo tatou Tamā i le lagi i latou sa pā'ia e fa'anoanoāga. Ina ua alu a'e Tavita i luga o le Mauga o Olive, ua "alu a'e ma tagi, ma lona ulu ua ufitia; ua alu a'e lava o ia ua lē fa'ase'evaeina" (II Samuelu 15:30), na silasila ifo ma le tigāalofa le Ali'i iā te ia. Sa ofu Tavita i se 'ietalatala, ma sa fa'apuapuagātia o ia e lona lotofuatiaifo. O nei fa'ailoga o lona fa'amaulalo sa fa'aalia ai lona loto salamō. Sa ia tagi ma tu'u atu i le Atua lana matā'upu, ma e le'i tu'ulafoa'ia e Ia Lana 'au'auna. E le'i i ai se taimi na aupito pele ai Tavita i le finagalo o le Atua alofa e pei o lea na sola'ese ai mai ōna fili, ina ua fa'avevesi le fouvalega e lona ia lava atali'i. Ua fetalai le Ali'i, "'Ou te 'ai'oi atu ma sasa iā i latou uma 'Ou te alofa i ai; o lenei ia e vilivilita'i ma ia e salamō" (Fa'aaliga 3:19). E si'itia i luga e Keriso le loto salamō, ma fa'aleleia le agaga fa'anoanoa se'ia o'o ina 'avea ma Ōna afio'aga.

(8) PE A FA'ATASI KERISO MA i TATOU, E FA'APEFEA ONA TATOU TALI ATU i LE TOFOTOFOINA O LO TATOU FA'ATUATUA E ALA MAI TOFOTOFOGA, O MEA FAIGATĀ, PO O ĀNA A'OA'IGA?

O'u uso e, ia outou manatu, o le mea e fialia tele ai pe a maua outou i tofotofoga 'ese'ese; ina ua outou iloa o le tofotofoina o lo outou fa'atuatua e tupu ai le onosa'i. Iakopo 1:2, 3

Mau e Tau i ai: II Korinito 12:9, 10; Eperu 12:1-12; Roma 5:3, 4

Pe a o'o mai tofotofoga i o tatou luga, mata e to'afia i tatou o le a pei o Iakopo! Tatou te manatu o le lima o le fili ua o'o mai; ma ua tatou fa'asagatau ma le tauaso i ai se'ia uma lo tatou malosī, a e tatou te lē maua ai lava se filemū po o se fa'amafanafanaga. Ina ua pā'ia Iakopo e le lagi a ua tafa mai ata o le aso, sa fa'aalia ai Lē na la fa'afeagai - o le Agelu o le feagaiga. Sa tagi o ia ma mana'omia le fesoasoani, ma ua fa'apa'ū i le fatafata o Lē alofa e lē mavae ina ia maua le fa'amanuiāga sa naunau i ai lona agaga. E mana'omia ia tatou iloa e aogā tofotofoga, ma ia lē manatu fa'atauva'a i a'oa'iga a le Ali'i pe fa'avaivai ai.

(9) PE A TATOU LAVATIA MA LE ONOSA'I MA LE LOTO MAULALO A'OA'IGA A LE ALI'I, O LE Ā LE FA'AI'UGA O LE A TATOU MAUA?

Fa'auta mai, amu'ia le tagata ua a'oa'iina e le Atua; o le mea lea 'aia e te ta'ufa'atauva'aina ai a'oa'iga a Lē ōna le malosi uma lava. Iopu 5:17

Mau e Tau i ai: Iopu 5:17-19; Eperu 12:5-11; Fa'ata'oto 3:11; Iakopo 5:11; Fa'aaliga 3:19

"Amu'ia le tagata e a'oa'iina e le Atua....O Ia na te fa'atigāina, o Ia fo'i na te fusia; o Ia e manu'a ai, o Ōna 'a'ao fo'i e fofō ai. E lavea'i mai o Ia iā te 'oe i puapuagā e ono, o lona fitu lava e lē papa'i atu se leaga iā te 'oe" (Iopu 5:17-19). So'o se tasi ua taia, na afio mai Keriso ma le galuega o le fa'amalōlō. Atonu o le a fa'amalamalamaina, e ala i le pupula o Lona fa'atasi ai le olaga o ē fa'anoanoa, puapuagātia, ma mafatia.

(10) O LE Ā LE FOLAFOLAGA OFOFOGIA E MAFAI ONA TATOU TAPA i AI i LE FA'ATUATUA, PE A O TATOU FA'ANOANO MA FA'AVAUVAU ONA O LE AGASALA?

E tele lava mea leaga e o'o i lē ua amiotonu; a e lavea'iina o ia e le Atua ai ia mea uma. Salamo 34:19

Mau e Tau i ai: Fa'ata'oto 24:16; Ioane 16:33; II Timoteo 3:11, 12

E lē finagalo le Atua ia fa'asoesā pea le loto fa'anoanoa ma le tigā, a e ia tatou ea i luga ma tepa a'e i Ōna fofoga alofa. E tū pea le Fa'aola i tafatafa o le to'atele o lo'o fa'atauasoina o latou mata e loimata ma ua latou lē iloa atu ai Ia. O lo'o naunau o Ia e tatou te 'a'apa atu ma u'umau i Ōna 'a'ao, ia tatou tepa a'e iā te Ia ma se fa'atuatua e faigofie, ma fa'alagolago i Lana ta'ita'iga. O lo'o tatala mai pea Lona Agaga i a tatou fa'anoanoāga, tatou tigā, ma tatou tofotofoga; ua alofa mai Ia mo i tatou ma se alofa e lē gata, ma le alofa fa'apalepale ua si'omia i tatou. Ia tumau o tatou loto iā te Ia ma manatunatu loloto i Lona alofa fa'apalepale i aso uma lava. O le a Ia si'itia le agaga i luga a'e o fa'anoanoāga ma fa'afitauli ia maua ai le filemū.

Ia tatou mafaufau i lenei mea ma fa'afiafiaina ai i le fa'amoemoe. "O lenei fo'i le manumalō e manumalō ai i le lalolagi, o lo tatou fa'atuatua lava" (I Ioane 5:4).

(11) PE A TATOU MAUA LE FA'AMAFANAFANAGA IĀ KERISO MAI LE LOTO FA'ANOANO ONA O A TATOU AGASALA, A E PEI O MOSE, MO AI O LE A TATOU TATALO LĒ FA'APITO AI MA FAI TATOU MA SUI FA'AFAUTUA?

Na 'ou 'ai'oi atu ai iā Ieova, ua fa'apea atu, Le Ali'i e, 'aia e te fa'aumatia Lou nu'u ma Lou tofi na e lavea'iina i Lou mana, ua e aumaia fo'i nai Aikupito i le 'a'ao malosi. Teuterenome 9:26

Mau e Tau i ai: Teuterenome 9:24, 25; II Nofoa'iga Tupu 30:18-20; Kenese 18:31, 32; i Samuelu 15:11; Tanielu 9:4-19

Amu'ia fo'i i latou o ē o lo'o tagi ma Iesu i le tigāalofa ona o le lalolagi fa'anoanoa, ma fa'anoanoāga ona o āna agasala, a e lē o manatu fa'apito iā te ia lava. O Iesu o le Tagata Fa'anoanoa, sa tumau Lona Agaga mafatia e le'i i ai se gagana e mafai ona fa'amatalaina. Sa manu'a Lona agaga ona o solitulafono a tagata. Na matuā galue ma le ma'elegā o Ia ina ia fa'amāmā 'avega ma tigā a le fanau a tagata; ma sa mamafa Lona finagalo i le fa'anoanoa a o silasila atu i le motu o tagata o lo'o liliu'ese mai iā te Ia ma te'ena ai le ola e fa'avavau. O le a tofusua lenei manu'a e i latou uma e mulimuli iā Keriso. E fa'asoa i latou i Lona alofa a o ulu atu ma Ia i Ōna puapuagā mo le fa'asaoina o agaga na lēiloa. Latou te tofusua i mafatiāga o Keriso, ma e tofusua fo'i i le mamalu o le a fa'aalia. E tasi ma Ia i Lana galuega, e feinu ma Ia i le ipu o fa'anoanoāga, a e tofusua fo'i i Lana fiafia.

(12) O LE Ā LA TATOU TIUTE TAU'AVE E FAIA INA UA MAUA LE FA'AMAFANAFANAGA MAI LE ATUA ONA UA TE'A'ESE LE FA'ANOANO MAI A TATOU AGASALA?

Ia fa'amanuiaina le Atua, o le Tamā o lo tatou Ali'i o Iesu Keriso, o le Tamā e Ōna le alofa mutimutivale, o le Atua fo'i e Āna le fa'amafanafanaga uma; o Lē na te fa'amafanafanaina mai iā te i matou i lo matou puapuagā uma lava, ina ia matou mafaia ona fa'amafanafana atu iā te i latou ua maua i se tasi lava puapuagā, i le fa'amafanafanaga ua fa'amafanafanaina ai i matou e le Atua. II Korinito 1:3, 4

Sa maua e Iesu le galuega e aumaia le mapusaga, e ala i mafatiāga. Na fa'atigāina o Ia i mafatiāga uma a le aigā tagata (Isaia 63:9), ma "Ua tigāina o Ia ina o tofotofoina, o le mea lea ua mafai ai o Ia ona fesoasoani i ē ua tofotofoina" (Eperu 2:18). i lenei galuega e manuia agaga uma ua ulu atu i le mafutaga e tofusia fa'atasi ai i Ōna puapuagā. "Auā pei ona tele iā i matou o tigā ona o Keriso, ua fa'aapea fo'i ona tel o le fa'amafanafanaga o i matou e Keriso" (II Korinito 1:5). E i ai le alofa e fa'apitoa a le Ali'i mo lē fa'anoanoa, ma o lona mana e fa'aliua loto, e tosina mai ai agaga iā te Ia. O Lona alofa e fa'amatala ai se ala i totonu o le agaga ua fa'amanu'aina ma tigā, ma 'avea o se vaila'au fa'amalōlō iā i latou o lo'o fa'anoanoa. "O le Tamā e Ōna le alofa mutimutivale, o le Atua fo'i e Āna le fa'amafanafanaga uma;..Na te fa'amafanafanaina mai iā te i matou i lo matou puapuagā uma lava, ina ia mafaia ona fa'amafanafana atu iā te i latou ua maua i se tasi lava puapuagā, i le fa'amafanafanaga ua fa'amafanafanaina ai i matou e le Atua" (II Korinito 1:3, 4).

Li'o le Tali: **Ioe** **Lē Mautonu**

Tali o Tatalo

[illegible]

Amu'ia ē Agamalū

Lesona 3

E fa'avae lenei a'oa'oga i le Mataio 5:5.

(1) O LE Ā LE MANATU 'ESE LONA TOLU MA LE FOLAFOLAGA NA TU'U MAI E KERISO I LEA ASO I LUGA O LE "MAUGA O FA'AMANUIĀGA?"

Amu'ia ē agamalū, auā e fai mo latou tofi le nu'u. Mataio 5:5

Mau e tau i ai: Salamo 25:9; 69:32; 147:6; 149:4; Isaia 11:4; 29:19.

Mai nei Fa'amanuiāga o lo'o tu'u mai ai fa'agaoioiga ua masani ai le tagata Kerisiano. O i latou e manatu o lo'o mana'omia e Keriso, o i latou e fa'anoanoa ona o le agasala ma sa fa'atasi ma Keriso i le a'oga o mafatiāga, o le a iloa le agamalū mai le A'oa'o Sili mai le lagi.

(2) E FA'APEFEA ONA FA'AMATALAINA MOSE E LE TUSI PA'IA?

Na matuā agamalū lava le tagata nei o Mose, e sili lava i tagata uma o i le lalolagi. Numerā 12:3

E lē o ni uiga sa fa'atāuaina e Iutaia ma ē fa'apaupau le onosa'i ma le fa'apalepale. O 'upu sa tautala ai Mose e ala mai le una'iga a le Agaga Pa'ia, sa fa'apea ai o ia o le tagata e aupito agamalū i le lalolagi, sa lē fa'atauiaina lava e tagata o lona taimi o se vi'iga; peita'i na fa'apea o se 'upu e faia fa'atauemu pe amusia ai. A e sa fa'amuumua e Iesu le agamalū o se mea e mana'omia mo Lona malō. Sa fa'aalia le matagofie o lenei meaalofo tāua i Lona soifuāga ma Lona uiga.

(3) E FA'APEFEA ONA FA'AMATALAINA E LENEI FUAI'UPU LE UIGA MONI O KERISO?

Ia outou amoina La'u amo, ma ia outou fa'aa'oa'oa'ia te A'u, auā o A'u lē agamalū ma le loto maulalo; ona maua lea e outou o le malōlōga mo outou agaga. Mataio 11:29

Mau e tau i ai: Luka 22:26, 27; II Korinito 10:1; Isaia 53:2, 3

O Iesu, le pupula o le mamalu o le Tamā, "e le'i manatu Ia o se mea faoa ina ia tusa lava o Ia ma le Atua; a ua fa'amaulalo e Ia ia te Ia, ua uiga o Ia fa'atasi ma le pologa" (Filipi 2:6, 7). I gaoioiga fa'atauva'a o le olaga sa malie o Ia e fa'ataunu'u, na femalaga'ai ma le fanau a tagata, e lē o se tupu e fa'aaloalogia, a e pei o se 'au'auna e galue mo isi. E le'i iā te Ia se uiga fa'ailoga tagata pe fa'asausili. Sa i le Fa'aola o le lalolagi se uiga moni e aupito sili i lo agelu, a e ina ua tu'u fa'atasi le mamalu o Lona itu Atua ma le agamalū ma le loto maulalo, sa tosina mai ai tagata uma iā te Ia.

(4) SA FA'APEFEA ONA FA'AALIA PEA E KERISO, LO TATOU FA'AA'OA'O, I LONA AGAMALŪ MA LE LOTOMAU LALO, LE TU'U ATU ATOA O LONA FINAGALO I LE TAMĀ?

O Ia fo'i ua 'auina mai A'u o lo'o ia te A'u Ia; e lē tu'ua A'u e to'atasi e le Tamā, auā 'Ou te faia pea lava o mea e lelei ia te Ia. Ioane 8:29

Mau e tau i ai: Ioane 4:34; 5:30; 6:38; 14:31

Sa tū Iesu ua na o Ia lava, ma e le'i i ai se loto fa'apito na fa'aali a'e i mea uma sa Ia faia; na Ia faia mea uma e fa'atatau i le finagalo o Lona Tamā. Ina ua lata i le fa'ai'uga o Lana galuega i le lalolagi, sa Ia fa'apea mai ai loa, "Ua 'Ou tu'u atu le vi'iga iā te 'Oe i le lalolagi; ua 'Ou fa'aumaina le galuega na e tu'uina mai iā te A'u 'Ou te faia" (Ioane 17:4).

(5) A O FA'ASOLO E TATOU TE TAU'AVE LE AMO A KERISO I O TATOU LUGA, O LE Ā LE MEA O LO'O IA NAUNAU E TATOU TE A'OA'OINA?

Ia outou amoina La'u amo, ma ia outou fa'aa'oa'oa'ia te A'u, auā o A'u lē agamalū ma le loto maulalo; ona maua lea e outou o le malōlōga mo outou agaga. Mataio 11:29

Mau e tau i ai: Ioane 13:15-17; Filipi 2:3; Roma 15:1-6

Ma o lo'o Ia fa'atonu mai i tatou, "Ia outou fa'aa'oa' o ia te A'u, auā o A'u lē agamalū ma le loto maulalo" (Mataio 11:29). Ma "Ai se tasi e fia mulimuli mai iā te A'u, 'aia ne'i usiusitai o ia iā te ia" (Mataio 16:24); ia lepeti le nofoa'iga o le loto fa'apito i le tagata lava ia ma ia lē toe i ai le agaga fia sili.

(6) ONA O LO'O FETAUA'I PEA LE UIGA FA'ALETAGATA IA MATUĀ SILISILI'ESE LE MAUALUGA, A E FA'APEI O LE APOSETOLO O PAULO, O LE Ā LE MEA E TATAU ONA TATOU FILIFILI MA FAIA A E LE'I MAFAI ONA TATOU FA'ATINOINA LE AGAMALŪ MONI O KERISO I O TATOU OLAGA?

Ua fa'asatauroina fa'atasi i maua ma Keriso; a e 'ou te lē toe ola a'u, a o Keriso o lo'o ola i totonu ia te a'u; o le ola fo'i 'ou te ola ai nei i le tino, 'ou te ola ai lava i le fa'atuatua i le Ālo o le Atua, o Lē na alofa mai ia te a'u, ma foa'iina mai o Ia e Ia e fai mo'u sui. Kalatia 2:20

Mau e tau i ai: Kalatia 5:24; Roma 6:6; Kolose 2:13; 3:3, 4

O lē e tepa iā Keriso i Lona te'ena o Ia lava, i Lona uiga fa'amaulalo, o le a fa'apea mai, e pei o Tanielu, ina ua ia va'aia le Tasi e pei o atali'i o tagata, "ua mavae lo'u matagofie, ua 'ou pulavale, ua leai lava se malosi ua toe ia te a'u" (Tanielu 10:8). O le loto fa'amauluga ma le fiasa'oloto e fa'amamaluina ai le tagata, a e a va'aia lo latou uiga leaga moni e iloa ai o fa'ailoga lava ia a 'au'auna a Satani.

O le uiga fa'aletagata e taumafai pea ia fa'alialia, e sauni ai mo se tauvāga; a e o lē e iloa Keriso ua tu'u 'ese lona manatu mo ia lava, le mimitavale, le loto fa'amauluga, ma e i ai le filemū i le agaga. O le loto fa'apito ua 'ave'ese e le Agaga Pa'ia, ma ua lē toe popole ia aupito sili le mauualuga o le tulaga. Tatou te lē mana'omia ia iloa mai tatou i totonu o le motu o tagata; a e ua lagona e mauualuga lo tatou tulaga i lalo o 'a'ao o lo tatou Fa'aola. Ia tatou tepa iā Iesu, ia fa'atalitali mo le ta'ita'iga a Ōna 'a'ao, ia fa'alologologo mo le ta'iala mai Lona si'ufofoga. Sa fa'apea gaoioiga i le olaga o le aposetolo o Paulo, ma ua fa'apea ai ia, "Ua fa'asatauroina fa'atasi i maua ma Keriso; a e 'ou te lē toe ola a'u, a o Keriso o lo'o ola i totonu iā te a'u; o le ola fo'i 'ou te ola ai nei i le tino, 'ou te ola ai lava i le fa'atuatua i le Ālo o le Atua, o Lē na alofa mai ia te a'u, ma foa'iina mai o Ia e Ia e fai mo'u sui" (Kalatia 2:20).

(7) A FA'ASATAUROINA LOA LO TATOU LAVA TAGATA A E FA'ATUMAU PEA LE VA'AI IĀ KERISO, O LE Ā LE I'UGA O LE A MAUA?

E te leoleoina ia filemū lava lē ua mausalī lona loto; auā ua ia fa'atuatua ia te 'Oe. Isaia 26:3

Mau e tau i ai: Filipi 4:6, 7; Salamo 85:8; Ioane 14:27; 16:33; Roma 5:1

Pe a tatou talia Keriso o se malō e mau i le agaga, o le a tumau "le manuia fo'i mai le Atua, o lo'o silisili lava i mea uma e manatu i ai, e leoleoina ai o outou loto atoa ma o outou mafaufau ia Keriso Iesu" (Filipi 4:7). O le soifuāga o le Fa'aola i e lalolagi, e ui ina i ai o Ia i taimi o fa'afitauli, o se soifuāga filemū. A o taumafai pea Ōna fili e tau tuliloa ma fa'amailei o Ia, a e sa Ia fetalai mai, "O Ia fo'i ua 'auina mai A'u o lo'o iā te A'u Ia; e lē tu'ua A'u e to'atasi e le Tamā, auā 'Ou te faia pea lava o mea e lelei iā te Ia" (Ioane 8:29). Sa le'i mafai e fa'asoesā fa'aletagata ma mailei fa'aSatani ona fa'avevesi le malū o lea so'otaga ma le Atua. Ma ua Ia fa'apea mai iā i tatou, "'Ou te tu'uina atu iā te outou le manuia; o Lo'u manuia 'Ou te avatu ai ia te outou" (Ioane 14:27), ma "Ia outou amoina La'u amo, ma ia outou fa'aa'oa' o ia te A'u, auā o A'u lē agamalū ma le loto maulalo; ona maua lea e outou o le malōlōga mo outou agaga" (Mataio 11:29). Ia tatou tau'ave ma Ia le amo o le galuega mo le mamalu o le Atua ma le fa'aeaina o le aigā tagata, ona tatou iloa lea e faigofie le amo ma e māmā le avega.

(8) O LE Ā LE MEA E TATAU ONA TATOU FAIA PEA IA LĒ MAFAI AI ONA EA A'E I LUGA LE ALOFA FA'APITO MO LE TAGATA LAVA IA MA FA'AUMATIA AI LE OLAGA FILEMŪ?

O lenei, ia outou fusi a'e i sulugātiti o outou mafaufau, ia fa'autauta, ia ato'atoa ona fa'amoemoe, i le alofa tunoa e molia mai ia te outou pe a fa'aalia mai Iesu Keriso. I Peteru 1:13

Mau e tau i ai: Eperu 12:1, 2; Isaia 45:22; Iuta 1:21; Kolose 3:2

O le alofa fa'apito o le tagata iā te ia lava e fa'aumatiaina lo tatou filemū. Pe a o ola pea lea loto fa'apito, o le a puipuia pea tatou mai le fa'alumaina ma le fa'atigā loto; peita'i pe a tatou oti, ma ua fa'alilo o tatou olaga iā Keriso, o le a tatou lē

tu'uloto le lē amana'ia po o le lē manatua; o le a lē toe lagona ni faitioga ma lē toe va'aia uiga lē fa'aaloalo ma le fa'asausili. "E onosa'i le alofa, e agamalū, e lē losilosilosi le alofa, e lē mitamita vale le alofa, e lē fa'afefeteina; e lē amio matagā, e lē sa'ilia e ia ana lava mea, e lē fa'aitaitagofie, e lē tu'uina atu i nisi le leaga, e lē fiafia i le amio leaga, a e fiafia i le fa'amaoni, e ufiufi i mea uma, e talitonu i mea uma, e fa'amoemoe i mea uma, e onosa'i i mea uma. E lē uma le alofa" (I Korinito 13:4-8).

(9) O LE Ā LE FAUTUA MAI LENEI FUAI'UPU O LE A AUMAIA LE FIAFIA MONI E TUMAU PE A MULIMULI I AI?

A ia outou mua'i sa'ili le malō o le Atua ma Lana amiotonu; ona fa'aopoopoina atu lea o ia mea uma ia te outou. Mataio 6:33

Mau e tau i ai: Fa'ata'oto 3:9, 10; Ioane 6:27; I Tupu 3:11-13

O le fiafia e pogai mai mea fa'alelalolagi e fesuisuia'i i tulaga 'ese'ese e mafai ona maua mai ai; a o le filemū a Keriso o se filemū e tumau ma e lē mafai ona motusia. E lē fa'alagolago i tulaga o le olaga, o le tele o 'oa fa'alelalolagi, po o le to'atele o uō i le lalolagi. O Keriso o le puna o le vai ola, ma o le fiafia mai iā te Ia e lē mafai ona lē manuia.

(10) O LE Ā LE FA'ATINOGA MANINO O LE AGAMALŪ SA FA'AMATALAINA I LENEI FUAI'UPU, E SI'ITIA A'E AI LE TULAGA O LE FILEMŪ MA LE LĒ GAOIĀ I LE SI'OSI'OMAGA?

O le tali filemū e liliu'eseina ai le ita; a o le 'upu fa'atigā e tupu ai le ita. Fa'ata'oto 15:1

Mau e tau i ai: Fa'ata'oto 10:12

O le agamalū o Keriso, a fa'atinoina i le aiga, o le a fa'afiafiaina ai tagata o le aiga atoa; e lē fa'atupu misa, e lē tali mai i 'upu ita, peita'i e fa'amālū i le loto ua fa'atigā ma aumai se uiga tusa'afia i le li'o. So'o se mea pe a teuiloto lea uiga, o le a 'avea ai aiga o le lalolagi o se vaega o le aiga tele o lo'o i lugā i le lagi.

(11) E FA'APEFEA ONA TALI ATU LATOU UA FA'ATUMULIA E LE AGAMALŪ O LE AGAGA O KERISO PE A O SAUĀINA, A E LĒ O LE TAU MA SUI?

O lenei, a matelāina lē ua ita mai ia te 'oe, fafaga ia te ia; a fia inu ia avatu ia te ia e inu ai; auā o le amio fa'apea e fa'afaupe'e ai malala ola i luga i lona ulu. Roma 12:20

Mau e tau i ai: Roma 12:19; Fa'ata'oto 25:22; Eperu 10:30; Efeso 4:2; Kolose 3:12

E sili mamao atu le mafatia o i tatou ona ua tu'ua'i sesē i lo o le tu'u i o tatou lava luga le tigā o le tau ma sui i o tatou fili. O le faitaga'i ma le tau ma le sui sa amata e Satani, ma o ē tu'ulotoina, e na o le leaga o le a mafai ona maua mai ai. O le loto maulalo, o le agamalū lea o le fua o le tumau iā Keriso, o le mealilo moni o fa'amanuiāga. "E fa'amatagofie e Ia i le olataga ē ua agamalū" (Salamo 149:4).

(12) O LE Ā LE FOLAFOLAGA OFOFOGIA MAI IĀ KERISO SA TOE FA'AMAMAFAINA E LE TUPU O TAVITA, MA O LE A FA'AMANUIA AI I LATOU O Ē MULIMULI IĀ KERISO MA LE AGAMALŪ MA Ē TU'U ATU ATOA I LATOU IĀ TE IA?

A o ē agamalū, e fai mo latou le nu'u; e fa'afiafia fo'i i latou ia te i latou ona o le manuia e tele. Salamo 37:11

Ma e tau i ai: Salamo 25:9; 69:32; Isaia 29:19; Sefana'ia 2:3

O ē agamalū "e fai mo latou le nu'u" (Salamo 37:11). O le naunauta'iga e si'i maualuga ia fa'aeaina le tagata lava ia, o le pogai na ulu mai ai le agasala i le lalolagi, ma 'ave'esea ai mai o tatou ulua'i mātua le pule'aga o le lalolagi matagofie, lo la malō. E ala i le tu'u'esea e Keriso o mea uma, na Ia toe fa'asao mea sa lēiloa. Ma na Ia fetalai mai ia tatou manumalō fa'apei ona Ia faia. "O lē manumalo 'Ou te avatua iā te ia ma te nonofo fa'atasi ma A'u i Lo'u nofoāli'i, e pei o A'u fo'i ona 'Ou manumalō" (Fa'aaliga 3:21). E ala i le loto maulalo ma tu'u atu ato'atoa o i tatou, o le a mafai ona 'avea tatou ma sulī fa'atasi ma Ia, ma "o ē agamalū e fai mo latou le nu'u."

O le a lē fa'apenei le lalolagi o lo'o folafola mo ē agamalū, e pogisā ma fa'amālumālu e le oti ma le fetu'u. "E fa'atalitali i tatou i le lagi fou ma le lalolagi fou, pei o Lana na folafola mai, e mau ai le amiotonu" (II Peteru 3:13). Ma "E leai fo'i se toe fa'afano e tasi; e i ai fo'i le nofoāli'i o le Atua ma le Tama'i Mamoe, o Āna 'au'auna fo'i latou te 'au'auna ia te Ia" (Fa'aaliga 22:3).

(13) O LE FA'ATAUNU'UGA O LE Ā LE FOLAFOLAGA E MAFAI ONA TEPA TAULA'I I AI Ē AGAMALŪ I LE LALOLAGI FOU?

E sōloi'esea fo'i e le Atua loimata uma i o latou mata; e leai fo'i se toe oti, po o se fa'anoanoa, po o se auē, e leai fo'i se toe puapuagā; auā ua mavae atu mea muamua. Fa'aaliga 21:4

Mau e tau i ai: Fa'aaliga 7:17; Isaia 25:8; 30:19; 35:10; 61:3

O le a leai se tulaga e lē atofaina, leai se fa'anoanoa, leai se isi e fa'apea, o a'u ua ma'i; lē toe i ai solo mo tanuga, leai se fa'avauvau, leai se oti, leai se toe fa'atofā, leai se loto momomo; a e o le a fa'atasi ai Iesu, ma o le a i ai le filemū. I lea nofoāga, "Latou te lē fia 'a'ai, latou te lē fia inu fo'i; e lē ogotia i latou i le vevela po o le lā; auā o Lē ua alofa iā i latou, na te ave iā te i latou, na te ta'ita'iina fo'i i latou i vaipuna" (Isaia 49:10).

'Ou te matuā fa'afetai i lo'u Ali'i ma le Fa'aola o Iesu, o Lē sa filifili e faimalaga ma i tatou i Lona itū tagata; e le'i 'avea ma tupu ina ia fa'aalologia ai, a e pei o se pologa i le galuega e 'au'auna ai ma le fa'amaulalo mo isi.

Li'o le Tali: **Ioe** **Lē Mautonu**

'Ou te iloa o le alofa fa'apito mo le tagata lava ia e fa'aumatia ai le filemū, ma a o ola pea lea uiga fa'apito'ou te tū pea ia puipuiā ai mai 'upu fa'atigā; peita'i ona o lo'u olaga sa lilo iā Keriso, pe a 'ou oti o le a 'ou lē lagona faitioga, tauaso i tauemuga, ma liliu'ese mai'upu faifai. Le Ali'i e, fa'amolemole ia faia lenei mea iā te a'u i le asō!

Li'o le Tali: **Ioe** **Lē Mautonu**

'Ou te fa'afetai ua a'oa'o tatou e Keriso e ala mai Āna afioga ma fa'ata'ita'iga, e fa'apea o le fiafia moni e maua lea pe a tu'u'ese atoa le manatu fa'apito ma le fia fa'amaualuga a e talia le finagalo o le Atua, ma ia ala i se olaga e agamalū mo le lelei o isi.

Li'o le Tali: **Ioe** **Lē Mautonu**

O la'u tatalo\ia mafia ona a'oa'oina a'u i aso ta'itasi, e ala i le alofa tunoa o le Atua, ina ia fa'atagaina le Agaga Pa'ia e fa'asatauro lo'u uiga fa'aletino. 'Ou te mana'omia e fa'atagaina Keriso e afio i totonu iā te a'u, ma ia liua a'u ia fa'apei o Lona uiga pa'ia, e ala i le fa'atuatua.

Li'o le Tali: **Ioe** **Lē Mautonu**

Manatu o Su'esu'ega

Tatalo e Mana'omia

Tali o Tatalo

Amu'ia ē Fia 'A'ai ma Fia Inu

Lesona 4

O lenei lesona e fa'avae i le Mataio 5:6.

(1) O LE Ā LE MANATU LONA FĀ MA LE FOLAFOLAGA SA TU'U MAI E KERISO I LENĀ ASO I LUGA O LE "MAUGA O FA'AMANUIĀGA?"

Amu'ia ē fia 'a'ai ma fia inu i le amiotonu; auā e ma'o'ona i latou. Mataio 5:6

Mau e Tau i ai: Luka 1:53; Ioane 4:14; Isaia 49:10

(2) E FA'APEFEA ONA FA'AMATALAINA E LE TUSI PA'IA LE "AMIOTONU?"

E tautala lo'u laulaufaiva i Lau afioga, auā ua tonu Āu poloa'iga uma lava. Salamo 119:172

Mau e Tau i ai: Luka 1:6; 10:26, 27; Teuterenome 6:25; Salamo 45:6; Roma 6:19

O le amiotonu e pa'ia, e fa'apei o le Atua, ma o "le Atua, o le alofa lava ia" (I Ioane 4:16). E tū gatasi ma le tulafono a le Atua, auā "ua tonu Āu poloa'iga uma lava" (Salamo 119:172), ma "o le alofa o le ato'atoa lea o le tulafono" (Roma 13:10). O le amiotonu o le alofa, ma o le alofa o le malamalama ma le soifua o le Atua.

(3) E TO'AFIA O LE A SA'ILIA MA LE FA'AMAONI LE ATUA MA LONA AMIOTONU PE A LĒ O FAUTUAINA E LE AGAGA?

Fa'apei ona tusia, E leai sē amiotonu, e leai lava se tasi, e leai se na te lagona, e leai sē sa'ili i le Atua. Ua latou ō 'ese uma lava, ua leaga fa'atasi i latou, e leai sē ua amio lelei, ua leai lava se tasi. Roma 3:10-12

Mau e Tau i ai: Roma 3:23; Iopu 14:4; 15:14, 16; 25:4; Ieremia 17:9

(4) O LE Ā LE ULUA'I LA'ASAGA I LE TALIAINA O LEA TULAGA?

A o i latou uma ē na talia o Ia, ma fa'atuatua i Lona suafo, na Ia avatu i ai o lea manuia, ia 'avea i latou ma fanau a le Atua. Ioane 1:12

Mau e Tau i ai: Isaia 45:24; 61:10; Roma 3:22; Salamo 71:16, 19

E fa'atinoina iā Keriso le amiotonu o le Atua. E tatou te maua le amiotonu e ala i le taliaina o IA.

(5) O AI LE POGAI O LE AMIOTONU?

O le tofi lenā o 'au'auna a Ieova, o a latou amiotonu fo'i mai iā te A'u lea, ua fetalai mai ai Ieova. Isaia 54:17

E lē maua le amiotonu mai fetaua'iga e fa'atigāina ai, po o galuega e fa'avaivai ai, e lē ala mai i meaalofo po o se taulaga; peita'i e tu'u mai e leai se tau i agaga uma o lo'o fia 'a'ai ma fia inu i ai. "E! outou uma o ē fia inu, ō mai ia i le vai, atoa ma outou ua leai ni tupe, ō mai ia, ina fa'atau ma 'a'ai; ia outou o mai lava,... a e leai se tupe, e leai fo'i se tau e fa'atau a'i" (Isaia 55:1). "O a latou amiotonu fo'i mai iā te A'u lea, ua fetalai mai ai Ieova" (Isaia 54:17), ma "o le suafo fo'i lenei e ta'ua ai o Ia, O IEOVA LA TATOU AMIOTONU" (Ieremia 23:6).

(6) O LE Ā LE LA'ASAGA LONA LUA PE A I AI LE AMIOTONU O LE ATUA I TOTONU O I TATOU?

O le amiotonu lea a le Atua i le fa'atuatua iā Iesu Keriso, e o'o i tagata uma, mo tagata uma fo'i o ē fa'atuatua; auā e lē 'ese'ese lava. Roma 3:22

Mau e Tau i ai: Roma 1:17; Kalatia 5:5; Filipi 3:9; Eperu 11:7

(7) PE AFAI O LO'O TATOU FIA 'A'AI MA FIA INU MO LE AMIOTONU, O LE Ā LE FOLAFOLAGA E MAFAI ONA TATOU TAPA I AI?

*Ua fetalai atu Iesu ia te i latou, O A'u nei le areto o le ola; o lē sau iā te A'u, e lē lāina lava ia; o lē fa'atuatua fo'i iā te A'u, e lē toe fia inu lava ia. **Ioane 6:35***

Mau e Tau i ai: Ioane 7:37, 38; 4:13, 14; Mataio 11:28-30; Fa'aaliga 22:7

E leai se sui fa'aletagata e mafai ona aumaiase mea e fa'amalieina ai le agaga o lo'o fia'ai ma fia inu. A e ua fetalai Iesu, "Fa'auta, 'Ou te tū atu i le puipui ma tu'itu'i atu; ai se tasi e fa'alogo mai i Lo'u leo, ma tatala mai le puipui, 'Ou te ulufale atu iā te ia, ma te tali sua fo'i ma ia, o ia fo'i ma A'u" (Fa'aaliga 3:20), ma "O A'u nei le areto o le ola; o lē sau iā te A'u, e lē lāina lava ia; o lē fa'atuatua fo'i iā te A'u, e lē toe fia inu lava ia" (Ioane 6:35).

(8) E FA'APEFEA ONA FA'ATUMAU LE FUA O LE AMIOTONU I TOTONU IĀ TE I TATOU?

*Inā tumau ia o outou iā te A'u, o A'u fo'i ia te outou. Fa'apei o le lā e lē mafai ona fua pe a na o ia, pe afai e lē mau i le vine; a fa'apea fo'i outou, pe afai tou te lē tumau iā te A'u. **Ioane 15:4***

Mau e Tau i ai: Salamo 5:8; 36:10; 37:6; I Ioane 2:29; Tito 3:5; Kolose 1:23; 2:6

E pei ona tatou mana'omia mea'ai e tausia ai lo tatou malosi fa'aletino, e fa'apea ona tatou mana'omia Keriso, le Areto mai le lagi, e tausia ai le ola fa'aleagaga ma maua ai le malosi e fai ai galuega a le Atua. E pei ona talia pea e le tino mea'ai e tausia ai le ola ma le malosi, e fa'apea le tatau ona maua pea e le agaga le feso'ota'iga ma Keriso, ia gaua'i atu ai iā te Ia ma fa'alagolago ma le ato'atoa iā te Ia.

(9) O LE Ā LE I'UGA O LE AMIOTONU?

*O le ala o le amiotonu, o i ai le ola; e leai fo'i se oti i ona magāala. **Fa'ata'oto 12:28***

Mau e Tau i ai: Isaia 32:17; Iakopo 3:18; Efeso 4:24; Salamo 32:11; Esekielu 18:5-9

E pei o le tagata malaga ua vaivai ona sa'ili o se punavai i le toafa, ma ina ua maua, sa ia fa'amalie loa lona matelāina; o le a fa'apea le Kerisiano ua fia inu ma ua maua le vai mamā o le ola, o le pogai o Keriso lava lea.

(10) O AI LE FA'AILOGA O LE AMIOTONU MA O LA TATOU FAUTUA FA'AMAONI?

*Si a'u fanau e, 'ou te tusi atu nei mea iā te outou, ina ne'i agasala outou; pe afai fo'i e agasala se tasi, o ia te i tatou le fautua i luma o le Tamā, o Iesu Keriso lea, o Lē amiotonu. **I Ioane 2:1***

Mau e Tau i ai: Salamo 11:7; 36:6, 10; 48:10; 71:15, 16, 19

A o tatou malamalama i le ato'atoa o le uiga o le Fa'aola, o le a tatou naunau ia suia atoa ma ia fa'afou i le fa'atusa o Lona uiga mamā. A tatou iloa le Atua, o le a maua luga le tapula'a o le amio ma o le a tatou naunau fa'amaoni e fa'aātaina Lona fa'atusa. O le a so'ofa'atasi le itū fa'ale-Atua ma le itū tagata ina ua 'a'apa atu le agaga i le Atua, ma o le a mafai ona fa'apea atu ma le loto ua naunautā'i, "Lo'u agaga e, e te fa'alologo lava i luma o le Atua; auā mai iā te Ia lava lo'u fa'amoemoe" (Salamo 62:5).

(11) O AI E AUMAIA IĀ I TATOU LE NAUNAUTA'IGA MO LE AMIOTONU?

*Lo'u agaga e, e te fa'alologo lava i luma o le Atua; auā mai iā te Ia lava lo'u fa'amoemoe. **Salamo 62:5***

Mau e Tau i ai: Isaia 26:9; 42:6; 45:13; Salamo 119:40, 144; 88:12; Eperu 12:2

Pe a e lagona ua i ai se mana'oga i lou agaga, pe a ua e fia 'ai pe fia inu mo le amiotonu, o se fa'amaoniga lea o lo'o galue Keriso i lou loto, o le a e sa'ili e ala i le Agaga Pa'ia, ina ia faia e Ia mea mo 'oe, o mea ia e lē mafai ona fai e 'oe lava ia. Tatou te lē mana'omia ia fa'amalie i tatou mai alavai e papa'u; auā o lo'o i o tatou luga le vaipuna tele, o ōna suāvai e lava ma totoo e mafai ona inu fua i ai, pe a tatou si'i ia maua luga a'e le tulaga o le fa'atuatua.

(12) A O TATOU SA'ILI LE PUNĀVAI OLA O LE AMIOTONU, O AI O LE A AUMAIA I O TATOU MAFAUFAU PE A MANA'OMIA SE FESOASOANI 'UPU MONI FA'ALEAGAGA MAI LE AFIIGA A LE ATUA?

*Auā e a'oa'o le Agaga Pa'ia iā te outou i lea lava itū aso i 'upu e tatau ona fai atu ai. **Luka 12:12***

Mau e Tau i ai: Luka 21:15; Esoto 4:11, 12; Galuega 6:10

O afioga a le Atua o punāvai o le ola. A o e sa'ili i ia vaipuna ola o le a aumaia ai 'oe i se mafutaga ma Keriso, e ala i le Agaga Pa'ia. O 'upu moni ua masani ai o le a tu'u mai i lou mafaufau i se va'aiga fou; o fuai'upu mai le Tusi Pa'ia o le a fa'aailoa iā te 'oe i se uiga fou fa'aapei o le 'emo o le uila, o le a e iloa le uiga o nisi 'upu moni e fa'atatau i le galuega o le fa'aolataga, ma o le a e iloa o lo'o ta'ita'i oe e Keriso, o lo'o i ōu tafatafa le A'oa'o mai le lagi.

(13) A O TATOU FIA INU MO LE AMIOTONU, INU MAI LE VAIMALŪ O LE OLAGA, MA SA'ILI LOA E FA'ASOA ATU I ISI, O LE Ā LE TA'IALA O FA'AMANUIĀGA O LE A TATOU FA'AILOA ATU?

*Ia outou foa'i atu, e foa'iina mai ai iā te outou; e foa'i mai e i latou i lo outou lava 'ie pulupulu le fua lelei, e lolomi ma lūlūina, e tumu ma solo i tua. Auā o le fua tou te fuaina atu ai, e fuaina mai ai iā te outou. **Luka 6:38***

Mau e Tau i ai: Isaia 58:6-9; 55:11; 32:20; 52:7; Roma 2:10

Na fetalai mai Iesu, "O le vai 'Ou te avatu iā te ia, e 'avea i totonu iā te ia o le vaipuna, e puna i luga i le ola e fa'avavau" (Ioane 4:14). A o tatala mai e le Agaga Pa'ia le 'upu moni iā te 'oe, o le a e teu loa i mea tāua uma sa e faia ma o le a e naunau e ta'u atu i isi e fa'atatau i mea lelei ua fa'aali mai iā te 'oe. O ia mea o le a e fa'aailoa atu ai ni manatu fou e fa'atatau i le uiga ma le galuega a Keriso, ma o le a fa'aali atu ai Lona alofa mutimutivale e tu'u atu iā i latou e alolofa iā te Ia, ma latou fo'i e lē o alolofa iā te Ia.

(14) PE A TATOU FA'ATAGA O IA, O LE Ā LE MEA NA FOLAFOLA E KERISO O LE A IA FAIA MO I TATOU PE A TATOU SA'ILI LANA AMIOTONU?

*Na te fa'afoisia mai lo'u agaga; na te ta'ita'i ia te a'u i ala o le amiotonu ona o Lona suafa. **Salamo 23:3***

Mau e Tau i ai: Salamo 37:5; 115:9-11; Fa'ata'oto 3:5, 6; Isaia 26:3, 4

"Ia outou foa'i atu, e foa'iina mai ai iā te outou" (Luka 6:38),...auā o le afioga a le Atua "o le punāvai i fa'ato'aga; o le punāvai ola; o vaitafe fo'i mai Lapanona" (Pese a Solomona 4:15). Pe a tofo le loto i le alofa o Keriso, ma a o e fa'asoa atu o le a maua se vaega e sili atu le tele ma le maoa'e. Pe a fa'aalia pea le Atua i le loto, o le a fa'atele ai mea e iloa ma mafai ona alofa atu. O lo'o tagi mai pea le agaga e mana'omia 'Oe "e fa'aolaina i tatou," ma o lo'o tali mai pea le Agaga, "e matuā fa'aolaina lava i tatou" (Roma 5:9, 10). Auā e fiasia le Atua e "faia o mea uma e fa'asilisili lava i mea tatou te ole atu ai ma mafaufau i ai" (Efeso 3:20).

Ua tu'u iā Iesu, o Lē na foā'i Lona soifua mo le fa'aolataga o le aigātagata ua lē iloa, le Agaga Pa'ia e leai se gata'aga. O le a fa'apea ona tu'uina i so'o uma o lo'o mulimuli iā Keriso, pe a tu'u atu le loto atoa mo Lana afio'aga. Sa fa'atonu mai lava le Ali'i, "Ia fa'atumuina outou i le Agaga" (Efeso 5:20), ma o lenei fa'atonuga o se folafolaga fo'i mo lona fa'ataunu'uga. Ua fa'amalieina le Tamā iā Keriso ona e tatau ona "mau i totonu ia te Ia le tumu ato'atoa," ma "o lo'o ua fa'a'ato'atoaina fo'i outou iā te Ia" (Kolose 1:19; 2:10).

(15) O LE Ā LE MOLIMAU O LE A TU'U ATU E I LATOU O LO'O MATIVA FA'ALEAGAGA MA MANA'OMIA E SA'ILI IA UFITIA E LE OFU O LE AMIOTONU A KERISO?

*'Ou te matuā fiasia ia Ieova, e 'oli'oli lo'u loto i lo'u Atua; auā ua na fa'aofuina a'u i ofu o le olataga, ua na fa'apulupuluina a'u i le ofu o le amiotonu; e pei o le fa'ato'afaivā ua pulou o ia pei se faitaulaga; e pei o le fa'atoanofotane fo'i ua teuteu o ia i ana teuga. **Isaia 61:10***

Mau e Tau i ai: II Timoteo 4:8; Salamo 17:5; Eperu 12:11; Tito 2:12

Ua sasa'a ifo e le Atua Lona alofa e matuā tele na'uā, e pei o le timu e fa'asūsū ai le lalolagi. Ua fetalai o Ia, "To'ulu mai ia, o 'oe le lagi i luga; o ao fo'i, ia fa'amaligi mai le amiotonu; ia fa'amaga mai le lau'ele'ele, ma ia fua mai le olataga ma le amiotonu, ia fa'atupuina fa'atasi" (Isaia 45:8). Ma "O ē ua tigāina ma ē matitiva o lo'o latou sa'ili i se vai, a ua leai; ua matūtū o latou laulaufaiva i le fia inu; o A'u o Ieova, 'Ou te tali atu iā te i latou, o A'u o le Atua o Isara'elu, 'Ou te lē

tu'ulafoa'iina i latou. 'Ou te su'ēna vaitafe i luga o mauga tula, ma vaipuna i vanu; 'Ou te faia le vao lafulafuā ma vailepa, 'Ou te faia fo'i le lau'ele'ele naumati ma vaipuna" (Isaia 41:17, 18).

Ua 'ou iloa e leai lava se tasi e amiotonu ma e pau le ala e mafai ai ona maua le amiotonu, e ala lea i le lelei o Keriso.

Li'o le Tali:

A o ou fa'aaoga le taimi e su'esu'e ai Lana afioga ma iloa ai le uiga ato'atoa o le Fa'aola, ua 'ou lagona ai mea 'ou te mana'omia. Ua Ia tu'u mai ia 'ou fia 'ai ma fia inu mo Lana amiotonu ma ia suia ato'atoa ai a'u ia pei o Lona fa'atusa mamā.

Li'o le Tali:

Ua 'ou malamalama e pau le ala e mafai ai ona savali pea i lenei auala o le tumau pea iā Keriso, ma 'ou te tatalo o le a Ia fesoasoani mai iā te a'u ia mautū le so'otaga ma Ia.

Li'o le Tali:

A o 'ou inu pea i aso ta'itasi mai le vaipuna o le ola a Keriso, 'ou te naunau ia ta'ita'iina isi uso malaga i le Pogai. 'Ou te tatalo mo le Agaga Pa'ia ia fa'asino i lo'u mafaufau 'upu e tonu ma Afioga Pa'ia e mafai ai ona 'ou tosina i latou ia fia'a'ai ma fia inu mo lea amiotonu ma ia sa'ili ai mo se mafutaga ma Ia e lē gata.

Li'o le Tali:

'Ou te fa'afetai ma tapa atu i le folafolaga a Keriso o le a fa'atumulua ma ufitia a'u e Lona ofu o le amiotonu a o 'ou i ai pea i le tulaga e lē fia 'ai ma fia inu mo Ia.

Li'o le Tali:

Manatu o Su'esu'ega

[illegible]

Amu'ia ē Alolofa Atu

Lesona 5

E fa'avae lenei lesona i le Mataio 5:7.

(1) O LE Ā LE MANATU LONA LIMA MA LE FOLAFOLAGA NA TU'U MAI E KERISO I LENĀ ASO I LUGA O LE "MAUGA O FA'AMANUIĀGA?"

Amu'ia ē alolofa atu; auā e alofaina mai i latou. Mataio 5:7

Mau e Tau i ai: Fa'ata'oto 21:21; 3:3; 11:17; 19:17; 16:6; II Samuelu 22:26; Efeso 4:32

(2) E FA'APEFEA LE LOTO O LE TAGATA PE A LĒ 'AVEA KERISO MA PULUVAGA?

E sili le fa'a'ole'ole o le loto i mea uma, ma ua matuā leaga lava; po o ai na te mafaia ona iloa? Ieremia 17:9

Mau e Tau i ai: Kenese 6:5; 8:21; Iopu 15:14-16; Salamo 53:2, 3; Failauga 9:3

O le loto o le tagata e malūlū ma pouliuli ma e lē alofa; a o so'o se taimi e fa'atinoina ai e se tasi se agaga alofa ma fa'amagalo atu, e lē o ia lava, a e ala mai le pule a le Agaga o le Atua o lo'o fa'agae'etia ai lona loto. "O i tatou, ua tatou alolofa ia te Ia, auā na Ia mua'i alofa mai ia te i tatou" (I Ioane 4:19).

(3) O LE Ā LE ULUA'I UIGA NA TU'U MAI E LE ATUA I LONA FA'AMATALA MAI O IA LAVA?

Ua afio ane fo'i Ieova i ona luma, ma na'ta'u mai, O Ieova, o Ieova, o le Atua alofa mutimutivale ma le alofa fua, e telegese Lona to'asā, a e tele le alofa ma le fa'amaoni. Esoto 34:6

Mau e Tau i ai: Luka 6:36; II Nofoa'iga Tupu 30:9; Salamo 86:5, 15; 103:8-13

O le Atua o le pogai o le alofa tunoa; o Lou suafa "o le Atua alofa mutimutivale ma le alofa fua" (Esoto 34:6). Na te lē tausia i tatou e pei ona tatau ai mo i tatou. E lē fesili o Ia pe o lo'o aogā tatau i tatou mo Lona alofa, a e ua Ia liligi ifo i o tatou luga 'oa o Lona alofa ina ia tatou aogā ai. O Ia e lē tau ma sui; e lē finagalo Ia e fa'asala se tasi, a e ia fa'asao. E ui ina mata'utia le mamafa ua Ia fa'aalitino ai Lona 'a'ao alofa mo le fa'aolataga o ē ua sē, a e o lo'o matuā naunau o Ia e fa'amāmā mafatiāga o tagata ma fa'amalōlō o latou manu'a. E moni o le Atua "e lē fa'asaoina lava e Ia o ē agasala" (Esoto 34:7), a e Na te fa'amagalo ma 'ave'esea le agasala.

(4) O AI O LO'O FA'AMALOSI MAI LE APOSETOLO O PAULO E TATAU ONA TATOU FA'ATA'TTA'I I AI?

O lenei, ia fa'aa'oa'oa outou i le Atua, fa'apei o le fanau pele. Efeso 5:1

Mau e Tau i ai: Levetiko 11:45; Mataio 5:48; I Peteru 1:15, 16; II Peteru 1:4

O ē alolofa e "tofusia fa'atasi... i le amio Atua" (II Peteru 1:4), ma o latou ia e fa'ailoa mai ai le alofa fa'apalepale o le Atua. O loto uma e o gatasi ma le finagalo alofa e lē gata, o le a sa'ili le agaga ua sē ia toe fa'afo'i mai. A fa'atasi ai Keriso i le agaga o se vaipuna lea e ola pea, ma o le a tafe pea fa'amanuiāga e tele mai Lona afio'aga.

(5) ONA O TATOU O ŌNA SUI, O LE Ā LE GALUEGA UA TU'U MAI E LE ATUA MO I TATOU TA'ITO'ATASI?

O mea uma fo'i mai le Atua ia, ua uma ona fa'aleleia e Ia o i tatou iā te Ia talu Iesu Keriso, ua tu'uina mai fo'i ia te i matou le galuega o le leleiga. II Korinito 5:18

Mau e Tau i ai: II Korinito 5:19, 20; Efeso 4:32; Salamo 82:2-4

O le a fesili le Kerisiano i lē ua sē, lē ua tofotofoina, ma i latou ua mana'omia le fesoasoani ona ua goto i le agasala, O le ā se mea e mafai ona 'ou faia ia manuia ai i latou ia? E va'ai atu ia i ē ua mafatia ma fa'amaulaloina, o agaga i latou na maliu ai Keriso ina ia fa'asaoina, ma na tu'u e le Atua i Lana fanau le galuega o le toe fa'aleleiga ma i latou.

O ē alolofa, o i latou ia e fa'aalitinoina le tigāalofa i ē matitiva, ē puapuagātia, ma ē o lo'o sauāina. Ua tautala Iopu, "Na 'ou lavea'iina lē ua puapuagaina, ina ua vala'au mai o ia, ma lē ua 'aumatuā, atoa ma lē ua leai sona fesoasoani. Na o'o mai iā te a'u le fa'amanū o lē na fai a fano; o a'u fo'i na pese fiafia ai le loto o le fafine ua oti lana tane. Na fai le amiotonu mo'u ofu, ma 'ou ofu ai; na fai la'u fa'amasinoga e peisea'i o se ofu talaloa ma se pulou. Na fai a'u ma mata o le tauaso, o vae o le pipili, o a'u lea. Na fai a'u ma tamā o ē ua matitiva; na 'ou su'esu'eina fo'i le finauga sa 'ou lē iloa" (Iopu 29:12-16).

(6) O LE Ā SE ALA AOGĀ E MAFAI ONA TATOU FA'AALI ATU AI LE ALOFA O KERISO I LE AIGĀ TAGATA UA LĒ ILOA?

*Ua tali atu Ia, ua fa'apea atu ia te i latou, O le tagata e lua ona ofu tino, ia avane iā te ia e leai sona ofu; o lē ua iā te ia mea e 'ai, ia fa'apea fo'i ona fai. **Luka 3:11***

Mau e Tau i ai: Fa'ata'oto 14:31; Isaia 58:7-10; Esekielu 18:7-9

O le olaga o le to'atele e matuā tigāina i fa'afitauli; latou te lagona le lē ato'atoa, ma e na o le mafatia ma tupu ai le lē talitonu, ona manatu lea e leai se mea o le a fia fa'afetai ai. A e o 'upu agalelei, foliga e tigāalofa ma e fa'aali atu ai le fia fa'afetai, o le a 'avea o se ipuvai malū mo le agaga o matelāina. O se 'upu fa'amalosi, o se agalelei e fa'aalia, o le a fa'amāmāina 'avega mai lē o lo'o vaivai mai lana āmoga mamafa. Ma o so'o se 'upu po o se agalelei e faia o le a fa'aalia ai le alofa o Keriso mo le aigā tagata o lo'o lē iloa.

(7) O LE Ā LE I'UGA UA FOLAFOLA MAI PE A TATOU OLA I SE OLAGA E FA'AGALO AI LE LOTO FA'APITO MO 'OE LAVA A E GALUE MO LE LELEI O ISI?

*E fa'atamao'aigaina le tagata matamau; o ia fo'i lē fa'asūsū i nisi, e fa'asūsūina lava o ia. **Fa'ata'oto 11:25***

Mau e Tau i ai: Fa'ata'oto 10:16; 14:21; Roma 2:10; Isaia 32:20; 58:10-12; Ioane 4:36

O ē alolofa atu "o le a alofaina i latou" (Mataio 5:7). E maua le filemū e le agaga e tigāalofa, e loto malie i le olaga e tu'u 'ese ai ia lava a e galue mo le lelei o isi. O le tagata e afio ai le Agaga Pa'ia ma e fa'atino i le olaga o le a fa'amalūina loto ma'a'a ma fafaguina le tigāalofa ma le fa'apalepale. O le a e selesela mea sa e totōina. "Amu'ia le tagata ua manatua lē ua mativa;...E tausia o ia e leova ma fa'aolaina; e manuia fo'i o ia i le nu'u; e te lē tu'ua fo'i o ia i le mana'o o ē ita iā te ia. E lagolago ane leova iā te ia i le ta'otoga o lona ma'i; e te liua lona moega uma lava i lona ma'i" (Salamo 41:1-3).

(8) PE A TATOU FAIA LE GALUEGA A KERISO O LE FA'ASA'OLOTO O Ē O LO'O PUAPUAGĀTIA, O LE Ā LE MEA UA FOLAFOLA MAI LE ATUA O LE A IA AUMAIA?

*A o lo'u Atua e fa'a'atoa e Ia iā te outou mea uma e matitiva ai outou, e tusa ma le faula'i o Lona vi'iga, iā Keriso Iesu. **Filipi 4:19***

Mau e Tau i ai: II Korinito 9:8; Fa'ata'oto 3:9, 10; Mataio 6:33

O lē e tu'u atu lona ola i le Atua e galue ai mo Lana fanau o le a so'ofa'atasi ma Ia Lē e i Lana pule'aga 'olua uma o le atulaulau. O lona olaga e fusia e le maea auro o folafolaga e lē mafai ona suia ma le soifuāga o Keriso. O le a lē tu'ulafōā'ia ia e le Ali'i i le itulā o mafatiāga, pe a mana'omia le fesoasoani. "O lo'u Atua e fa'a'atoa e Ia iā te outou mea uma e matitiva ai outou, e tusa ma le faula'i o Lona vi'iga, iā Keriso Iesu" (Filipi 4:19).

(9) O Ā 'UPU OFOFOGIA O LE A FA'ALOGOINA E I LATOU O Ē ALOLOFA MA O LO'O FA'AMAONI PEA I LE TOE AFIO MAI O KERISO?

*Ona fai atu ai lea o lona ali'i ia te ia, Ua lelei ia, le 'au'auna lelei e, ma le fa'amaoni, ua e fa'amaoni i nai mea itiiti, 'ou te tofia 'oe e pule i mea e tele; inā ulufale mai ia i le fiafia o lou ali'i. **Mataio 25:23***

Mau e Tau i ai: Mataio 25:34

I le toe itulā e mana'omia ai le fesoasoani, o ē alolofa o le a maua le lafitaga i le alofa mutimutivale o le Fa'aola tigāalofa ma o le a talia i latou i nofoāga e fa'avavau.

'Ou te iloa a lē 'avea le Atua ma puhiuaga e ala i le galuega a le Agaga Pa'ia, o le loto o le tagata o le a malūlū, e pogisā, ma leai se alofa.

Li'o le Tali: **Ioe** **Lē Mautonu**

'Ou te iloa o le Atua o le pogai o le alofa tunoa ma 'ou te fa'afetai e Na te lē faia iā i tatou mea e tatau mo i tatou, a e peita'i ua liligi ifo i o tatou luga 'oa o Lona alofa.

Li'o le Tali: **Ioe** **Lē Mautonu**

Ua 'ou iloa nei le avanoa ofoofogia e tatou te mafai ai, e ala i Lona alofa tunoa, ona fa'atasi ma Ia ma 'avea ma soa o Lona uiga fa'aAtua e mafai ai ona tatou fa'aalitino Lona alofa ma le agalelei i se lalolagi mafatia ma ua lē iloa.

Li'o le Tali: **Ioe** **Lē Mautonu**

O la'u tatalo ia soifua ma galue le Ali'i, e ala mai iā te a'u ina ia 'avea ai a'u ma Ōna 'a'ao i le lalolagi. Ia 'ou fa'aalia Lona agalelei ma le alofa i le aigā tagata ua lē iloa, e ala i a'u 'upu ma galuega e lē faia fa'apito.

Li'o le Tali: **Ioe** **Lē Mautonu**

Manatu o Su'esu'ega

Tatalo Mana'omia

Tali o Tatalo

[illegible]

Amu'ia ē Loto Mamā

Lesona 6

O lenei lesona e fa'avae i le Mataio 5:8.

(1) O LE Ā LE MANATU LONA ONO MA LE FOLAFOLAGA NA TU'U MAI E KERISO I LENĀ ASO I LUGA O LE "MAUGA O FA'AMANUIĀGA?"

Amu'ia ē loto mamā; auā latou te iloa atu le Atua. Mataio 5:8

Mau e Tau i ai: I Nofoa'iga Tupu 29:17, 18; Salamo 51:10; 73:1; I Peteru 1:22; Esekielu 36:25-27

(2) O LE Ā LE A'OA'IGA MALOSI NA TU'U ATU E KERISO I LE 'AU TUSI'UPU MA FARESAIO E FA'ATATAU I LE TULAGA O LATOU LOTO?

E fa'apea fo'i outou, o fafo ua mataamionu i luma o tagata, a o totonu, ua tutumu outou i le pepelo ma le amiolētonu. Mataio 23:28

Mau e Tau i ai: Mataio 23:25-27; 15:19, 20; Luka 11:39, 40

Sa matuā fa'amaliegatā tagata Iutaia e fa'ataau i le mamā taulesauniga, ma ua 'avea ai a latou tulafono ma 'avega mamafa. Sa fa'atumulia o latou mafaukau i tulafono ma puipuga e lē tatau, ma le fefe i lē mamā i le va'aiga mai fafo, a e latou te lē va'ai i le 'elea o le a tu'u i le agaga mai le loto fa'apito ma le mataū'a.

(3) O LE Ā LE FA'ATA'OTO SA FA'AAOGĀ E KERISO E FA'AMAMAFĀ AI PE O FEA E AMATA MAI AI LE UIGAMAMĀ MONI?

O 'oe na le Faresaio tauaso, ia e mua'i fa'amamā i totonu o le ipu ma le tanoa, ina ia mamā atoa ma le tua. Mataio 23:26

Mau e Tau i ai: Mataio 12:33

(4) O Ā MEA SA FA'AALIA IĀ IOANE O LE A LĒ MAFĀI ONA FA'AŪLU ATU I LE MALŌ O LE LAGI?

E lē sao atu lava i ai se mea leaga e tasi, po o sē na te faia se mea 'inosia, po o se pepelo; na o i latou lava ē ua tusia i le tusi o le ola a le Tama'i Mamoe. Fa'aaliga 21:27

Mau e Tau i ai: Isaia 35:8; 52:1; II Korinito 6:9, 10; Efeso 5:5

E lē ta'u mai e Iesu o lenei mamā fa'asauniga o se tasi tulaga mo le ūlu atu i Lona malō, a e sa fa'asino i le mana'omia o le loto mamā. O le poto mai lugā "e muamua ona mamā" (Iakopo 3:17). O le a lē ūlu atu i le 'a'ai a le Atua se mea leaga, a o i latou uma o le a nonofo ai o le a mamā o latou loto. O lē ua a'oa'oina iā Iesu o le a fa'aalitino uiga lelei, e lē gagana fa'alētatau, po o manatu lē fa'aaloalo. Pe a fa'atasi ai Keriso i le loto, o le a i ai uiga ma mafaukauga e mamā ma ato'atoa.

(5) O LE Ā LE MEA E TATAU ONA TATOU SA'ILIA, E ALA I LE ALOFA TUNOA O KERISO, INA IA MAFĀI AI ONA TATOU ŪLU ATU I LE MALŌ O LE LAGI?

Ia outou tausisi i le filemū ma tagata uma lava, i le ma le amio lelei, a aunoa ma lea, e leai se tasi na te iloa atu le Ali'i. Eperu 12:14

Mau e Tau i ai: Salamo 34:14; Roma 14:19; Kalatia 5:22, 23; I Timoteo 6:11

E i ai le uiga loloto ina ua fetalai Iesu, "Amu'ia ē loto mamā," - e lē na o le mamā i le uiga e malamalama i ai le lalolagi, e sa'oloto ma mamā mai le tu'inaanau o le tino, a e o le fa'amaoni ma le mamā i fuafuāga ma manatunatuga lilo o le agaga, sa'oloto mai le mimitavale ma le fa'asausili, o le loto maulalo, lē fa'apito, ma ia fa'apei o le tamaitiiti.

(6) E TO'AFIA E MAFĀI ONA FA'AMAMĀINA O LATOU LOTO, E ALA I A LATOU LAVA FAUFAŪGA FA'ALETAGATA?

Po o ai ea e aumai se mea mamā nai le mea 'ele'elea? E leai se tasi. Iopu 14:4

Mau e Tau i ai: Ieremia 17:9; Fa'ata'oto 21:2; Salamo 130:3, 4; Kenese 6:5

(7) E NA O AI LE POGAI O LE A MAFAI ONA MAUA MAI AI LE LOTO UA MAMĀ ATO'ATO'A?

Ua o'o mai fo'i le afioga a Ieova iā te a'u, ua fa'apea mai, "'Ou te avatu fo'i iā te outou le loto fou, ma 'Ou tu'u i totonu iā te outou le agaga fou; 'Ou te 'ave'esea le loto ma'a'a ai o outou tino, ma 'Ou avatu iā te outou le loto 'a'ano.'" Esekielu 36:16, 26

Mau e Tau i ai: Esekielu 11:19; Teuterenome 30:6

(8) O LE Ā LE FOLAFOLAGA E MAFAI ONA TATOU TAPA I AI PE AFAI TATOU TE SA'ILI FA'AMAONI SE LOTO MAMĀ?

A e afai tatou te fa'aali a tatou agasala, e fa'amaoni o Ia, ma le amiotonu e fa'amagalo ai a tatou agasala, ma fa'amamā mai iā i tatou i amiolētonu uma lava. I Ioane 1:9

Mau e Tau i ai: Esekielu 36:25-27; Isaia 1:18; II Korinito 5:17; Levetiko 26:40-42; Fa'ata'oto 28:13

(9) E FA'APEI O LE TUPU O TAVITA, O LE Ā LE TATALO FA'ATAUĀNAU E TATAU ONA TATOU FAIA?

Le Atua e, ia e faia se loto mamā mo a'u; ma ia e fa'afouina se loto mau i totonu iā te a'u. Salamo 51:10

Mau e Tau i ai: Salamo 51:3-5; 32:5; 38:18; II Samuelu 24:10

(10) O LE Ā LE FESILI FETU'UA'I SA FAI ATU E LE 'AU FARESAIO NA FA'AALIA AI O LATOU E TAUASO FA'ALEAGAGA FA'ATATAU I LE UIGA MAMĀ O KERISO?

Ona tali mai lea o Iutaia, ua fa'apea mai iā te Ia, E lē ua tonu ea la matou 'upu. O le Samaria 'Oe, o lo'o iā te 'Oe fo'i le temoni? Ioane 8:48

Mau e Tau i ai: Mataio 12:24; 10:25

E vaganā ua e talia i lou lava olaga le fa'avae o le alofa e fai ai mea lelei mo isi, o le fa'avae lea o Lona uiga, o le a lē mafai ona e iloa le Atua. O le loto ua fa'asesēina e Satani, e va'ai a'e ia fa'apea o le Atua o se pule sauā, e loto ma'a'a; a e o uiga fa'apito o le fanau a tagata, e o'o lava iā Satani, ua latou fa'asinomia i Lē e alofa na foafoa mea uma. Ua fa'apea mai o Ia, "Fa te 'oe ua tutusa lava A'u ma 'oe" (Salamo 50:21).

Ua fa'amatalaina Āna fa'amanuiāga fa'apea e na o se fa'aailoga o Lona uiga e tau ma sui. E fa'apea fo'i le Afioga Pa'ia, o le fale teu'oa o Lona alofa tunoa. O le mamalu o ōna 'upu moni, e maualuga e tau i le lagi ma e o'o i le fa'avavau, ua lē manino le uiga. O le to'atele o le aigā tagata ua fa'apea mai e fa'atatau iā Keriso, o Ia "e pei o le pogai i le nu'u naumati," ma ua va'ai latou iā te Ia "e leai sona matagofie" ia latou "manana'o ai iā te Ia" (Isaia 53:2). O Iesu o le fa'aaliga o le Atua i le aigātagata a o fa'atasi ai Ia ma i latou, a e sa fa'apea atu le 'au tusi'upu ma Faresaio iā te Ia, "O le Samaria 'Oe, o lo'o iā te 'Oe fo'i le temoni" (Ioane 8:48).

(11) O AI MONI NA FA'AALIA ATO'ATO'A E KERISO LE UIGA MAMĀ?

Ua fetalai atu Iesu iā te ia, 'Filipo e, ua loa lava ona 'Ou i ai iā te outou, a e te le'i iloa ea A'u? O lē ua va'ai mai iā te A'u, ua va'ai o ia i le Tamā; pe se ā fo'i e te fai mai ai, Fa'aailoa mai le Tamā iā te i matou?' Ioane 14:9

Mau e Tau i ai: Ioane 14:7, 20; Kolose 1:15; Filipi 2:6

E o'o i Ōna so'o sa fa'atauasoina e ala i o latou loto fa'apito, latou te le'i malamalama iā te Ia Lē na afio mai e fa'atinoina le alofa o le Tamā iā i latou. O le pogai lea na malaga to'atasi ai lava Iesu a o fa'atasi i totonugalemū o le motu o tagata. Sa na o le lagi na malamalama ato'atoa iā te Ia.

(12) I LE AFIO FA'ALUA MAI O KERISO, O LE Ā LE TALI A TAGATA LEAGA PE A TŌ'ESEA LE 'IE PUPUNI O LO LATOU TAUASO FA'ALEAGAGA?

Ua latou fai atu fo'i i mauga ma papa, Mafuli mai ia iā te i matou, ma tanuma'i i matou ai le silafaga a Lē ti'eti'e i le nofoāli'i, ma le to'asā o le Tama'i Mamoe. Fa'aaliga 6:16

Mau e Tau i ai: Fa'aaliga 6:14-17; Ieremia 8:3; Hosea 10:8; Luka 23:30

Pe a afio mai Keriso i Lona mamalu, e lē mafai e le 'au amioleaga ona vā'ai iā te IA. O le malamalama o Lona fa'atasi ai o le ola lea iā i latou e alolofa iā te Ia, a e o le oti i le 'au lē fa'atuatua. Mo i latou, o le fa'amoemoega o Lona afio mai e "na o le fa'atali ma le mata'ū tele i le fa'asala, ma le to'asā e mumū" (Eperu 10:27). I Lona fa'aali mai, o le a tatalo ia fa'alilo i latou mai fofoga o Lē na malii e togiola i latou.

(13) I LE AFIO MAI O KERISO, O LE Ā LE TALI A I LATOU O Ē UA MAUA LE LOTO MAMĀ, E ALA I LE MANA O LE AGAGA PA'IA?

O lea aso e fa'aapea ai, Fa'auta, o lo tatou Atua lenei; sa tatou fa'atalitali iā te Ia, ua Ia fa'aolaina fo'i i tatou; o Ieova lava lenei, sa tatou fa'atalitali iā te Ia; tatou te fiasia ma 'oli'oli i Lana fa'aolataga. Isaia 25:9

Mau e Tau i ai: Tito 2:13; Fa'aaliga 19:7

O le a suia mea uma mo latou ua fa'amamāina loto e ala i le fa'atasi ai o le Agaga Pa'ia. O i latou ia e mafai ona iloa le Atua. Sa fa'alafi Mose i le mavaevae o le papa ina ua fa'aalia iā te ia le mamalu o le Ali'i; ma e fa'aapea ona tatou iloa le alofa o le Atua pe a ua fa'alafi i tatou iā Keriso.

"O lē ua mana'o i le loto mamā, e matagofie ōna laugutu; e fai o ia ma uō a le Tupu" (Fa'ata'oto 22:11). E tatou te va'aia o Ia i le taimi nei lava e ala i le fa'atuatua. I a tatou mea e fai i aso ta'itasi tatou te iloa ai Lona agalelei ma le alofa mutimutivale i le fa'atinoina o Āna fa'amanuiāga, ma e tatou te iloa o Ia i le uiga o Lona Ālo. E tu'u mai e le Agaga Pa'ia le 'upu moni e fa'ataui i le Atua ma Lē na Ia 'auina mai, ma tatala atu le loto ma le mafaufau ia malamalama i ai. O ē loto mamā e iloa le Atua i se va'aiga e fou ma e fa'apeleina, o Ia o lo latou Fa'aola, ma a o latou va'aia le mamā ma le matagofie o Lona uiga, e naunau i latou e fa'aātaina Lona fa'atusa. O le a fa'atumulia o latou loto i le fiasia e lē mafa'amatalaina a o latou va'aia o Ia o le Tamā e naunauta'i ia fa'afeiloa'i le atali'i ua salamō.

(14) A O FA'AMAMĀINA LE LOTO E KERISO, E ALA IĀ TE AI O LE A IA AUMAIA IĀ I TATOU MATA E VA'AI AI FA'ALEAGAGA?

A ua fa'aalia mai ia mea e le Atua iā te i matou e Lona Agaga; auā e su'esu'e ifo le Agaga i mea uma, o mea loloto fo'i a le Atua. I Korinito 2:10

Mau e Tau i ai: I Korinito 2:9-16; Mataio 11:25; Salamo 146:8

O ē loto mamā e iloa Lē na foafoaina mea uma ona o galuega ofoofogia a Ōna 'a'ao, i mea matagofie o lo'o i le atulaulau. Latou te faitau manino i 'upu mai Lana afioga le fa'aaliga o Lona alofa tunoa, Lona agalelei, ma Lona alofa mutimutivale. O 'upu moni o lo'o fa'alilo mai ē popoto ma le fa'afiaamitonu e fa'aalia lea i tama meamea. O le tāua ma le matagofie o le 'upu moni lea e lē o fa'aailoa e le 'au popoto fa'alelalolagi, a o lo'o fofola mai pea iā i latou e i ai le fa'atuatua ma le naunauta'i fa'atamaitiiti ina ia iloa ma faia le finagalo o le Atua. Tatou te iloa le 'upu moni pe a 'avea tatou ma soa o le uiga Atua.

E ola ē loto mamā e pei ona va'aia o fa'atasi ai le Atua i le taimi na Ia vaea mai ai latou i lenei lalolagi. O le a latou fesāga'i ma Ia ma va'ai i Ōna fofoga ina ua suia i latou i le tulaga e lē toe oti o i lumana'i, e fa'apei o Atamu a o savavali ma talanoa ma le Atua i Etena. "O ōna pō nei tatou te va'ava'ai ai fa'anenefu i le fa'aata, a o ia ōna pō tatou te fesāga'i ai" (I Korinito 13:12).

'Ou te iloa e naunau Keriso ia 'ou mamā, e lē na o le mamā i le malamalama fa'alelalolagi. E naunauta'i ia mamā fa'amaoni mai fuafuāga ma ala lilo o le loto - ia sa'oloto mai le mimitavale ma le fa'alialia, ia loto maulalo, lē fa'apito, ma ia pei o le tamaitiiti.

Li'o le Tali:

Ioe

Lē Mautonu

A o 'ou va'ai i le Tusi Pa'ia ma 'ou iloa ai le fa'avae o le alofa e mamā, ma e tu'u atu atoa ai fa'ataulaga i le soifuāga ma le uiga o Keriso, o le mo'omo'oga o lo'u loto ia 'avea a'u fa'apei o Ia.

Li'o le Tali:

Ioe

Lē Mautonu

Pe a fa'atasi ai Keriso i le loto, o le a fa'amamāina ato'atoa le uiga ma le mafaufau. 'Ou te mana'o ia 'ou iloa fa'atasi atu iā te Ia, ina ia mafai ai ona 'avea a'u ma Ōna sui ma fa'amamaluina ai Lona sua'fa.

Li'o le Tali:

Ioe

Lē Mautonu

O la'u tatalo, fa'apei o le Tupu o Tavita, ina ia fa'amagalo e le Atua a'u agasala ma ia fausia iā te a'u se loto mamā ma fa'afouina Lona Agaga i totonu iā te a'u.

Li'o le Tali:

Ioe

Lē Mautonu

Manatu mai Su'esu'ega

Tatalo Mana'omia

Tali o Tatalo

Amu'ia ē Fa'atupuina le Filemū

Lesona 7

E fa'avae lenei lesona i luga o le Mataio 5:9.

(1) O LE Ā LE MANATU LONA FITU MA LE FOLAFOLAGA SA TU'U ATU E KERISO I LEA ASO I LUGA O LE "MAUGA O FA'AMANUIĀGA?"

Amu'ia ē fa'atupuina le filemū; auā e ta'ua i latou o atali'i o le Atua. Mataio 5:9

Mau e Tau i ai: Roma 12:18; 14:17-19; II Korinito 13:11; Kalatia 5:22

(2) ONA O LE GALUEGA MAI LE LAGI A KERISO E OFO MAI LE FILEMŪ IĀ I TATOU UMA TA'ITO'ATASI, O LE Ā LE SUAFA TAULE-TUPU NA IA TAU'AVE?

E igoa fo'i o Ia, o Lē Silisili 'ese, o le Faipule, o le Atua malosi, o le Tamā o le fa'avavau, o le Ali'i o le filemū. Isaia 9:6

Mau e Tau i ai: I Tesalonia 5:23

O Keriso o le "Ali'i o le Filemū," ma o Lana galuega o le toe fa'afo'i i le lagi ma le lalolagi le filemū sa fa'aleagaina e le agasala. "Ua ta'ua miotonuina i tatou i le fa'atuatua, o lea ua tatou lelei ai ma le Atua, ona o lo tatou Ali'i o Iesu Keriso" (Roma 5:1). So'o se tasi e malie o le a tu'u 'ese le agasala a e tatala atu lona loto i le alofa tunoa o Keriso, o le a tofusia i lea filemū fa'alelagi.

(3) O LE Ā LE FOLAFOLAGA E MAFAI ONA TATOU TAPA I AI PE A TATOU TALITONU MA FA'ATUATUA, ONA MAUA LEA O LE ALOFA TUNOA O KERISO I TOTONU O TATOU LOTO?

E te leoleoina ia fīfilemū lava lē ua mausalī lona loto; auā ua ia fa'atuatua iā te 'Oe. Isaia 26:3

Mau e Tau i ai: Salamo 85:7, 8; Ioane 16:33

E leai se tasi tulaga e maua ai le filemū. O le talia o le alofa tunoa i le loto e te'a'ese ai le uiga ita; a e fa'afilemū ai finauga ma fa'atumulia le agaga i le alofa. A i le loto le filemū mo le Atua ma uso ā tagata, o le a lē mafai ona pagātia. E lē maua ai ni manatunatuga leaga, e leai se mataū'a i le loto. O le loto e ō gatasi ma le Atua e tofusia i le filemū o le lagi ma o le a salalau atu ōna manuia iā i latou uma i le si'osi'omaga. o le a i ai le agaga o le filemū e pei o le sau i loto o lo'o vaivai ma tigā i fetaia'iga fa'alelalolagi.

(4) A O AFIO A'E KERISO I LE LAGI, O LE Ā LE FA'AMANUIĀGA NA IA TU'UA MO I LATOU UMA E MULIMULI IĀ TE IA?

'Ou te tu'uina atu iā te outou le manuia; o Lo'u manuia 'Ou te avatu ai iā te outou; 'Ou te lē avatu iā te outou fa'apei ona avatu e le lalolagi. 'Aua le atuatuva'e o outou loto, 'aua fo'i tou te matata'u. Ioane 14:27

Mau e Tau i ai: Ioane 20:21; 16:33

(5) O AI LE SUI O LO'O FA'AAOGĀ E LE ATUA INA IA FA'AŪLUINA AI LONA FILEMŪ I LANA FANAU?

O le Atua fo'i e tupu mai ai le fa'amoemoe, ia fa'atutumuina outou e Ia i le 'oli'oli uma atoa ma le filemū, ina ua fa'atuatua; ina ia tele lava lo outou fa'amoemoe ona o le mana o le Agaga Pa'ia. Roma 15:13

Mau e Tau i ai: Roma 14:17; 8:6

(6) O LE A FA'APEFEA ONA FA'AALIA LE FILEMŪ O KERISO INA IA FA'ASOA ATU E ŌNA SO'O I LE LALOLAGI?

O le mea lea e iloa ai e tagata uma lava o O'u so'o outou, pe afai ua outou fealofani. Ioane 13:35

Mau e Tau i ai: Iakopo 3:18; Isaia 32:17

Ua 'auina atu so'o o Keriso i le lalolagi ma le fe'au o le filemū. E mafai e so'o se tasi ona fa'aali le alofa o Keriso e ala i le olaga pa'ia e filemū ma e lē fa'alialia; so'o se tasi, e ala i 'upu ma gaoioiga, o le a ta'ita'i ai se isi ina ia tu'u'ese le agasala a e gaa'i atu lona loto i le Atua, o ia lea e fa'atupu filemū.

(7) O LE Ā LE IGOA O LE A TA'U AI Ē FA'ATUPU FILEMŪ MA E FA'AMAONIA AI LO LATOU SO'OTAGA MA LE LAGI?

*Amu'ia ē fa'atupuina le filemū; auā e ta'ua i latou o atali'i o le Atua. **Mataio 5:9***

Ma "Amu'ia ē fa'atupuina le filemū; auā e ta'ua i latou o atali'i o le Atua" (Mataio 5:9). E fa'amaonia la latou so'otaga ma le lagi ona o le agaga o le filemū, ma e si'omia i latou e le manogi o Keriso. O le sasala manogi o le olaga, o le matagofie o le amio, e fa'aali atu ai i le lalolagi le fa'amaoniga o i latou o le fanau a le atua. E fa'aaloa mai fo'i i tagata sa latou fa'atasi ai ma Keriso. "O i latou uma fo'i o ē alolofa ua fanau mai i latou mai le Atua" (I Ioane 4:7). Ma "Ai se tasi ua lē iā te ia le Agaga o Keriso, e lē fai lea Mona;" a e peita'i "o i latou uma ua ta'ita'iina e le Agaga o le Atua, o atali'i i latou o le Atua" (Roma 8:9, 14). "E i ai fo'i ē ua totoe o Iakopo i nu'u e tele e pei o le sau mai iā Ieova, pei o le ua fo'i i luga o vao iti, o le mea e lē faatalitali i tagata, e lē faatalitali fo'i i le fanau a tagata" (Mika 5:7).

(8) PE A UI INA MĀFULI MAI MAUGA, O LE Ā LE FEAGAIGA OFOFOGIA MAI LE ATUA E MAFAI ONA TATOU TAPA I AI?

*Auā e mavae atu o ātu mauga, e lūlūina fo'i mauga; a o Lo'u alofa e lē mavae atu lea nai iā te oe, ma La'u feagaiga e manuia ai e lē lūlūina lea, ua fetalai mai ai Ieova o Lē alofa iā te oe. **Isaia 54:10***

Mau e Tau i ai: Isaia 55:12; Filipi 4:6, 7

'Ou te fa'afetai tele ina ua tu'ua e Keriso le matagofie o le lagi ona o se galuega ia toe fa'afo'i mai le filemū i le lalolagi lea ua fa'aleagaina e le agasala.

Li'o le Tali: **Ioe** **Lē Mautonu**

'Ou te iloa e amata le filemū i le olaga o le tagata pe a tu'u'ese le agasala a e tatala atu le loto i le alofa tunoa o Keriso. Pe a tatou filifili e fa'ataga Keriso i totonu o le loto, o le a ulufale mai le Agaga o le filemū ma mau i le loto ua fa'avaivai ma atuatuvaile ona o fetaua'iga fa'alelalolagi.

Li'o le Tali: **Ioe** **Lē Mautonu**

'Ou te lagona le fiafia i le 'avea o a'u ma so'o o Keriso ma ua tu'u mai le galuega e 'ave le fe'au o le filemū a Keriso i le lalolagi. O la'u tatalo, "Le Tama pele o i le lagi, 'ou te tapa i Lau feagaiga o le filemū. Fa'amolemole ia si'omia a'u e le sasala manogi o Keriso ina ia mafai ona 'ou fa'aalia o Lou Agaga filemū ma 'ou tu'u atu ai le fa'amaoniga o la'u so'otaga ma 'Oe. Ia e galue e ala iā te a'u, ina ia 'fai a'u ma auala i Lou filemū i le lalolagi.

Li'o le Tali: **Ioe** **Lē Mautonu**

Manatu mai Su'esu'ega

Tatalo Mana'omia

Tali o Tatalo

Amu'ia ē Sauāina

Lesona 8

O lenei lesona e fa'avae i luga o le Mataio 5:10.

(1) O LE Ā LE MANATU 'ESE FOU LONA VALU MA LE FOLAFOLAGA SA TU'U MAI E KERISO I LENĀ ASO I LUGA O LE "MAUGA O FA'AMANUIĀGA?"

Amu'ia ē sauāina ona o le amiotonu; auā e o latou le malō o le lagi. Mataio 5:10

Mau e Tau i ai: Mareko 10:29, 30; Luka 6:22, 23; 21:12; II Korinito 4:8-17

E lē o tu'u maia e Iesu i Ōna so'o le fa'amoemoe ia maua le mamalu fa'alelalolagi ma 'oa, pe maua se olaga e sa'oloto mai tofotofoga. A e peita'i ua Ia tu'u iā i latou le avanoa e savavali ai fa'atasi ma lo latou Matai i ala e fa'afiti ai e le tagata ia lava ma faitiōga, auā e lē iloa latou e le lalolagi.

(2) O AI 'AUTAU O LE A TA'ITA'IA 'AU UA SO'OFA'ATASI AI Ē FOUVALE MA Ē AMIOLEAGA O LO'O TETE'E I LE MALŌ O LE ATUA?

Auā tatou te lē tau ma tagata, a o ali'i sili, ma faipule, ma ali'i o le pouliuli o lenei lalolagi, atoa ma agaga leaga i mea o i le lagi. Efeso 6:12

Mau e Tau i ai: Roma 8:38, 39

Sa te'ena Ia, Lē na afio mai e togioa le lalolagi ua lēiloa, e ala i 'au ua tu'ufa'atasi e fili uma o le Atua ma tagata. I lenei so'otaga, ua fa'atulaga fa'atasi agelu leaga ma tagata amioleaga e tete'e i le Ali'i o le Filemū.

(3) SA FA'APEFEA LE FAIGA O KERISO E LE 'AU FOUVALE NA IA AFIO MAI E FA'ASAO?

Ua inosia ma tu'ulafoa'iina o Ia e tagata; o le tagata fa'anoanoa, ua masani fo'i ma le tigā; e peiseā'i ua 'alo 'ese mata iā te Ia; ua inosia o Ia, ma ua tatou lē manatua lava o Ia. Isaia 53:3

Mau e Tau i ai: Isaia 53:4-12; I Peteru 2:24; I Korinito 15:3; Ioane 8:59

E ui ina fa'aalia le alofa mutimutivale o le Atua iĀna fetalaiga ma gaoioiga uma, a e ona e lē fa'apei o Ia le lalolagi, sa tupu ai le faitaga'i e aupito mata'utia. Ona e Na te lē fa'atagaina ia fa'aaogā o tatou uiga leaga, ua fafaguina ai loa le matau'a ma le tete'e malosi. E fa'apea olaga o i latou uma e iā Keriso Iesu. O le a i ai pea se fete'ena'iga i le vā o le amiotonu ma le agasala, o le alofa ma le 'ino'ino, le 'upu moni ma le mea sesē.

(4) SA FA'APEFEA ONA FA'AMATALA E KERISO LE FAIGA O IA, MA LE FAIGA O LE A TU'U IĀ I LATOU UA FA'ATUMULIA E LONA AGAGA, INA IA LATOU FA'AAGA'I PEA I LUMA LE FE'AU A LONA MALŌ?

Ia outou manatua le 'upu na 'Ou fai atu ai ia te outou. E lē sili le 'au'auna i lona ali'i. Afai ua latou fa'asauā mai iā te A'u, e fa'asauā fo'i iā te outou; afai ua latou tausia La'u 'upu, latou te tausia fo'i la outou. Ioane 15:20

Mau e Tau i ai: Luka 6:40; 21:12

Pe a fa'ailoa mai e se tasi le alofa o Keriso ma le matagofie o le mamalu, o le a ia tosina 'ese mai agaga o le malō a Satani, ma o le a fafaguina ai le ali'i o le pouliuli ia tete'e malosi i ai. O i latou uma ua fa'atumulia e le Agaga o Keriso, o le a fa'afeagai ma sauāga ma faitiōga. O le a suia uiga o sauāga e fa'atatau i le taimi, a e o le fa'avae e pogai mai ai o le mea lava lea e tasi na fasiotia le 'au filifilia a le Atua talu mai aso o Apelu.

(5) O LE Ā LE FAUTUA A IAKOPO E FA'ATATAU I LE TOFOTOFOINA O LE FA'ATUATUA E TUPU AI LE ONOSA'I MA LE FA'A'ATO'ATOAINA O LA TATOU AMIO?

*O'ū uso e, ia outou manatu, o le mea e fiafia tele ai pe a maua outou i tofotofoga 'ese'ese. **Iakopo 1:2***

Mau e Tau i ai: Galuega 5:41; Luka 6:23; II Korinito 12:10; Filipi 1:29

A o sa'ilī tagata ia ō gatasi ma le Atua, o le a latou iloa pea le tigā o le satauro. O malō sa pule ma agaga leaga uma o i tulaga maua luga o le a tutū fa'atasi e tete'e i latou uma e gaua'i atu ma le usiusita'i i tulafono a le lagi. O lea e tatau ona maua e so'o o Keriso le fiafia mai sauāga, auā o le fa'amaoniga lea o lo'o latou mulimuli i tulaga'a'ao o lo latou Matai.

(6) PE A TATOU FA'AFEAGAI MA TOFOTOFOGA MA FA'AFITAU O SAUĀGA, O LE Ā LE FOLAFOLAGA E MAFAI ONA TATOU TAPA I AI?

*Amu'ia outou pe a itagia outou e tagata, pe a fa'ate'a'eseina fo'i outou, ma fa'aleagaina e i latou, ma lafoa'iina lo outou igoa, pei o se mea leaga, ona o le Atali'i o le tagata. Ia outou 'oli'oli i lea aso, ma ia outou osooso ma le fiafia; auā fa'auta, o i le lagi lo outou tau i tele; auā sa fa'apea ona fai e o latou tamā i perofeta. **Luka 6:22, 23***

Mau e Tau i ai: Mareko 10:30; Eperu 10:34; I Peteru 3:14

E le'i folafola e le Ali'i o le a saogalemū Ōna tagata mai tofotofoga, a e ua la folafolaina le mea e sili atu le lelei. Ua fetalai o Ia, "E pei o ōu aso fo'i e fa'apea lou malosī" (Teuterenome 33:25). Ma "O Lo'ū nei alofa tunoa e lava lea e fesoasoani iā te 'oe; auā o le vaivai e fa'a'atoina ai Lo'ū mana" (II Korinito 12:9). Pe a vala'auina 'oe ia uia le ogāumu 'a'asa mo Lona sua'fa, o le a fa'atasi pea Iesu i ōu tafatafa fa'apei ona i ai o Ia ma talavou fa'amaoni e to'atolu i Papelonía. O ē alolofa i lo latou Fa'aola o le a fa'afiafiaina i so'o se avanoa e tofusia ai ma Ia i le fa'alumaina ma faitiōga.

(7) O AI SA LAPATA'I TAGATA O LE ATUA UA SAUĀINA INA IA FEFEFE AI, E SILI ATU I LO O I LATOU O LE A FA'ATIGĀINA MA FASIOTIA LE TINO?

*'Aua fo'i tou te matata'u i ē fasioti le tino, a e latou te lē mafaia ona fasioti le agaga; a e lelei ona outou matata'u i lē ua mafai ona fano iā te ia le agaga atoa ma le tino i Kēna. **Mataio 10:28***

Mau e Tau i ai: Isaia 51:7, 12; Tanielu 3:17-25; Luka 12:4, 5; Fa'aaliga 2:10

I augātupulaga uma o lo'o sauāina pea e Satani tagata o le Atua. Ua ia fa'atigāina ma fasioti i latou, a e ua 'avea o tagata ua manumalō, ma fa'aali mai ai ona o lo latou fa'atuatua tumau, Lē tasi e sili atu le malosī i lo Satani. E mafai e Satani ona fa'atigāina ma fa'aumatia le tino, peita'i e lē mafai ona tagolima i le ola o lo'o fa'alilo e Keriso i le Atua. E na te mafai ona tu'u i le falepuipui, a e lē mafai e ia ona saisaitia le agaga. E mafai e latou ona tepataula'i mai le pogisā i le mamalu, ma fa'apea atu, "O lo'ū manatu e lē tatau ona fa'atusaina le tigā i nei ona pō ma le manuia atali e fa'aalia mai iā te i tatou" (Roma 8:18). Ma "O lo matou puapuagā māmāsagia ma le vave mavae, e tupu mai ai mo i matou le manuia mamafa e matuā silisili 'ese lava ma le fa'avavau" (II Korinito 4:17).

(8) O LE Ā LE MEA O LE A FA'AALI MULIMULI MAI IĀ I TATOU PE A TATOU TUMAU MA LE ONOSA'I E LAVĀTIA PUAPUĀGA MA SAUĀGA, E ALA I LE ALOFA TUNOA O KERISO?

*E fa'apei ona tofusia o outou fa'atasi i tigā o Keriso, ia outou 'oli'oli ai, ina ia fiafia outou ma le 'oli'oli tele pe a fa'aalia mai Lona mamalu. **I Peteru 4:13***

Mau e Tau i ai: I Peteru 1:7; I Korinito 3:13; Roma 1:17; Mareko 13:11

E ala mai tofotofoga ma sauāga, o lo'o fa'aalia mai ai le mamalu - le uiga - o le Atua i Ōna tagata filifilia. O lo'o a'oa'oina ma fa'atonuina i le a'oga a Keriso le ekalesia a le Atua, a e ua itagia ma sauāina e le lalolagi. O lo'o savavali i latou i auala vāapiapi o le lalolagi, a e o lo'o fa'amamāina i latou i le afi o fa'afitauli. O le a mulimuli pea iā Keriso e ui ina faigatā fete'ena'iga; e latou te lavatia fa'anoanoāga ma le fa'afitia o latou lava, peita'i o nei tigā uma e a'oa'o mai ai le leaga o le agasala, a e va'ai atu ma le 'ino'ino i ai.

Pe a fa'asoa latou i puapuagā o Keriso, o le a i'u ai i le 'avea ma soa o Lona mamalu. Sa va'aia e le perofeta i le fa'aaliga pa'ia le manumalō o tagata o le Atua, ma fa'apea mai ai, "Na 'ou iloa atu fo'i ua peiseā'i o se sami tioata ua fefilo'i ma le afi; o i latou fo'i na manumalō i le manu fe'ai, ma lona fa'atagata, ma lona fa'aailoga, ma le faitau aofa'i o lona igoa, ua tutū i latou i le sami tioata, ua iā te i latou kitara a le Atua. Ua latou pepese i le pese a Mose le 'au'auna a le Atua, ma le pese a

le Tama'i Mamoe, ua fa'apea atu, Le Ali'i e, le Atua e Ōu le malosi uma lava, ua tetele Āu galuega e ofo ai; e tonu ma fa'amaoni Ōu ala, le Tupu o le 'au pa'ia e" (Fa'aaliga 15:2, 3). Ma "O i latou ia o ē ō mai nai le puapuagā tele, ua ta fo'i o latou ofu, ma ua fa'asinasinaina o latou ofu i le toto o le Tama'i Mamoe. O le mea lea ua latou i luma ai o le nofoāli'i o le Atua, ua latou 'au'auna fo'i iā te Ia i Lona malumalu i le ao ma le po; o Lē ti'eti'e fo'i i le nofoāli'i e mau ma i latou"(Fa'aaliga 7:14, 15).

(9) PE A O'O I LE TAIMI O LE I'UGA MA O LE A FEAGAI TAGATA O LE ATUA MA SAUĀGA ONA O LO LATOU FA'ATUATUA, O LE Ā LE AVANOA O LE A MAUA AI MO I LATOU?

*E o'o ia mea iā te outou e fai ma molimau. **Luka 21:13***

Mau e Tau i ai: Luka 21:12; Mareko 13:11

(10) A O TATOU LAVATIA PEA FA'AFITAU LI ONA O TATOU O LE FANAU A LE ATUA, O LE Ā LE MEA E MAFAI ONA TATOU MAUA AI LE FILEMŪ I LE ILOA UA UMA ONA FA'ATAUNU'U E KERISO?

*Ua uma ona tu'u'eseina e Ia o ali'i sili ma faipule, ona fa'aalia mai lea o i latou ia iloa uma, ua manumalō o Ia iā te i latou i lea lava mea. **Kolose 2:15***

Mau e Tau i ai: Efeso 1:20, 21; Ioane 10:28; II Korinito 12:9

E lē tu'u mai e Iesu i Ōna so'o le fa'amoemoe ia maua le mamalu po o 'oa fa'alelalolagi, a e ua ofo iā i latou le avanoa e savavali ai fa'atasi ma Ia i le ala na Ia uia e lē fa'apito, ma na fa'afitia ai lava o Ia. Ua 'ou iloa pe a 'ou ola i le olaga pei ona soifua ai Keriso - i le matagofie o le mamalu, o le a 'avea a'u ma fili o ē amioleaga.

Li'o le Tali: **Ioe** **Lē Mautonu**

Pe a vala'auina a'u e fetaia'i ma sauāga, 'ou te tatalo, e ala i e alofa tunoa o le Atua, ia Ia aumaia le malosi 'ou te puapuagātia ai mo Ia. O la'u tatalo ia fa'aaogā lenei avanoa ia molimau ai mo Ia ma ia fa'amamaluina ai Lona suafa.

Li'o le Tali: **Ioe** **Lē Mautonu**

'Ou te fa'atatuina lenei galuega maoa'e o se avanoa tāua ma, e fa'apei o talavou Iutaia e to'atolu i Papelonía, o le a 'ou fa'apea atu ma le mautinoa, "E mafai e lo'u Atua ona laveda'i a'u pe a Ia finagalo i ai; a e a leai, 'ou te lē ifo i atua o lenei lalolagi i le mafaufau pe se mea e fai, e ui ina i'u i le fa'aumatia ai o a'u."

Li'o le Tali: **Ioe** **Lē Mautonu**

Manatu mai Su'esu'ega

Tatalo e Mana'omia

Tali o Tatalo

Amu'ia Outou pe a Latou 'Upu Leaga iā te Outou

Lesona 9

E fa'avae lenei lesona i luga o le Mataio 5:11, 12.

(1) O LE Ā LE MANATU 'ESE FOU E LONA IVA MA LE FOLAFOLAGA SA TU'U MAI E KERISO I LUGA O LE "MAUGA O FA'AMANUIĀGA?"

*Amu'ia outou pe a latou 'upu leaga, ma fa'asauā iā te outou, ma latou tu'ua'iina pepelo outou i mea leaga uma ona o A'u. Ia outou 'oli'oli ma fiafia lava; auā o i le lagi lo outou tavi e tele; auā na fa'apea ona latou fa'asauā i perofeta ē na muamua iā te outou. **Mataio 5:11-12***

O le uiga o le "'upuleagaina" o le so'onafai tau i 'upu. O 'upu e tai tutusa uiga o le ta'usalaina, faitio, osofa'i, fa'asē, tu'ua'ia'ia, fa'aleaga, ta'uvalea, masalosologa, ta'uleaga, po o le fa'alata.

(2) ONA O LONA MA'ELEGĀ MO LE LELEI O KERISO, SA FA'APEFEA LE FAIGA O LE TUPU O TAVITA?

*Auā ua fa'alumaina lava a'u ona o 'Oe; ua ufitia o'u mata i le mā. 8 Ua fai a'u ma tagata āumau i o'u uso, ma tagata 'ese i le fanau a lo'u tinā. 9 Auā ua 'aina lava a'u i le mana'o tele i Lou fale; ua o'o mai fo'i iā te a'u faifaiga a ē na faifaia 'Oe. **Salamo 69:7-9***

Mau e Tau i ai: Salamo 22:6-8; 44:22; Ieremia 15:15; Ioane 15:21, 22

Talu mai le taimi o lona pa'ū, o lo'o galue pea Satani e tau fa'asesē. A o ia fa'aali sesē le Atua, e fa'apea ona ia fa'ailoa sesē mai fo'i, e ala i ōna sui, le fanau a le Atua.

(3) A O TULA'I O IA I LUMA O HEROTA, O LE Ā LE ITU'AIGA FA'ASAUĀ NA LAVATIA E KERISO ONA E TUMAU LONA USIUSITA'I I LE AMIOTONU?

*Ua fa'alēaogāina o Ia e Herota ma lana 'au, ma tauēmu mai iā te Ia, ua latou fa'aofu fo'i iā te Ia i le ofu pupula, ona toe au mai ai lea o Ia iā Pilato. **Luka 23:11***

Mau e Tau i ai: Luka 22:64, 65; Mataio 27:27, 30; Ioane 19:5

E leai se tasi o lo'o savavali fa'atasi ma tagata o lenei lalolagi ua sili atu ona ta'uleagaina nai lo o le Atali'i o le tagata. Sa 'amusia ma ulagia o Ia ona sa mautū Lona usiusita'i i fa'avae o le tulafono pa'ia a le Atua. Sa 'inosia o Ia a e leai se mafua'aga. Peita'i na tula'i o Ia ma le filemū i luma o Ōna fili, ua ta'u atu o le fa'alumaina o se vaega o le tala'aga a le Kerisiano, ma na Ia fautua i Ōna so'o e uiga i mafatiāga ma sauāga o le a o'o mai, ia 'aia ne'i fa'avaivai ai.

(4) E UI INA 'UPULEAGAINA MA TA'UVALE I TATOU ONA O KERISO, PE AFAI E TA'ULELEIA O TATOU UIGA MA AMIO, O LE Ā LE MEA O LE A I'U I AI?

*Ia lelei a outou amio i luma o nu'u 'ese, o le mea latou te fai 'upu leaga ai iā te outou, peiseā'i o tagata amio leaga outou, latou te va'ava'ai ai i a outou amio lelei, ona latou vivi'i atu ai lea i le Atua i le aso e asiasi mai ai. **I Peteru 2:12***

Mau e Tau i ai: I Peteru 2:11; Mataio 5:16; Tito 2:8

Atonu o le a fa'a'ele'elea le igoa lelei e 'upu tau fa'aleaga, a e peita'i e lē mafai ona a'afia ai le amio auā e i lalo o le tausiga a le Atua. A tatou lē fa'atagaina le agasala, o le a leai se malosī, pe tauletataga pe fa'aSatani, e mafai ona aumaia se 'elea i luga o le agaga.

(5) PE A 'UPULEAGAINA I TATOU MA O'O MAI MAFATIĀGA O TOFOTOFGA ONA UA TA'USESĒINA I TATOU, O AI E MAFAI ONA TATOU TAPA I AI E FA'AMALOSIA LO TATOU FA'ATUATUA?

Ia va'ava'ai atu iā Iesu o Lē na te ta'ita'iina ma Lē na te fa'a'ato'atoaina le fa'atuatua; o Lē na onosa'i i le satauro, na fa'atauva'a iā te Ia le mā, ona o le 'oli'oli sa tu'u i Ōna luma, ua nofo fo'i o Ia i le itū taumatau o le nofoāli'i o le Atua.

Eperu 12:2

E te leoleoina ia fīfilemū lava le ua mausalī lona loto; auā ua ia fa'atuatua iā te 'Oe. 4 Inā fa'atuatua ia outou iā Ieova e fa'avavau lava; auā o loa Ieova, o le papa e fa'avavau ia. Isaia 26:3-4

Mau e Tau i ai: II Korinito 12:10; Mika 7:7

E leai se 'ese'esega i le loto o le tagata o lo'o tumau i le Atua mai le itulā na feagai ai ia ma tofotofoga e sili ona mafatia ma fa'avaivai ai, ma le taimi a o maua lona tulaga, ma sa foliga mai ua fa'amanuiaina ma ua i ōna luga le malamalama o le Atua. O āna 'upu, āna fuafuāga, āna gaoioiga, atonu o le a fa'aalia mai ma fa'auiga sesē, a e o le a lē fa'apopole ai ia ona e tele atu le tūa o mea o lo'o fuafua i ai. E fa'apei o Mose, sa fa'amalosia o ia "pei o sē iloa atu i Lē e lē o va'aia" (Eperu 11:27); e le'i manatu "i mea ua va'aia, a o mea e lē va'aia" (II Korinito 4:18).

(6) PE A TA'U FA'ASESĒ A TATOU FUAUFUĀGA MA GAOIOIGA, O LE Ā LE MEA E MAFAI ONA TATOU FA'ALAGOLAGO I AI MA LE MAUTINOĀ E SAU LE ASO O LE A FA'AALIA MAI AI?

Auā e leai se mea lilo e lē fa'aalia; e leai fo'i se mea natia e lē fa'ailoa, a e i'u ina fa'aalia. Luka 8:17

Mau e Tau i ai: Luka 12:2, 3; Failauga 12:14; Mataio 10:26; I Korinito 4:5

E silafia e Keriso mea uma o lo'o lē malamalama ai ma o lo'o fa'auiga sesē e tagata. E mafai lava e Lana fanau ona fa'atalitali ma onosa'i ma le fa'atuatua, e ui ina fa'atauemu mai ma inosia i latou; e leai se mea lilo o le a lē fa'aalia, ma o latou uma e fa'amamaluina le Atua o le a fa'apea ona fa'amamalu e Ia i luma o tagata ma le 'au agelu.

(7) O LE Ā LE MEA O LE A FA'APUAPUAGĀTIA AI I LATOU UMA E NAUNAU E OLA I SE OLAGA E FA'APA'IAINA IĀ KERISO IESU?

O i latou uma fo'i o ē loto ina nonofo ma le amio Atua iā Keriso Iesu, e sauāina i latou. II Timoteo 3:12

Mau e Tau i ai: Ioane 16:33; 17:14

Na fetalai Iesu, "Pe a latou 'upu leaga, ma fa'asauā iā te outou,... ia outou 'oli'oli ma fiafia lava" (Mataio 5:11, 12). Ma sa Ia fa'asino Lana 'au fa'alogologo i perofeta, o ē sa tautala atu i le suafa o le Ali'i, o "fa'aa'oa'o i le fa'ato'atoa i le leaga, atoa ma le onosa'i" (Iakopo 5:10). Sa fasiotia Apelu, o ia o le ulua'i Kerisiano o le fanau a le Atamu. Na savavali Enoka ma le Atua, ma sa lē iloa o ia e le lalolagi. Sa tauaifai ma ulagia Noa e le lalolagi, na ta'ua o se fiaatua ma se tagata fa'atupu fefe. "Na tofotofoina isi i tauemuga, ma sasaina, atoa ma noanoataga, ma tu'uina i fale puipui;" ma " na fa'ataugāina nisi, ua lē talia e i latou le olataga, ina ia maua e i latou le toe tū mai e sili ona lelei" (Eperu 11:36, 35).

I so'o se tupulaga, sa fa'apea lava ona ta'uleagaina ma sauāina 'avefe'au filifilia a le Atua, a e ui ina puapuagātia sa fa'asalalauina i nu'u mamao uma le malamalama o le tala lelei a le Atua. O lo'o tula'i mai so'o o Keriso ma 'ave aga'i pea i luma lea lava galuega, ma ua iloa lelei fo'i o le a lē mafai e le fili ona faia se mea e tete'e ai le 'upu moni, a e ua fai mo le 'upu moni. Sa fuafua lava e le Atua o le a aumaia i luma le 'upu moni ma o le a 'avea ma matā'upu e su'esu'e ma talanoaina, e ui lava ina tele le tete'e ma le ino'ino mai. E tataua ona fafaguina mafau o tagata; o finauga ma fete'ena'iga uma, o taumafaiga uma ina ia leai se sa'olotoga o le loto fuatiaifo, o tu'ua'iga ma faitiōga, o ala ia a le Atua e fa'ate'ia ai mafau o tau fiamomoe.

(8) PE A TOFOTOFOINA LO TATOU FA'ATUATUA E ALA I SAUĀGA MA, E ALA I LE ALOFA TUNOA O KERISO O LE A TATOU TUTUMAU PEA, O LE Ā LE P'UGA O LE A O'O I AI?

O le tofotofoina fo'i o lo outou fa'atuatua, e silisili ona aogā i le auro e fa'aumatia, e ui lava ina tofotofoina i le afi, e 'avea ma mea e i'u i le vi'iga, ma le mamalu, ma le manuia pe a fa'aalia mai Iesu Keriso. I Peteru 1:7

Mau e Tau i ai: I Peteru 4:13; I Korinito 3:13

E fa'afia ea ona va'aia lenei i'uga i le tala fa'asolopito o 'avefe'au a le Atua! Ina ua fasiotia Setefano ona o le fa'atonuga a le Fono Faitulafono, e le'i fa'agata ai i inei le fuafuāga a le tala lelei. O le malamalama o le lagi ssa fa'apupulaina ai lona fofoga, o le alofa fa'alelagi sa mānavaina mai lana tatalo, na 'avea ma ū ma'ama'ai i loto o le 'au Faitulafono, ma sa 'avea ai Saulo le Faresaio o se mea faigaluega e tau'ave le suafa o Keriso i nu'u fa'apaupau ma tupu, fa'apea le fanauga a Isara'elu.

I se taimi mulimuli, a o i ai le aposetolo matua o Paulo i lona fale sa puipuia ai i Roma, na tusi ai ia e fa'apea, "O isi fo'i ua tala'i ia Keriso ma le matau'a lava, ma le finau vale,... e lē faia ma le fa'amaoni, o lo'o o manatunatu i latou e fa'aopoopo ai le puapuagā i lo'u noanoataga;... e ui lava i togafiti uma, pe fa'atagā fai, pe fai ma le fa'amaoni, ua tala'iina atu ai Keriso" (Filipi 1:15-18). E ala mai le i ai o Paulo i le falepuipui, sa fa'asalalau i nu'u mamao le tala lelei, ma e tele agaga na maua mo Keriso mai maota o le 'au Kaisara. E ui i taumafaiga a Satani ia fa'aumatia le alu o le tala lelei, o le fatu "e lē pala" o le Afioga a le Atua, e "ola ma ua tumau e o'o i le fa'avavau" (I Peteru 1:23) ua totōina i loto o tagata; ma e ala i sauāga ma le ta'uleagaina o Lana fanau, a e o le suafa o Keriso ua fa'alauteleina ma e tele agaga ua lavea'iina.

(9) O LE Ā LE MEA O LO'O ŌLE MAI KERISO E TATOU TE FAIA MO I LATOU O Ē 'UPULEAGAINA MA FA'ASAUĀ IĀ I TATOU?

A 'Ou te fai atu A'u iā te outou, ia outou alolofa atu i ē ua ita mai iā te outou, ia outou fa'amanuia atu i ē ua fetu'u mai iā te outou, ia outou agalelei atu i ē ua 'ino'ino mai iā te outou, ia outou tatalo fo'i mo ē ua tu'ua'i fua mai ma fa'asauā mai iā te outou. Mataio 5:44

Mau e Tau i ai: Fa'ata'oto 25:21, 22; Luka 6:27, 28, 34-35; Roma 12:14, 20, 21

(10) O LE Ā LE FOLAFOLAGA A KERISO MO I LATOU O Ē FA'AMAONI PEA A O TU'UA'IA ONA O LONA SUAFA?

'Aua lava e te fefe i mea o le a e tigā ai. Fa'auta, o le a tu'uina atu ni o outou e le ti'apolo i le fale puipui, ina ia tofotofoina ai outou; e pō agafulu fo'i e puapuagātia ai outou. Ia e fa'amaoni se'ia o'o i le oti, ona 'Ou avatu ai lea iā te oe o le pale o le ola. Fa'aaliga 2:10

Mau e Tau i ai: Galuega 14:22; Iakopo 1:12; Mataio 5:12; Mareko 10:30; I Peteru 3:14

E matuā sili le tau i o i le lagi mo i latou o ē o lo'o molimau mo Keriso e ui i sauāga ma mafatiāga. A o sa'ili pea e tagata mea lelei fa'alelalolagi, o lo'o fa'asino Iesu i a latou tau i fa'alelagi, peita'i Na te lē o tu'u mea uma o le ola o i lumana'i; e amata le tau i lalo nei. Sa fa'aali le Ali'i iā Apera'amo i taimi anamua ma fetalai mai, "O A'u nei o lou talitā, o lou tau i e matuā tele lava" (Kenese 15:1).

O le tau i lea mo i latou uma e mulimuli iā Keriso. O Ieova Imanuelu - ua iā te Ia "le 'olua uma o le poto atoa ma le malamalama, ua lilo ai," o lo'o mau ai i totonu "iā te Ia le tumu uma lava o le itū Atua ua i Lona tino" (Kolose 2:3, 9) - e aumaia le tigālofa ma Ia, ina ia iloa Ia, ia tasi ma Ia, a o matala atu le loto e talia Ōna uiga; ia na iloa Lona alofa ma le mana, ia na maua 'oa e lē masa'ilia a Keriso, ia malamalama lelei ma manino "le uiga o le lautele, ma le umi, ma le loloto, ma le maualuga, ia iloa fo'i le alofa o Keriso ua silisili 'ese e lē mailea, ia fa'atutumuina outou i le tumu uma lava o le Atua" (Efeso 3:18, 19) - "O le tofi lenā o 'au'auna a Ieova, o a latou amiotonu fo'i mai iā te A'u lea, ua fetalai mai ai Ieova" (Isaia 54:17).

(11) E FA'APEFEA ONA 'ANA'ANA LE 'AU FA'AMAONI I LE MALŌ O LE ATUA A O I LENEI LALOLAGI, E UI INA O SAUĀINA I LATOU?

Auā o le malō o le Atua, e lē o mea e 'ai ma mea e inu; a o le amiotonu, ma le filemū, ma le 'oli'oli i le Agaga Pa'ia. Roma 14:17

Mau e Tau i ai: Luka 17:21; Mataio 12:28; Mareko 9:1; 10:14, 15

O le 'oli'olisaga lenei sa fa'atumulua ai loto o Paulo ma Sila a o la tatalo ma pepese vi'iga i le Atua i lea vaeluāga pō i le falepuipui i Filipi. Sa fa'atasi ai Keriso i o la tafatafa, ma o le malamalama o Lona afio ai sa fa'apupulaina ai le pogisā e ala i le mamalu o maota o le lagi. Mai Roma, sa tusi Paulo a o ia va'aia le salalau o le tala lelei, e ui ina o lo'o saisaitia o ia, "O le mea lea ua 'ou 'oli'oli ai, e moni 'ou te 'oli'oli ai lava" (Filipi 1:18). Ma sa toe fa'aleoina fetalaiaga a Keriso mai

luga o le mauga i le fe'au a Paulo i le ekalesia i Filipi, a o feagai latou ma sauāga, "Ia outou 'oli'oli i le Ali'i 'aia le aunoa; 'ou te toe fai atu, ia outou 'oli'oli" (Filipi 4:4).

'Ou te iloa talu mai lona pa'ū, o lo'o galue pea Satani e tau fa'asesē. E fa'apei ona ia ta'usesē le Atua, o le a fa'apea ona ia ta'usesē le fanau a le Atua e ala i ōna sui.

Li'o le Tali: **Ioe** **Lē Mautonu**

Ua 'ou malamalama e le'i i ai se tasi ua sili ona ta'uileagaina mai so'o se tagata nai lo o Keriso. Sa 'amusia ma ulagia o Ia ona o Lona usiusita'i mautū i fa'avae o le tulafono pa'ia a le Atua, ma o la'u tatalo ia fa'apea ona i ai lea usiusita'i i lo'u olaga.

Li'o le Tali: **Ioe** **Lē Mautonu**

'Ou te iloa o 'upu tau fa'aleaga e tau fa'apogisā ai le manatu i le tagata, a e peita'i e lē mafai ona fa'a'ele'elea ai le amio, auā o le mea lea e i le tausiga a le Atua. A tatou lē fa'atagaina le agasala, e leai se malosia fa'aletagata pe fa'a-satani e mafai ona aumaia se 'elea i luga o le agaga.

Li'o le Tali: **Ioe** **Lē Mautonu**

Ua 'ou iloa pe a ta'uileaga fa'alētatau i tatou ona o Keriso, o se avanoa lea e molimau atu ai i le vi'iga, fa'ane'ene'ega, ma le mamalu o Iesu Keriso.

Li'o le Tali: **Ioe** **Lē Mautonu**

'Ou te matuā fa'afetai tele iā Keriso ona ua Ia tu'ua le mamalu o le lagi a e afio mai i le lalolagi ma ua ta'uileaga ma sauāina ai ina ia mafai ona 'ou ola.

Li'o le Tali: **Ioe** **Lē Mautonu**

O la'u tatalo pe a fa'aleagaina a'u ona o Keriso, ia 'ou mafai ona 'ou aumaia le mamalu iā te Ia, tusa pe 'ou te oti ai. Auā e tele le tau i le lagi mo i latou o lo'o molimau mo Keriso, e ui i sauāga ma faitioga.

Li'o le Tali: **Ioe** **Lē Mautonu**

Manatu mai Su'esu'ega

Tatalo e Mana'omia

Tali o Tatalo

O le Masima o le Lalolagi

Lesona 10

E fa'avae lenei lesona i le Mataio 5:13.

(1) O LE Ā LE MANATU FOU LONA SEFULU MA LE LAPATA'IGA NA TU'U MAI E KERISO I LUGA O LE "MAUGA O FA'AMANUIĀGA?"

O outou, o le masima o le lalolagi outou; a e afai e magalo le masima, pe se ā se mea e fa'amāi a'i? E leai se mea e toe aogā ai, na ona lafoa'iina i fafo, ma solia e tagata. Mataio 5:13

O le masima e aogā mo le fa'asaoina o mea; ina ua fa'aigoa e le Atua Lana fanau o le masima, sa Ia a'oa'o e fa'atatau i Lana fuafuāga e tu'u latou i lalo o Lona alofa tunoa ina ia mafai ona 'avea ai i latou ma sui i le fa'asaoina mai o nisi.

(2) O LE Ā LE GALUEGA FA'APITOA UA TU'U MAI E LE ATUA I ŌNA TAGATA FILFIFILIA MA E FA'AFIA ONA TU'U MAI?

Ia outou pepese atu iā Ieova, ia outou fa'afetaia Lona suafa; ia outou tala'i atu Lana fa'aolataga i lea aso ma lea aso. Ia outou ta'uta'u atu Lona mamalu i nu'u 'ese, ma Ōna vavega i nu'u uma lava. Salamo 96:2, 3

Mau e Tau i ai: Isaia 58:6-11; 49:6; 60:1-3; Mataio 28:19, 20

E lē na o le pogai sa filifilia ai e le Atua tagata i luma o le atulaulau atoa ona ia 'avea i latou o Ōna atali'i ma afa'ina, a e peita'i ina ia mafai ona maua e le lalolagi, e ala iā i latou le alofa tunoa e aumaia le fa'aolataga (Tito 2:11). Ina ua filifili e le Ali'i Aperamo, e lē na o na faia o ia ma uō fa'apitoa a le Atua, a e ia 'avea ma se auala mo avanoa fa'apitoa sa fa'anaunau o Ia e fa'ae'e i luga o malō.

(3) O LE Ā LE AUALA E FA'AAOGĀ E LE ATUA E FA'APA'IAINA AI ŌNA TAGATA INA IA MAFAI AI ONA 'AVEA I LATOU MA "MASIMA" AOGĀ I LE LALOLAGI?

Ia e fa'apa'iaina i latou i Lau 'upu moni; o Lau afioga o le 'upu moni lea. Ioane 17:17

Mau e Tau i ai: Ioane 15:3; Efeso 5:26; Salamo 19:7-9; I Peteru 1:22, 23

Na fetalai Iesu i lenā tatalo mulimuli ma Ōna so'o a e le'i fa'asatauroina o Ia, "'Ou te fa'apa'ia fo'i A'u e sui a'i i latou, ina ia fa'apa'iaina o i latou i le 'upu moni" (Ioane 17:19). Ia fa'apea Kerisiano o ē ua fa'amamāina e ala i le 'upu moni ona maua e i latou uiga a ē ua fa'asaoina, ma ia tausi le lalolagi ina ia sao mai le amioleaga.

(4) O LE Ā SE AUALA AOGĀ E MAFAI AI ONA FAI TATOU MA MASIMA I LE LALOLAGI?

Ua tali atu Ia, ua fa'apea atu iā te i latou, O le tagata e lua ona ofu tino, ia avane iā te ia e leai sona ofu; o lē ua iā te ia mea e 'ai, ia fa'apea fo'i ona fai. Luka 3:11

Mau e Tau i ai: Mataio 25:35; Fa'ata'oto 14:31; 19:17; Iakopo 1:27

E tatau ona fefiloi le masima ma le mea o lo'o fa'aopoopo i ai; ia ati ma fefiloi fa'atasi ina ia sao lelei ai. E fa'apea fo'i feso'ota'iga a le tagata to'atasi ma so'otaga a le to'atele ina ia pā'ia ai tagata e le mana fa'aola o le tala lelei. E lē fa'asaoina ta'i motu o tagata, a e o tagata ta'ito'atasi, auā e sili le malosi o le fealoa'iga a le tagata to'atasi. E tatau ona tatou fa'afelata'i ma i latou e tatou te naunau ia maua le manuia.

(5) E UI MAI IĀ TE AI LE AUALA O LE A MAUA AI LE MASIMA LELEI O LE MANA FA'ALIUA E FA'ASALALAU ATU I LE LALOLAGI?

A e maua e outou le mana, pe a afio ifo le Agaga Pa'ia i luga iā te outou; e fai fo'i outou ma molimau iā te A'u i Ierusalem ma Iutaia uma lava, ma Samaria, e o'o lava i le tulu'iga o le lalolagi. Galuega 1:8

Mau e Tau i ai: Kalatia 5:22, 23; I Ioane 3:24; II Timoteo 1:14

O le tofoga o le masima e fa'asino i le manatāua o le Kerisiano - o le alofa o Iesu i le loto, o le amiotonu o Keriso e fa'atumulua ai le olaga. O Lona alofa e mafa'asalalau ma e ma'elegā; pe a i ai i totonu o i tatou o le a mafai ona fa'asosolo atu i isi. Ia tatou fa'alatalata atu iā i latou se'ia mafanafana o latou loto ona o tatou uiga alofa ma mea lelei tatou te faia. O le so'o moni e fa'asoa atu le managalua ia atia ma tu'u atu ai le malosi fou i agaga sa ia galue ai ma le fa'amaoni. E lē o se malosi mai lea tagata, a e o le mana o le Agaga Pa'ia e faia le galuega o le suiga.

(6) O LE Ā LE FETALAIGA A KERISO IĀ I LATOU O Ē TULAGA MALŪLŪ MA E PEI O LE MASIMA UA LĒ TOFO MASIMĀ I LE LALOLAGI?

Ua 'Ou iloa āu galuega, e te lē ma'alili, e te lē vevela fo'i; 'Ou te loto ina ia e ma'alili, pe vevela; o lenei, ua e fa'alēogalua, e te lē ma'alili, e te lē vevela fo'i, o le mea lea 'Ou te lua'i atu ai iā te oe i Lo'u gutu. Fa'aaliga 3:15, 16

Mau e Tau i ai: Mareko 9:49, 50; Levetiko 2:13; Kolose 4:6

Sa fa'aopoopo atu e Iesu lenei lapata'iga: "Afai e magalo le masima, pe se ā se mea e fa'amāi a'i? E leai se mea e toe aogā ai, na ona lafoa'iina i fafo, ma solia e tagata" (Mataio 5:13).

A o latou fa'alogu atu i fetalai a Keriso, sa latou va'ai atu i le pa'e o le masima i le auala ina ua tiā'i fafo ona ua leai sona aogā. O lea ua fa'asino moni i le tulaga o le 'au Faresaio ma le 'a'afiāga o la latou talitonuga i mafutaga uma. E fa'asino i olaga o agaga ta'ito'atasi ua mavae 'ese mai ai le mana o le alofa tunoa o le Atua ma ua i'u ina malūlū ma ua lē i ai Keriso. Po o le ā lava lana taleni, o lea tagata e itagofie ma ua leai se isi e fiafia i ai. O le itu'aiga agaga lea sa fetalai mai i ai Keriso, "'Ou te loto ina ia e ma'alili, pe vevela; o lenei, ua e fa'alēogalua, e te lē ma'alili, e te lē vevela fo'i, o le mea lea 'Ou te lua'i atu ai iā te oe i Lo'u gutu" (Fa'aaliga 3:15, 16).

(7) O LE Ā LE MEA UA FETALAI KERISO IA TATOU FAIA IA TOFO LELEI AI LE MASIMA, INA IA MAFAI AI ONA ATINA'E IĀ I TATOU UIGA FA'A-ATUA MA IA FUA LELEI AI I LENEI LALOLAGI LĒ TALITONU?

Inā tumau ia o outou iā te A'u, o A'u fo'i iā te outou. Fa'apei o le lā e lē mafai ona fua pe a na o ia, pe afai e lē mau i le vine; a fa'apea fo'i outou, pe afai tou te lē tumau iā te A'u. Ioane 15:4

Mau e Tau i ai: Kalatia 2:20; Ioane 6:56; 9:33; Efeso 3:17

Pe a leai se fa'atuatua ola iā Keriso e 'avea ma lou lava Fa'aola, o le a lē mafai ona tatou faia se mea ia iloa ai e le lalolagi lē talitonu le uiga o le Kerisiano moni. E lē mafai ona tatou avatu i nisi mea e lē o iā i tatou fo'i. Pe a o tatou olaga e fa'amaoni ma e fa'apa'iaina mo Keriso, o le a mafai ona tatou tosina malosi mai ai mo le manu'a ma le fa'aeaina o le aigā tagata.

(8) E TUSA AI MA LE FA'ATONUGA A LE ATUA, E FA'APEFEA LA TATOU FAIGA O ISI INA IA FA'AILOA ATU AI UA FANAU TATOU IĀ TE IA MA E 'AVEA AI PEA TATOU MA MASIMA LELEI?

Le 'au pele e, ia tatou fealofani; auā mai le Atua le alofa; o i latou uma fo'i o ē alolofa ua fanau mai i latou mai le Atua, ua iloa fo'i e i latou le Atua. I Ioane 4:7

Mau e Tau i ai: I Ioane 4:21; 2:10; 3:17, 18; I Tesalonia 4:9

Pe a leai se galuega, leai se alofa moni, leai se gaoioiga, o le a leai fo'i se malosi e fesoasoani ai, leai se so'otaga ma le lagi, ma e leai se sasala o le manogi o Keriso e lagona i le olaga. Vaganā pe a mafai ona fa'aaogāina tatou e le Agaga Pa'ia e fai ma sui e alu atu ai le feso'ota'iga mo le 'upu moni i le lalolagi fa'apei ona iā Iesu, o le a pei tatou o le masima ua leai se aogā. Ona ua lē iā i tatou le alofa tunoa o Keriso, ua tatou molimau atu i le lalolagi o le 'upu moni sa tatou ta'u atu ua leai se mana fa'apa'ia, ma o lea o le a leai se aogā o 'upu mai le Afioga a le Atua. "Afai 'ou te tautala i gagana a tagata atoa ma agelu, a e leai so'u alofa, ua 'avea a'u ma 'apa memea ta'alili, po o se sumapalo tagitagi. Afai fo'i o iā te a'u ona perofeta ane, ma le iloa o mea lilo uma, ma le poto uma lava; afai fo'i o ia te a'u le fa'atuatua uma e 'ave 'ese ai mauga, a e leai so'u alofa, 'ou te lē aogā lava. Afai fo'i 'ou te tufatufaina a'u mea uma e fagaina a'i ē matitiva; afai fo'i 'ou te tu'uina atu lo'u tino ina ia susunuina, a e leai so'u alofa, e leai lava sona aogā iā te a'u" (I Korinito 13:1-3)..

(9) O LE Ā LE FA'AMAONIGA SILI E FA'AILOA ATU AI O TATOU O LE MASIMA LELEI MO KERISO?

O le mea lea e iloa ai e tagata uma lava o O'u so'o outou, pe afai ua outou fealofani. Ioane 13:35

Mau e Tau i ai: I Ioane 2:10; 3:13

Pe a ua fa'atumulua le loto i le alofa, o le a tafe atu ai i isi, e lē ona o mea lelei sa maua mai, a e ona o le ta'iala o fa'agaoioiga o le alofa lea. E suia le amio e le alofa, e pulea manatunatuga, fa'ato'ilalo le fe'aina'i, ma fa'aeaina le loto alofa. O lenei alofa e pei o le lautele o le atulaulau, ma e ò gatasi ma galuega a agelu. Pe a fa'apele i le loto, o le a fa'asuumalie ai le olaga atoa ma manuia ai tagata uma. E na o lenei lava le mea e mafai ai ona 'avea i tatou ma masima o le lalolagi.

'Ou te malamalama o le masima sa fetalai ai Keriso e fa'asino i le mana tāua o le Kerisiano - o le alofa o Iesu i le loto, o le amiotonu o Keriso e pulea le olaga.

Li'o le Tali: **Ioe** **Lē Mautonu**

Ua 'ou iloa o le fuafuluāga a le Atua i Lona filifilia o tagata ia lē na ona Ia aumaia i latou e fai ma atali'i ma afafine; peita'i fa'apei ona tu'u le masima ia tofo lelei ai le mea 'ai, a e ia 'avea Lana fanau ia mafai ona fa'asalalau atu ai Lona alofa ma le tala lelei o le fa'aolataga i le lalolagi.

Li'o le Tali: **Ioe** **Lē Mautonu**

'Ou te iloa e tatau ona fefiloi le masima ma mea o lo'o fa'aopoopo i ai; ia tatau ona ulufia ma fefiloi fa'atasi mea uma ina ia fa'aleleia ai. E fa'apea fo'i feso'ota'iga e faia i le vā o tagata ta'ito'atasi, o le a fa'asaoina ē ua lē iloa ona o le mana fa'aola o le tala lelei.

Li'o le Tali: **Ioe** **Lē Mautonu**

Manatu Mai Su'esu'ega

Tatalo e Mana'omia

Tali o Tatalo

O le Malamalama o le Lalolagi

Lesona 11

E fa'avae lenei lesona i luga o le Mataio 5:14.

(1) O LE Ā LE MANATU LONA SEFULU TASI NA TU'U MAI E KERISO I LUGA O LE "MAUGA O FA'AMANUIĀGA?"

O outou, o le malamalama o le lalolagi outou. E lē mafai ona lilo le 'a'ai ua tū i luga o le mauga. Mataio 5:14

Mau e Tau i ai: Fa'ata'oto 4:18, 19; Ioane 12:36; Roma 2:19; II Korinito 6:14

A o a'oa'o atu e Iesu tagata, o Āna a'oa'oga tāua sa tosina mai ai Lana 'au fa'alologologo i fa'amalamalamaga mai va'aiga o mea na foafoaina o lo'o si'omia i latou. O nei tagata sa potopoto mai lava a o taeao, ma o lenei ua tū maua luga le lā ma ua tafe'ese ai ao ma mea sa paologia mai o itū mauga ma vanu o le fanua. O 'ave o le lā ua fa'atumulia ai le vaitūloto i malamalama fa'aauo ma fa'ataina ai ao o lo'o gasolosolo malie i itū uma o le lagi, a e ua fa'asūsū laula'u ma fugāla'u ua mātala e le sau.

Ua silasila ifo le Fa'aola i le motu o tagata o lo'o fa'apotopoto mai i Ōna luma, ma silasila aga'i i le lā o lo'o oso a'e, ona fetalai atu lea i Ōna so'o, "O outou, o le malamalama o le lalolagi outou" (Mataio 5:14). A o fa'asolo a'e pea le lā i lana galuega alofa e fa'ate'a'ese ai le pouliuli o le pō a e fafaguina le lalolagi ia ola mai, e fa'apea so'o o Keriso ona latou ō atu i la latou galuega e fa'asusulu le malamalama o le lagi i luga o ē o lo'o i le pogisā o mea sesē ma le agasala.

(2) O LE Ā LE A'OA'OGA A KERISO E FA'ATATAU I LE AOGĀ O LE LAMEPA?

Latou te lē tutuina fo'i le lamepa i le tu'u ai i lalo o le mea e fua a'i saito, a e tu'u i luga lava o le tu'ugālamepa ia pupula atu ai i ē o i le fale uma. Mataio 5:15

Mau e Tau i ai: Mareko 4:21; Luka 8:16

I le susulu malamalama o le taeao, sa tutū manino mai 'a'ai ma alalafaga o lo'o i luga o mauga ma o se va'aiga ua matagofie lava. Sa fa'asino Iesu aga'i i lea va'aiga ma fa'apea atu, "E lē mafai ona lilo le 'a'ai ua tū i luga o le mauga" (Mataio 5:14b). Ma Ia toe fa'aopoopo atu, "Latou te lē tutuina fo'i le lamepa i le tu'u ai i lalo o le mea e fua a'i saito, a e tu'u i luga lava o le tu'ugālamepa ia pupula atu ai i ē o i le fale uma" (Mataio 5:15). O le to'atele o lo'o fa'alologologo i Āna afioga o tagata e galulue i le 'ele'ele ma ē faifaiva, o latou fale e ta'itasi potu ma o le lamepa e tasi a tu'u i lona tulaga e fa'amalamalamaina ai le fale atoa.

(3) O LE Ā LE GALUEGA SA TU'U E KERISO I LENĀ ASO I TAGATA O Ē UA MULIMULI IĀ TE IA?

Ia fa'apea ona pupula atu lo outou malamalama i luma o tagata, ina ia latou iloa la outou amio lelei, latou te vivi'i atu ai i lo outou Tamā o i le lagi. Mataio 5:16

Mau e Tau i ai: Efeso 5:8; I Peteru 2:9; Isaia 58:8; 60:1-3

(4) O AI LE POGAI O LE MALAMALAMA, MA O LĒ E FA'ALA'EI'AUINA I TATOU IA FAI MA TAGATA E TAU'AVE LE MALAMALAMA?

Sa iā te Ia le ola; o le ola fo'i o le malamalama lea o tagata. Ioane 1:4

Mau e Tau i ai: Ioane 1:7-9; 1:29; 8:12; 9:5; 12:46; Salamo 84:11

E leai lava se isi malamalama e fa'amalamalamaina po o le a fa'asusulu atu i luga o le tagata ua pa'ū vaganā lea e susulu mai iā Keriso. O Iesu le Fa'aola, e na o Ia le malamalama e mafai ona fa'amalamalamaina le pōuliuli o le lalolagi mai le agasala. Ua tusia e fa'ata'au iā Keriso, "Sa iā te Ia le ola; o le ola fo'i o le malamalama lea o tagata" (Ioane 1:4). Sa fa'apea ona mafai e Ōna so'o ona fai ma ē tau'ave le malamalama ina ua latou talia Lona soifuāga. O le agaga na soifua ai Keriso, o Lona alofa e fa'aalia i le amio, sa 'avea ai latou ma malamalama o le lalolagi.

E leai se malamalama i le aigātagata lava ia. Pe a lē fa'atasi ai Keriso, o le a pei tatou o se molī e lē o tutuina, pei o le masina pe a fa'aū'ese ōna foliga mai le lā; o le a leai lava so tatou malamalama o le mafai ona susulu atu i le pogisā o le lalolagi. A e peita'i, pe a tatou fa'asaga aga'i i le Lā o le Amiotonu, pe a tatou ō atu ma pa'i atu iā Keriso, o le a fa'apupulaina le agaga atoa i le malamalama o Lona fa'atasi ai.

(5) E PEI ONA 'AUINA MAI KERISO E LE TAMĀ I LE LALOLAGI E 'AVEA MA ŌNA SUI, O LE Ā FO'I LE MEA UA FAIA E KERISO FA'ATASI MA I TATOU?

Fa'apei ona e 'auina mai A'u i le lalolagi, ua fa'apea fo'i A'u ona 'auina atu o i latou i le lalolagi. Ioane 17:18

Mau e Tau i ai: Ioane 20:21; Isaia 61:1-3

E tatau ona 'avea so'o o Keriso ia sili atu i lo o se malamalama i luma o tagata; o latou o le malamalama o le lalolagi. O lo'o fa'apea mai Iesu iā i latou uma ua ta'uta'u Lona suafa, Ua outou tu'u atoa mai lava outou iā te A'u, ma ua 'Ou tu'u atu outou i le lalolagi e fai ma'O'u sui. E fa'apei ona 'auina mai Ia e le Tamā i le lalolagi, o lea ua Ia fetalai mai, "ua fa'apea fo'i A'u ona 'auina atu o i latou i le lalolagi" (Ioane 17:18). E fa'apei ona faia Keriso ma ala e fa'aalia mai ai le Tamā, e fa'apea fo'i ona 'avea i tatou ma ala mo le fa'aaliga mai o Keriso. O lo tatou Fa'aola o le pogai o le malamalama, ia 'aia lava ne'i galo e le Kerisiano o lo'o fa'aalia o Ia e ala i le aigātagata. O lo'o tu'uina mai fa'amanuiāga a le Atua e ala i osiga fa'aletagata. Na afio mai Keriso i le lalolagi o le Atali'i o le tagata. O le aigā tagata, pe a feso'ota'i atu i le uiga fa'aAtua, e tatau ona pā'ia lava le aigā tagata.

O le ekalesia a Keriso - o so'o ta'ito'atasi uma a le Matai - o ala filifilia a le lagi mo le fa'aaliga o le Atua i tagata. O lo'o fa'atali pea agelu mamalu ia e fa'aioa atu le malamalama o le lagi ma le mana i agaga ua sauni o le a fa'aumatia. E lē tatau ea ona fa'ataunu'u e le tagata lana galuega sa filifilia i ai ia? Paga lea, o le a lē maua e le lalolagi le mana sa folafola mai o le Agaga Pa'ia!

(6) O AI LE SUI O KERISO O LE A MAFAI AI ONA TATOU FA'ATASI PEA MA IA, MA E ALA MAI AI ONA IA TU'U MAI LONA MALAMALAMA INA IA TATOU AVATU I LE LALOLAGI?

O le mea lava lenei ua tatou iloa ai ua tumau i tatou i totonu iā te Ia, o Ia fo'i i totonu iā i tatou, auā o Lona Agaga ua ia foa'iina mai iā te i tatou. I Ioane 4:13

Mau e Tau i ai: I Ioane 3:24; I Korinito 3:16; 6:19; Esekielu 36:27

A e le'i fa'atonu Iesu i Ōna so'o, "Ia taumafai e fa'asusulu atu lou malamalama," na fetalai o Ia, "Ia pupula atu le malamalama." Pe a o afio Keriso i le loto, e lē mafai ona fa'alilo le malamalama o Lona fa'atasi ai. Pe afai o i latou o lo'o ta'u o so'o o Keriso a e lē o ni malamalama o le lalolagi, o le mafuaga ua lē iā i latou le mana e mana'omia, ua lē iā i latou se malamalama e fa'asusulu atu, ona ua leai so latou so'otaga ma le Pogai o le malamalama.

(7) I SE AUALA E FA'ATINO AI LE AOGĀ, O LE Ā LE MALAMALAMA E TATAU ONA TATOU TAU'AVE IA MAFAI AI ONA TATOU FA'AMAMALUINA LO TATOU TAMĀ O I LE LAGI?

Ia fa'apea ona pupula atu lo outou malamalama i luma o tagata, ina ia latou iloa la outou amio lelei, latou te vivi'i atu ai i lo outou Tamā o i le lagi. Mataio 5:16

O sē alofa i lona uso, o lo'o tumau ia i le malamalama, e leai fo'i se mea iā te ia e tausuai ai. I Ioane 2:10

I augātupulaga uma o le "Agaga o Keriso sa i totonu iā te i latou" (I Peteru 1:11) ma na faia fanau moni a le Atua ma malamalama mo tagata uma i o latou lava tupulaga. Sa tau'ave le malamalama e Iosefa i Aikupito. I lona uiga mamā ma le agalelei ma le alofa fa'aleatali'i, sa fa'asino ia iā Keriso a o i ai i se malō fa'apaupau. A o aga'i atu le fanauga a Isara'elu mai Aikupito i le Nu'u Folafolaina, o ē na i ai le loto fa'amaoni sa 'avea ma malamalama i malō na latou fa'afeagai, ma sa fa'aalia ai le Atua i le lalolagi, e ala iā i latou. Mai iā Tanielu ma ōna uso i Papelonía, ma Moretekai i Peresia, sa susulu atu 'ave o le malamalama i le pōuliuli o maota o tupu.

E fa'apea fo'i so'o o Keriso ona tutū e fai ma 'ave malamalama a o aga'i atu i le lagi; o le a fa'atinoina, e ala iā i latou le alofa mutimutivale ma le agalelei o le Tamā i le lalolagi o lo'o si'omia e le pogisā o le fa'auigasesē o le Atua. Ua ta'ita'i isi

e fa'amamaluina le Tamā i le lagi ina ua va'aia a latou galuega lelei; ua fa'aalia e i ai le Atua o lo'o ti'eti'e i luga o le nofoāli'i o le atulaulau, ma e tatau mo Ia le vi'iga ma le fa'ane'ene'ega. O le alofa o le Atua e susulu mai le loto, ma le olaga e fa'aalia ai e talafeagai ma Keriso, o sina va'aiga lea o le lagi ua tu'u mai i tagata o le lalolagi ina ia mafai ona latou lagona lona maoa'e.

Ua fa'apea ona ta'ita'iina tagata ia talitonu "i le alofa ua i le Atua iā te i tatou" (I Ioane 4:16). O lea o le a fa'amamāina ma suia loto sa agasala ma tumu i le leaga, ina ia "tu'uina atu iā te outou ua lē ponā i luma o Lona lava mamalu ma le fiafia tele" (Iuta 1:24).

(8) O LE Ā LE TA'IALA E TATAU ONA TATOU FA'AAOGĀ MA LE FA'AETEETE PE AFAI O LE A TATOU FA'AALI MA LE FA'AMAONI LE MALAMALAMA O KERISO I LE LALOLAGI?

'Aua tou te faia se mea lē tonu i le fa'amasinoga; 'aua e te fa'ailogaina le tagata mativa, 'aua fo'i le fa'aaloalo i le tagata mau'oa; a ia e fa'amasino ma le tonu lē lua te tuā'oi. Levitiko 19:15

Mau e Tau i ai: Iakopo 2:1-9

O fetalaiaga a le Fa'aola, "O outou o le malamalama o le lalolagi" (Mataio 5:14), sa fa'asino i le moni o le galuega e aofia ai le lalolagi atoa na Ia tu'u i Ōna so'o. I ōna pō o Keriso, sa fausia ai le puipui e maualuga ma mata'utia le malosi ona o le loto fa'apito ma le mimitavale ma le fa'ailoga tagata, ua fai ma pupuni i le vā o leoleo fifilifilia mo le tausiga o afioga pa'ia ma malō uma o le lalolagi. Peita'i na afio mai le Fa'aola ia suia ai nei mea uma.

O afioga uma sa fa'alogi i ai tagata mai Ōna fofoga sa lē pei o mea na latou fa'alogoina mai faitaulaga ma a'oa'o o le malumalu. E 'ave'esea e Keriso le pā pupuni, le alofa fa'apito, le fa'ailoga tagata o lo'o vaevae ai tagatanu'u 'ese'ese, ma ia a'oa'o atu ai le alofa mo le atoa o le aigātagata. E Na te si'itia i luga le tagata mai le vāapiapi o le li'o ona o le uiga fa'apito; Na te talepe i lalo vaevaega e tau i laufanua ma mea e fa'a'ese'ese ai mafutaga. E leai se 'ese'esega iā Keriso o le tuā'oi ma le tagata'ese, o uō ma fili; a e o lo'o Ia a'oa'o mai ia tatou va'ai i ē o mana'omia le fesoasoani e pei o tatou lava tuā'oi, ma o le lalolagi la tatou fanua galue.

(9) O LE Ā LE GALUEGA NA VALA'AUINA AI KERISO MA O LE AUALA O LE A AVATU AI E LANA EKALESIA LE MALAMALAMA O LE TALA LELEI I LE LALOLAGI?

Ua i o 'u luga le Agaga o le Ali'i o Ieova; auā ua fa'au'uina a 'u e Ieova e tala 'i le tala lelei i ē ua tigāina, ua Ia 'auina mai a 'u e fufusi i ē loto momomo, e tala 'i le sa'olotoga i le tafeāga, ma le matuā tatalaina o ē ua fusifusia. E tala 'i le tausaga e talileleia mai ai e Ieova, ma le aso e tau ai ma sui e lo tatou Atua; e fa'amatalaloto i ē fa'anoanoa uma lava. Isaia 61:1-2

Mau e Tau i ai: Isaia 58:6-14

E fa'apei ona ātia tulimanu uma o le lalolagi e 'ave o le lā, e fa'apea le fuafuāga a le Atua ina ia o'o atu le malamalama o le tala lelei i agaga uma o i luga o le lau'ele'ele. Pe ana fai o fa'ataunu'u le fuafuāga a le Ali'i e Lana ekalesia, semanū ua fa'asusulu le malamalama iā i latou uma o lo'o nonofo i le pōuliuli ma o i lalo o le ata o le oti. Pe ana ō atu tagata ekalesia e fa'asalalau le tala lelei i nu'u uma a e lē o le potopoto e faitio ma 'alo 'ese ma lē faia a latou vaega, pe ana o fa'asusulu atu le malamalama o Keriso mai iā i latou, ma galulue mo le fa'asaoina o agaga pei ona Ia faia, se manū o le a vave ona 'aveina i le lalolagi atoa lenei "tala lelei o le malō."

(10) E PEI O APERA'AMO, INA UA UMA ONA TATOU TALIA FA'AMANUIĀGA A LE ATUA, O LE Ā LA TATOU TULAGA E FA'ATATAU I ISI, E ALA I LE MALAMALAMA O LE TALA LELEI?

'Ou te faia oe ma nu'u tele, 'Ou te fa'amanuia fo'i iā te oe, 'Ou te matuā fa'amamaluina lou igoa; e manuia fo'i oe. Kenese 12:2

Mau e Tau i ai: Kenese 18:18; 17:6; 26:4; Roma 4:11

E fa'apea le fuafuāga a le Atua i le vala'auina o Ōna tagata, mai iā Apera'amo i le laugatasi o Mesopotamia e o'o mai iā i tatou i lenei tupulaga, ina ia fa'atunu'u lona fa'ai'uga. Ua fa'apea mai o IA, "Ou te fa'amanuia fo'i iā te 'oe,...e manuia fo'i 'oe" (Kenese 12:2). Na fetalai Keriso e ala i le perofeta o le tala lelei, ma sa toe fa'aleoina i le Lauga i luga o le Mauga, e

mo i tatou i lenei lava tupulaga fa'ai'u: "Tula'i ia, inā malamalama ia, auā ua o'o mai lou malamalama; ua alu a'e fo'i le pupula o Ieova i ōu luga" (Isaia 60:1).

Pe afai o lo'o fa'aali a'e le mamalu o le Ali'i i luga o lou agaga, pe a o e va'aia le matagofie o lē "e silisili 'ese i le mano" ma o Lē ua "ato'atoa Lona lelei" (Pese a Solomona 5:10, 16), afai ua fa'apupulaina o outou agaga i le fa'atasi ai o Lona mamalu, o lo'o ua 'auina mai iā te 'oe lenei afioga e le Matai. Ua e tū i ma Keriso i luga o le mauga sa liua ai? I lalo o le laugatasi o lo'o i ai agaga ua fa'apologaina e Satani; o lo'o fa'atalitali i latou mo le 'upu moni o le fa'atuatua ma talosaga ia fa'asa'oloto ai i latou.

(11) E FA'APEI O PETERU MA IOANE, O LE Ā LE TALI TONU O LE A FA'AALIA E I LATOU O Ē UA I AI LE ALOFA O KERISO?

Auā ma te lē mafaia ona lē tautala i mea ua ma va'ai i ai ma fa'alogi i ai. Galuega 4:20

Mau e Tau i ai: Galuega 18:5; 1:8; Ieremia 20:9; Salamo 39:3

E tatau ona tatou manatunatu loloto i le mamalu o Keriso, a e ia fa'apea fo'i ona tautala e uiga Lona silisili 'ese. Na va'ai Isaia i le mamalu o Keriso, ma sa tautala fo'i e fa'atatau iā te Ia. A o manatu loloto ifo Tavita i le alofa ofoofogia o le Atua, sa ia tautala atu i mea sa ia va'aia ma ōna lagona. "Sa vevela lava lo'u loto i totonu iā te a'u; o lo'u mafaufau fo'i ua mū ai le afi; ona tautala ai lea o lo'u laulaufaiva" (Salamo 39:3).

O ai o le a mafai ona iloa le fuafuāga ofoofogia o le fa'aolataga, le mamalu o le Alo e to'atasi o le Atua, a e o le a lē tautala atu e fa'atatau i ai? O ai e mafai ona tu'uloto le alofa e lēgafatia sa fa'atinoia i luga o le satauro o Kalevario i le maliu o Keriso, ina ia lē fano ai tatou a e ia maua le ola e fa'avavau - o ai e mafai ona va'aia lenei mea a e leai se 'upu e fa'a'iloa atu ai le mamalu o le Fa'aola?

"I totonu o Lona malumalu fo'i e ta'itasi ma tautala i Lona mamalu" (Salamo 29:9). Sa vi'ia o Ia e le faipese mālīe o Isara'elu i luga o le kitara, e fa'apea, "Ou te tautala atu i le matagofie o le vi'iga o Lou mamalu, atoa ma Āu mea mamana; e tautalatala i latou i le malosī o Āu mea e mata'utia ai 'Oe; 'ou te ta'uta'u atu fo'i i Lou silisili 'ese" (Salamo 145:5, 6).

(12) E PEI O PAULO, O LE Ā LA TATOU MATĀ'UPU E TATAU ONA FA'AILOA A O TATOU Ō ATU E FAI MA SUI O KERISO E FA'AMALAMALAMAINA LE LALOLAGI?

Auā na tonu lo'u manatu, ou te lē iloa se tasi mea iā te outou tau lava o Iesu Keriso, o Ia lava na fa'asatauroina. I Korinito 2:2

Mau e Tau i ai: I Korinito 1:23; Kalatia 6:14; Mataio 28:18-20

Ia si'itia maualuga i luga a'e o tagata le satauro o Kalevario, ia ulutia o latou mafaufau ma ō gatasi ai o latou manatu. O le a fa'amalosia itū fa'aleagaga uma e le mana o le Atua, ona tu'ufa'atasi lea o le malosī e galue fa'amaoni ai mo le Matai. O le a fa'asusulu atu 'ave malamalama i le lalolagi e le 'au faigaluega, e 'avea i latou o suiola e fa'amalamalamaina le lalolagi.

E talia ma le fialia e Keriso so'o se sui e tu'u atu ia atoa mo Ia. E aumaia e Ia le tagata ia so'ofa'atasi ma le itū fa'aleAtua, ina ia mafai ai ona fa'afeso'ota'i atu i le lalolagi e uiga i mealilo o le alofa ua liu tino tagata. Ia tautala atu ai, tatalo ai, pese ai, ma fa'asalalau i nu'u'ese le fe'au o Lona mamalu, ma fa'aauau atu i nu'u mamao.

O tofotofoga e tau'ave ma le onosa'i, o manuia e talia ma le fa'afetai, o fa'aosoosoga e te'ena, o le agamalū, agaalofoa, alofa mutimutivale, ma le alofa e fa'aalia pea, o malamalama ia e susulu atu i le amio, e lē mafai ona fa'atusaina i le pogisā o le loto e fa'apito, le olaga lea e le'i fa'asusuluina i ai se malamalama.

'Ou te iloa o le avanoa ma le vala'au mao'a e a so'o o Keriso o le ō atu lea ma fa'asusulu atu le malamalama o le lagi i le lalolagi ma avatu, e ala i mea faigaluega fa'aletagata, Āna fa'amanuiāga.

Lī'o le Tali:

Ioe

Lē Mautonu

Ua 'ou iloa e lē mafai e a'u lava ia ona fa'atupu lea malamalama. E na o Iesu lava le Pogai o le malamalama e mafai ona fa'asusulu i lenei lalolagi o lo'o lēiloa i le pōuliuli, ma 'ou te naunau ia mafai ona susulu atu, e ala iā te a'u.

Li'o le Tali: **Ioe** **Lē Mautonu**

'Ou te filifili e fa'asaga aga'i i le Lā o le Amiotonu ina ia fa'apupulaina lo'u agaga e le malamalama o Lona fa'atasi ai.

Li'o le Tali: **Ioe** **Lē Mautonu**

'Ou te fiafia e tu'u atu atoa a'u iā te Ia ina ia mafai ai e Ia ona fa'ailoa atu i le lalolagi mealilo o Lona alofa ua liu tino tagata, e ala i lo'u olaga.

Li'o le Tali: **Ioe** **Lē Mautonu**

'Ou te tatalo mo se vaega ia fa'asili o Lona Agaga ina ia mafai ai ona 'ou tautala e uiga i ai, ia 'ou pese e fa'atatau i ai, ma 'ou ta'u atu i nu'u'ese - le fe'au o Lona mamalu!

Li'o le Tali: **Ioe** **Lē Mautonu**

Manatu mai Su'esu'ega

Tatalo Mana'omia

Tali o Tatalo

O le Fa'aleagaga o le Tulafono

Lesona 12

(1) O Ā TULAGA NA TU'U ATU AI E LE ALI'I TA'IALA O LE TULAFONO I ŌNA TAGATA I LE MAUGA O SINAI?

O le Mauga o Sinai fo'i ua pusa atoa uma; auā na afio ifo ai Ieova i le afi, ua alu a'e fo'i ōna asu pei o le asu o se umu; ua lulūteleina lava le mauga atoa uma. Esoto 19:18

Mau e tau i ai: Esoto 20:18; Salamo 68:8; Teuterenome 4:11, 12; 5:22; Ne'emias 9:13-15

I totonugalemū o faititili ma le afi, na tu'u mai ai e Keriso lava ia le tulafono i luga o le Mauga o Sinai. Sa mautū i le tumutumu o le mauga le mamalu o le Atua e pei o se afi fa'aumatia, a o ;e mauga sa gatete i le fa'atasi ai o le Ali'i. Sa fa'alogologo ma le mata'u tele le fanauga a Isara'elu i fa'atonuga pa'ia a le tulafono. Oi se 'ese'esega mai le va'aiga i luga o le mauga o Fa'amanuiāga! I se tasi aso i le tau mafanafana, ua logofilemū mea uma vaganā pese a manufelegei, sa fa'amatala atu ai e Iesu fa'avae o Lona malō. O Ia Lē na fetalai atu i 'upu alofa i lenā aso, ma sa Ia fa'amatala iā i latou ta'iala o le tulafono sa lauina i luga o Sinai.

(2) O LE Ā LE UIGA O LE ATUA NA FA'AALIA I LE TOE FA'AFO'ISIA O LANA FANAU FA'ALELALOLAGI, MA O LO'O FA'APEA LAVA I LE ASŌ?

O sē lē alofa ua lē iloa e ia le Atua; auā o le Atua, o le alofa lava Ia. I Ioane 4:8

Mau e tau i ai: Teuterenome 33:2, 3; Salamo 86:5, 15; Efeso 2:4

Ina ua tu'u mai le tulafono, ma ona ua leva ona fa'apagotāina Isara'elu i Aikupito, sa mana'omia ia 'a'afia i latou i le mana ma le mamalu o le Atua; e ui i lea na Ia fa'aali mai o Ia lava o le Atua alofa. O Mose na fa'aali i ai e le Atua Lona mamalu i 'upu ofoofogia o lo'o teuloto mai augātupulaga: "O Ieova, o Ieova, o le Atua alofa mutimutivale ma le alofa fua,...e tele le alofa ma le fa'amaoni, o Lē tausi le alofa e o'o atu i afe o tupulaga; o Lē fa'amagalo fo'i i lē amiolētonu ma le solitulafono ma le agasala" (Esoto 34:6, 7).

(3) O Ā TA'IALA E LUA A LE LAGI NA TOE FA'AMALOSIA INA UA TOE TU'U MAI I LE TULAFONO I SINAI?

'Ia e alofa fo'i i le Ali'i lou Atua ma lou loto atoa, ma lou agaga atoa, ma loumanatu atoa, ma lou malosi atoa.' O le poloa'iga sili lea. E fa'apenā fo'i lona lua, o lenei: 'Ia e alofa fo'i i lē lua te tuā'oi, ia pei o 'oe lava iā te 'oe.' E leai lava se tasi poloā'iga e sili i na poloā'iga. Mareko 12:30-31

Mau e tau i ai: II Ioane 1:5; I Timoteo 1:5; Mataio 7:12; 22:37-40; I Ioane 3:11

O le tulafono sa tu'u mai i luga o Sinai o le fa'aleoina o le fa'avae o le alofa, o le fa'aaliga i le lalolagi o le tulafono a le lagi. Sa fa'au'uina i 'a'ao o le Fautua - sa gaganaina e Ia, Lē e ōna le mana e mafai ai ona suia loto o tagata ina ia ō gatasi ma ōna ta'iala. Sa fa'aalia e le Atua le fa'amoemoe o le tulafono ina ua fetalai o Ia iā Isara'elu, "E fai outou ma tagata pa'ia mo A'u" (Esoto 22:31).

(4) I LE LATOU MA'ELEGĀ E TAUSI LE MATĀ'UPU O LE TULAFONO, O LE Ā LE VAEGA TĀUA SA LĒ TAUSISI I AI TA'ITA'I IUTAIA?

Oi talofa fo'i iā te outou Faresaio! Auā tou te avatu mea e sefulua'i le mili, ma le pekano, ma la'au uma e afu, a ua tu'ua e outou le fa'amasinoga ma le alofa i le Atua; e tatau pe ana faia nei mea, a e 'a'ua fo'i le tu'u na mea. Luka 11:42

Mau e Tau i ai: Mataio 23:23; Teuterenome 10:12, 13; Mika 6:8

Peita'i e le'i va'ai Isara'elu i le uiga fa'aleagaga o le tulafono, ma o le tele o taimi sa ta'uta'u atu latou te usiusita'i , a e na o le tausi o masaniga ma sauniuniga, a ua lē tu'u atu atoa le loto i le pulega a le alofa. Fa'apei ona fa'ailoa mai e Iesu Lona

uiga ma Lana galuega i tagata, e pa'ia, agaalofo, ma uiga fa'atamā o le Atua, ma fa'aailoa le lē aogā o le usita'i fa'afoliga, e le'i maua e ta'ita'i Iutaia pe na malamalama fo'i i Āna afioga. Sa manatu latou ua Ia fa'atauva'aina mana'oga o le tulafono; ina ua Ia tu'u i o latou luma 'upu moni o lo'o mana'omia i galuega sa filifilia ai latou, sa na o na va'ai latou i fafo, ma sa latou molia ai Ia i le taumafai e fa'alēaogā le tulafono.

(5) SA FA'APEFEA ONA TU'U MAI E KERISO ĀNA A'OA'OGA E 'ESE'ESE MAI I MEA A LE 'AU TUSI'UPU MA FARESAIO?

*Ua fa'ai'u e Iesu o nei 'upu, ona matuā taufaiofo ai lea o le motu o tagata i Lana matā'upui; auā ua Ia a'oa'o iā te i latou e pei o sē ua i ai le pule, a e lē pei o le 'au tusi'upu. **Mataio 7:28, 29***

Mau e tau i ai: Mataio 28:18

O 'upu a Keriso sa fetalai atu ai ma le fa'amaoni ma le mana na fafaguina ai loto o tagata. Sa manatu latou o le a fa'alologologo i 'upu masani a a'oa'o o le malumalu, a e le'i fa'apea. Sa latou "matuā taufaiofo...i Lana matā'upu; auā ua Ia a'oa'o iā te i latou e pei o sē ua i ai le pule, a e lē pei o le 'au tusi'upu" (Mataio 7:29). Sa va'ai Faresaio i le matuā 'ese'ese lava o le tulaga latou te a'oa'o atu ai ma a'oa'oga a Keriso. Sa latou va'aia le mamalu, ma le mamā, ma le matagofie o le 'upu moni, o le loloto ua 'afia lemū ai le tele o mafaufau. O le alofa mutimutivale ma le fa'apalepale o le Fa'aola ua tosina mai ai loto o tagata iā te Ia. Ua va'ai a'oa'o o le malumalu i a'oa'oga a Keriso, ua lē fa'atusaina i mea o lo'o latou a'oa'o atu i tagata. Ua Ia fa'amalepe i lalo pā puipui sa atina'e e lo latou mimitavale ma le fa'aailoga tagata; ma ua latou fefefe ina ua tosina 'ese mai e Ia le to'atele. Sa fa'apea ona latou mulimuli iā te Ia ma loto ua lē malilie, ona o le naunau ia tupu se fete'ena'iga ma le motu o tagata, ma o le a mafai ai ona molia Ia e le Fono Faitulafono ina ia ta'usala ma fasioti ai.

(6) O LE Ā LE FA'AVAE O LE GALUEGA A KERISO I LE LALOLAGI?

*'Aua ne'i outou manatu ua 'Ou sau e tatalaina le tulafono po o le 'au perofeta; 'Ou te le'i sau e tatalaina, a ia fa'ataunu'uina. **Mataio 5:17***

Mau e tau i ai: Mataio 3:15; Roma 3:31; 8:4; 10:4; Isaia 42:21

I luga o le mauga, sa mātā'i pea Iesu e le 'au taulamalama; a o Ia fa'amatala atu ta'iala o le amiotonu, sa fe'avea'i e le 'au Faresaio tala e fa'atatau i Āna a'oa'oga ma fa'apea o Ia e tete'e i fa'atonuga na tu'u mai e le Atua i luga o Sinai. E le'i i ai i fetalaiaga a le Fa'aola se mea e fa'aitiitia ai le fa'atuatua i talitonuga ma a'oa'oga na tu'u mai e ala iā Mose; auā o 'ave uma o le malamalama fa'alelagi na tala atu e lenei ta'ita'i o Isara'elu i ōna tagata sa maua mai lava lea i a Keriso. E to'atele o lo'o fa'apea i o latou loto na afio mai Ia e tu'u fa'agata le tulafono, a e o le fetalaiaga a Iesu sa fa'aalia ai Lona uiga moni e fa'atatau i tulafono pa'ia. Ua fetalai mai Ia, "'Aua ne'i outou manatu ua 'Ou sau e tatalaina le tulafono po o le 'au perofeta" (Mataio 5:17).

(7) O LE Ā LE MEA E TATAU ONA USIUSITA'I I AI INA IA ATO'ATOA MA Ō GATASITASI, E O'O LAVA I MEA UMA NA FOAFOAINA?

*O le afioga a Ieova na faia ai le lagi; ma 'au uma o i ai, na faia i le mātā'ava a Lona fofoga. Ua fa'apotopotoina e Ia o suāsami e pei se mea maupu'epu'e; ua tu'uina atu e Ia o le moana i fale'oloa. Ia matata'u iā Ieova atoa uma le lalolagi; ia fefefe lava iā te Ia o outou uma o ē nonofo i le atulaulau. 'Auā o Ia lava na fetalai ane, ona i ai lava lea; o Ia na tulei mai Lana afioga, ona tū mai lava lea. **Salamo 33:6-9***

Mau e tau i ai: Salamo 78:23-28; Salamo 107:25-30; 147:15-18; 148:1-13

O Lē na faia le tagata, Lē na tu'u maia le tulafono, o Ia lea na fetalai mai e lē o Lana fuafuāga ia tu'u'ese ōna fa'atonuga. O mea uma ua foafoaina e i lalo o le tulafono, ma e fa'alagolago le ola lelei ma le ō gatasitasi o le lalolagi o le foafoāga i le usiusita'i i nei tulafono.

O lea e i ai ta'iala maoa'e o le amiotonu e pulea le ola o meaola e atamamai, ma e fa'alagolago i le feso'ota'i atu i nei ta'iala mo le olagamau ma le tamā'o'aiga o le atulaulau. Sa i ai pea le tulafono a le Atua a e le'i faia lenei lalolagi. O agelu e i lalo o le pule'aga a nei ta'iala, ma ina ia ō gatasi le lalolagi ma le lagi, e tatau fo'i ona usiusita'i le tagata i tulafono a le Atua.

(8) O ANAFEA NA FA'AALI MAI AI E LE ALI'I I Ē NONOFO I LE LALOLAGI LE TULAFONO O LO'O NAUNAU O IA IA TATOU USIUSITA'I I AI?

Le 'au uso e, 'ou te lē tusi atu iā te outou se poloa'iga fou, a o le poloa'iga tuai, ua iā te outou talu le amataga; o le poloa'iga tuai o le 'upu lea ua outou fa'alologologo ai talu le amataga. I Ioane 2:7

Sa fa'aailoa e Keriso fa'atonuga o le tulafono i le tagata i Etena "ina o pepese fa'atasi fetū o le taeao, ma alalaga fiafia atali'i uma o le Atua" (Iopu 38:7). E lē o le galuega a Keriso i le lalolagi le fa'aumatia o le tulafono, a e peita'i, e ala i Lona alofa tunoa, ia toe fa'afo'i mai le tagata ia usita'i i ōna fa'atonuga.

E umi se taimi talu ona fa'alogole so'o sa alofagia i 'upu a Iesu i luga o le mauga, ona ia tusia lea a o osofia e le Agaga Pa'ia, e fa'atatau i le tulafono e mana'omia pea, e lē gata. Fai mai ia, "o le agasala o le solitulafono lava lea" ma "o i latou uma lava o ē fai le agasala, ua latou soli le tulafono" (I Ioane 3:4). Ua ia fa'amanino mai o le tulafono lea "o le poloa'iga tuai, ua iā te outou talu le amataga" (I Ioane 2:7). O lo'o tautala ia fa'atatau i le tulafono sa i ai i le foafoāga ma sa toe fa'amanatuina i luga o le Mauga o Sinai.

(9) I LONA TAIMI A O I LE LALOLAGI, O LE Ā LE MEA NA FAIA E KERISO E FA'ATATAU I LE TULAFONO?

Ua finagalo malie Ieova ona o Lana amiotonu; Na te ta'uuleleia le tulafono, ma fa'amamaluina ai. Isaia 42:21

Mau e tau i ai: Salamo 71:19; Ioane 15:10; 8:29; Mataio 5:17-20

Ua fetalai Iesu e uiga i le tulafono, "'Ou te le'i sau e tatalaina, a ia fa'ataunu'uina" (Mataio 5:17). O lenei 'upu "fa'ataunu'u" sa fa'aaogā tutusa ina ua fetalai iā Ioane le Papatiso e fa'atatau i Lana galuega, o le "fa'ataunu'u o amiotonu uma," o le uiga ia fa'ataunu'u mea o lo'o mana'omia o le tulafono, e tu'u mai ai se fa'ata'ita'iga o le tausisi ato'atoa i le finagalo o le Atua.

O Lana galuega o le "ta'uuleleia le tulafono, ma fa'amamaluina ai" (Isaia 42:21). O Ia e fa'aalia le uiga fa'aleagaga o le tulafono, e tu'u atu ōna ta'iala ia tau i mea mamao, ma ia fa'amanino ōna mana'oga e o'o lava i le fa'avavau.

O le ofoofogia ma le matagofie o le uiga o Keriso, e na o se ata nenefu mai tagata e pito agamalū ma uiga tamāli'i; na tusi Solomona a o osofia e le Agaga e fa'atatau iā te Ia, "O Ia e silisili 'ese i le mano,...Ua ato'atoa ona lelei o Ia" (Pese a Solomona 5:10, 16). Na va'aia Ia e Tavita i le fa'aaliga fa'avalōaga, ma fa'apea ai, "Ua sili lava Lou 'aulelei i atali'i o tagata" (Salamo 45:2); o Iesu o le fa'atusa fa'aletino o le Tamā, o le pupula ofoofogia o Lona mamalu; o le Fa'aola ua fa'afitia Ia lava, ma sa Ia fa'aalitinoina le uiga o le tulafono a le Atua a o femalagaa'i i Lana galuega alofa a o aumau i le lalolagi. I Lona soifuāga na fa'atino mai ai o le alofa fa'alelagi, o ta'iala pei o Keriso, e fa'avae ai tulafono moni e fa'avavau.

(10) O LE Ā LE FETALAIGA A KERISO NA FA'AMAONIA AI E TUMAU E FA'AVAVAU LE TULAFONO A LE ATUA?

E mavaegofie atu le lagi ma le lalolagi, a e lē i'uvale sina fasi mata'itusi e tasi o le tulafono. Luka 16:17

Mau e tau i ai: Salamo 119:160; Luka 21:33; Kalatia 3:17-24; Isaia 51:6; 40:8; Mataio 5:18

Sa fetalai Iesu, "'Ou te fai atu iā te outou, e mavae atu le lagi ma le lalolagi, a e lē mavae atu lava se iota po o sina fasi mata'itusi o le tulafono, se'ia taunu'u mea uma" (Mataio 5:18). Na tausi e Keriso le tulafono, ma ua Ia molimau i lona uiga e lē mafai ona suia ma ua fa'amaonia e mafai ona usiusita'i ma le atoa i ai atali'i ma afafine o Atamu, e ala i le alofa tunoa. A o i luga o le mauga na Ia fetalai mai ai e leai se mata'itusi itiiti e tatau ona mavae'ese mai le tulafono se'ia fa'ataunu'u mea uma - o mea uma e fa'atatau i le aigātagata, mea uma e fa'atatau i le fuafuāga o le fa'aolataga. E lē o Ia a'oa'o mai ia fa'agata le aogā o le tulafono, a e o lo'o silasila ifo Ia i le mea e gata ai le tafa'ilagi o le tagata ma ta'utino iā i tatou le pule a le tulafono, ina ia lē manatu se tasi o Lana galuega na afio mai ai o le fa'auma lea o fa'atonuga a le tulafono. E tumau pea ta'iala pa'ia a le tulafono a le Atua, e fa'atasi ma le tumau pea o le lagi ma le lalolagi. O Lana amiotonu, "e pei o le atu mauga o le Atua" (Salamo 36:6), o le a alualu pea, o le pogai o fa'amanuiāga, e aumaia vaiola lelei e toe fa'afo'u ai pea le lalolagi.

(11) A O ULUFIA O IA E LE AGAGA PA'IA, SA FA'APEFEA ONA FA'AMATALA E TAVITA LE TULAGA E FA'AVAVAU O LE TULAFONO A LE ATUA?

E sao le tulafono a Ieova, e fa'afo'isia mai ai le agaga; e fa'amaoni le poloā'iga a Ieova, e fa'apotoina ai lē ua faigofie.
Salamo 19:7

Mau e tau i ai: Eperu 7:19; Iakopo 1:25

Ona e ato'atoa le tulafono a le Atua. ma e lē mafai ona suia, e lē mafai e le tagata lava ia ona 'ausia le tapula'a o mea e mana'omia mo le fa'ataunu'uina. O le pogai lea na afio mai ai Iesu e fai ma la tatou Togiola. O Lana galuega o le faia lea o le tagata ia 'avea ma soa o le uiga fa'aAtua, ina ia aumai ai ia e ō gatasi ma fa'avae o le tulafono a le lagi. E fa'aeaina le tulafono pe a tatou tu'u'ese a tatou agasala a e talia Keriso e fai ma tatou Fa'aola. Ua fesili le aposetolo o Paulo, "E fa'alēaogā ea e i tatou le tulafono i le fa'atuatua? 'Aua ne'i fa'apea; a ua tatou fa'atumauiina ai le tulafono" (Roma 3:31).

(12) ONA E LĒ MAFAI E TATOU TAGATA AGASALA ONA TAUSI E TATOU LAVA IA LE TULAFONO, O LE Ā LE MEA NA FOALFOLA MAI KERISO O LE A IA FAIA INA IA MAFAI AI ONA TATOU USIUSITA'I, E ALA I LONA ALOFA TUNOA?

"O le feagaiga lava lenei 'Ou te faia ma i latou pe a mavae atu ia aso, o lo'o fetalai mai ai le Ali'i: 'Ou te tu'uina atu A'u tulafono i o latou loto, ma 'Ou tusi ai i o latou mafaufau.'" Eperu 10:16

Mau e tau i ai: Eperu 8:8-12; Ieremia 31:33

Fai mai le folafolaga a le feagaiga fou, "'Ou te tu'uina atu A'u tulafono i o latou loto, ma 'Ou tusi ai i o latou mafaufau" (Eperu 10:16). E ui lava o sauniga sa fa'asino iā Keriso le Tama'i Mamoe a le Atua e 'ave'esea agasala a le lalolagi, sa tatau lava ona fa'auma i Lona maliu, a o ta'iala o le amiotonu o lo'o fa'atino i Poloa'iga e Sefulu e lē mafai ona suia, e pei o le nofoāli'i e fa'avavau. E le'i tinea se poloa'iga e tasi, e le'i suia se iota po o sina mata'itusi. O nei ta'iala o tulafono mo le olaga sa fa'ailoa i le tagata i Parataiso ma o le a tunau e lē suia i Parataiso ina ua toe fa'afou. Pe a toe fuga mai Etena i le lalolagi fou, o le a usiusita'i mea uma o i lalo o le lā i le tulafono o le alofa a le Atua.

"Ieova e, ua mausalī Lau afioga i le lagi e fa'avavau lava" (Salamo 119:89). "O galuega a Ōu a'ao e moni ma le tonu; e fa'amaoni Āna fe'au uma lava. E fa'atumauiina ia mea e fa'avavau fa'avavau lava; ua faia i le fa'amao'i ma le tonu" (Salamo 111:7, 8). Ma "Talu anamuā ua 'ou iloa ai Āu tulafono, ua e fa'avaeina ia e fa'avavau" (Salamo 119:152).

(13) O LE Ā LE LAPATA'IGA MATA'UTIA UA TU'U MAI IĀ I LATOU O Ē O LE A SOLIPALA SE TULAFONO PA'IA E TASI A LE ATUA?

Ia malaia lē na te lē fa'amauiina 'upu o lenei tulafono e faia. Ona tali mai ai lea o le nu'u uma, "Amene!" Teuterenome 27:26

Mau e tau i ai: Salamo 119:6, 128; Kalatia 3:10-12; Teuterenome 12:32

"O sē na te tatalaina se poloā'iga e tasi e aupito itiiti o nei poloā'iga, ma fa'apea ona a'oa'o i tagata, e ta'ua ia e aupito itiiti i le malō o le lagi" (Mataio 5:19).

O le uiga o le a leai sona nofoāga i totonu o le malō, auā o lē e soli se poloā'iga lava e tasi, i le agaga ma le mea moni, o le a na lē tausia se isi lava fo'i. Ua fa'apea mai le aposetolo, "Auā o sē tasi le tulafono uma, a e agasala i se mea e tasi, ua nofo sala ia i mea uma" (Iakopo 2:10).

O le agasala e lē ona ua sili atu le leaga o le mea ua lē usita'i ai, a e peita'i o le faia o le mea ua 'ese mai le finagalo o le Atua; ma o lea ua fa'aali mai ai o lo'o i ai le feso'ota'iga i le vā o le agaga ma le agasala. A fevaevaea'i 'au'aunaga o le loto, o le a te'ena le Atua ma o le a fouvale aga'i i tulafono a Lona malō.

(14) AISEĀ E TATAU AI ONA TATOU TU'U ATUA O TATOU LOTO I LE FINAGALO O LE ATUA - O LANA TULAFONO LEA - A E LE'I MAFAI ONA TATOU ŪLU ATU I LE MALŌ I LE LAGI?

O i ai le ala ua tonu i le manatu o le tagata; a o lona taunu'uga, o ala ia e oti ai. Fa'ata'oto 14:12

Mau e tau i ai: Fa'ata'oto 16:25; Kenese 6:5; Ieremia 17:9; 13:23

Pe ana sa'oloto tagata e ō 'ese mai mana'oga na tu'u mai e le Ali'i a e fa'atū a latou lava tapula'a, se manū o le a tele na'uā tapula'a mo manatu 'ese'ese ma o le a 'ave'esea le faigāmalō mai le pule'aga a le Atua. O le a silisili'ese le mafaufau o le tagata, a e o le a lē fa'amamaluina ma fa'aaloogia le finagalo pa'ia ma le maoa'e o le Atua - Lana fuafuāga alofa mo Āna meaola uma.

So'o se taimi e filifili ai e le tagata lona ia lava ala, latou te fa'atulaga ai lava i latou ia fete'ena'i ma le Atua. O le a leai so latou tofi i le malō o le lagi, auā o le a latou fa'asagatau i ta'iala o le lagi. Ina ua lafoa'i le finagalo o le Atua, ua latou tu'u lava latou i le itū a Satani, le fili a le Atua ma le tagata. E lē o se 'upu e tasi, pe o 'upu e tele, a e peita'i o fetalaiiga uma mai le fofoga o le Atua o le a ola ai le tagata. E lē mafai ona saogalemū tatou pe a tu'u'ese se 'upu e tasi, tusa pe o le ā le foliga mai e fa'atauva'a.

(15) O LE Ā LE FA'AMANUIĀGA UA FOLAFOLA I Ē O LO'O GAUA'I MA LE ATO'ATO'A I LE FINAGALO O LE ATUA MA TAUSI I ĀNA POLOA'IGA?

Amu'ia i latou o ē faia Āna poloā'iga, ina ia taga iā i latou le la'au o le ola, ma ia latou ūlu atu i le 'a'ai i ōna faitoto'a.

Fa'aaliga 22:14

Mau e tau i ai: Salamo 112:1; 119:1-3, 165; Fa'ata'oto 3:1, 2; Mataio 7:21-23; I Koronito 7:19; Teuterenome 26:16-19; 7:11-15

E leai se poloā'iga o i le tulafono e lē mo le lelei ma le fiafia o le tagata i le olaga nei ma le ola o i lumana'i. Pe a usita'i i le tulafono a le Atua, o le a si'omia le tagata e pei o se pā puipui e sao ai mai le leaga. O le tagata e fa'amalepe lenei pā na fausia e le Atua, o le fa'aumatia fo'i lona mana e puipui ai ia; o le a ia tatala le ala e osofa'i ai e le fili ina ia fa'ama'imaui ma fa'aleaga.

Ina ua taumafai o tatou ulua'i mātua e fa'alēaogā le finagalo o le Atua, sa la fa'amatala atu ai faitoto'a o mafatiāga i le lalolagi. Ma o so'o se tasi e mulimuli i lenei fa'aa'oa'oga o le a selesese fo'i lea fa'ai'uga. O fa'atonuga uma o Lana tulafono e fa'avae i luga o le alofa o le Atua, ma o se tasi e liliu 'ese mai poloā'iga, o lo'o aga'i i se olaga lē fiafia ma le malaia.

(16) O LE Ā LE OLEGA A LE ATUA INA IA FA'AALIA AI LO TATOU ALOFA MO IA?

Afai tou te alolofa mai iā te A'u, ia outou tausii mai i A'u poloā'iga. Ioane 14:15

Mau e tau i ai: Ioane 14:21-23; 15:10, 11; I Ioane 2:3-5; 5:2, 3; 3:22, 23

'Ou te iloa o mea uma na foafoaina e i lalo o le tulafono; e fa'alagolago le solosolo lelei ma le ō gatasi o le lalolagi o le foafoāga pe a ususita'i i nei tulafono. E fa'apea fo'i ona aumaia e le Atua ta'iala o le amiotonu e pulea le ola lelei o mea ola uma e fai mafaufau.

Li'o le Tali:

Ioe

Lē Mautonu

'Ou te malamalama o le tulafono sa tu'uina mai luga o Sinai o se fa'aaliga i le lalolagi, e lē mafai ona suia le tulafono a le lagi. E ta'u manino e le Tusi Pa'ia o le tulafono o le alofa e ato'atoa ma e lē mafai e tagata agasala lava ia ona ausia tulaga o ōna tapula'a.

Li'o le Tali:

Ioe

Lē Mautonu

'Ou te matuā fa'afetai ona ua fa'au'uina lea mea i 'a'ao o le Fautua -na fetalai mai ai o Ia e ala i le mana o Lē e mafai ona aumaia loto o tagata ia ō gatasi ma ōna ta'iala.

Li'o le Tali:

Ioe

Lē Mautonu

'Ou te alofa iā Keriso ma naunau e fa'aali lo'u alofa, fa'apei ona Ia ōle mai - ia usita'i i Āna poloā'iga e fa'avae i le alofa.

Li'o le Tali:

Ioe

Lē Mautonu

Ua 'ou fa'afetai tele ona e ala i le folafolaga mai Lana feagaiga fou, "'Ou te tu'uina atu A'u tulafono i o latou loto, ma 'Ou tusi ai i o latou mafaufau" o le a 'avea lenei ma se mea tāua moni i lo'u olaga. 'Ou te tatalo o le a pele iā te a'u Āna tulafono, ma 'ou savali ai e ala i le mana o le Agaga Pa'ia, ina ia 'ou fa'amamaluina ai Lana suafa.

Li'o le Tali:

Ioe

Lē Mautonu

O le Uiga o le Amiotonu

Lesona 13

E fa'avae lenei a'oa'oga i luga o le Mataio 5:20.

(1) O LE Ā LE LAPATA'IGA NA TU'U MAI E KERISO E FA'ATATAU I LE AMIOTONU O TUSI'UPU MA LE 'AU FARESAIO?

Auā 'Ou te fai atu iā te outou, a lē sili la outou amiotonu i la le 'au tusi'upu ma le 'au Faresaio, e lē sao atu lava outou i le malō o le lagi. Mataio 5:20

Mau e Tau i ai: Mataio 23:23-28; Luka 11:39, 40, 44; Roma 10:2, 3

Sa molia e tusi'upu ma le 'au Faresaio Keriso ma Ōna so'o e fa'apea o tagata agasala ona ua latou fa'alēaogā tapuā'iga ma sauniga o lo'o fa'amamalu e a'oa'o o le malumalu. Sa fa'apopoleina ma ua fenumia'i so'o i le tele o taimi ona o le tu'ua'ia ma faitiōga mai ē sa masani latou te fa'aaloalogia ma ta'ua o ta'ita'i fa'aleagaga; a o lenei ua fa'ailoa e Iesu le sesē. Ua Ia ta'u mai le lēaogā o le amiotonu na matuā fa'atāuaina e le 'au Faresaio.

Na ta'ua le malō Iutaia o tagata e fa'apitoa le fa'amaoni, e fīafia i ai le Atua; peita'i ua fa'asino Keriso i la latou talitonuga e leai se fa'atuatua ola. O a latou uiga fa'a-atua e fa'afoliga, o latou faufauga fa'aletagata ma sauniga, e o'o lava i gaoioiga fa'alialia mai fa'o mea e mana'omia o le tulafono, e le'i mafai ona maua se aogā ia fa'apa'iaina ai i latou. O latou loto e lē mamā ma e lē amio fa'apei o Keriso.

(2) O LE Ā LE TA'IALA MALOSI O LE A GALUEA'IINA LE AMIOTONU E LE FA'ATUATUA I O TATOU AGAGA?

Auā o le Agaga matou te fa'atalitali atu ai i le fa'amoemoe i le amiotonu ua i le fa'atuatua; auā e leai se aogā o le peritome po o le lē peritomeina e ē o iā Keriso Iesu, tau lava o le fa'atuatua e matuā galue i le alofa. Kalatia 5:5, 6

Mau e tau i ai: I Ioane 3:14-17; I Korinito 13:13; I Tesalonia 5:8

E lē lava se tapuā'iga fa'aletulafono e aumaia le agaga ia ō gatasi ma le Atua. O le fa'atuatuāga e lē mafai ona gausia ma e ma'a'a a Faresaio, e aunoa ma se salamō, fa'apalepale, po o le alofa, a e sa na o se mea e tausuai ai i le tagata agasala. Sa pei i latou o le masima ua leai se māi; ua leai sa latou malosī tāua e puipuia ai le lalolagi mai le leaga. E pau le fa'atuatua moni lea e "galue i le alofa" e fa'amamāina le agaga; e fa'apei lea o le mea fa'afefete e suia le amio.

(3) O Ā TOGAFITI E TOLU NA TU'U MAI E LE ATUA, E ALA MAI LE PEROFETA O MIKA, MO LE AGAGA O LO'O SA'ILI IA TA'UAMIOTONUINA E LE ATUA?

Sole, ua fa'aali atu e Ia iā te 'oe le mea lelei; se ā fo'i se mea e finagalo ai Ieova iā te 'oe, pe a lē o ia mea, ia fai le amiotonu, ia naunau i le alofa, ma ia feōa'i ma lou Atua ma le loto fa'amaulalo? Mika 6:8

Mau e tau i ai: Iakopo 2:20

O nei mea uma sa tatau ona a'oa'oina ai Iutaia uma mai a'oa'oga a perofeta. Mai seneturi e tele ua mavae, sa fa'alogoina le tagi mai le agaga ina ia tonu ma le Atua, ma na maua le tali mai 'upu a le perofeta o Mika: "'Ou te alu atu ma ni ā i luma o Ieova, 'ou te ifo atu ma ni ā i le Atua maua luga? 'Ou te alu atu ea i Ōna luma ma taulaga mū, ma tama'i povi e tasi lo latou tausaga? E fīafia ea Ieova i afe o mamoe po'a, ma manomano ālia e tafe suā'u?...Sole, ua fa'aali atu e Ia iā te 'oe le mea lelei; se ā fo'i se mea e finagalo ai Ieova iā te 'oe, pe a lē o ia mea, ia fai le amiotonu, ia naunau i le alofa, ma ia feōa'i ma lou Atua ma le loto fa'amaulalo?" (Mika 6:6-8).

(4) AISEĀ E LĒ MAFAI AI E LE AIGĀ TAGATA, E ALA I A LATOU LAVA TAUMAFAGA, ONA TAUSI LE TULAFONO E TONU MA PA'IA A LE ATUA?

Po o ai ea e aumai se mea mamā nai le mea 'ele'elea? E leai se tasi. Iopu 14:4

*O i matou nei e tusa ma le mea leaga i matou uma; o a matou amiotonu uma e tusa ia ma le 'ie o le ma'i; ua mamae i matou uma e pei o le lau la'au, o a matou amiolētonu e pei se matagi ua lelea ai i matou. **Isaia 64:6***

Mau e tau i ai: Roma 3:23; Ieremia 17:9; 13:23; Efeso 2:5

Sa fa'asino mai e le perofeta o Hosea le mea o lo'o fausia le 'a'ano fa'afaresaio, i 'upu nei: "O Isara'elu, o le vine ia e mafalā; ua ia fua mai ni fua e fai mona" (Hosea 10:1). O Iutaia e galulue mo latou lava, ma o la latou amiotonu o le fua o a latou lava taumafaiga e tausi le tulafono e fa'atatau i o latou lava manatu ina ia manuia ai lava o latou loto fa'apito. I le taumafaiga e fa'apa'iaina lava latou ia, sa latou taumafai ai e aumai se mea mamā mai se mea e 'ele'elea. A o le tulafono a le Atua e pa'ia e pei ona pa'ia o Ia, e 'ato'atoa fa'apei ona ato'atoa o Ia; o le ala lenei ua tu'u mai ai i le tagata le amiotonu o le Atua. E lē mafai e le tagata, iā te ia lava, ona tausi lenei tulafono; auā o le natura o le tagata e 'ele'elea, e matagā, ma e matuā 'ese mai le uiga o le Atua. O galuega a le loto fa'apito e "tusa ma le mea leaga;" ma o "a matou amiotonu uma e tusa ia ma le 'ie o le ma'i" (Isaia 64:6).

(5) AISEĀ NA LĒ MAFAI AI ONA 'AUSIA LE AMIOTONU MONI E LE 'AU FARESAIO?

*Auā ua lē iloa e i latou le amiotonu mai le Atua, ma ua sa'ili e fa'atū la latou lava amiotonu, ua latou lē usiusita'i ai i le amiotonu mai le Atua. **Roma 10:3***

Mau e tau i ai: Roma 9:30-32; Isaia 64:6; Luka 16:15; Kalatia 5:4

A o pa'ia pea le tulafono, e lē mafai e Iutaia ona 'ausia le amiotonu e ala i a latou lava taumafaiga e tausi le tulafono.

(6) E FA'APEFEA ONA MAFAI E TAGATA AGASALA ONA TAUSI POLOĀ'IGA E TONU MA PA'IA A LE ATUA?

*Ia maua fo'i a'u ua iā te Ia, e lē iā te a'u sa'u amiotonu nai le tulafono, a e peita'i na o lea o lo'o i le fa'atuatua iā Keriso, o le amiotonu lea mai le Atua i le fa'atuatua. **Filipi 3:9***

Mau e tau i ai: Roma 1:17; 3:22-26; Isaia 51:8; II Peteru 1:1

E tataui i so'o o Keriso ona maua le amiotonu e 'ese mai lea e i le 'au Faresaio, ina ia mafai ona latou ūlu atu i le malō o le lagi. Na ofoina e le Atua iā i latou, e ala i Lona Ālo, le amiotonu e ato'atoa a le tulafono. Pe a tatala atu ma le ato'atoa o latou loto e talia ai Keriso, o le a afio ma i latou le Atua soifua i Lona atoa - o Lona alofa lea - e suia ai i latou i Lona lava fa'atua; ma e ala i le meaalofoa e maua fua a le Atua, o le a latou maua le amiotonu pei ona mana'omia e le tulafono. Peita'i sa te'ena Keriso e le 'au Faresaio; "Auā ua lē iloa e i latou le amiotonu a le Atua, ma ua sa'ili e fa'atū la latou lava amiotonu" (Roma 10:3), a e ua latou lē fia gaua'i atu i le amiotonu a le Atua.

Sa fa'asaga pea Iesu e fa'aali i Lana 'au fa'alologologo le uiga o le usiusita'i e tausi poloā'iga a le Atua - o le toe fa'atupuina iā te i latou lava le uiga o Keriso. Sa fa'atinoina iā te Ia le Atua i o latou luma i aso ta'itasi.

(7) E FA'APEI O PAULO, O LE Ā LE MEA E TATAU ONA TATOU FILIFILI IA FAI I ASO TA'ITASI INA IA MAFAI AI ONA FA'AALI PEA I O TATOU OLAGA LE AMIOTONU O KERISO?

*Ua fa'asatauroina fa'atasi i ma'ua ma Keriso; a e 'ou te lē toe ola a'u, a o Keriso o lo'o ola i totonu iā te a'u; o le ola fo'i 'ou te ola ai nei i le tino, 'ou te ola ai lava i le fa'atuatua i le Ālo o le Atua, o Lēna alofa mai iā te a'u, ma foa'iina mai o Ia e Ia e fai mo'u sui. **Kalatia 2:20***

Mau e tau i ai: Kalatia 5:24; 6:14; Roma 6:4-6

(8) PE A TATOU GAUĀ'I I LANA FUAFUĀGA I O TATOU OLAGA, O LE Ā LE FOLAFOLAGA OFOFOGIA MAI IĀ KERISO E MAFAI ONA TATOU TAPA I AI?

*'Aua e te fefe, auā 'Ou te iā te 'oe; 'aua e te fetepatepa'i, auā o A'u lou Atua; 'Ou te fa'amalosia 'oe; e moni, 'Ou te fesoasoani iā te 'oe; e moni, 'Ou te taofia 'oe i Lo'u lima taumatau e i ai le amiotonu. **Isaia 41:10***

Ua 'ou iloa o le tulafono a le Atua e pa'ia e pei ona pa'ia o Ia, e ato'atoa fa'a'apei o Ia. E tu'u mai ai i tagata le tapula'a o le amiotonu a le Atua, e mamā ma e ato'atoa.

Li'o le Tali:

Ioe

Lē Mautonu

'Ou te iloa e lē mafai ona 'ou aumaia se mea mamā mai se mea 'ele'elea. E lē mafai a a'u lava ia ona 'ou tausi le tulafono pa'ia a le Atua; o la'u amio moni e palapalā, matagā, ma e matuā 'ese mai Lona uiga. Pe a o a'u lava ia, e matuā lē mafai lava e lo'u uiga tonu ona 'ausia Lana tapula'a 'e ato'atoa.

Li'o le Tali:

Ioe

Lē Mautonu

'Ou te iloa le faigatā e maua i le fa'afiaamiotonu e ala i se talitonuga e tau o 'upu o le tulafono, a e lē o le agaga, fa'a'apei o Faresaio, ma o le a lē mafai ai ona aumaia le agaga ia ō gatasi ma le Atua. 'Ou te malamalama o le talitonuga moni ma le amiotonu e fa'avae i luga o le fa'atuatua lea e "galuea'iina e ala i le alofa" e fa'amamāina le agaga. E pei lea o le mea fa'afefete e fesuia'ia le amio.

Li'o le Tali:

Ioe

Lē Mautonu

Ma le fa'atuatua ma le loto maulalo, ua 'ou filifili e tatala ato'atoa lo'u loto e talia Keriso, ina ia afio le Atua i totonu iā te a'u, o Lona soifua o Lona alofa lava lea ia tumau ai ma a'u. 'Ou te talia Āna folafolaga e suia a'u ia pei o Lona fa'atusa; ma o lea, e ala i le fa'atuatua iā te Ia ma Lana meaalofa e maua fua, ia 'ou maua le fa'amanuiāga o le amiotonu lea e mana'omia e le tulafono.

Li'o le Tali:

Ioe

Lē Mautonu

Manatu o Su'esu'ega

Tatalo e Mana'omia

Tali o Tatalo

Teua'iloto o le 'Ino'ino ma le Lotovale

Lesona 14

O lenei lesona e fa'avae i le Mataio 5:21, 22.

(1) O LE Ā LE MUA'I TA'IALA E FA'ATATAU I LA TATOU FAIGA O ISI SA TOE TU'U MAI E KERISO I LENĀ ASO I LUGA O LE MAUGA?

'Aua e te 'ino'ino i lou uso i lou loto; ia e a'oa'i lava i lē lua te tua'oi, 'aua fo'i ne'i tu'u ai pe a le agasala iā te ia. Levitiko 19:17

Mau e tau i ai: I Ioane 2:9, 11; 3:13-15

Na fetalai le Ali'i e ala mai iā Mose; "Aua e te 'ino'ino i lou uso i lou loto;... 'Aua e te tau'i ma sui, 'aua fo'i le fa'amoemoe lou ita i tagata o lou nu'u, a e te alofa atu i lē lua te tua'oi ia pei o 'oe lava iā te 'oe" (Levitiko 19:17, 18). E tutusa lava 'upu moni sa tu'u mai e Keriso ma ia na a'oa'oina e perofeta, peita'i sa fa'anefu e le loto ma'a'a ma le fafia i le agasala.

Sa fa'aalia ai i Lana 'au fa'alologologo le fa'amaoni o afioga a le Fa'aola, auā a o latou ta'usalaina isi ona ua solitulafono, sa latou ta'usalaina ai lava fo'i latou, ma sa latou teuloto le mataū'a ma le lotovale.

(2) ONA O LO LATOU 'INO'INO I TAGATA ROMA, O LE Ā LE MANATU FA'AVAE O LE TULAFONO PA'IA A LE ATUA SA LATOU SOLIA, I O LATOU LOTO?

'Aua e te fasioti tagata. Esoto 20:13

Mau e tau i ai: Esoto 21:14; Kenese 9:6; Teuterenome 5:17

O le nu'u o Vasana, e i le isi itū sami ma le nofoāga o lo'o potopoto ai le motu o tagata, o se vaega 'ele'ele e maugā ma e tele ai vanu ma tofē, e tele ai tagata e fai amioleaga i ia vaimea. Sa i mafaufau o tagata tala o nei mea leaga, ma ua naunau latou ia ta'uleagaina nei fai amioleaga. A e peita'i o latou fo'i e fefinaua'i ma e itavale; ua latou tu'uloto le ino'ino tele i o latou ta'ita'i Roma fa'asauā, ma manatu e tatau fo'i sa'oloto latou e ino'ino ma faitio i isi uma tagata, e o'o lava i o latou uso lutaia pe a lē ō gatasi ma o latou manatu. I nei mea uma ua latou solia le tulafono o lo'o fai mai, "'Aua e te fasioti tagata" (Esoto 20:13).

(3) O LE Ā LE MEA O LE A LĒ MAFAI ONA FA'ATASI IĀ I TATOU, PE A FILIFILI E TEULOTO LE 'INO'INO I O TATOU USO Ā TAGATA?

O i latou uma o ē ita i o latou uso, o fasioti tagata i latou; ua outou iloa fo'i e leai sē fasioti tagata e tumau ia te ia le ola e fa'avavau. I Ioane 3:15

Mau e tau i ai: Fa'aaliga 21:8; 22:14, 15; Kalatia 5:21

Sa amata iā Satani le agaga tauimasui ma le ino'ino, ma na ta'ita'i ai ia e fasioti le Ālo o le Atua. Pe a fa'apele le lotovale ma le lē alofa, ua teuloto fo'i le agaga lava lea e tasi, ma o lona fua o le a o'o ai i le oti. E pei o le la'au i totonu o le fatu, e fofoaina le fuafuāga leaga i le manatu ia tauimasui. Ua fai mai le perofeta, "O i latou uma o ē ita i o latou uso, o fasioti tagata i latou; ua outou iloa fo'i e leai sē fasioti tagata e tumau iā te ia le ola e fa'avavau" (I Ioane 3:15).

(4) ONA O TAGATA UMA TA'ITO'ATASI NA FAIA LEA I LONA FA'ATUSA, O LE Ā LE ŌLEGA A LE ATUA E FA'ATATAU I LA TATOU FAIGA O ISI, E O'O FO'I LAVA I A TATOU 'UPU?

'Aua ne'i faia se mea e tasi ma le finau vale, ma le mitamita fua; a ia ta'itasi outou ma manatu ma le loto maulalo, ua sili nisi uma ia te ia. 'Aua ne'i ta'itasi ma va'ava'ai i ana lava mea, a ia ta'itasi ma va'ava'ai i mea a isi. Filipi 2:3-4

Mau e tau i ai: Roma 14:4; I Korinito 4:7

"Ai se fai atu fo'i i lona uso, Raka, e nofo sala o ia i le fonono" (Mataio 5:22). Ina ua tu'u mai e le Atua le meaalofo o Lona Ālo e togiola ai i tatou, sa fa'aalia ai le maua luga o Lana fa'atatau i agaga o tagata ta'ito'atasi uma, ma ua Ia lē tu'uina i se tasi se sa'olotoga ia 'upuleaga ai se isi. E ui ina i ai sesē ma vaivaiga i tagata uma, peita'i e ā le Atua agaga uma - e ā Ia mai le foafoāga, ma e ā Ia ina ua fa'atauina e ala i le toto tāua o Lona Ālo. Na Ia faia tagata uma i Lona fa'atusa, ma e o'o lava i lē e aupito tulaga mau lalo, e tatou ona fa'aaloalo ma agalelei i ai. E o'o lava i se 'upu e tasi a e tautala atu ma le lē fa'aaloalo i se agaga e to'atasi na malie ai Keriso, o le a i o tatou luga lava lea.

(5) O LE Ā LE IGOA E TA'U AI E LE TUSI PA'IA LE TAGATA UA FILIFILI LE ALA O LE ITA VALE PO O LE INO'INO I LONA USO?

'Aua le fa'ata'alise ona ita o lou loto; auā e tumau le ita i loto o ē valelea. Failauga 7:9

Mau e tau i ai: Fa'ata'oto 14:17; 16:32; 26:23-26; Iakopo 1:19

"Ai sē fai atu fo'i, Le vale e, e nofo sala o ia i le afi o Kēna" (Mataio 5:22b). I le Feagaiga Tuai e fa'aaogā le 'upu "le vale" e fa'asino i se tagata ua fulitua mai le fa'atuatua, po o se tasi ua alu aga'i i le leaga. Ua fetalai Iesu i so'o se tasi o le a ta'usalaina lona uso fa'apea ua fulitua i le fa'atuatua pe ua ita i le Atua, e fa'aali mai ai o le mea lava e tasi ua ta'usalaina ai fo'i ma ia.

(6) O LE Ā LE IGOA UA TU'U IĀ SATANI ONA O LONA INO'INO E MATA'UTIA MA LE FAI'UPUVALE I LE 'AU USO?

Na 'ou fa'alogofa'i i le leo tele i le lagi, ua fa'apea, O ōna pō nei ua o'o mai ai le olataga, ma le mana, ma le malō o lo tatou Atua ma le pule a Lona Keriso; auā ua lafo i lalo lē na molia o tatou uso, o lē na molia i latou i luma o lo tatou Atua i le ao ma le po. Fa'aaliga 12:10

A o fefinaua'i Keriso ma Satani e fa'atatau i le tino o Mose, o Keriso lava "na lē fa'amalosia ona lafo atu o se 'upu leaga e fa'asala iā te ia" (Iuta 1:9). Pe ana lē faia fa'apea, se manū ua Ia tū fa'atasi i le fanua o Satani, auā o moli'aga o le a'upega a le fili. E fa'aigoa o ia i le Tusi Pa'ia, o "lē na molia o tatou uso" (Fa'aaliga 12:10). E lē fa'aaogāina e Iesu a'upega a Satani, a e na Ia fa'afetaui ia i nei 'upu, "Ia a'oa'i le Ali'i iā te 'oe" (Iuta 1:9b).

(7) O LE Ā LE MEA O LE A FA'AALIA PE A I AI LE INO'INO MA LE TAUFUA'ASESĒ I LE LOTO?

E ufiufi e ia lona 'ino'ino i le pepelo; a e fa'aalia lona leaga i le fa'apotopotoga. Fa'ata'oto 26:26

Mau e tau i ai: Fa'ata'oto 26:24, 25; 12:5, 20; Salamo 28:3

(8) E AFĀINA FA'APEFEA LA TATOU SAVALIGA I LE MALAMALAMA FA'ALEAGAGA PE A TEU'ILOTO LE LOTOTIGĀ?

A o lē ita i lona uso, o i le pouliuli o ia, o lo'o savali fo'i i le pouliuli, e lē iloa fo'i e ia le mea e alu i ai, auā ua fa'atauasoina ōna mata e le pouliuli. I Ioane 2:11

Mau e tau i ai: I Ioane 3:15; 4:20; I Korinito 13:1-3; Fa'ata'oto 10:12; 14:17

(9) E FA'APEI O KERISO A O MAFATIA I LUGA O LE SATAURO, O LE Ā LE TALI E TATAU ONA TATOU TU'U ATU PE A FA'AOSOOSAINA I TATOU E TAUI ATU MA SUI?

Ona fetalai atu lea o Iesu, Lo'u Tamā e, ia e fa'amagaloina atu iā te i latou; auā ua latou lē iloa le mea ua latou faia. Ua tufatufa e i latou Ōna ofu, ona fai ai lea o le vili. Luka 23:34

Mau e tau i ai: Luka 6:27, 28; I Peteru 2:20-23; Galuega 7:60; Roma 12:14

O Lana fa'aa'o'o ua tu'u mai lea mo i tatou. Pe a tatou ō mai ia fa'asagatau ma fili o Keriso, ia lē tataui iā i tatou ona faia se 'upu mai le agaga fia tauimasui po o se mea e foliga mai o se moliga. A tatou tula'i mai e fai ma si'ufofoga o le Atua, ia lē faia se 'upu e lē fa'aaogāina e le Mamalu o le lagi i fete'ena'iga ma Satani. Ia tu'u i le Atua le galuega o le fa'amasino ma le ta'usalaina.

(10) INA UA SAU PETERU IĀ KERISO MA FESILI PE FA'AFIA LE TATAU ONA TATOU FA'AMAGALO ATU, O LE Ā LE TALI A KERISO?

Ua fetalai atu Iesu iā te ia, 'Ou te lē fai atu iā te 'oe, se'ia atu fitu, a ia fitugafulu ni fitu. Mataio 18:22

Mau e tau i ai: Mataio 18:21; Efeso 4:31, 32; Kolose 3:13

(11) E FA'APEFEA ONA FILIFILI E LE ATUA LANA FUA O LE FA'AMAGALOGA IĀ I TATOU?

A outou tutū ma tatalo, ai se mea tou te tigā ai i se tasi, ia outou fa'amagaloina; ina ia fa'amagaloina fo'i e lo outou Tamā o i le lagi a outou agasala. Afai fo'i tou te lē fa'amagaloina, e lē fa'amagaloina e lo outou Tamā o i le lagi a outou agasala. Mareko 11:25-26

Mau e tau i ai: Mataio 6:12, 14-15; Roma 12:21

A o o'u su'esu'eina le uiga alofa o Keriso, ua 'ou iloa ai o le alofa o le fa'avae lea o le malō o le Atua ma o Lana fuafuāga fo'i lea mo Āna meaola uma na Ia foafoa.

Li'o le Tali: **Ioe** **Lē Mautonu**

'Ou te iloa o le alofa o le tete'e lea i le lotovale ma le ino'ino. O le fa'avae lea e tasi a le pouliuli sa fa'aalia e Satani i lona ato'atoa i le satauro.

Li'o le Tali: **Ioe** **Lē Mautonu**

Ua 'ou va'aia i manatu tau ma sui uma o lo'o fa'a'ailoa mai ai fa'agaoioiga leaga, e pei lava o le la'au i totonu o le fatu. So'o se tasi e fa'apele le lotovale ma le lē alofa, o le agaga lava lea e tasi e pei o le tiāpolo ma o lona fua o le a i'u ai i le oti.

Li'o le Tali: **Ioe** **Lē Mautonu**

'Ou te iloa na faia e le Atua tagata uma i Lona fa'atusa, ma o le a o'o lava i lē e aupito tulaga maulalo, e tatau ona fa'aaloalo ma agalelei i ai. E o'o lava i se 'upu e tasi e tautalaina ma le lē fa'aaloalo i se agaga na maluu ai Keriso, o le a i o latou luga lava lea.

Li'o le Tali: **Ioe** **Lē Mautonu**

'Ou te tatalo ia mafai ona 'ou mulimuli i le fa'ata'ita'iga a Keriso, o le alofa ma le tigāalofa lea mo tagata uma. E ala i Lona alofa tunoa, fa'amolemole ia fesoasoani mai ina ia 'ou lē faia se 'upu pe teuloto se manatu e tauimasui po o le lotovale i o'u uso ā tagata na faia i Lou fa'atusa.

Li'o le Tali: **Ioe** **Lē Mautonu**

Manatu o Su'esu'ega

Tatalo e Mana'omia

Tali o Tatalo

O le Alofa ma le Toe Fa'aleleiga

Lesona 15

O lenei a'oa'oga e fa'avae i luga o le Mataio 5:24.

(1) O LE Ā LE POLOĀ'IGA TELE LONA LUA NA FETALAI MAI AI KERISO?

E fa'apenā fo'i lona lua, o lenei, 'IA E ALOFA ATU I LĒ LUA TE TUĀ'OI, IA PEI O 'OE LAVA IĀ TE 'OE.' E leai lava se tasi poloā'iga e sili i na poloā'iga. Mareko 12:31

Mau e tau i ai: Mataio 7:12; 22:39; Luka 10:27; Roma 13:8, 9

(2) SA FA'APEFEA ONA FA'ATINOINA LE ALOFA E LE SAMARIA AGALELEI I LE FA'ATA'OTO A KERISO?

Pe ni a fa te 'oe, o ai so latou nei o le to'atolu ua fai ma tagata la te tuā'oi ma lē na maua e tagata fao mea? Ua fai mai ia, O lē na alofa atu iā te ia. Ona fa'apea atu ai lea o Iesu iā te ia. Inā alu ia, ma ia e fa'apea ona fai. Luka 10:36-37

Mau e tau i ai: Iakopo 2:15, 16; I Ioane 3:17, 18; Luka 6:32-36; Mika 6:8

O le alofa o le Atua o se mea e sili atu i lo na o le aunoa o se lelei; o se punāvaiola, o se ta'iala e lelei ma aogā, e fa'atafe pea ia fa'amanuia ai isi. Pe a fa'atasi le alofa o Keriso iā i tatou, o le a lē tu'uloto se uiga ino'ino mo tatou uso ā tagata, a e o le a tatou sa'ili ala e fa'atino ai le alofa mo i latou.

(3) O LE Ā LE FETALAIGA A KERISO E UIGA I LA TATOU TALI E TATAU MO Ē FA'ATIGĀ IĀ I TATOU?

A 'Ou te fai atu A'u iā te outou, 'aua ne'i outou tete'e atu i le leaga; ai sē na te pō mai i lou alafau taumatau, ia e liliu atu iā te ia le isi. Mataio 5:39

Mau e tau i ai: Mataio 5:44; Levitiko 19:18; Fa'ata'oto 24:29; Roma 12:17-19; I Korinito 6:7

(4) E PEI O KERISO LA TATOU FA'AA'OA'O, O LE Ā LANA TALI IĀ I LATOU SA FA'ATAUEMU MA SAUĀ IĀ TE IA?

Ona fetalai atu lea o Iesu, Lo'u Tamā e, ia e fa'amagaloina atu iā te i latou; auā ua latou lē iloa le mea ua latou faia. Ua tufatufa e i latou Ōna ofu, ona fai ai lea o le vili. Luka 23:43

Mau e tau i ai: I Peteru 3:9; 2:20-23; I Korinito 4:12; Galuega 7:58-60

(5) O LE Ā LE MEA E TATAU ONA TATOU FAIA A E LE'I TALOSAGAINA LE ALOFA TUNOA O LE ATUA MA LONA UIGA FA'AMAGALO?

Ia fefa'aalia'i a outou agasala, ma tatalo lē tasi mo lē tasi, ina ia fa'amalōlōina outou. Ua aogā tele le tatalo fa'atauānau a le tagata amiotonu. Iakopo 5:16

Mau e tau i ai: Galuega 19:18; Mataio 3:6; Levitiko 5:5; Salamo 32:5; Fa'ata'oto 28:13

Ua fetalai mai Keriso, "Inā tu'u ia i lea mea o lau taulaga i luma o le fata faitaulaga, a e alu 'oe ia mua'i fa'alelei i lou uso, i le e sau ai, ma avatu lau taulaga" (Mataio 5:24). O taulaga fa'atapuā'iga e fa'ailoa atu ai le fa'atuatua o le tagata i le taulaga, o le a tofusia e ia le alofa tunoa o le Atua e ala iā Keriso. E na o se mea e fa'afoliga pe afai e fa'ailoa atu e se tasi lona fa'atuatua i le alofa fa'amagalo o le Atua, a o lo'o ia fa'aali uiga lē alofa.

(6) O LE Ā LE VĀ FEAGAI O LE FA'AMAGALOGA E TATOU TE FA'AILOA ATU I ISI MA LE FA'AMAGALOGA O TATOU E LE ATUA?

Auā afai tou te fa'amagaloina atu tagata i a latou agasala, e fa'amagaloina fo'i outou e lo outou Tamā o i le lagi. A e afai tou te lē fa'amagaloina atu tagata i a latou agasala, e lē fa'amagaloina fo'i e lo outou Tamā a outou agasala. Mataio 6:14-15

Mau e tau i ai: Fa'ata'oto 28:13; I Ioane 1:9; Mareko 11:26

(7) PE A O TATOU O LANA FANAU FA'ALELALOLAGI, O LE Ā LE UIGA O LE ATUA E TATAU ONA TATOU FA'AALIA I LA TATOU VĀ FEALOA'I MA ISI?

O i tatou fo'i, ua tatou iloa ma ua fa'atuatua i le alofa ua i le Atua iā te i tatou. O le Atua, o le alofa lava Ia; o lē tumau i le alofa, ua tumau ia i totonu o le Atua, o le Atua fo'i o i totonu iā te ia. I Ioane 4:16

Mau e tau i ai: I Ioane 4:20

O se tasi e ta'u atu o lo'o ia galue mo le Atua a e fai mea sesē pe fa'atigā i se uso, o lo'o ia fa'aali sesē le uiga o le Atua i lea uso; ia tatou ona ta'u atu lea sesē mafa'ailoa o le agasala ina ia ō gatasi ma le Atua. Atonu e telē atu le sesē na faia e le uso iā i tatou i lo o le mea sa e faia iā te ia, a e lē fa'aititia ai la tatou avega. Pe a tatou ō atu i luma o le Atua ona o se mea na faia e se isi iā i tatou, ia tatou tu'u pea le meaalofo o le tatalo, o le fa'afetai, ma le taulaga mai le loto, ma e alu i le uso o lo'o lua fe'ese'esea'i, ia ta'u atu ma le loto maulalo la tatou lava agasala ma ōle atu ia fa'amagalo mai.

(8) O LE Ā LE FA'ATA'TTA'IGA A SAKAIO, LE TAGATA AO LAFOGA, MO LE TOE TOTOGIINA NA IA FA'AALIA INA UA UMA ONA LIUA?

A ua tū mai Sakaio, ua fa'aapea mai i le Ali'i, Fa'auta, le Ali'i e, o le a 'ou vaeluaina atu a'u mea i ē matitiva; afai fo'i ua tigā se tasi i lo'u tu'ua'i ane, 'ou te tau'i atu ai e taifā. Luka 19:8

Mau e tau i ai: Numera 5:7; Levitiko 6:4-7; 5:16; Esoto 22:1, 4, 7, 9

Pe afai sa tatou faitogafiti pe tau fa'amanu'a so tatou uso, e tatau ona faia se mea ia toe totogi atu ai. Pe a tatou faia se molimau sesē, pe a tatou fai atu se 'upu sesē, pe a tatou tau fa'aleaga i so'o se ala lava, e tatau ona tatou ō i ē sa tatou talanoa i ai e fa'ataui i lea uso ma toe fa'asa'o a tatou 'upu tau fa'asesē uma.

(9) O LE Ā LE ALA FA'ALE-TUSI PA'IA I LE FA'ALELEIGA E TATAU ONA TATOU UIA PE A FA'ATIGĀ MAI SE TASI IĀ TE I TATOU?

Ia outou iā te outou. Pe afai a e agaleaga mai lou uso iā te 'oe, ia e a'oa'i atu iā te ia; pe afai e salamō ia, ia e fa'amagalo atu ia te ia. Pe afai e fo'i fa'afitu i le aso ona agaleaga mai o ia iā te 'oe, ma fo'i fa'afitu i le aso ona liliu mai iā te 'oe, ua fa'aapea mai, Ua 'ou salamō; ia e fa'amagalo atu iā te ia. Luka 17:3, 4

Mau e tau i ai: Mataio 18:15-17; I Korinito 6:6-8; Kolose 3:13; Levitiko 19:17; Salamo 141:5

Pe a i ai ni fa'afitāuli i le vā o uso a e ua talanoaina ia sa'o i lo latou lava vā, ma i le agaga alofa o le Kerisiano, o le a lē i'u vale ai lea i se leaga. Atonu o le a galulue fa'atasi ai ona o Lona alofa so'o uma o Keriso, pe a lē fa'aleagaina vā feāloa'i ona o le fe'aina'i fa'alētatau!

(10) E ALA I LE ALOFA TUNOA O LE ATUA, O LE Ā LE UIGA PE A TATOU MULIMULI I LE ALA A KERISO MO LE FA'ALELEIGA MA LE TATOU USO?

Afai e agaleaga mai lou uso iā te 'oe, ia e alu, ma a'oa'i iā te ia tau lava o oulua ma ia. Afai e fa'alogi mai o ia iā te 'oe, ua e maua lou uso. Mataio 18:15

Mau e tau i ai: Iakopo 5:20; Roma 12:21; I Korinito 9:18, 19

(11) E ALA I LE ALOFA TUNOA O LE ATUA, O LE Ā LE I'UGA O LE FA'ALELEIGA I LE VĀ O TATOU MA IA?

O lenei, inā salamō ia outou ma outou liliu, ina ia sōloi'esea a outou agasala, ina ia o'o mai ai o tausaga e filemū ai mai luma o le Ali'i. Galuega 3:19

Mai le fa'aa'oa'oga o le soifuāga o Keriso, ua 'ou iloa ai o le alofa o se mea e sili atu i lo o le aunoa ma se lelei; o le punāvaiola e tafe mai iā i tatou, o se ta'iala e lelei ma aogā, ia fa'atafe pea e fa'amanuia ai isi.

Li'o le Tali: **Ioe** **Lē Mautonu**

'Ou te iloa ona o a'u o le Kerisiano, o lenei ta'iala e tatau ona fai ma fa'avae o feso'ota'iga uma ma le vā feāloa'i ma le Atua ma o tatou uso ā tagata.

Li'o le Tali **Ioe** **Lē MAutonu**

E manino i le mafaufau pe a ta'u e le tagata o ia o lo'o galue mo le Atua a e fai mea sesē pe fa'atigā i se uso, o lo'o ia fa'amatala sesē le uiga o le Atua i lea uso, ia tatau ona ta'u atu le sesē ma fa'aailoa atu lea agasala ina ia ō gatasi ai ma le Atua.

Li'o le Tali: **Ioe** **Lē Mautonu**

'Ou te malamalama i le pogai e tatau ai ona 'ou alu i se uso po o se tuafafine sa ma fete'ena'i pe sa 'ou fa'asesē ona o se togafiti; ia 'ou taumafai malosi e fai se fa'aleleiga a e le'i fa'amoemoe o le a fai fa'apea e le Atua se mea mo a'u.

Li'o le Tali: **Ioe** **Lē Mautonu**

'Ou te tatalo mo se poto mai le ali'i e mulimuli ai i ala fa'ale-Tusi Pa'ia auā faiga ma ē o lo'o fa'atigā mai iā te a'u, ina ia tosina ai i latou i le Ali'i.

Li'o le Tali: **Ioe** **Lē Mautonu**

'Ou te talosaga atu i le Ali'i mo le fa'amagaloga o a'u agasala, ia mafai ai ona 'ou tapa i fa'amanuiāga e tele ua folafola mai, ina ia 'ou ō gatasi ai ma 'Oe fa'apea o'u uso ā tagata.

Li'o le Tali: **Ioe** **Lē Mautonu**

Manatu o Su'esu'ega

Tatalo Mana'omia

Tali o Tatalo

O le Amataga o le Agasala

Lesona 16

O lenei lesona e fa'avae i luga o le Mataio 5:28.

(1) O LE Ā LE MEA O LE A FA'AILOA MAI AI LE TULAGA MONI O LE AMIO?

Auā e pei ona manatu o ia i lona loto, ua fa'apea lava o ia. Fa'ata'oto 23:7

Mau e tau i ai: Fa'ata'oto 4:23; Luka 11:39; Mataio 23:26

Sa mimitavale lava lutaia ona o a latou uiga agatonu ma sa vā'ai ma le ino'ino i tu'inaanau fa'aletino a ē fa'apaupau. O se mea e fa'atigā pea i loto o tagata le fa'atasi ai o fitafita Roma i Palesitina, ona ua aumaia e nei tagata 'ese tū fa'apaupau, o tu'inaanau, ma fa'afiafiāga lē aogā. I Kapanauma, o nei ta'ita'i Roma ma a latou faipa'aga fa'alētatau, ua feuiā'i solo ma a latou fa'afiafiāga i auala po o i luga o va'afolau ua fa'apisaō ai le afiafi o lo'o to'afilemū. Sa fa'atali tagata i se fetalaiga a Iesu e a'oa'i atu ai lenei vaega o tagata, a e sa matuā ofo i latou i le fa'alogu atu i 'upu o lo'o fa'ailoa mai ai le leaga o latou fo'i lava loto.

(2) O FEA E AMATA MAI AI LE FILIFILIGA E AGASALA?

O outou fo'i sa tagata 'ese anamua, sa fai o Ia mo outou fili i o outou loto i le amio leaga; a o lenei, ua lelei outou ma Ia. Kolose 1:21

Mau e tau i ai: Hosea 4:8; Ieremia 17:1; Tanielu 11:27; Kolose 1:21

(3) O FEA E AMATA MAI AI LE AGASALA O LE INO'INO?

'Aua e te 'ino'ino i lou uso i lou loto; ia e a'oa'i lava i lē hua te tua'oi, 'aua fo'i ne'i tu'u ai pea le agasala ia te ia. Levitiko 19:17

Mau e tau i ai: Sakaria 8:17; Mataio 5:22

(4) E FA'APEFEA MA O FEA E AMATA AI LE AGASALA O LE MULILUA?

A 'Ou te fai atu A'u iā te outou, ai sē va'ai atu i le fafine ina ia mana'o i ai, ua uma ona mulilua ma ia i lona loto. Mataio 5:28

Mau e tau i ai: II Peteru 2:14; Fa'ata'oto 6:25; I Ioane 2:16

Sa fetalai Iesu, pe a fiafia ma teuloto manatunatuga leaga, tusa pe fa'alilo, a e fa'aali mai ai lava o lo'o pulea pea le loto e le agasala. O lo'o i ai pea i lea agaga le 'o'ona ma o lo'o fusimau e le agasala.

O le tagata e fiafia e tu'uloto va'aiga lē mamā, e fa'afiafia i manatunatuga leaga, o le tu'inaanau o mata, o le a va'aia i agasala e fai ma le iloa le uiga moni o le leaga sa ia fa'alilo i vaega uma o lona agaga. Pe a o'o mai fa'aosoosoga, atonu o le a faia se agasala mata'utia a e lē o le leaga o lo'o fa'aalia, peita'i o le a fa'atino mai le mea sa fa'alilo ma fofōina i le loto. E pei o le tagata "ona manatu o ia i lona loto, ua fa'apea lava o ia" (Fa'ata'oto 23:7), auā e sau mai le loto "mea e tutupu o le olaga" (Fa'ata'oto 4:23).

(5) O FEA O LE A FAIA AI E LE ATUA LANA FA'AMASINOFA'AMAONI?

O A'u o Ieova o Lē su'esu'e i le loto, o lē tofotofo i manatu, ina ia tu'uina atu i tagata ta'itasi e tusa ma ōna ala, e tusa fo'i ma le fua o āna amioga. Ieremia 17:10

Mau e tau i ai: Salamo 7:9; 24:3, 4; I Samuelu 16:7; I Nofoā'iga Tupu 28:9; Ieremia 11:20; 20:12

(6) O LE Ā LE FAUTUA A PAULO I LE KERISIANO E FA'ATATAU I LE FA'AAOGĀINA O LATOU MAFAUFAU?

O lenei, ia outou fusi a'e i sulugātiti o outou mafaufau, ia fa'autauta, ia ato'atoa ona fa'amoemoe, i le alofa tunoa e molia mai iā te outou pe a fa'aalia mai Iesu Keriso. I Peteru 1:13

Mau e tau i ai: Roma 12:2; 15:5; Mareko 12:30; Efeso 4:22-24; Kolose 3:2

(7) O LE MAFAUFAU O AI E TATAU ONA I TOTONU O I TATOU PE A O TATOU O KERISIANO?

Ia iā te outou fo'i lea lava manatu sa iā Keriso Iesu. Filipi 2:5

Mau e tau i ai: I Korinito 2:16

(8) I LE TAUA O LO'O TAUINA MO TATOU LOTO MA MAFAUFAU, O LE Ā LE FOLAFOLAGA E MAFAI ONA TATOU TAPA I AI?

A o lenei le feagaiga 'Ou te osia ma le aiga o Isara'elu, pe a mavae ia aso, o lo'o fetalai mai ai Ieova: "Ou te tu'uina La'u tulafono i totonu iā te i latou, ma 'Ou tusi ai i o latou loto; e fai fo'i A'u mo latou Atua, o i latou fo'i e fai Mo'u nu'u.

Jeremia 31:33

Mau e tau i ai: Isaia 26:3; Filipi 4:7; Teuterenome 30:6

Ua 'ou iloa pe a ta'u mai e le Tusi Pa'ia le "loto" po o le "mafaufau" o lo'o fa'ailoa mai le itū o le fai'ai e fa'aaogā e fai filifiliga fa'apei ona tu'u mai e le Atua le sa'olotoga e pulea ai o tatou lava loto.

Li'o le Tali: Ioe Lē Mautonu

Ua 'ou malamalama o le finauga tele i le vā o le lelei ma le leaga e i le loto ma le mafaufau, ma lē e fa'amaoni i ai.

Li'o le Tali: Ioe Lē Mautonu

'Ou te malamalama pe a tu'uloto se manatu, pe a tu'u i ai se avanoa, o le a fa'atinoina i se gaoioiga - e fa'apei o le tagata "ona manatu o ia i lona loto, ua fa'apea lava o ia."

Li'o le Tali: Ioe Lē Mautonu

'Ou te iloa o lo'u mafaufau e fa'aletino ma e mana'omia ia fa'asatauroina i aso ta'itasi uma. Ua 'ou filifili e mulimuli i le fautua a Paulo ma, e ala i le alofa tunoa o Keriso, ia "fusi a'e i sulugātiti o lo'u mafaufau."

Li'o le Tali: Ioe Lē Mautonu

'Ou te tatalo ia i ai le mafaufau o Keriso i totonu iā te a'u ma, e ala i le mana o le Agaga Pa'ia, ia mafai ona fa'amamaluina o Ia e o'u manatunatuga ma gaoioiga uma.

Li'o le Tali: Ioe Lē Mautonu

Manatu o Su'esu'ega

Tatalo Mana'omia

Tali o Tatalo

O Masaniga Leaga ma le Loto

Lesona 17

E fa'avae lenei lesona i le Mataio 5:28, 29.

(1) PE A FA'ATUSATUSA LE FA'ALETINO MA LE FA'ALEAGAGA, O LE Ā LE FETALAIGA A KERISO I LE MEA E SILI ONA FAI I LO O SE MEA O LE A MAFUA AI LE FA'AUMATIĀGA O TATOU AGAGA?

Afai fo'i e te tausuai i lou lima taumatau, inā tutū 'ese ia, ma e lafoa'i; auā e lelei ina fano se tasi o ōu fasi tino, a e leaga pe a lafoina lou tino uma i Kēna. Mataio 5:30

Mau e tau i ai: Mareko 9:43-48; I Ioane 2:15-17; Kalatia 5:24, 25; Tito 2:12

Ina ia puipuia le tino mai fa'ama'i ma fa'aumatia ai le ola, e taumafai le tagata e tu'u atu se vaega e o'o lava i le 'ave'esea o lona lima taumatau. A e tele atu mea e tatau ona tatou tu'u 'ese atu ia lē fa'amalaiaina ai le ola o le agaga.

(2) O LE Ā LE MAFUA'AGA O MASANIGA E FA'AMAILEI AI TATOU MAI MEA O LO'O SA'ILI KERISO E 'AUMAI?

O ana amio leaga e maua ai lava lē ua agasala; o maea o ana agasala e taofia ai o ia. Fa'ata'oto 5:22

Mau e tau i ai: Fa'ata'oto 29:6; 1:31; 11:5, 6; Salamo 7:15, 16; 9:15; Ieremia 2:19

(3) E ALA I LE MANA O LE TALA LELEI, O LE Ā LE FOLAFOLAGA E MAFAI ONA TATOU TAPA I AI PE A MANUMALŌ MAI LE SAISAIGA A LE AGASALA?

E fanau mai e ia le tama tane, e te fa'aigoa fo'i iā te Ia o Iesu; auā e fa'aola e Ia Lona nu'u ai a latou agasala. Mataio 1:21

Mau e tau i ai: Roma 6:14; 8:2; Mika 7:19; Ioane 10:10

O agaga ua fa'alēaogā ma fa'apologaina e Satani o le a lavea'iina ia tofusia ai i le sa'olotoga matagofie o atali'i o le Atua, e ala lea i le tala lelei. O le fuafuāga a le Atua ia lē na o na fa'asa'oloto mai puapuagā ona o le i'uga lea o le agasala, a e ia lavea'i mai le agasala lava ia.

(4) O LE FA'ATUSA O AI NA FAIA AI LE TAGATA I LE AMATAGA, MA O LE FA'ANAUNAUGA LEA A LE ATUA IA TOE FA'AFO'I I AI?

Ona faia lea e le Atua o le tagata i Lona fa'atusa, o le fa'atusa o le Atua na Ia faia ai o ia; na faia e Ia o i la'ua o le tane ma le fafine. Kenese 1:27

Mau e tau i ai: Kenese 9:6; Salamo 139:14; Efeso 4:24

O le agaga e matuā 'ele'elea ma foliga leaga, e tatau ona fa'amamāina, ma suia ina ia fa'a'ofuina i le "matagofie mai iā Ieova lo matou Atua" (Salamo 90:17), ma "ia foliga i Lona Ālo" (Roma 8:29). E pei ona tusia "O mea e le'i va'aia e mata, e le'i lagona fo'i e taliga, e le'i o'o fo'i i le loto o se tagata, o mea ia ua saunia e le Atua mo i latou o ē alofa iā te Ia" (I Korinito 2:9). E na o le ola e fa'avavau o le a mafai ona fa'aalia mai ai le i'uga matagofie e o'o i le tagata ua toe fa'afo'i i le fa'atusa o le Atua.

(5) O LE Ā LE MEA E TATAU ONA TATOU FA'ATAGAINA IA FAIA E KERISO I O TATOU LOTO MA MAFUFAU INA IA MAFAI AI ONA FA'ASA'OLOTO I TATOU MAI LE FA'APOLOGAINA E LE AGASALA MA TOE FA'AFOUINA AI TATOU?

'Aua fo'i tou te amio fa'atasi ma lenei lalolagi, a e peita'i ia liliuina i le toe fuata'iina o outou loto, ina ia outou su'esu'e pe se ā le finagalo o le Atua, o mea ua lelei, ma le mālīe, ma le ato'atoa. Roma 12:2

Mau e tau i ai: I Ioane 2:15-17; Roma 12:1; 6:11-13; Iakopo 1:21, 22; Salamo 32:5; 143:10, 11

Ina ia tatou 'ausia lenei tapula'a maualuga, e tatau ona tu'u 'ese mea e fai ma ala o le a taupa'ū ai le agaga. E taofimau i tatou e le agasala e ala i le loto; a e a tu'u atu le loto, e fa'asino lava lea i le sali 'esea o le mata po o le tipī 'ese o le lima. Ua fetalai mai Keriso, e sili atu i le tagata e loto fa'apito ona leaga le tino, manu'a, pipili, pe a mafai ai ona ia maua le ola. O le mea e va'ai atu e pei o le a malaia ai, a e o le faitoto'a lea i le manu'a e aupito maoa'e.

(6) O AI O LE A LAVEA'IINA I TATOU MAI LE AGASALAMA GALUE IA TOE FA'AFOUINA AI I TATOU?

Auē o a'u le tagata malaia! o ai sē lavea'i iā te a'u ai le tino o lenei oti? 'Ou te fa'afetai lava i le Atua, auā o Iesu Keriso lo tatou Ali'i. Roma 7:24-25

Mau e tau i ai: I Korinito 15:57; I Ioane 5:4, 5; Filipi 3:20, 21; 1:6; Salamo 107:16; 116:16

(7) O LE Ā LA TATOU VAEGA E FAIA I LE GAOIOIGA MO LE FA'AFOUGA?

O le mea lea ia outou gaua'i ai i le Atua; ia outou tete'e atu i le ti'apolo, ona sola 'ese ai lea o ia iā te outou. Ia outou fa'alatalata atu i le Atua, ona fa'alatalata mai lea o Ia ia te outou. Tagata agasala e, inā fafano ia o outou lima, o outou ē fa'alotolotolua e, inā fa'amamā ia o outou loto. Iakopo 4:7, 8

Ia o'ofu outou i ofutau ato'atoa mai le Atua, ina ia outou mafaia ona tete'e atu i togafiti a le ti'āpolo. Efeso 6:11

Mau e tau i ai: Efeso 6:12-18; Roma 13:14; Luka 10:27; I Peteru 4:19

(8) O LE Ā LE MEA E TATAU ONA TATOU FAIA INA IA TUMAU PEA LE MEAALOFA O LE OLA MA IA MAUA ATILI PEA E PEI ONA TU'U MAI E KERISO IĀ I TATOU?

O A'u nei o le vine, o la outou. O lē tumau iā te A'u, ma A'u ia te ia, o ia lava e fua tele mai; auā e lē mafaia e outou ona fai o se mea e tasi pe a A'u lē i ai. Afai e lē tumau se tasi iā te A'u, ona lafoa'iina lea o ia i tua pei o le lāla'au, ma fa'apopoina, ona fa'apotopotoina ai lea e tagata, ma lafo i le afi, ua susunu ai. Ioane 15:5, 6

Mau e tau i ai: Kalatia 5:16; Eperu 10:38; Kolose 2:6-8

O le Atua o le vaipuna o le ola, ma e mafai ona tatou maua le ola pe a tatou feso'ota'i pea ma Ia. A vavae'ese mai le Atua, o le a tatou i ai pea mo sina taimi la'ititi, a e o le a leai se ola i a i tatou. "A o lē fiafia i la le tino, e ui lava ina ola, ua oti ia" (I Timoteo 5:6).

(9) PE A UA TATOU MANUMALŌ I LE AGASALA MA UA OLA MANUIA, IA PEI O PAULO, O LE Ā LA TATOU MOLIMAU O LE A TU'U ATU?

Ua fa'asatauroina fa'atasi i ma'ua ma Keriso; a e 'ou te lē toe ola a'u, a o Keriso o lo'o ola i totonu iā te a'u; o le ola fo'i 'ou te ola ai nei i le tino, 'ou te ola ai lava i le fa'atuatua i le Alo o le Atua, o Lē na alofa mai iā te a'u, ma foa'iina mai o Ia e Ia e fai mo'u sui. Kalatia 2:20

Mau e tau i ai: Kalatia 5:24, 25; Roma 6:5-8, 13; 8:2; Kolose 2:11-13; 3:3, 4

E pau le mea o le a mafai ai e Ia ona aumai le ola iā i tatou, pe a tu'u atu atoa o tatou loto i le Atua. Na fetalai mai Iesu, e pau le mea e mafai ai ona fa'ato'ilalo agasala lilo, o le talia lea o Lona soifuāga e ala i le tu'u atu atoa o lou ola fa'apito iā te Ia. Atonu e mafai ona e natia ia agasala i lou loto ma fa'alilo mai le va'aiga a tagata, a e o le a fa'aapefea ona e tū atu i luma o le afio'aga a le Atua?

(10) O LE Ā LE MEA O LE A TUPU I LE AGAGA O LO'O U'UMAU I LE LOTO FA'APITO O LE AGASALA MA UA TETE'E E GAUA'I O LATOU LOTO I LE ATUA?

O le tagata e agasala e oti lava ia; e lē tauia le agasala a le tamā i le atali'i, e lē tauia fo'i le agasala a le atali'i i le tamā; o le amiotonu a lē ua amiotonu e i ōna luga lava lea, o le amio leaga fo'i a lē ua amio leaga e i ōna luga lava lea. Esekielu 18:20

Mau e tau i ai: Ieremia 31:30; Levitiko 5:17; Iopu 31:3

Pe a e u'umau i lou lava tagata fa'apito, ma lē gaua'i atu le loto i le Atua, o le a e filifilia le oti. O le Atua o se afi mumū e fa'aumatiaina le agasala. Pe a e filifili le agasala ma e lē loto e vavae'ese mai ai, o le a fa'aumatia 'oe i le fa'atasi ai o le Atua, ona e fa'aumatia ai fo'i ma le agasala.

(11) PE A TU'U ATU LE LOTO MA UA FA'AMAMĀINA E LE ATUA, O AI O LE A TAU'AVEINA LE AVEGA O A TATOU AGASALA?

Na fa'apea fo'i Keriso, ua tasi lava ona avatua o Ia ma taulaga, ina ia 'aveina ai agasala a le to'atele, e fa'aali fo'i o Ia iā te i latou o ē fa'atalitali atu iā te Ia i Lona fo'i fa'alua mai, e lē ina ia 'aveina agasala, a ia latou ola ai. Eperu 9:28

Mau e tau i ai: I Peteru 3:18; I Peteru 2:21-24; I Ioane 3:5; Mataio 26:28; Isaia 53:4-6; Roma 5:6-8; 8:3; II Korinito 5:21; Kalatia 1:4

E mana'omia e fai se taulaga ona tu'u atu ai lea o 'oe i le Atua; peita'i o le taulaga maulalo lea e fai mo le taulaga e tū maualuga, o le fa'alalolagi mo le fa'aleagaga, o le mea e pala mo le mea e fa'avavau. E lē o fuafua le Atua ia tatau ona fa'aumatia o tatou loto, auā e mafai ona tatou fa'ataunu'u mea o lo'o Ia finagalo e tatou te faia. E tatau ona gaua'i o tatou loto iā te Ia, ina ia tatou toe maua mai ai, a e ua mamā ato'atoa, ma o le a feso'ota'i ma le Atua i Lona tigālofa ina ia sasa'a ifo, e ala iā i tatou Lona alofa tunoa ma le mana. E ui ina foliga mai e faigatā ma tigā pe a tu'u atu le loto o lo'o sē 'ese, a e "o le a lelei lea mo 'oe" (Mataio 5:30).

(12) PE A TU'U ATU MA LE ATO'ATO A LE LOTO IĀ TE IA, O AI O LE A MAUA MAI AI LO TATOU MALOSI?

Le Atua e, ua mata'utia 'Oe ai Ōu afio'aga pa'ia; o le Atua o Isara'elu, o Ia lea na te tu'uina atu le malosi ma le fitafita i Lona nu'u. Ia fa'afetaia lava le Atua. Salamo 68:35

Mau e tau i ai: Salamo 29:11; II Korinito 12:9, 10; Isaia 40:29-31; Kolose 1:11; Filipi 4:13

Sa iloa e Iakopo le manumālō o le fa'atuatua ma ta'ua ai o le atali'i o le Atua ina ua pa'ū i le 'ele'ele ma ua mana'omia le fesoasoani mai le agelu o le feagaiga. Ina "ua setusetu lona vae" (Kenese 32:31) sa fa'afilemūina 'autau a Esau i ōna luma, ma na punou ifo le tupu o Farao i le fia maua o se fa'amanuiāga mai iā te ia. E fa'apea le Ali'i o lo tatou fa'aolataga ona "fa'a'ato'atoaina ona o tigā" (Eperu 2:10), ma o le fanau a le fa'atuatua "na fa'amalosia i latou sa vaivai," ma "na tutuli ai 'au a nu'u 'ese" (Eperu 11:34). E fa'apea ona ave "le vete e tagata pipili" (Isaia 33:23), ma o latou e vaivai o le a "pei o Tavita," ma "o le aiga o Tavita...e pei o le agelu a le Ali'i" (Sakaria 12:8).

(13) PE A TATOU Ō MAI MA LE FA'AMAULALO I LE ALI'I MA LE SALAMŌ MONI, MA TU'U ATU ATOA LE LOTO I LE ATUA, O LE Ā LE I'UGA O LE A MAUA?

E avatu le fiasia i ē fa'anoanoa i Siona, e foa'iina atu iā i latou le matagofie e sui a'i le lefulefu, o le u'u o le oli'oli e sui a'i le fa'anoanoa, o le ofu e fai a'i vi'iga e sui a'i le loto fa'avaivai; e igoa i latou, O la'au o le amiotonu, o le fa'ato'aga a Ieova, e fai Mona vi'iga. Isaia 61:3

Mau e tau i ai: Mataio 11:28-30; Roma 6:22; 8:2; II Korinito 3:17

Ua 'ou iloa e ala mai le loto ona u'umau a'u e le agasala; a e vaganā ua tu'u atu atoa lo'u loto i le Atua o le a mafai ai e Ia ona tu'u mai le ola ma lavea'i lo'u agaga lē aogā ina ia tofusua ai i le sa'olotoga matagofie a le fanau a le Atua.

Li'o le Tali: Ioe Lē Mautonu

"ou te filifili e tu'u atu lo'u loto i le Atua; e tu'u atu le fa'alalolagi mo le fa'aleagaga, o le mea pala mo le mea e fa'avavau. O le a gaua'i atu lo'u loto iā te Ia ina ia 'ou toe maua mai ai, ia mamā ma ato'atoa ina ia mafai ai e Ia ona sasa'a ifo e ala mai iā te a'u o Lona alofa ma Lona mana.

Li'o le Tali: Ioe Lē Mautonu

Manatu o Su'esu'ega

Tatalo Mana'omia

Tali o Tatalo

O le Manuia o le Fa'aipoipoga

Lesona 18

O lenei a'oa'oga e fa'avae i luga o le Mataio 19:3.

(1) O LE Ā LE MAFUAGA A LE ATUA MO LE FA'AVAEINA O LE FA'AIPOIPOGA?

Ua fetalai mai fo'i Ieova le Atua, E lē lelei ina to'atasi o le tagata; 'Ou te faia sona fesoasoani e tatau ma ia. Kenese 2:18

Mau e tau i ai: Fa'ata'oto 18:22; Failauga 4:9-12; 4:10

(2) I LE FUAFUĀGA A LE ATUA, E FA'APEFEA ONA FA'A'ATO'ATO MA TAUSI PEA MALIĒGA FA'ALETINO MA LAGONA O LE TULAGA FA'AIPOIPO?

O le mea lea e tu'ua ai e le tane lona tamā ma lona tinā, a e fa'atasi ma lana avā; ona 'avea ai lea o i la'ua ma tino e tasi. Kenese 2:24

Mau e tau i ai: Mareko 10:6-9

(3) E TO'AFIA E I AI I LE PA'AGA MA O LE VĀ O AI (FA'ATATAU I TAMA MA TEINE) NA FAIA E LE ATUA MA IA FA'AMANUIA I LE FA'AIPOIPOGA?

O le mea lea e tu'ua ai e le tane lona tamā ma lona tinā, a e fa'atasi ma lana avā; ona 'avea ai lea o i laua ma tino e tasi. Kenese 2:24

Mau e tau i ai: I Timoteo 3:2; Levitiko 18:22; Roma 1:25-32

(4) O LE Ā LE UMI NA FUAFUA LE ATUA MO LE SO'OTASIGA O LE FA'AIPOIPOGA?

Ua noatia le fafine i le tulafono i aso uma e ola ai lana tane; a e afai ua oti lana tane, ua sa'oloto o ia e nofotane i lē ua loto i ai, tau lava i lē ua i le Ali'i. I Korinito 7:39

Mau e tau i ai: Roma 7:1-3

(5) O LE Ā LE MANUIA PE A UA TATOU MAUA LE UŌ TONU A O TATOU Ō MALAGA FA'ATASI I LE ALA O LE OLAGA?

E sili ona lelei o le to'alua i le to'atasi; auā ua iā te i la'ua le tau'i lelei i la la galuega. Auā afai e pa'ū le tasi e fa'atūina o ia i luga e lē la te to'alua; oi talofa fo'i i lē ua to'atasi pe a pa'ū, auā e leai sē la te to'alua e fa'atū ia te ia i luga. Failauga 4:9, 10

Mau e tau i ai: Failauga 4:11, 12; Kalatia 6:2; I Korinito 7:2; Fa'ata'oto 18:22

(6) O LE Ā LE FA'ANAUNAGA A LE ATUA IA TATOU VA'AIA AI LE SO'OTAGA O LE FA'AIPOIPOGA NA IA FOAFOA; MA E FA'APEFEA ONA TATOU TAUSI MA LE FA'AALOALO LAGONA MATAGOFIE FA'ALETINO SA FUAFUAINA?

Ia lelei le fa'avā i tagata uma, o le moega fo'i ia leai sona leaga; e fa'asalaina e le Atua o ē fa'ita'aga ma ē mulilulua. Eperu 13:4

Mau e tau i ai: Fa'ata'oto 5:15-23

(7) E UI INA SA FUAFUA LE ATUA IA TUMAU LELEI LE FA'AIPOIPOGA MO LE OLAGA ATOA O LE ULUGALI'I, A E PE A FA'ALEAGAINA LE SO'OTAGA FA'APITOA FA'ALEULUGALI'I, O LE Ā LE MEA O LE A IA FA'ATAGA E FAI?

'Ou te fai atu fo'i iā te outou, Ai sē fa'ate'a i lana avā, a o le'i mulilua ia, ma fai avā i se tasi, ua mulilua ia; o sē fai avā i lē na fa'ate'aina, ua mulilua fo'i lea. Mataio 19:9

Mau e tau i ai: Mareko 10:11, 12; Luka 16:18; I Korinito 7:10-16

(8) O LE Ā LE FINAGALO O LE ATUA E UIGA I LE MOTUSIA O LENEI SO'OTAGA PA'IA PE A TATALA LE FEAGAIGA FA'AULUGALI'I?

*Auā 'Ou te 'ino'ino i le alei, ua fetalai mai ai Ieova le Atua o Isara'elu; auā ua ufiufi e ia lona ofu i le fa'asauā, ua fetalai mai ai Ieova o 'au; o le mea lea ia outou fa'aeteete ai i o outou loto, a e 'aua tou te fa'a'ole'ole. **Malaki 2:16***

Mau e tau i ai: Mataio 19:4-6

I le masani fa'a-Iutaia, e fa'atagaina ona vavae 'ese e le tane lana āvā mo sina sesē itiiti, ma e mafai ai loa ona sa'oloto le fafine e toe fa'aipoipo. O lenei masaniga sa i'u ai i le matuā fai amioleaga ma le agasala. Sa fa'aailoa manino mai e Iesu i le Lauga i luga o le Mauga e lē mafai lava ona motusia le fusi o le fa'aipoipoga, vaganā ai ua lē fa'amaoni i le feagaiga o le fa'aipoipoga. "'Ou te fai atu fo'i iā te outou, Ai sē fa'ate'a i lana avā, a o le'i mulilua ia, ma fai avā i se tasi, ua mulilua ia; o se fai avā i lē na fa'ate'aina, ua mulilua fo'i lea" (Mataio 19:9).

(9) O LE Ā LE IGOA E TA'UA AI I LATOU E FAIA SO'O SE ITU'AIGA AMIOGA I FAFO O LE SO'OTAGA FA'ALEULUGALI'I, MA O LE Ā LE MEA O LE A LATOU LĒ 'AUSIA?

*Tou te lē iloa ea, o ē amio leaga e lē fai mo latou tofi le malō o le Atua? 'Aua ne'i fa'asesēina outou; o ē faita'aga, ma ē ifo i tupua, ma ē mulilulua, ma ē tauātane, ma ē fa'asotoma, ma ē gaoui, ma ē matape'ape'a, ma ē onā, ma ē agatele, ma ē fao mea, e lē fai mo latou tofi le malō o le Atua. **I Korinito 6:9, 10***

Mau e tau i ai: Kalatia 5:19, 21; Efeso 5:5; Kolose 3:5, 6; Fa'aaliga 22:15

(10) O LE Ā LE FAUTUĀGA LELEI O LO'O TU'U MAI I LE TUSI PA'IA E MAFAI ONA FA'AAOGĀ I LE FILIFILIINA O SE PA'AGA MO LE OLAGA ATOA MA AISEĀ?

*'Aua tou te amo fa'alēgatasi ma ē lē talitonu; auā pe fa'aapefea ona fa'atasi o le amiotonu ma le amio leaga? Pe fa'aapefea fo'i ona mafuta o le malamalama ma le pouliuli? 15 Pe fa'aapefea fo'i ona loto gatasi o Keriso ma Pelialo? Pe fa'aapefea fo'i ona tofusua fa'atasi o lē talitonu ma lē ua lē talitonu? **II Korinito 6:14-15***

Mau e tau i ai: Teuteranome 7:3, 4; Ne'emias 13:1-3, 23-26; Salamo 106:35; I Korinito 15:33; Efeso 5:7-11

(11) O ANAFEA, E ALA MAI IĀ TE AI, MA O LE VĀ O AI SA FAIA AI LE ULUA'I SO'OTAGA O LE FA'AIPOIPOGA?

*Ona faia lea e le Atua o le tagata i Lona fa'atusa, o le fa'atusa o le Atua na Ia faia ai o ia; na faia e Ia o i la'ua o le tane ma le fafine. **Kenese 1:27***

*Ua silasila atu le Atua i mea uma ua na faia, fa'auta fo'i, ua matuā lelei lava. O le afiafi ma le taeao o le aso ono lea. **Kenese 1:31***

*Ua fa'amoegaseina o Atamu e Ieova le Atua, i le ua moe lava; ona tōina lea e Ia le tasi ōna ivi 'aso'aso, ma na fa'aso'o ane le 'a'ano e sui a'i. O le ivi 'aso'aso fo'i na tōina e Ieova le Atua iā Atamu ua na fai a'i le fafine, ona Ia aumaia lea o ia iā Atamu. Ona fa'apea ai lea o Atamu, O le ivi lava lenei o o'u ivi, ma le 'a'ano o o'u 'a'ano; e ta'ua o ia o le fafine, auā na tōina atu o ia ai le tane. O le mea lea e tu'ua ai e le tane lona tamā ma lona tinā, a e fa'atasi ma lana avā; ona avea ai lea o i la'ua ma tino e tasi. **Kenese 2:21-24***

Ina ua ō a'e mulimuli le 'au Faresaio ma fa'afesili Iesu e uiga i le tatalaina o le fa'aipoipoga e tusa ai ma le tulafono, sa Ia fa'asino Lana 'au fa'alologologo i le amataga o lenei so'ofa'atasiga e pei ona fa'au'uina i le foafoāga. "Ona fetalai atu ai lea o Ia iā te i latou, 'Ona o outou loto ina ma'a'a na tu'u mai ai e Mose iā te outou e fa'atea i a outou avā; a e le'i fa'apea talu mai i le amataga'" (Mataio 19:8). Na Ia toe fa'amanatu iā i latou aso matagofie i Etena, ina ua fetalai atu le Atua ua "matuā lelei" mea uma.

Sa manino lava le taimi amata o le fa'aipoipoga ma le Sapati, o fa'avae e lua mo le fa'amamaluina o le Atua ma le manuia o le aigā tagata. O lea, pe a fusua e Lē na foafoaina lima o le to'alua i le fa'aipoipoga ma fa'apea mai, "O le mea lea e tu'ua

ai e le tane lona tamā ma lona tinā, a e fa'atasi ma lana avā; ona avea ai lea o i la'ua ma tino e tasi" (Kenese 2:24), ua Ia fa'aailoa mai ai le tulafono o le fa'aipoipoga mo le fanau uma a Atamu se'ia o'o i le fa'ai'uga o le lalolagi. O le mea na fetalai mai le Tamā lava ia e lelei, o le tulafono lea o fa'amanuiāga e aupito maoa'e ma atina'e ai le tagata.

(12) O LE Ā LE FA'ATA'OTO O LO'O FA'AAOGĀ E LE TUSI PA'IA E FAI MA FA'AILOGA O LE FESO'OA'IGA I LE VĀ O KERISO MA LANA EKALIESIA?

Ia tatou fiafia ma 'oli'oli, ma tu'u atu le vi'iga iā te Ia; auā ua o'o mai le tausama'aga o le Tama'i mamoe, o Lona faletua fo'i ua saunia o ia e Ia. Fa'aaliga 19:7

Mau e tau i ai: Mataio 9:15; II Korinito 11:2; Ioane 3:29; Isaia 62:5; 61:10; Hosea 2:20; Mareko 2:19

E pei fo'i o isi uma meaalofo ofoofogia a le Atua sa tu'uina i le tausiga a le aigā tagata, ua fa'apea ona fa'aleagaina le fa'aipoipoga e le agasala; peita'i o le fuafuāga a le tala lelei o le toe fa'afo'i lea i lona mamā ato'atoa ma le matagofie. I le Feagaiga Tuai ma le Feagaiga Fou o lo'o fa'aaogā le vāfeagai i le fa'aipoipoga e fa'asino i le so'otaga pa'ia i le vā o Keriso ma Ōna tagata, o le 'au fa'aolaina na Ia fa'atau i le tau o Kalevario. Ua Ia fetalai, "Aua e te fefe,... Auā o Lē na faia 'oe o lau tane lea, o leova o 'au o Lona igoa lea; o Lē na fa'atauina 'oe, o le Pa'ia o Isara'elu lea" (Isaia 54:4, 5). Ma, "Le fanau liliu 'ese e, inā fo'i mai ia, o lo'o fetalai mai ai leova;... 'Ou te avea outou" (Jeremia 3:14). I le "Pese o Pese" ua tatou fa'alogoa ai i le leo o le fa'ato'anofotane ua fa'apea mai, "O lo'u manamea, o lo'u lava Ia, e fai fo'i a'u Mona." O Ia lea "e silisili 'ese i le mano," ua tali atu fo'i Lana uō filifilia, "La'u uo e, ua sao lou lalelei, e leai lava se pona iā te oe" (Pese a Solomona 2:16; 5:10; 4:7).

(13) O LE Ā LE FA'ATONUGA O LO'O TU'U MAI I TANE, E ALA I LE FA'ATA'ITA'IGA A KERISO, MO LE FAIGA O A LATOU ĀVĀ?

O outou tane, ia outou alolofa atu i a outou lava avā, fa'apei o Keriso fo'i ona alofa mai i le ekalesia, ma foa'iina mai e Ia iā te ia e fai Mona sui. Efeso 5:25

Mau e tau i ai: Efeso 5:25-32; Fa'ata'oto 5:18, 19; Kolose 3:19; I Peteru 3:7

I le taimi o le aposetolo o Paulo, i le tusi i Kerisiano Efeso, sa ia fa'aailoa atu ai ua fa'avaeina e Keriso le tane o le ulu o lana avā, e puipui iā te ia, o le fusi o le aiga, efusia fa'atasi tagata uma o le aiga, e pei lava o Keriso o le ulu o le ekalesia ma le Fa'aola o le tino e lē mafā'amatalaina. O lea ua fa'apea mai ai, "Auā o le tane o le ulu ia o le avā, pei o Keriso fo'i o le ulu ia o le ekalesia,... O lenei, fa'apei ona usiusita'i o le ekalesia iā Keriso, ia fa'apea fo'i fafine i a latou lava tane i mea uma lava. O outou tane, ia outou alolofa atu i a outou lava avā, fa'apei o Keriso fo'i ona alofa mai i le ekalesia, ma foa'iina mai e Ia iā te ia e fai Mona sui; ina ia fa'apa'iaina ai, ina ua fa'amamāina i le fa'ata'eleina i le vai atoa ma le 'upu; ina ia na tu'uina atu o ia ia te Ia, o le ekalesia matagofie lava, e leai sona ila, po o se ma'anuminumi po o se tasi mea fa'apenā, a ia pa'ia ma ia lē ponā. O lo'o fa'apea ona tataua ona alolofa o tane i a latou lava avā" (Efeso 5:23-28).

(14) PE A MAUA E IA LE ALOFA MONI, O LE Ā LE MEA O LE A TOE TU'U ATU E LE ĀVĀ I LANA TANE I SE AIGA E FA'AOGĀTOTONU KERISO?

A o outou, ia ta'itasi outou ma alofa i lana lava avā fa'apei o ia lava iā te ia; o le fafine fo'i ia āva o ia i lana tane. Efeso 5:33

Mau e tau i ai: Efeso 5:22

(15) O LE Ā LE KĪ (FA'ATA'ITA'I) MO LE FA'AIPOIPOGA E MANUIA MA LE AIGA E FA'AMANUIAINA PEI ONA FA'AMATALA MAI I LE SALAMO 128?

Amu'ia i latou uma o ē matata'u iā leova, o ē savavali i Ōna ala. Salamo 128:1

Mau e tau i ai: Fa'ata'oto 3:5, 6; 24:3, 4; Iosua 24:15, 16; Luka 11:17; Eperu 13:4

E na o le alofa tunoa o Keriso o le a mafai ai ona fa'atū lenei fa'avae ia pei ona fuafuaina e le Atua - o le sui mo le fa'amanuiaina ma le si'itia i luga o le aigā tagata. Ma o le a mafai e aiga uma o le lalolagi ona fa'asino i aiga o le lagi, i le loto gatasi, ma le filemū, ma le alofa.

(16) O FEA E MAFAI ONA MAUA AI SE FA'AMAFANAFANAGA MA LE FA'AMOEMOE MO LĒ UA LOTO FA'ANOANOA ONA O LE LĒ FA'AMAONI I LE FEAGAIGA O LE FA'AIPOIPOGA?

O le fa'amatalaloto lea iā te a'u i lo'u puapuagā; auā o Lau afioga ua fa'aolaolaina ai a'u. Salamo 119:50

Mau e tau i ai: Isaia 54:5; I Peteru 5:7; Roma 15:4; 8:28; Eperu 13:5; Filipi 4:4-7

I le asō e pei lava o ōna pō o Keriso, o le tulaga o le tagata ua fa'ailoa mai i 'upu fa'anoanoa le ato'atoa fa'alelagi o lenei vāfeagai pa'ia. Peita'i e ui ina o'ona ma maua le lē malie i le mea sa fa'amoemoe e maua ai le fiafia ma le faigāuō, a e o lo'o ofoina se fa'amafanafanaga e le tala lelei a Keriso. O le a fa'aleleia le mea ua 'o'ona e le onosa'i ma le fa'apalepale e mafai ona tu'u mai e Lona Agaga. O le a fa'atumulia le loto o lo'o afio ai Keriso, e fa'amalieina e Lona alofa ma o le a lē tuagia i le naunau e maua se tigālofa ma fa'atāuaina ia lava. Pe a tu'u atu le agaga i le Atua, o le a mafai ona fa'ataunu'u e Lona poto so'o se mea e lē mafai e le tagata ona fai.

(17) PE AFAI E TOFUSIA LE ULUGALI'I I LE AGAGA O LE LOTO SALAMŌ MA LE FA'AMAGALOGA, E ALA I LE ALOFA TUNOA O LE ATUA, O LE Ā LE MEA E MAFAI E LE MANA O LE ATUA ONA FAIA MO LE FA'AIPOIPOGA UA FA'ALEAGAINA?

Auā e fa'amafanafanaina Siona e Ieova, e fa'amafanafanaina ana mea fa'atafunaina uma lava; Na te faia lona fanua lafulafuā e pei o Etena, ma lona toafa e pei o le fa'ato'aga a Ieova; e maua ai le fiafia ma le 'oli'oli, o le fa'afetai ma le leo o le pese. Isaia 51:3

Mau e tau i ai: Isaia 58:12; 61:1-7; II Korinito 5:17, 18; II Nofoa'iga Tupu 7:14

E ala i le fa'aaliga mai o Lona alofa tunoa, o loto sa fa'alēogalua po ua fa'avā'ese, atonu o le a so'ofa'atasi e fusi e tumau i lo o mea o le lalolagi - o fusi auro lea o se alofa e lavātia tofotofoga.

'Ou te iloa o le fa'aipoipoga o le fusi fa'apitoa mo le olaga atoa e pei o se meaalofoa mai le Atua ia tofusia ai i le vā o le ali'i ma le tama'ita'i.

Li'o le Tali: **Ioe** **Lē Mautonu**

Ua 'ou malamalama, e ui ina sa fuafua le Atua ma Lana naunauta'iga ia tumau le feagaiga o le fa'aipoipoga mo le olaga atoa, a e pe afai e fa'aleagaina lea feagaiga pa'ia e ala i le lē fa'amaoni o le tasi, o le a la fa'atagaina le isi ua manu'a e fa'asa'oloto mai lea so'otaga.

Li'o le Tali: **Ioe** **Lē Mautonu**

Ua 'ou iloa fo'i, ona o le alofa tunoa o le Atua, pe a fa'aalia le salamō ma le fa'amagaloga, e mafai e Ia ona toe fa'aleleia le so'otaga sa fa'aleagaina.

Li'o le Tali: **Ioe** **Lē Mautonu**

'Ou te iloa pe a fausia le fa'aipoipoga ma le aiga i le ala sa fa'atonu mai e le Atua ma Lana fa'ata'ita'iga, ma mulimuli i le fautua ua tu'u mai e fa'atatau i le faiga o le tasi e le tasi - o le fa'asoa tutusa o le alofa ma le fa'aaloalo - o le a i'u ai i se fa'amanuiāga e tele mo i latou o lo'o i ai i lea aiga, ma se fa'amanuiāga fo'i mo i latou uma e maua se feso'ota'iga i ai.

Li'o le Tali: **Ioe** **Lē Mautonu**

Manatu o Su'esu'ega

Tatalo e Mana'omia

Tali o Tatalo

'Aua Lava Ne'i Tautō

Lesona 19

O lenei lesona e fa'avae i luga o le Mataio 5:33-37.

(1) O Ā MAFUA'AGA E LUA O LE FA'ATAUTŌ?

Auā e tautō tagata i se tasi e sili, o le tautō fo'i e fa'amaoni ai, o le iuga lea o fefinaua'iga uma iā i latou. Eperu 6:16

Mau e tau i ai: Numera 30:2, 10; Esera 10:5

(2) O LE Ā LE FA'ATONUGA FA'APITOA NA FETALAI MAI KERISO IA LĒ FAIA A O TU'U ATU SE FEAGAIGA MO LE FA'ATAUNU'UINA O A TATOU 'UPU?

A 'Ou te fai atu A'u ia te outou, 'aua lava ne'i tautō; 'aua le tautō i le lagi, auā o le nofoāli'i lea o le Atua; po o le lalolagi, auā o le mea e tū ai Ōna 'a'ao lea; po o Ierusalema, auā o le 'a'ai lea a le Tupu Silisili. Mataio 5:34-35

Mau e tau i ai: Iakopo 5:12; Teuterenome 23:22, 23

(3) O LE Ā LE MAFUAGA MO LENEI FA'ATONUGA?

O'u uso e, e muamua lava i mea uma lenei, 'aua lava ne'i outou tautō, po o i le lagi, po o i le fanua, po o se tasi lava tautōga; a e tau lava o la outou ioe, ioe, ma la outou leai, e leai; ina ne'i fa'asalaina ai outou. Iakopo 5:12

Mau e tau i ai: Levitiko 5:4; Mataio 5:37

Ua tu'u mai le mafuaga o lenei fa'atonuga: Ia tatou lē tautō "i le lagi, auā o le nofoāli'i lea o le Atua; po o le lalolagi, auā o le mea e tū ai Ōna 'a'ao lea; po o Ierusalema, auā o le 'a'ai lea a le Tupu silisili. 'Aua fo'i ne'i e tautō i lou ulu, auā e te lē mafaia ona fa'asinasina, pe fa'auliuli se lauulu e tasi" (Mataio 5:34-36).

O mea uma e mai le Atua. E leai se mea e iā i tatou e le'i foa'iina mai, ma o mea uma o lo'o iā i tatou ua fa'atauina mo i tatou e ala i le toto o Keriso. O nei mea uma sa fa'ailogaina i le satauro, ma fa'atauina e le toto tāua e lē mafai ona fa'atauina se tau, auā o le Atua soifua lava lea. O lea e leai sa tatou mea e tatau ona fai ma feagaiga, ina ia fa'ataunu'u ai sa tatou 'upu.

(4) O LE Ā LE MEA O LO'O FA'ASĀ MAI I LE POLOĀ'IGA LONA FĀ?

'Aua e te ta'u fua le suafa o Ieova lou Atua; auā e lē fa'asaoina e Ieova o lē ta'u fua i Lona suafa. Esoto 20:7

Mau e tau i ai: Levitiko 19:12

Sa malamalama lutaia o lo'o fa'asāina i le Poloa'iga e Tolu le fa'aaogā fa'alētatau o le suafa o le Atua; peita'i ua latou manatu o lo'o latou sa'oloto pea e fa'aaogā nisi tautōga. Sa masani latou i le fa'aaogā lautele o le fa'atautō. E ala mai iā Mose, sa fa'asāina le fa'atautō sesē, a e sa tele a latou togafiti 'ese'ese e sa'oloto ai latou mai le fa'ataunu'uina o le mea na tautō ai. E le'i fefefe i latou i le faia o mea e lē tatau ma le lē fa'aaloalo, ma sa puipua i latou mai le lē fa'amaoni e ala i se tulaga e mafai ai ona 'alo'ese mai le tulafono.

Na ta'usalaina e Iesu a latou masaniga, ma fa'aailoa mai o nei tū masani o tautōga, o le solia lava lea o le poloa'iga a le Atua.

(5) I SE FA'AVAE TAULETULAFONO, O LALO O LE Ā LE TULAGA NA TALI AI KERISO INA UA FESILIGIA E LE FAITAILAGA SILI?

A ua lē fetalai Iesu. Ona fai mai ai lea o le faitaulaga sili, ua fa'aapea mai iā te Ia, 'Ou te fai atu iā te 'Oe ia te tautō mai ia te i matou i le suafa o le Atua soifua, po o 'Oe le Keriso, o le Ālo o le Atua. Mataio 26:63

Mau e tau i ai: Luka 22:70; Mareko 14:61

E le'i fa'asāina e le Fa'aola le fa'aaogā o le tautō tauletulafono, ona o lo'o vala'au ai i le Atua ia fai ma molimau e moni ma fa'amaoni mea uma o lo'o tautalagia. I Lona fa'amasinoga i luma o Faipule Faitulafono, e le'i fa'afiti Iesu e fai se molimau ma ua fa'atautō. Sa fai atu le faitaulaga sili iā te Ia, "'Ou te fai atu ia te 'Oe ia te tautō mai ia te i matou i le suafa o le Atua soifua, po o 'Oe le Keriso, o le Ālo o le Atua." Na tali atu Iesu, "O lea lava" (Mataio 26:63-64). Pe ana ta'usalaina le tautō fa'aletulafono e Keriso i le Lauga luga o le Mauga, se manū na tatau ona Ia a'oa'i atu le faitaulaga sili i Lona fa'amasinoga ma fa'amalosia ai Āna a'oa'oga, mo le lelei o Ōna so'o.

(6) O LE Ā LE FA'AI'UGA O LE A O'O IĀ I LATOU E AUMAIA MOLIMAU PEPELO I LE ATUA PO O LE TAGATA?

E lē fa'asaina le molimau pepelo; ma lē ua tala pepelo, e lē sao lava ia. Fa'ata'oto 19:5

Mau e tau i ai: Fa'ata'oto 21:28; 12:19; Esoto 23:1; Tanielu 6:24; Mataio 12:36

E to'atele lava ē o lo'o fiafia e taufa'asesē o latou uso ā tagata, peita'i o latou ia ua ulufia e le Agaga o le Atua ma sa a'oa'oina e lē o se mea tatau le pepelo i Lē na faia i latou. Pe a i lalo o se tautōga, ia iloa e lē na o tagata o lo'o latou tautō i ai, a o i luma o le Atua; pe a latou tu'u atu se molimau pepelo, o lo'o faia lea iā te Ia Lē e silafia mea o i le loto ma e silafia le mea moni. O le a tete'e latou i le faia o lenei agasala ina ua iloa i'uga mata'utia mai le fa'amasinoga mo i latou.

(7) O LE Ā LE TA'IALA E FA'AALIA MAI PE A TAUTALA MA LE FA'AMAONI?

O lē tautala fa'amaoni, ua fa'aali mai e ia le tonu; a o lē molimau pepelo, ua fa'aali mai e ia le fa'a'ole'ole. Fa'ata'oto 12:17

Mau e tau i ai: Fa'ata'oto 14:25; 13:5; 12:22

O le Kerisiano e mafai i taimi uma ona fa'atautō a o tu'u atu lana molimau. E ola pea ia pei o lo'o fa'atasi ai le Atua, ma e iloa o manatu uma o lo'o silafia e Ia; pe a mana'omia e fai fa'apea i se tulaga fa'aletulafono, e ōle ia i le Atua ia 'avea ma molimau o āna 'upu uma, e moni lea ma e fa'amaoni.

(8) O LE Ā LE TA'IALA NA TU'U MAI E KERISO UA LĒ MANA'OMIA AI ONA FAI TAUTŌGA?

A ia fa'apea la outou 'upu, Ioe, ioe; E leai, e leai; auā o le upu e sili i na 'upu, mai le leaga lava ia. Mataio 5:37

Mau e tau i ai: Iakopo 5:12; Kolose 4:6; II Korinito 1:17

Na fa'ata'atia e Iesu se ta'iala ia lē mana'omia ai se tautōga. Sa Ia a'oa'o mai e tatau ona fai ma tulafono o le gagana le 'upu moni. "A ia fa'apea la outou 'upu, Ioe, ioe; E leai, e leai; auā o le upu e sili i na 'upu, mai le leaga lava ia" (Mataio 5:37).

O nei 'upu ua fa'alēaogāina ai fa'amatalaga ma fuai'upu e fai lē tatau. Ua fa'alēaogā fa'aaloaloga taufa'asesē, o le 'aloga mai le mea moni, o fuai'upu taufa'asesē, o le gugutu ma la faifa'atele, o le lē fa'amaoni i fefa'ataua'iga, o faiga ia ua i ai le lalolagi i nei ōna pō. Ua a'oa'o mai ai e mafai ona ta'ua o le tagata fa'amaoni so'o se tasi e lē fa'aali tonu mai i āna 'upu mea o lo'o i lona loto, po o se tasi e fa'aalia foliga e 'ese'ese ma ōna uiga.

Pe ana usita'i i fetalaiga a Keriso, se manū ua latou lē tautala i masalosologa leaga ma faitiōga lē lelei; ina ua tautala e fa'ata'u i gaoioiga ma fuafuāga a le isi tagata, o ai e mafai ona iloa po o tautala i se 'upu moni? E fa'afia ona fa'anefu le uiga moni na tu'u mai ona o le mimitavale, o le māitaita, ma le to'atama'i! O se tepatasi, o sina 'upu, o le fesuia'iga o le leo, e o'o lava i mea ua fa'amaonia o le a fa'ailoa ai mea e lē tonu. Ma "o mea e sili" i le 'upu moni, e "mai le leaga lava ia."

(9) O AI LE TA'ITA'I E TA'IMUAINA I 'UPU MONI UMA Ē O LO'O MULIMULI IĀ KERISO?

A e a malii mai o Ia, o le Agaga lea e tupu mai ai le 'upu moni, e ta'ita'i e Ia ia te outou i 'upu moni uma; auā e lē tautala fua Ia na o Ia, a o mea uma e fa'alogi i ai o Ia, e tautala a'i lava, ma fa'ailoa mai ia te outou mea e o'o mai. Ioane 16:13

Mau e tau i ai: Ioane 14:17; 15:26; 14:26; I Korinito 2:10-13

O mea uma e faia e le Kerisiano e tatau ona manino lelei fa'apei o le malamalama o le lā. O le 'upu e ā le Atua ia; o le tautala e ā le Kerisiano, e mai iā Satani lea; ma o so'o se tasi e ui 'ese mai le ala sa'o o le 'upu moni o lo'o aga'i atu ia i le mana leaga a le fili. E lē o se mea māmā ma faigofie le tautala ma le fa'amaoni, ona e lē mafai ona tautala i le mea tonu se'iloa e tatou te iloa le 'upu moni. Ua fa'afia ona aumaia taofi ua uma ona fafau, o le fa'ailoga tagata, o le pote e lē ato'atoa, o le sesē o iloiloa, o le a lē mafai ai ona i ai malamalamaga tonu i mea e tatau ona tatou faia! E lē mafai ona tatou tautala i le mea moni se'iloa e ta'ita'iina pea o tatou mafaufau e Ia, o le 'upu moni lava lea.

(10) O LE Ā LE ITU'AIGA GAGANA E TATAU ONA TAUTALA AI I TAIMI UMA SO'O O LO'O MULIMULI IĀ KERISO MA AISEĀ?

'Aua ne'i alu atu se 'upu leaga ai o outou gutu, na o le 'upu lelei e ati a'e ai i mea e aogā, e tupu ai le lelei i ē fa'alogologo i ai. Efeso 4:29

Mau e tau i ai: Kolose 3:8, 9; Sakaria 8:16, 17; Iakopo 3:9-12

Ua fa'atonu mai Keriso, e ala i le aposetolo o Paulo, "Ia lē aunoa a outou 'upu ma le alofa...." (Kolose 4:6). I le malamalama o nei 'upu, o lo'o fa'aalia mai i fetalaiga a Keriso i luga o le mauga le lē lelei o le fa'aulaula, o le fa'atausua, o mea lē tāua, ma manatu 'ele'elea. E mana'omia ia lē na o le moni o a tatou 'upu, a e tatau ona mamā ato'atoa.

(11) O LE Ā LE TATALO E TATAU E LE KERISIANO ONA FAI I ASO UMA?

Ieova e, ia e laved'i mai iā te a'u i laugutu pepelo, ma le laulaufaiva e fa'a'ole'ole. Salamo 120:2

Mau e tau i ai: Salamo 141:3; 49:3; Fa'ata'oto 8:6, 7; 10:19

(12) E FA'AFEFEA ONA FA'AILOA ATU UIGA LELEI O LE GAGANA A O FAIA GALUEGA A LE TAGATA KERISIANO?

'Aua tou te faia se mea lē tonu i le fa'amasinoga, i le fua fa'aloloa, po o le fua fa'atautau, po o le fua fa'a'ofu'ofu. Ia ia te outou le fua fa'atautau ua tatau, o ma'a e tatau, o le efa e tatau, ma le sinu e tatau; o A'u o Ieova lo outou Atua, na 'Ou au mai iā te outou nai le nu'u o Aikupito. Levitiko 19:35-36

Mau e tau i ai: Teuterenome 25:13, 15; Fa'ata'oto 11:1; 16:11; 20:10; Esekielu 22:12, 13

O i latou uma ua a'oa'oina iā Keriso o le a lē "amio fa'atasi ma galuega le aogā a le pouliuli" (Efeso 5:11). O le gagana, e fa'apei lava o le olaga, o le a faigofie, tautala sa'o, ma e moni; o i latou ia o lo'o sauniuni mo le fa'atasiga ma le 'au pa'ia, o ē "e lē iloa fo'i se pepelo i o latou gutu" (Fa'aaliga 14:5).

Ua 'ou malamalama o le mafuaga e lē faia ai se tautōga ona e mai le Atua mea uma ma ua fa'atauina i le toto o Keriso. E lē o iā i tatou le pule e osi ai se feagaiga e pei o le a tatou fa'ataunu'u a tatou 'upu e fa'atautō ai i mea o i le lagi po o le lalolagi.

Li'o le Tali: Ioe Lē Mautonu

Ma le fesoasoani mai o le Atua, 'ou te filifili ia 'ou lē solia le poloa'iga e tolu i le fa'aaogā lē tatau o le sua'fa o le Ali'i.

Li'o le Tali: Ioe Lē Mautonu

Ua 'ou iloa ona o le fa'aa'oa'o a Keriso, o le mea e tatau le fa'atautō i le tulaga tauletulafono. Ona o a'u o le Kerisiano, 'ou te fiafia e 'avea le Atua ma a'u molimau, ia fa'ailoa atu ai le 'upu moni ma le iloa o lo'o silafia e le Atua manatunatuga uma.

Li'o le Tali: Ioe Lē Mautonu

'Ou te malamalama fo'i o lo'o a'oa'o mai Keriso e lē mana'omia le tautōga a e lē o i se tulaga fa'aletulafono. E tatau ona fa'amaoni a tatou 'upu i taimi uma ina ia lē mana'omia ia itu'aiga tautōga. Ia manino lelei fa'apei o le malamalama o le lā 'upu uma a le Kerisiano ma āna mea e fai, ma ia fa'aātaina ai ta'iala o le 'upu moni na tu'u mai e le Atua.

Li'o le Tali: Ioe Lē Mautonu

Manatu o Su'esu'ega

Tatalo Mana'omia

Tali o Tatalo

O le Maila Fa'asili

Lesona 20

E fa'avae lenei a'oa'oga i luga o le Mataio 5:38-42.

E i ai mea tutupu sa lē fiafia ai tagata Iutaia mai a latou feso'ota'iga ma fitafita Roma. Sa fa'amautū vaega a fitafita i itū 'ese'ese uma o nu'u o Iutaia ma Kalilaia, ma ua fa'amanatu ai i tagata le tulaga mauualalo ua o'o i ai lo latou malō. Sa latou fa'alogi i le leo tele o le pū ma va'aia le potopoto o fitafita e si'omia le fu'a Roma ma ifopunou e fa'amamalu lenei fa'aailoga o lana pule malosi. O fetaua'iga faisoi o i le vā o fitafita ma tagata 'ese'ese sa atili fa'ateleina ai le faitaga'i.

(1) O LE Ā LE MEA NA FA'ATONU FA'AMALOSI E FITAFITA ROME INA IA FAIA E SIMONA LE KURENE?

*Ua latou ō atu, ona iloa ai lea e i latou o le tagata Kurene, e igoa iā Simona, ua latou fa'atauānau ia te ia ia 'ave Lona satauro. **Mataio 27:32***

Mau e tau i ai: Mareko 15:21; Luka 23:26

I femalagaa'iga a se ta'ita'i Roma ma āna fitafita leoleo, o le tele o taimi e na te fa'aaogā tagata Iutaia o lo'o galulue i fa'ato'aga ma fa'atonu fa'amalosi i latou e tau'ave avega mamafa i luga o mauga pe fai isi galuega o lo'o mana'omia. O lea mea sa tatau i le tulafono fa'a-Roma ma le aganu'u, a e a tete'e i ai i ia mana'oga, e i'u ai i 'upu fa'atigā ma le fa'asauā.

Sa atili fa'atumulia loto o tagata i le naunau e tu'u'ese le amo mamafa a Roma, ma sa fa'apitoa i tagata Kalilaia le malosi o le agaga fouvale. O Kapanau se 'a'ai e tū fa'atuā'oi, sa i ai le nofoāga o fitafita leoleo Roma; ma a o a'oa'o ai Iesu, o le va'aiga o ia fitafita sa fa'amanatu ai i Lana 'au fa'alologologo le tulaga fa'alumaina o Isara'elu. Sa tepa tagata iā Keriso ma le naunauta'iga o Ia Lē o le a fa'amaulaloina Roma.

(2) O LE Ā LE MEA NA A'OA'O ATU KERISO I TAGATA IA TALI ATU AI Ē O LO'O FA'ASAUĀ IĀ I LATOU, A E O LE MEA O LO'O TETE'E I FA'AMOEMOEGA A TAGATA?

*A 'Ou te fai atu A'u iā te outou, 'aia ne'i outou tete'e atu i le leaga; ai sē na te pō mai i lou alafau taumatau, ia e liliu atu iā te ia le isi. **Mataio 5:39***

Mau e tau i ai: Levitiko 19:18; Roma 12:17

A e ua silasila a'e Iesu ma le fa'anoanoa i foliga o tu'u mai i Ōna luma. Ua Ia silafia le agaga o le toe tauimasui ua fa'amautū ōna leaga i o latou luga, ma iloa ai le naunau o tagata mo le malosi e fa'aumatia ai o latou fili sauā. Ma le fa'anoanoa tele, na Ia fa'atonu iā i latou, "'Aua ne'i outou tete'e atu i le leaga; ai sē na te pō mai i lou alafau taumatau, ia e liliu atu ia te ia le isi" (Mataio 5:39).

(3) E FA'APEFEA ONA FA'AMATALAINA E LE TUSI O FA'ATA'OTO LE TALI MAI A SO'O O KERISO I FAIGA LEAGA?

*'Aua e te fa'apea ane, 'Ou te tau'i atu i le leaga; ia e fa'atalitali iā Ieova, ona fa'aolaina lea o 'oe e Ia. **Fa'ata'oto 20:22***

Mau e tau i ai: Fa'ata'oto 24:29; 24:17

O nei 'upu e na o se toe fa'amamafaina o le a'oa'oga a le Feagaiga Tuai. E moni o le tulafono, "E suia le mata i le mata, e suia le nifo i le nifo" (Levitiko 24:20), o se tu'utu'uga i tulafono sa tu'uina iā Mose; peita'i o se poloā'iga lava fa'alemalō. E leai se tasi e mauta'ia i le tauimasui mo ia lava, auā ua iā i latou fetalaiga a le Ali'i: "'Aua e te fa'apea ane, 'Ou te tau'i atu i le leaga" (Fa'ata'oto 20:22). Ma ia, "'Aua ne'i e fa'apea ane, E pei ona faia e le tagata iā te a'u, e fa'apea lava ona 'ou faia ia te ia" (Fa'ata'oto 24:29).

(4) E FA'APEFEA LE FAIGA O A TATOU "FILI" FA'APEI ONA A'OA'O AI TATOU E KERISO?

*Afai e fia 'ai lē ua ita iā te 'oe, ia e fa'afaga iā te ia; afai e fia inu o ia, ia e fa'ainu iā te ia i le vai. **Fa'ata'oto 25:21***

Mau e tau i ai: Mataio 5:44; Esoto 23:4, 5; Roma 12:20, 21

O le soifuāga fa'alelalolagi atoa o Iesu o se fa'atinoina lea o lenei ta'iala. Na tu'ua e lo tatou Fa'aola Lona aiga i le lagi ina ia aumai le Areto o le ola i Ōna fili. E ui ina fa'ae'e i Ōna luga mai le fanau mai e o'o i le tu'ugamau molimau pepelo ma sauāga, a e na latou maua mai iā te Ia le alofa fa'amagalo. Ua Ia fetalai, e ala mai le perofeta o Isaia, "Na A'u tu'uina atu Lo'u tua i e sasa mai, ma O'u alafau i ē futi le 'ava; 'Ou te le'i ufiufi fo'i O'u mata i le mā ma le feanu" (Isaia 50:6). Ma "Na fa'asauāina o Ia, sa tigaina fo'i o Ia, a e lē tautala mai o Ia; e pei o le tama'i mamoe ua ta'ita'iina ia fasia, e pei o le mamoe fo'i i luma o ē sele lona fulufulu, ua fa'alologo ia, o Ia fo'i ua lē tautala mai" (Isaia 53:7). Ma e mai le satauro o Kalevario, ua fa'asolo mai ai lava i augātupulaga Lana tatalo mo ē sa fa'asauā ma fasioti iā te Ia ma le fe'au o le fa'amoemoe i le gaoi ina o le a oti.

(5) E TUSA PE O LE Ā LE TULAGA O I AI, O LE Ā LE FOLAFOLAGA E MAFAI ONA TAPA I AI I LATOU O Ē ALOLOFA I LE ALI'I?

Ua tatou iloa fo'i e galulue fa'atasi mea uma e lelei ai i latou e ua alofa atu i le Atua, o ē ua vala'auina i Lona finagalo.

Roma 8:28

Mau e tau i ai: Roma 8:35-39; Kenese 50:20; Salamo 46:1, 2; I Peteru 1:7, 8

Sa si'omia Keriso e le fa'atasi ai o le Tamā, ma e le'i afāina o Ia vaganā mea sa fa'atagaina mai le alofa o le Atua mo le manuia o le lalolagi. O lenei le pogai o Lona mafanafana, ma e fa'apea fo'i mo i tatou. O lē ua fa'atumulia e le Agaga o Keriso ua tumau iā Keriso. E pa'ū i luga o le Fa'aola le mala o lo'o fa'asinotonu i lea tagata, ona o lo'o si'omia ia e Lona fa'atasi ai. So'o se mea e o'o iā te ia, e sau lea mai iā Keriso. E lē mana'omia ia na te'ena le leaga, auā o Keriso lana talipupuni. E leai se mea e mafai ona tagolima iā te ia vaganā ua fa'atagaina e le Ali'i, ma o "mea uma" e fa'ataga "e galulue fa'atasi...e lelei ai i latou ē ua alofa atu i le Atua" (Roma 8:28).

(6) E FA'APEFEA IĀ I TATOU, PE AFAI O SO'O O KERISO, ONA FA'ATATAUINA O TATOU PULEAGA FA'ALEMALŌ MA AISEĀ?

Ia usiusita'i tagata uma i faipule silisili; auā e leai se pule pe a lē mai le Atua; o pule uma lava o lo'o fai nei, ua fa'atūina e le Atua. Roma 13:1

Mau e tau i ai: Roma 13:7; Luka 20:25; Fa'ata'oto 24:21

(7) PE AFAI E LĒ TALAFEAGAI TULAFONO A LE TAGATA MA TULAFONO A LE ATUA, IA FA'APEI O PETERU, O LE Ā LE TALI E TATAU ONA TATOU TU'U ATU?

Ona tali atu lea o Peteru ma le 'au aposetolo ua fa'apea atu, E tusa ona sili o lo matou 'ana'ana i le Atua i lo matou 'ana'ana i tagata. Galuega 5:29

Mau e tau i ai: Galuega 4:19; I Samuelu 15:24; Mareko 7:7-9

(8) E FA'APEFEA ONA FA'AMATALA MAI E LENEI FUAI'UPU INA IA TATAU ONA TATOU Ō IA FA'ASILI SE ISI MAILA?

O lē fia fai se fa'amasinoga ma 'oe e 'ave lou ofu tino, ia e tu'u atu fo'i i ai ma lou ofu tele. Mataio 5:40

Mau e tau i ai: Luka 6:29; I Korinito 6:7; Salamo 37:21; Fa'ata'oto 3:27, 28

Sa fa'atonu atu Iesu i Ōna so'o e fai mea ia fa'asili atu i lo o mea o lo'o mana'omia latou te faia, ma ia 'aia le tete'e i ē pule. Ma ia tatau iā i latou ona fa'ataunu'u tiute tau'ave, tusa pe e talatu o le mea e mana'omia fa'aletulafono. O le tulafono sa tu'u mai iā Mose na fa'atonu mai ai ia loto alofa i ē matitiva. Pe a tu'u mai e le tagata lona ofu e fa'amau ai se aitalafu, ia 'aia ne'i fa'atagaina le tali'aitalafu e ulu i le fale ma aumai lea mea; a e tatau ona fa'atali ia i fafo se'i aumai le ofu fa'amau iā te ia. Po o le ā lava le tulaga, e tatau ona toe fa'afo'i le fa'amau i lē ōna le feagaiga i le afiafipō (Teuteranome 24:10-13).

E le'i fa'atauinā nei tu'utu'uga alofa i ōna pō o Keriso; a e na a'oa'o Iesu i Ōna so'o ina ia gaua'i atu i le filifiliga a le fa'amasinoga, e ui ina tapa mai e sili atu i lo o le mea ua fa'atagaina e le tulafono a Mose. Pe a mana'o mai i se vaega o le ofu, e tatau ona tu'u atoa i ai. Ia totogi atoa le aitalafu; pe a tatau ai, totogi fa'asili le mea na fa'ataga mai e le fa'amasinoga.

(9) O LE Ā LE TALI E TATAU ONA TATOU TU'U ATU PE A O TATOU O KERISIANO UA I LE TULAGA O LĒ E TALIAITALAFU?

Ia e avatu i lē ua ole mai iā te 'oe; 'aia fo'i e te liliu 'ese i lē ua fia nonō tupe iā te 'oe. Mataio 5:42

Mau e tau i ai: Mataio 25:35-40

O le lesona lava lea e tasi sa a'oa'o e ala mai iā Mose: "'Aua ne'i e fa'ama'a'a atu lou loto, pe u'u mau lou lima i lou uso mativa; a ia e matuā fa'amafola atu lou lima iā te ia, ma e matuā avatu lava i ai o mea ia tusa ma lona mativa, ua mativa ai o ia" (Teuterenome 15:7, 8).

(10) PE A O TATOU O TALIAITALAFU, UA FA'APEFEA ONA A'OA'O I TATOU INA IA ALU I SE MAILA FA'ASILI MO TATOU FILI O LO'O MANA'OMIA LE FESOASOANI?

Peita'i outou, ia outou alolofa atu i ē o fai outou mo latou fili, ma ia agalelei atu, ma ia avatu tupe e nonōina, 'aia le fa'amoemoe i se mea e tasi e 'au mai; e tele ai so outou totogi, e 'avea fo'i outou ma fanau a lē Silisili 'ese; auā o Ia Lē agamalū i ē agavale, atoa ma ē amio leaga. Luka 6:35

Mau e tau i ai: Luka 6:27-31; Mataio 7:12

O lenei matā'upu ua fa'amanino ai le uiga o fetalaiga a le Fa'aola. E lē o a'oa'o mai tatou e Keriso ina ia tu'u atu fa'alētatau i tagata uma e talosaga mo se fesoasoani; peita'i ua fetalai mai o Ia, "e matuā avatu lava i ai o mea ia tusa ma lona mativa" (Teuterenome 15:8); ia avatu fa'ameaalofa a e lē o se aitalafu, ona e tatau iā i tatou ona "avatu tupe e nonoina, 'aia le fa'amoemoe i se mea e tasi e 'au mai" (Luka 6:35).

"O lē e tu'u atu ia lava ma fai meaalofo atu, e fafagaina le to'atolu, o ia, o lona tuā'oi mativa, ma A'u." Ma "Ia alofa atu i ē o fai outou mo latou fili" (Luka 6:27).

(11) O Ā ALA FA'APITOA E TOLU NA A'OA'O MAI AI E IESU I TATOU, E ALA I A'OA'OGA MA LANA FA'ATA'ITA'I, IA ALOLOFA ATU AI I O TATOU FILI?

A 'Ou te fai atu A'u ia te outou, 'ia outou alolofa atu i ē ua ita mai iā te outou, ia outou fa'amanuia atu i ē ua fetu'u mai iā te outou, ia outou agalelei atu i ē ua 'ino'ino mai iā te outou, ia outou tatalo fo'i mo ē ua tu'ua'i fua mai ma fa'asauā mai iā te outou.' Mataio 5:44

Mau e tau i ai: Mataio 5:40-43

O le lesona a le Fa'aola, ia "'aia ne'i outou tete'e atu i le leaga" (Mataio 5:39), o se 'upu faigatā lea iā Iutaia o lo'o fīa tauimasui, ma sa atili femuimuia'i ai lava i latou. A e ua fetalai atu nei Iesu i se a'oa'oga ua sili atu le mamafa: "Ua outou fa'alogi, na fai mai, Ia e alofa atu i lē lua te tua'oi, a ia 'ino'ino i lē ua ita mai iā te 'oe. A 'Ou te fai atu A'u ia te outou, ia outou alolofa atu i ē ua ita mai iā te outou, ia outou fa'amanuia atu i ē ua fetu'u mai iā te outou, ia outou agalelei atu i ē ua 'ino'ino mai iā te outou, ia outou tatalo fo'i mo ē ua tu'ua'i fua mai ma fa'asauā mai iā te outou; ina ia faia outou ma atali'i o lo outou Tamā o i le lagi" (Mataio 5:43-45).

O lenei le agaga o le tulafono sa fa'auigasesē e a'oa'o o le malumalu, o se tusiga e fa'amaliegatā, e lē faigofie ona tausia, e lē fefinaua'ia, ma e tulaga mālūlū ma ma'a'a.

(12) Ua FA'AALI MAI E ISARA'ELU O SE MEA E TATAU LO LATOU FA'AILOGA TAGATA MA LE SO'ONAFAI O ISI TALU ONA E TAU IĀ TE AI LO LATOU GAFA?

'Aia fo'i ne'i outou manatu e fa'apea ifo i o outou loto, O 'Apera'amo, o ia o lo matou tamā; auā 'Ou te fai atu iā te outou, e mafaia lava e le Atua ona fa'atupuina mai i nei ma'a ni fanau mā Apera'amo. Mataio 3:9

Mau e tau i ai: Luka 3:8; Galuega 13:26

O le fa'atatau a a'oa'o o le malumalu e sili lo latou lelei i lo o isi tagata, ma o lea e fa'apitoa ai i latou e le Atua e ala i le tulaga na fanau mai ai i Isara'elu. A e ua fa'asino Keriso i le agaga fa'amagalo o le alofa, o se mea e fa'amaonia ai o latou loto fa'apito fa'amaualuga e sili a'e i lo o telona ma tagata agasala, o lo'o latou matuā inosia lava.

(13) O LE Ā LE 'UPU ALOFA FA'APITOA E FA'ASUAFAINA AI LE ATUA E ITŪ'AIGA UMA O LE AIGĀTAGATA?

O lenei, ia fa'apea outou ona tatalo, Lo matou Tamā e, o i le lagi, ia pa'ia Lou suafa. Mataio 6:9

Mau e tau i ai: Mataio 6:1, 6, 14; 5:16, 48; Luka 11:2

Sa fa'asino atu e Keriso Lana 'au fa'alogologo i le Pule o le atulaulau, o lo'o i lalo o le suafa, "Lo matou Tamā." Ma sa Ia fa'amalamalama iā i latou le finagalo agamalū fa'apalepale o le Atua o lo'o fa'anaunau mo i latou. Na Ia a'oa'o atu i le tigāalofa o le Atua mo agaga uma ua lē iloa; ma "E fa'apei ona alofa mutumuti vale o le tamā i lana fanau, e fa'apea lava ona alofa mutimuti vale o leova i ē matata'u iā te Ia" (Salamo 103:13).

O lea mafaufauga e fa'atatau i le Atua e le'i tu'u maia i le lalolagi e se talitonuga a e na o le Afioga a le Atua. O le talitonuga fa'apaupau e a'oa'oina tagata ia va'ai i le Atua ma le mata'u tele a e lē o le alofa - o se atua ia e fa'amalie i le faia o taulaga a e lē o se Tamā e liligi ifo meaalofo o Lona alofa tunoa i luga o Lana fanau. Sa fa'apea lava tagata Isara'elu ona fa'atauasoia i a'oa'oga tāua a perofeta e fa'atatau i le Atua, ma na 'avea lenei fa'aaliga o Lona alofa fa'a-Tamā o se matā'upu fou, o se meaalofo fou i le lalolagi.

(14) SA FA'APEFEA ONA MALAGA FA'ASILI LE ATUA LE TAMĀ INA IA FA'AALIA AI LONA ALOFA E LĒ GATA MO AGAGA UMA UA LĒ ILOA?

Auā ua fa'apea lava ona alofa mai o le Atua i le lalolagi, ua Ia 'au mai ai Lona Atali'i e to'atasi, ina ia lē fano se tasi e fa'atuatua iā te Ia, a ia maua e ia le ola e fa'avavau. Ioane 3:16

Mau e tau i ai: Roma 5:8; I Ioane 4:9, 10; I Ioane 2:2

Sa talitonu luitaia e alofa le Atua iā i latou o lo'o 'au'auna iā te IA, - o la latou va'ai, e na o latou e fa'ataunu'uina mana'oga a le 'au a'oa'o o le malumalu, - a e o isi uma o le lalolagi e i lalo o Lana fetu'u ma faitioga. Sa fetalai Iesu, e lē fa'apea le tonu; o le lalolagi atoa, pe lelei pe leaga, e i lalo o le malamalama o Lona alofa tunoa. Sa tatau ona a'oa'o i tatou i lenei 'upu moni mai mea na foafoaina; auā o le Atua "o Lē na te fa'aoso i Lona lā i ē ua amio leaga atoa ma ē ua amio lelei; ua Ia fa'atoto ifo fo'i le ua i ē ua amiotonu, atoa ma ē ua amiolētonu" (Mataio 5:45).

(15) E FA'APEFEA ONA MALAGA FA'ASILI I ASO TA'ITASI LO TATOU TAMĀ FA'ALELAGI INA IA FA'AALIA AI LONA ALOFA MO ĀNA MEAOLA UMA I LE LALOLAGI?

Ua fa'atupu e Ia mutia mo manu vaefā, atoa ma mea toto e aogā i tagata; e fa'atupu mai le mea e 'ai i le 'ele'ele. Salamo 104:14

Mau e tau i ai: Salamo 104:1-35; 103:1-22

E lē ona o se mana e masani ai o lo'o fua mai ai fua o le 'ele'ele i tausaga ta'itasi ma e fai ai pea e le lalolagi ana ta'amilosaga e fa'ata'ali'o ai le lā. E ta'ita'i pea e le 'a'ao o le Atua paneta ia fa'asolo lelei i o latou tulaga a o gasolosolo i le vāteatea. O le mana o le Atua e ō gatasitasi ai le fa'asologa o le tau mafanafana ma le tau mālūlū, o le taimi o le lūlūga ma le seleselega, o le āo ma le pō e femulimulia'i i ōna lava itulā tonu. O Lana fetalai e tupu olaola ai la'au uma, oso a'e laula'au ma fuga mai fugāla'au. O mea lelei uma mo i tatou, o 'ave o le lā ma le mālū o timuga, o mea uma tatou te 'a'ai ai, o le ola lelei tatou te maua, o meaalofo lava o le alofa tunoa.

(16) O LE Ā LE TULAGA SA TATOU I AI INA UA FA'AALIA MAI E LE ATUA LE TAMĀ LONA ALOFA OFOFOGIA MO I TATOU?

A ua fa'aalitinoina mai e le Atua Lona lava alofa iā te i tatou, ina ua maluu Keriso ma sui o i tatou, a o tatou agasala pea. Roma 5:8

Mau e tau i ai: Isaia 53:6; I Peteru 3:18

A o i ai pea iā i tatou uiga lē alofa ma e matagā, "sa nonofo ma le loto leaga ma le matau'a, sa 'inosia ma faitaga'i," a e sa alofa mutimutivale lo tatou Tamā fa'alelagi iā i tatou. "A ua fa'aalia mai le agalelei ma le alofa i tagata o lo tatou Fa'aola le Atua, ona fa'aola mai ai lea o Ia iā i tatou, e lē ona o galuega o i le amiotonu sa tatou faia, a e tusa ma Lona lava alofa" (Tito 3:3-5). Pe a tatou maua Lona alofa, o le a faia i tatou ia fa'apea, e agalelei ma fa'apalepale, e lē mo na o i latou e tatou te fiafia i ai, a e mo ē faimeā sesē, e uiga leaga ma ē e agasala.

(17) O LE Ā LE FA'AALIGA TŪPITO E ILOA AI O TATOU MONI O LE FANAU A LE ATUA?

O le mea lea e iloa ai e tagata uma lava o O'u so'o outou, pe afai ua outou fealofani. Ioane 13:35

Mau e tau i ai: Ioane 17:21; I Ioane 2:5, 10; 3:10-14; 4:20, 21

O le fanau a le Atua, o i latou ia ua fai ma soa o Lona uiga Atua. E lē o se tulaga fa'alelalolagi, o le mea na fanau ai, le nu'u, po o le ekalesia e failotu ai, o le a fa'amaonia ai o tatou e aofa'atasi i le aiga o le Atua; a o lea le alofa, se alofa e si'osi'omia atoa ai le aigātagata. E o'o lava i tagata agasala e lē o atoa ona tete'e i o latou loto le Agaga o le Atua, e latou te tali fo'i i le agalelei, tusa pe latou te tau ai le leaga i le leaga, a e latou te tau fo'i le alofa i le alofa. E na o le Agaga o le Atua e tu'u atu le alofa e fa'afeagai ma le 'ino'ino. O le fa'ailoga o le tulaga fa'aletupu a le lagi o le agalelei i ē lē fa'afetai ma ē amioleaga, e fai mea lelei a e lē tauia mai, o le fa'ailoga mautinoa lea e fa'aalia e le fanau a le Silisili 'Ese.

Ua 'ou malamalama mai le Tusi Pa'ia o le mafua'aga mo le soifuāga fa'alelalolagi a Iesu o le aumaia lea o le areto o le ola i Ōna fili. E leai se mea na tupu iā te Ia vaganā lea na fa'atagaina mai le Alofa e Fa'avavau mo lo tatou manuia, ma ia fa'apea fo'i i o tatou olaga.

Li'o le Tali: Ioe Lē Mautinoa

Ua 'ou va'ai i a'oa'oga a Keriso e tatau iā i tatou Kerisiano ona mulimuli i Lana fa'ata'ita'i, ma ia ō atu i se maila fa'asili e ala i le avatu o se fesoasoani mo i latou o lo'o mana'omia, a e lē manatu ia toe tau ai mai.

Li'o le Tali: Ioe Lē Mautonu

'Ou te iloa e ala i le fa'ata'ita'i ma tulafono sa a'oa'o mai e Keriso, ia tatau ona tatou lima 'a'apa atu i ē matitiva, ma ia alofa atu i o tatou fili. Ia ō mamao atu i se maila fa'asili, e ala i le tatalo mo ē o o lo'o sauā mai ma fa'aaogā leaga i tatou.

Li'o le Tali: Ioe Lē Mautonu

'Ou te fa'afetai tele i le Atua le Tamā ina ua malaga fa'asili o Ia mo a'u, i le 'auina mai o Lona Ālo e maliu mo a'u agasala. O la'u tatalo ia mafai ona 'ou ola i se olaga e alu atu ai mo maila fa'asili mo isi, a e ala mai le mana o Lona Agaga Pa'ia o lo'o i totonu iā te a'u.

Li'o le Tali: Ioe Lē Mautinoa

Manatu mai Su'esu'ega

Tatalo e Mana'omia

Tali o Tatalo

Ia Pei o Lou Tamā Fa'alelagi

Lesona 21

Fa'avae lenei a'oa'oga i le Mataio 5:48.

(1) E O'O I FEA LE TAPULA'A O LE ALOFA, TIGĀALOFA, MA LE AMIO UA VALA'AUINA I AI LE KERISIANO E KERISO?

O lenei, ia 'ato'atoa ona lelei o la outou amio, e pei o lo outou Tamā o i le lagi e 'ato'atoa ona lelei o Ia. Mataio 5:48

Mau e tau i ai: Luka 6:36, 40; II Korinito 7:1; Filipi 3:12-15; Iakopo 1:4

O le 'upu "o le mea lea" ("therefore") e ta'u mai o se fa'ai'uga, se manatu fa'ai'u o se mea ua mavae, ua uma ona fai. Sa fa'amatala e Iesu i Lana 'au fa'alogologo le alofa tunoa ma le mutimutivale o le alofa o le Atua, ma o le mea lea ua Ia ōle atu ai ia ato'atoa i latou. Auā o lo latou Tamā fa'alelagi e "agamalū i ē agavale, atoa ma ē amioleaga" (Luka 6:35), ona ua Ia punou ifo e si'itia 'oe i luga; o le mea lea, ua fetalai mai Iesu, o le a mafai ai ona pei 'oe o Ia i Ōna uiga, ma e tula'i atu e leai se pona i luma o tagata ma agelu.

(2) O LE Ā LE FOLAFOLAGA IĀ I LATOU O LO'O FAIA TULAFONO E FA'AVAE I LE ALOFA O LE ATUA, O LE ALOFA IĀ TE IA MA LE ALOFA I ISI?

'Amu'ia i latou o ē faia Āna poloa'iga, ina ia taga iā i latou le la'au o le ola, ma ia latou ūlu atu i le 'a'ai i ōna faitoto'a. Fa'aaliga 22:14

Mau e tau i ai: Fa'aaliga 22:15; I Ioane 5:3; I Ioane 4:20

O tulaga o le ola e fa'avavau, a o i lalo o le alofa tunoa, e fa'apei o le taimi a o i Etena - o le amiotonu e ato'atoa, e ō gatasi ma le Atua, e fa'amaoni ato'atoa i ta'iala o Lana tulafono. O tapula'a o le amio sa tu'u mai i le Feagaiga Tuai e tutusapau ma mea o lo'o tu'uina mai i le Feagaiga Fou; o nei tapula'a e lē o ni mea e lē mafai ona tatou 'ausia. I fa'atonuga uma po o poloa'iga ua tu'u mai e le Atua o lo'o i ai se folafolaga, e matuā mautonu ma e talafeagai ma le poloa'iga. Ua faia e le Atua se ala ia mafai ai e tatou ona fa'apei o Ia, ma o le a Ia fa'ataunu'u nei mea mo i latou uma o ē lē faia o latou lava loto ma fa'alēaogā ai Lona alofa tunoa

(3) O LE Ā LE FA'AALIGA OFOFOGIA O LE ALOFA, PE A LĒ TE'ENA, E FAFAGUINA LO TATOU ALOFA MO KERISO MA E SUIA AI O TATOU OLAGA?

A ua fa'aalitinoina mai e le Atua Lona lava alofa iā te i tatou, ina ua malie Keriso ma sui o i tatou, a o tatou agasala pea. Roma 5:8

Mau e tau i ai: I Ioane 4:19; Ioane 15:13; Efeso 3:17-19; II Korinito 3:18

O lo'o alofa le Atua iā i tatou ma se alofa e lē mafa'amatalaina, ma o le a fafaguina lo tatou alofa mo Ia ina ua tatou tau malamalama i le umi ma le lautele ma le loloto ma le maualuga o lenei alofa e lē mailoa. E ala i le fa'aaliga mai o le lalelei ofoofogia o Keriso, e ala i le fa'aailoa mai o Lona alofa a o agasala pea i tatou, o le a fa'amalū ma fa'ato'ilalo ai le loto ma'a'a, ma fa'aliua le tagata agasala ia 'avea ma tama a le lagi. E lē fa'aaogā e le Atua mea faigatā; o le alofa o le mea faigaluega Na te fa'aaogā e tuli'esea le agasala mai le loto. E ala i le alofa, o le a Ia suia le mimitavale i le loto maualalo, o le faitaga'i ma le lē talitonu e suia i le alofa ma le fa'atuatua.

(4) E FA'APEFEA ONA FA'AMATALAINA LE ALOFA E LE TUSI PA'IA?

O se lē alofa ua lē iloa e ia le Atua; auā o le Atua, o le alofa lava Ia. I Ioane 4:8

Mau e tau ia i: I Ioane 4:7, 16

(5) O AI NA FA'ASINO E KERISO I LANA 'AU FA'ALOGOLOGO INA IA FAI MA LATOU FA'AA'OA'O PE FA'APEFEA ONA ALOFA ATO'ATOA?

O lenei, ia 'ato'atoa ona lelei o la outou amio, e pei o lo outou Tamā o i le lagi e 'ato'atoa ona lelei o Ia. Mataio 5:48

Mau e tau i ai: Luka 6:36; Efeso 5:1, 2

Sa taumafai pea lava tagata Iutaia e galulue ia 'ausia se tulaga e ato'atoa, e ala i a latou lava taumafaiga, a e le'i manuia. Sa ta'u atu e Keriso e matuā lē mafai lava, i lo latou lava amiotonu, ona ūlu i le malō o le lagi. A o lenei ua Ia fa'asino iā i latou le uiga amiotonu e tataua ona i ai iā i latou uma e fia ūlu i le lagi. I le Lauga i luga o le Mauga sa Ia fa'amatala manino ai ōna fua, ma o lenei ua Ia fa'asino iā i latou lona pogai ma lona uiga moni: Ia ato'atoa e pei o le Atua e ato'atoa. O le tulafono e na o se tusiga o le uiga o le Atua. E va'aia i lo outou Tamā fa'alelagi se fa'aalitinoina ato'atoa o ta'iala, o fa'avae lava ia o Lona malō.

(6) A O TATOU SAVAVALI MA LE ALI'I, E TUMAU I LONA ALOFA, MA FA'AALI LONA UIGA, O Ā MEA TĀUA E LUA O LE A TATOU FA'AILOA ATU I LE LALOLAGI?

O outou, o le masima o le lalolagi outou; a e afai e magalo le masima, pe se ā se mea e fa'amāi a'i? E leai se mea e toe aogā ai, na ona lafoa'iina i fafo, ma solia e tagata. O outou, o le malamalama o le lalolagi outou. E lē mafai ona lilo le 'a'ai ua tū i luga o le mauga. Mataio 5:13, 14

Mau e tau i ai: Mataio 5:15, 16; Fa'ata'oto 4:18; Filipi 2:15

O le Atua o le alofa lava Ia. E fa'apei o 'ave malamalama o le lā, o lo'o tafe mai iā te Ia le alofa ma le malamalama ma le fiasia mo Āna mea ola uma. O Lona uiga moni o le tu'u mai lea, e o'o lava i Lona soifua, o le alofa lea e lē fa'apito.

***"O Lona mamalu o le lelei lea o Lana fanau;
O Lona oli'oli, o Lona fa'apalepale fa'ale-Tamā.***

Ua fetalai mai Ia ina ia ato'atoa i tatou pei o Ia, i lea lava tulaga e tasi. Ia 'avea i tatou ma totonugalemū o le malamalama ma fa'amanuiāga i o tatou si'osi'omaga, e pei o Ia i le atulaulau. E leai se mea o iā i tatou vaganā le malamalama o Lona alofa o lo'o susulu i o tatou luga, ma ia tatou fa'aatina lea pupula. "I Lona agalelei," atonu e atoa lo tatou lelei i le mea o lo'o tatou i ai, e pei ona atoa le Atua i Lona afio'aga.

(7) E UI INA E LĒ MAFAI I O TATOU UIGA MONI ONA LIUA FA'ALEAGAGA, O LE Ā LE FOLAFOLAGA O LE A MAFAI ONA TATOU TOFUSIA I AI PE A TATOU FA'ATAGA KERISO IA FA'ATASI MA I TATOU MA IA GALUE LONA MANA I TOTONU IĀ I TATOU?

Ona o lea ua Ia folafolaina mai ai o mea e silisili 'ese lava ma le aogā, ina ia tofusia fa'atasi ai outou i le amio Atua. II Peteru 1:4

Mau e tau i ai: II Peteru 1:1-3; I Ioane 3:2

Ua fetalai Iesu, Ia outou atoa'toa pei o le Tamā ona ato'atoa. Pe a o outou o le fanau a le Atua, ua tofusia outou i Lona uiga moni, ma o le a pei lava outou o Ia. E ola le tamaitiiti i le olaga o lona tamā. Pe a o outou o le fanau a le Atua, ma sa fanau e ala mai Lona Agaga, o le a e ola e ala i le soifuāga o le Atua. O Keriso "o lo'o mau i totonu iā te ia le tumu uma lava o le itū Atua ua i lona tino" (Kolose 2:9); ma e fa'aalia le soifua o Iesu "i o matou tino augavale" (II Korinito 4:11). O lea ola o le a tupu a'e ai uiga lava ia ma fa'atino ai galuega fa'apei ona fa'aalia mai e Ia.

(8) PE A TATOU FA'ATAGA KERISO IA SOIFUA I LONA UIGA ATUA, E ALA IĀ I TATOU, MA FA'ATINOINA I O TATOU OLAGA LEA LAVA UIGA MA GALUE AI PEI O KERISO, O LE Ā LE MEA O LE A TATOU SOSOLA 'ESE MAI AI?

Ina ua sosola 'ese outou i le amio leaga o i le lalolagi i le tu'inanau. II Peteru 1:4

Mau e tau i ai: Esekielu 36:25-27

O le a fa'apea ona outou ō gatasi ai ma ta'iala uma o Lana tulafono; ona "E sao le tulafono a Ieova, e fa'afo'isia mai ai le agaga" (Salamo 19:7). E ala i le alofa "o le amiotonu o le tulafono" o le a "iā i tatou, o ē lē savavali i la le tino, a e i la le Agaga" (Roma 8:4).

A o ou fa'aaogā le taimi i le faitauina o le Afioga a le Atua, 'ou te va'aia ai Lona alofa tunoa e lē mavae a e ua fa'aalia i le alofa e "ato'atoa," ma 'ou te naunau ia fa'apei o Ia.

Li'o le Tali: **Ioe** **Lē Mautonu**

Ua 'ou iloa 'ou te lē mafai ona fa'atupu se alofa iā te a'u lava ia ma e lē mafai ona 'ou maua mai se isi lava pogai vaganā e mai lo tatou Atua alofa.

Li'o le Tali: **Ioe** **Lē Mautonu**

"Ou te naunauta'i i lo'u loto ia iloa ma tumau ma Keriso ina ia mafai e Lona uiga Atua ma le amiotonu e ato'atoa ona fa'aataina, e ala iā te a'u, e pei o le malamalama mo le lalolagi ma le masima i le 'ele'ele.

Li'o le Tali: **Ioe** **Lē Mautonu**

O le fa'anaunauga o lo'u loto ia alofa ato'atoa fa'apei ona alofa ato'atoa lo'u Tamā fa'alelagi, ma ia mafai i se aso ona ulufale i faitoto'a o le 'a'ai e feiloa'i ma fa'afeagai ai ma Ia.

Li'o le Tali: **Ioe** **Lē Mautonu**

Manatu o Su'esu'ega

Tatalo e Mana'omia

Tali o Tatalo

O le Ala Moni i le 'Au'aunaga

Lesona 22

E fa'avae lenei su'esu'ega i luga o le Mataio 6:1.

(1) O LE Ā LE MEA O LO'O LAPATA'I MAI LE TUSI PA'IA IA 'AUA NE'I TATOU SA'ILIA MO TATOU LAVA IA?

O le su'esu'ega fo'i o lo latou mamalu, o le mea e mafatia ai lea. Fa'ata'oto 25:27

Mau e tau i ai: Fa'ata'oto 27:2; Ioane 5:44; Filipi 2:3

O fetalaiga a Keriso i luga o le mauga sa fa'ailoa ai a'oa'oga e le'i fa'aleoina o Lona soifuāga, a e peita'i sa le'i malamalama i ai tagata. Latou te le'i malamalama pe fa'aapefa ona lē fa'aaogāina le mana mata'utia o lo'o iā te Ia ina ia maua ai se lelei. O latou agaga ma fuafuāga ma fa'agaoioiga sa lē talafeagai ma Ia. Sa fa'atino e Keriso iā i latou o lē alofa iā te ia lava o le tagata solitulafono lea, ona e ui ina fa'ailoa mai o latou e fa'amamaluina le tulafono, a e o lo'o latou mua'i sa'ili lo latou lava mamalu.

O ta'iala sa teuloto e le 'au Faresaio, o uiga lava ia o lo'o faifaipea mai augātupulaga uma o le aigātagata. O le agaga fa'a-Faresaio o le agaga lava lea o le uiga moni o le tagata; a o fa'aalia e le Fa'aola le 'ese'esega i le vā o Lona Agaga ma gaoioiga a a'oa'o o le malumalu, e fa'apea ona tutusapau le aogā o Āna a'oa'oga mo tagata i taimi uma.

(2) O LE Ā LE LAPATA'IGA NA TU'U MAI E KERISO E FA'ATATAU I A TATOU GALUEGA LELEI?

Ia outou, ne'i avatu ni a outou mea alofa i luma o tagata, ina ia iloa ai e i latou; a fa'apea, ona leai ai lea o so outou tau mai lo outou Tamā o i le lagi. Mataio 6:1

Mau e tau i ai: Luka 11:35

I ōna pō o Keriso sa taumafai pea Faresaio ia latou maua le tulaga fa'apitoa a le lagi ina ia latou maua ai le mamalu ma le tamao'aiga fa'alalolagi o lo'o fa'atatau o le tau mo le amio lelei. O a latou galuega lelei e fa'ailoa atu a o latou feōa'i ma fa'alialia solo i tagata ina ia iloa mai ai o a latou uiga e pa'ia.

Sa a'oa'i latou e Iesu ona o le fa'alialiavale, ua ta'u i ai e lē silasila le Atua i ia itū'aiga galuega, ma o le tau fa'ase'e ma le fiafa'avivi'i o tagata e na o lea lava le tau latou te maua.

Ua fetalai Iesu, "A ē avatu ni mea alofa, 'aia ne'i iloa e lou lima tauagavale le mea ua faia e lou lima taumatau; ina ia lilo au mea alofa" (Mataio 6:3, 4).

(3) PE A FAIA GALUEGA AGALELEI MA SE ALA TONU, E SAU IĀ TE AI MA E FA'APEFEA ONA MAUA LE TAU MONI?

Ia lilo au mea alofa; o lou Tamā fo'i, o Lē silafia i le mea lilo, o Ia lava na te avatu fa'aaliali se tau i te 'oe. Mataio 6:4

Mau e tau i ai: Mataio 6:18; Salamo 44:21; Ieremia 17:10

E le'i a'oa'o mai Iesu i nei 'upu ina ia fai fa'alilo uma au galuega lelei. Sa tusi le aposetolo o Paulo, e ala mai le Agaga Pa'ia, e fa'atatau i le lotofoa'i o Kerisiano mai Maketonia, peita'i na ta'uina o le alofa tunoa o Keriso sa galue iā i latou, ma o lea ua tu'u mai ai i isi lenei lava agaga. Sa fa'apea ona tusi fo'i i le ekalesia i Korinito ma fai mai, "o lo outou ma'elegā fo'i na tupu ai le losilosu i le to'atele" (II Korinito 9:2).

(4) PE A 'AU'AUNA ATU SO'O O KERISO MA O LATOU LOTO MAMĀ, O AI O LE A TU'U I AI LE MAMALU MA LE VI'IGA?

Afai e tautala se tasi, ia tusa ma afioga a le Atua; afai e 'au'auna se tasi, ia tusa ma le malosi ua foa'iina mai e le Atua, ina ia vi'ia le Atua i mea uma lava, ona o Iesu Keriso; ia ia te Ia le vi'iga ma le malosi e fa'avavau fa'avavau lava. Amene.

I Peteru 4:11

Mau e tau i ai: Salamo 115:1; I Korinito 10:31; Kolose 3:17

O fetalaiaga a Keriso lava na Ia ta'u fa'amanino mai ai, e lē o le fa'atatauaga o galuega fesoasoani o le aumaia lea o vi'iga ma le mamalu mai tagata (Mataio 6:2, 3). O i latou e naunau i 'upu fa'avi'ivi'i ma le tauafa'ase'e, ma fafaga pea fa'apea e pei o se mea suamalie, a e na o le ta'u o Kerisiano. O le amio-atua moni e lē taumafai e fa'alialiavale.

E ala i a latou galuega lelei, e aumai e so'o o Keriso le mamalu iā te Ia e Ōna le alofa tunoa ma le mana o lo'o latou galuea'iina, a e lē mo i latou lava ia. O le Agaga Pa'ia e mafai ai ona fa'ataunu'u galuega lelei uma; ma o lo'o tu'uina mai le Agaga e fa'amamalu ai Lē e aumai ai, a e lē o lea na taliaina. Pe a susulu le malamalama o Keriso i le agaga, o le a fa'atumulua laugutu i vi'iga ma fa'afetai i le Atua. O āu talosaga, o le faia o āu galuega, o lou agaalofoa, o lou lē loto fa'apito, o le a lē fai ma manatu autū o ōu mafaufauga po o talanoāga. O le a fa'asili maoa'e Iesu, o le a fa'alilo 'oe, ma o le a fa'aalia e na o Keriso le atoa o mea uma.

(5) E FA'APEFEA ONA VALA'AUINA I TATOU E LE TUSI PA'IA INA IA 'AU'AUNA I LE ALI'I?

O lenei, ia outou matata'u iā Ieova, ma 'au'auna iā te Ia ma le loto sa'o ma le fa'amaoni. Iosua 24:14

Mau e tau i ai: Filipi 1:10, 11; Tito 2:7; Teuterenome 10:12, 13

E tatou ona tatou avatu ma le fa'amaoni, a e lē ina ia fa'aali atu a tatou galuega lelei, peita'i ona o le tigāalofoa ma le loto alofa i ē o lo'o mafatia. O le fa'amaoni o fuafuāga, o le loto e agalelei moni, o le fa'amoemoe lea e tāua i le lagi. O le agaga e alofa fa'amaoni, alofanaunau ma le loto e tu'u atu atoa, e sili le tāua i le Atua i lo o le auro o Ofeira.

(6) PE A TATOU TU'U ATU ATOA I TATOU IA 'AU'AUNA I LE AIGĀTAGATA MA LE FA'AMAONI MA LE AMIOTONU, O LE Ā LE I'UGA UA FOLAFOLAINA MAI?

A o le vi'iga, ma le mamalu, ma le manuia iā te i latou uma o ē fai amio lelei; e muamua le Iutaia, atoa ma le Eleni. Roma 2:10

Mau e tau i ai: Salamo 112:9; Luka 12:37; Ioane 12:26; Mataio 25:34-36

Ia tatou lē manatu i tauai, a e o le 'au'aunaga; ona o le agalelei e fa'aali atu ai lenei agaga, o le a lē mafai ona lē tauia mai. "O lou Tamā fo'i, o Lē silafia i le mea lilo, o Ia lava na te avatu fa'aaliali se tauai iā te 'oe" (Mataio 6:4). E moni o le Atua o le Tauai tele lava Ia; pe a tatou tu'u atu i tatou lava i le Atua ia galue ai mo isi, o le a Ia tu'u mai fo'i Ia iā te tatou.

E lē mafai e se tagata ona tu'u atu lona ia lava loto ma le ola ina ia fa'atafe mai ai fa'amanuiāga a le Atua i isi, a e o le a lē maua ai fo'i e ia se tauai tele. E fa'apei lava o atumauga ma fanua laugatasi ona tafe mai ai o alavai ia taunu'u i le sami, e leai se lau'ele'ele o le a fa'aititiia ai le olaola lelei. O mea uma e latou te tu'u atu e toe totogi fa'asili mai! E tu'u mai e le vaitafe mealofoa e tele i le 'ele'ele e tafe atu ai, o la'au e ola lelei, o le mutia e mafafafia i ōna 'autafa, ma e fa'ateleina lanu 'ese'ese o fugāla'au. Pe a matelāina le 'ele'ele i le vela o le lā i le taumafanafana, a o le ala o le vaitafe e fa'aalia mai ai le matagofie o tamao'aiga e sau mai le mauga, o se molimau i le tauai o le alofa tunoa o le Atua e aumai i tagata uma, o ē tu'u atu latou e fai ma ala e fa'atafe atu ai lea alofa i le lalolagi atoa.

(7) O Ā FA'AMANUIĀGA E SEFULU SA FOLAFOLA MAI MO I LATOU O Ē FA'AALI LE AGALELEI, E ALA I LE 'AU'AUNAGA MO ISI A E LĒ FAIA FA'APITO?

Ona gafoa mai ai lea o lou malamalama e pei o le tafa o ata, e ta'alise ona tupu mai fo'i o lou malōlō; e alu atu fo'i lau amiotonu i ou luma, e muli'au mai le pupula o Ieova ia te 'oe. Ona e vala'au lea, a e tali mai ai Ieova; e te alaga atu, a e fetalai mai o Ia, 'O A'u lenei;' pe afai e te fa'ate'a'eseina le amo ia te outou, o le tusi o le lima, ma le 'upu vale. Afai fo'i e te alofa atu i lē ua fia 'ai, ma e fafaga ia ma'ona o lē ua tigā; ona alu a'e lea o lou malamalama i le pouliuli, ma lou pogisā e pei o le aoauli ia. E ta'ita'iina fo'i 'oe e lē aunoa e Ieova; e fa'amālie fo'i o Ia iā te 'oe pe a oge vai, ma fa'amalosia ou ivi; e 'avea fo'i 'oe e pei se fanua ua fa'asūsūina, e pei o le punavai fo'i e lē mate ōna suāvai. Isaia 58:8-11

E fa'amanuia fa'alua le galuega e faia i le agaalofoa. A o fa'amanuiaina isi ina ua avatu i ai le fesoasoani, o le a sili atu fa'amanuiāga e maua fo'i e le limafoa'i. O le alofa tunoa o Keriso i le agaga e fa'atupuina ai uiga e 'ese mai le loto fa'apito,

- o uiga o le a mamā, fa'amamaluina, ma fa'atamao'aiga ai le olaga. O galuega agaalofa e faia fa'alilo o le a so'ofa'atasia loto, ma o le a tosina fa'atasi loto iā te Ia, o Lē e fafaguina le loto foa'i.

O nei galuega e fai i le alofa a e lē mo le tagata lava ia e fa'apito, o mea e faia mai se olaga e filemū pei o se fugāla'au manogi, - o mea laiti ia e tāua ma e tofusua ai i fa'amanuiāga ma 'oli'olisaga o le olaga. O le a iloa mulimuli ai pe a tu'u'ese 'oe mo le lelei o isi, tusa po o le ā le maulalo o le tulaga, a e o le a lauiloa i le lagi o le fa'ailoga lea o la tatou so'otaga ma Ia, le Tupu o le mamalu, o Lē e tamao'aiga a e na fa'amativaina mo i tatou.

(8) E ALA IĀ TE AI, MA O LE Ā LE MEA E MAFAI ONA FA'AMALOSIA AI I TATOU INA IA MAFAI ONA Ō GATASI MA LE POLOA'I A LE LAGI E FAI GALUEGA LELEI MO ISI?

O Iesu o le Nasareta, o Lē na fa'au'uina e le Atua i le Agaga Pa'ia ma le mana, o Ia sa femaliua'i ma agalelei ma fa'amalōlō atu i ē na fa'ato'ilaloina uma lava e le ti'apolo; auā sa iā te Ia le Atua. Galuega 10:38

Mau e tau i ai: Galuega 2:22; Isaia 61:1-3; 42:1; Mataio 12:28

Atonu o galuega lelei sa faia fa'alilolilo lea, a e peita'i e lē mafai ona fa'aliloina i'uga ona o uiga o lē na faia ia mea. Pe a tatou galulue ma le loto atoa ona o tatou o so'o o Keriso, o le a feso'ota'i o tatou loto ma le Atua, o le a galue le Agaga o le Atua iā i tatou, ma o le a pese vi'iga pa'ia o le agaga e tali atu ai i Lona pa'i mai.

(9) PE A UA TATOU FA'AMAONI, E ALA I LE ALOFA TUNOA O LE ATUA, E FA'AAOGĀ A TATOU TALENI MA 'OLOA UA IA TU'U MAI IĀ I TATOU, O LE Ā LE MEA O LE A FAIA LOA E IA?

Auā o sē ua i ai ni mea, e foa'iina atu iā te ia e atili tele ai ana mea; a o lē ua lē i ai ni mea, e faoa le mea ua i ai. Mataio 25:29

Mau e tau i ai: Mataio 13:12

O Lē na tu'u mai taleni ia fa'asili i ē fa'aaogā fa'atatau meaalofoa sa tu'u iā i latou, ua na fa'ailoa mai la latou 'au'aunaga mo Ia, sa latou galulue e ala i Lona mana ma le alofa tunoa. O ē na sa'ili ia fa'atele ma fa'a'ato'atoaina le uiga fa'a-Kerisiano, e ala i le faia o galuega lelei, o le a selesese e i latou, i le lalolagi fou mea sa latou totōina. O le galuega sa latou amata i le lalolagi o le a fa'ataunu'u i lona ato'atoa i le ola e sili le maoa'e ma pa'ia e o'o i le fa'avavau.

(10) O LE Ā LE FA'AMANUIĀGA SILI O LE A TU'UINA IĀ I LATOU O Ē 'AU'AUNA ATU I ISI?

Ona fai atu ai lea o le Tupu i ē o i Lona itū taumatau, 'Ō mai ia, o outou ua fa'amanuiaina e Lo'u Tamā, ia fai mo outou tofi le malō ua saunia mo outou a o le'i fa'avaeina le lalolagi; auā na 'Ou fia 'ai, ona outou avane ai lea ni mea 'Ou te 'ai ai; na 'Ou fia inu, ona outou avane ai lea ni vai 'Ou te inu ai; sa fai A'u ma tagata 'ese, ona outou talia lea o A'u; na 'Ou lē lavalavā, ona outou fa'aofuina lea o A'u; na 'Ou ma 'i, ona outou asiasia mai lea o A'u; na 'Ou i le fale puipui, ona outou ō ane ai lea iā te A'u.' Mataio 25:34-36

Ua 'ou iloa, fa'aapea ma le atoa o le aigātagata, 'ou te fetaua'i pea i la'u taumafaiga e sa'ili lo'u lava vi'iga. 'Ou te naunau ia 'avea a'u ia pei o Keriso ma sa'ili ma le loto maulalo ia fa'amamaluina le Tamā.

Li'o le Tali: Ioe Lē Mautonu

Ua 'ou va'ai i lea taumafaiga e sa'ili lo'u lava mamalu ma o le a fa'asolo atu ai lava i mea fa'aleagaga. O la'u tatalo ia mafai ona 'ou faia galuega lelei ua fa'au'uina e le Atua mo a'u ma se loto mamā ma le fa'amaulalo a e leai se fuafuāga fa'afiaamiotonu mo a'u lava, a ia i ai le alofa mo le Ali'i e sau mai le loto.

Li'o le Tali: Ioe Lē Mautonu

'Ou te tatalo mo se loto mamā ina ia 'ou 'au'auna ai i le Ali'i ma le fa'amaoni ma le amiotonu fa'apei o le fa'aa'oa'o o a Keriso, ma e pei ona vala'uina ai tatou e le Tusi Pa'ia ia tatou faia.

Li'o le Tali: Ioe Lē Mautonu

Manatu mai Su'esu'ega

Tatalo e Mana'omia

Tali o Tatalo

O le Tatalo

Lesona 23

O lenei lesona e fa'avae i luga o le Mataio 6:5.

(1) O LE Ā LE IGOA SA TA'U AI E KERISO LE TAGATA MIMITAVALE E TATALO I NOFOĀGA FAITELE MO LONA IA LAVA VI'IGA?

Pe a e tatalo, 'aia ne'i e pei o tagata pepelo, auā ua latou fia tutū ma tatalo i sunako ma fetaula'igāala, ina ia iloa i latou e tagata. E moni, 'Ou te fai atu ia te outou, ua maua e i latou lo latou tau. Mataio 6:5

Mau e tau i ai: Mataio 23:14; Fa'ata'oto 15:8; Luka 20:47

E i ai taimi ua fa'apitoa e le 'au Faresaio mo talosaga, ma pe a o'o loa i lea taimi, e tusa pe o fea lava o i ai - atonu o i le alatele pe o le maketi o fefa'ataua'iga, i nofoāga e tumutumu ai tagata - e faia ai a latou talosaga e matuā leo tele i lea lava mea.

Sa a'oa'o mai Iesu i ia itū'aiga tapua'iga, e fai mo le fa'amamaluina o i latou lava. A e na te le'i fa'atauva'aina le tatalo e fai fa'alaua'itele, auā sa tatalo fo'i Ia ma Ōna so'o a o fa'atasi ma le motu o tagata. Peita'i sa Ia a'oa'o mai ia lē fa'alauiloaina tatalo e fai e na o le to'atasi. O tatalo tatou te faia fa'alilo ia lē o'o i taliga o nisi, a e ia na o le Atua, Lē e fa'alogo tatalo e fa'afofoga i ai.

(2) E UI INA MAFAI ONA TATOU TATALO I SO'O SE TAIMI MA I SO'O SE MEA, A E O LE Ā LE FAUTUA A IESU E FA'ATATAU I LE MEA IA TATOU FA'AFESO'OTA'I ATU AI MA LE ATUA?

A o 'oe, pe a e tatalo, inā ulu atu ia i lou afeafe, ma pupuni lona puipui, i le e tatalo ai i lou Tamā o i le mea lilo; o lou Tamā fo'i o Lē silasila i le mea lilo, na te avatu fa'aaliali se tau i te 'oe. Mataio 6:6

Mau e tau i ai: Mataio 24:23; II Tupu 4:33

A o 'oe, pe a e tatalo, inā ulu atu ia i lou afeafe, ma pupuni lona puipui" (Mataio 6:6a). Ia i ai se nofoāga fa'apitoa mo talosaga e faia fa'alilo; na filifili fo'i e Iesu nofoāga fa'apitoa mo le feso'ota'iga ma le Atua, ma e tatau fo'i i ā i tatou. E mana'omia tele se mea e mafai ona tatou malōlō i ai, se mea e mafai ona tatou fa'atasi ai, e na o taou ma le Atua.

"I le e tatalo ai i lou Tamā o i le mea lilo" (Mataio 6:6b). Ia tatou ō atu i le Atua, i le suafa o Iesu, fa'apei o le fa'atuatua o se tamaitiiti. E lē mana'omia se tagata e fai ma fautua. E ala iā Iesu, ia tatou fa'amatala o tatou loto i le Atua e pei e na o Ia e silafia ma alofa iā i tatou.

I le nofoāga lilo e tatalo ai, i le mea e lē o va'aia e mata pe o fa'alogo i ai ni taliga, a e na o le Atua e mafai ona silasila ifo ma fa'afofoga mai i ai, atonu o le fa'amasa'a atu o a tatou mana'oga ma fa'anaunauga i le Tamā e lē gata Lona alofa, ma i le filemū ma le lē gaoiā o le agaga o le a fetalai mai ai i o tatou loto le si'ufofoga e lē mafai ona lē tali i le tagi a le tagata o lo'o mana'omia le fesoasoani.

(3) PE A TATOU Ō MAI MA LE FA'AAMAU LALO I LE ALI'I, I LE SALAMŌ FA'AMAONI E AUMAI A TATOU VI'IGA FA'AFETAI, O MANA'OGA, MA MEA E MANA'OMIA, O LE Ā LE FOLAFOLAGA E MAFAI ONA TATOU TAPA I AI?

Afai e fa'amaulalo Lo'u nu'u ē ua ta'ua i Lo'u igoa, ma latou tatalo, ma sa'iliili ia te A'u, ma liliu 'ese i o latou ala leaga, ona 'Ou fa'alogo ai lea mai le lagi, ma fa'amagalo i a latou agasala, ma fa'aolaina lo latou nu'u. II Nofoa'iga Tupu 7:14

Mau e tau i ai: Salamo 50:15; 107:6-9; 34:4

"Ua mutimuti vale tele le Ali'i ma le alofa naunau" (Iakopo 5:11). O lo'o fa'atali pea Ia ma se alofa e lē mavae ia fa'afofoga mai o ta'uta'u atu sesē a le fanau lē usiusita'i ma talia o latou loto salamō. Pe a tatou fo'i atu iā te Ia ma se loto fa'afetai, e fa'atali Ia e pei o le tinā ma lana tama pele. E naunautai pea Ia mo i tatou, ma o lo'o vala'au ia 'ave a tatou

tofotofoga i Lona tigāalofa, o tatou fa'anoanoāga i Lona alofa, o tatou manu'a i Lana fa'amalōlōga, o tatou vaivaīga i Lona malosī, ma o tatou avanoāga i Lona ato'atoāga. E leai lava se tasi ua sau iā te Ia a e toe fo'i 'ese ma se fa'amoemoe ua lē taulau. "Na latou va'ava'ai atu iā te Ia, ona fa'a'oli'oliina lea o i latou; e lē mā fo'i o latou mata" (Salamo 34:5). E lēatofaina lava se tasi ua sau iā te Ia.

(4) O LE Ā LE MEA E TUPU PE A TATOU VA'AIA LE MAMALU O LE ATUA, A O TATOU TATALO MA FAITAU LANA AFIGA PA'IA?

A o i tatou uma, o lo'o va'ava'ai i tatou i le pupula o le Ali'i e peisea'i o i se fa'aata ma o tatou mata, e lē ufitia, ua liua ai i tatou ua foliga i ai nai le pupula e o'o i le pupula, fa'apei ona mai le Ali'i le Agaga. II Korinito 3:18

Mau e tau i ai: II Korinito 5:17; I Korinito 15:49; Kolose 3:10

O i latou uma e sa'ili fa'alilo le Atua, ma ta'u i le Ali'i o latou mana'oga ma ōle atu mo se fesoasoani, o le a lē fa'alēaogāina a latou talosaga. "O lou Tamā fo'i o lē silasila i le mea lilo, na te avatu fa'aaliali se tau i ia te 'oe" (Mataio 6:6c). A o tatou faia Keriso ma o tatou soa i aso ta'itasi, o le a tatou lagona o lo'o si'omia pea tatou e mana o le lalolagi e lē mava'aia; ma a tepa la latou va'ai iā Iesu o le a 'avea i tatou e pei o Lona fa'atusa. E suia i tatou i le va'aiga; o le uiga o le a fa'amalūina, fa'amamāina, ma fa'aleleia mo le malō fa'alelagi. O le i'uga mautinoa o la tatou so'otaga ma le mafutaga ma le Ali'i o le a fa'ateleina ai le ususita'i, o le tulaga mamā, ma le naunauta'i. O le a fa'atupu ai le potō i le tatalo, e tatou te maua se a'oa'oga fa'alelagi, ma o le a fa'aalia ai i le olaga le 'ana'ana ma le ma'elegā.

(5) O Ā MEA E TOLU E MAFAI ONA TATOU FAIA INA IA TUMAU AI PEA LA TATOU SO'OTAGA MA LE ATUA, IA MAFAI AI ONA TATOU FA'ATO'ILALO FA'AOSOOSOGA, SAUNI AI MO GALUEGA O ASO FAISO'O, MA IA MAUA AI LE FILEMŪ I SO'O SE TULAGA TATOU TE I AI?

Ia outou saga oli'oli pea lava. Ia tatalo e lē aunoa. Ia outou fa'afetai i mea uma lava, auā o le finagalo lea o le Atua ia te outou, i a Keriso Iesu. I Tesalonia 5:16-18

Mau e tau i ai: Eperu 4:16; Galuega 6:4

O le olaga e faliu i le Atua mo le fesoasoani, se fa'alagolago, o le malosī, e ala i le tatalo fa'atauānau i aso ta'itasi, o le a i ai fuafuāga lelei, o le a iloa manino le 'upu moni ma le tiute tau'ave, o le mafuaga maoa'e o gaoioiga, ma o le a fia'ai ma fiainu pea mo le amiotonu. Pe a tumau pea le so'otaga ma le Atua, o le a mafai ona tatou fa'asoa atu i isi, e ala i a tatou feso'ota'iga ma i latou, le malamalama, le filemū, ma le malū o lo'o pulea o tatou loto. O le malosī e maua mai le tatalo i le Atua, fa'atasi ma taumafaiga pea e a'oa'o le mafaufau ia agalelei ma tausi lelei, e saunia ai le tagata mo galuega o aso faiso'o, ma o le a filemū pea le agaga i so'o se tulaga e i ai.

(6) PE A FA'ATUMAU O TATOU MAFAUFAU IA FESO'OTA'I PEA MA KERISO MA A'OA'O IA FA'ATUATUA IĀ TE IA, O LE Ā LE MEA O LE A IĀ I TATOU PE A O'O MAI FA'AFITAU LI O LE OLAGA E SI'OMIA I TATOU?

E te leoleoina ia fīfilemū lava lē ua mausalī lona loto; auā ua ia fa'atuatua ia te 'Oe. Isaia 26:3

Mau e tau i ai: Isaia 57:19-21; Salamo 85:7, 8; Ioane 14:27; 16:33; Filipi 4:6, 7

Pe a tatou fa'alatalata atu i le Atua, o le a Ia tu'u 'upu i o tatou laugutu e tautala ai mo Ia, ma vivi'i atu ai i Lona suafa. O le a Ia a'oa'o i tatou i fuai'upu mai pese a agelu, ma vi'iga fa'afetai i lo tatou Tamā o i le lagi. O le a fa'aalia i gaoioiga uma o le olaga le malamalama ma le alofa o le Fa'aola o lo'o fa'atasi ai ma i tatou. E lē mafai e fa'afitauli mai fafo ona āu atu i le olaga o lo'o ola ma le fa'atuatua i le Ālo o le Atua.

(7) PE A TATOU TATALO, O LE Ā LE MEA SA LAPATA'I KERISO IA 'AUA NE'I TATOU FAIA?

A outou tatalo, 'aua ne'i tāutu i a outou 'upu, e pei o nu'u 'ese; auā fa te i latou, o le tele o a latou 'upu e talia ai i latou. Mataio 6:7

E va'ai le fa'apaupau o lana tatalo o se mea e tatau mo le fa'amagaloina o agasala; e talitonu ia o le umi o le tatalo e sili atu fo'i le lelei. Pe a mafai ona fa'apa'iaina latou e a latou lava taumafaiga, o la latou lava lea lelei ma o le a fa'amalieina ai ma le mimitavale. O lea manatu e fa'atatau i le tatalo ua galuea'iina le ta'iala o le toe fa'aleleiga, le fa'avae lea o talitonuga uma

e sesē. Sa tau'ave e Faresaio lenei manatu fa'apaupau e fa'ataui i le tatalo, ma e o'o lava fo'i iā i latou o lo'o ta'ua o Kerisiano i ōna pō nei. O fuai'upu e masani ona tautala ai, o 'upu e faifai pea, pe a o i le loto e lē mana'omia le Atua, e tusapau lea uiga ma 'upu o tatalo e faifaiso'o a le fa'apaupau.

O le tatalo e lē faia o se totogi mo agasala; e leai sona aogā po o se lelei pe a o fa'atāua mo ia lava. O 'upu lelei uma tatou te faia e lē mafa'atutusa ma se fa'anaunaga pa'ia e tasi, a e na o 'upu lēaogā pe a lē fa'ailoa ai lagona moni o le loto. O le tatalo a le fa'atuatua, o le tatalo lea e mai le loto fa'amaoni, e fa'ailoa ai mana'oga o le agaga, e pei ona tatou talosaga mo se uō fa'alelalolagi ma e iloa e maua mai. E lē naunau le Atua i a tatou fa'aaloaloga, a e le tagi mai le loto ua momomo ma ua fa'aleagaina e le agasala, ma ua o'o atu le leo vaivai i le Tamā alofa mutimutivale.

(8) O Ā MEA E LUA, PE A FAIA MA LE LOTO FA'AMAONI, O LE A FA'AMANUIA AI E LE ATUA A TATOU TALOSAGA MA ANAPOGI?

*Ia outou saeia o outou loto, a e lē o outou ofu, ma toe fo'i iā Ieova lo outou Atua; auā e alofa fua, ma alofa mutimutivale o Ia, e tele gese Lona to'asā, ua tele fo'i Lona alofa. **Ioelu 2:13***

Mau e tau i ai: Salamo 34:18; 51:1-4, 7; Isaia 66:2; Mataio 5:3, 4

"Pe a outou anapopogi, 'aua ne'i outou mata fa'anoanoa pei o tagata pepelo" (Mataio 6:16). O le anapogi, o lo'o fa'atonu mai ai le Afioga a le Atua e lē na o se sauniga. E lē na o le leai o se 'ai, ofu i 'ie talatala, pe tu'u lefulefu i luga o le ūlu, a e ona o le fa'anoanoa moni mo agasala, o le a lē anapogi fa'alialia.

Sa fa'atonu mai le Atua ia tausi le anapogi; e lē o le fa'amanu'a o le tino mo agasala o le agaga, a e ina ia fesoasoani ia tatou iloa ai le uiga fa'anoanoa o le agasala, ia ō atu ai ma le loto maulalo i luma o le Atua ona maua lea o Lona alofa tunoa e fa'amagaloina ai. O Lana fa'atonuga iā Isara'elu, "Ia outou saeia o outou loto, a e lē o outou ofu, ma toe fo'i iā Ieova lo outou Atua" (Ioelu 2:13).

O le a leai se aogā mo i tatou pe a fa'ailoa le salamō pe fa'aali atu a tatou lava galuega pe a lelei, ia fa'atau ai so tatou tofi fa'atasi ma le 'au pa'ia.

(9) O Ā LA'ASAGA TĀUA E LUA O LE SALAMŌ MONI NA TU'U MAI E LE ATUA, PE A TATOU FA'ATAGAINA, O LE A TOSINA AI TATOU IĀ TE IA I LE TATALO?

*Tou te manatunatu ai i a outou amio uma, ma a outou mea uma na fai, sa leaga ai outou; ona 'ino'ino ai lea o outou ia te outou ona o a outou mea leaga uma ua outou faia. **Esekielu 20:43***

Mau e tau i ai: Esekielu 36:31; Salamo 38:17, 18

O le salamō o le liliu 'ese lea mai iā te 'oe lava a e fa'asaga iā Keriso; pe a tatou maua Keriso ina ia soifua ai Ia i totonu o i tatou e ala i le fa'atuatua, o le a fa'atinoina loa galuega lelei.

(10) PE A TA'ITA'IINA I TATOU E LE AGAGA PA'IA I LE ANAPOGI, O AI E TATAU ONA AGA'I I AI LA TATOU ANAPOGI?

*A o 'oe, pe a e anapogi, ia u'u lou ulu, ma mulumulu ou mata; ina ia lē iloa e tagata ua e anapogi, na o lou Tamā o i le mea lilo; o lou Tamā fo'i o lo'o silasila i le mea lilo, na te avatu fa'aaliali se tau'i ia te 'oe. **Mataio 6:17, 18***

Mau e tau i ai: Tanielu 10:2, 3

So'o se mea e faia ia fa'amamaluina ai le Atua, e tataui lava ona faia ma se loto fiafia a e lē o le fa'anoanoa ma le muimui. E leai se uiga pogisā i le ekalesia a Iesu. Pe a fa'aali atu e Kerisiano uiga fa'anoanoa ma fa'ailoa ai ua lē malilie i lo latou Ali'i, ua latou fa'auigasesē Lona uiga ma tu'uina loa manatu faitio i gutu o Ōna fili. Atonu o lo'o ta'u mai i a latou 'upu o le Atua lo latou Tamā, a e o le a fa'aalia i o latou foliga ma uiga fa'anoanoa o latou e mātua oti.

(11) PE A FETE'ENA'I MA PUAPUAGĀ MAI FAFO, PO O MANATUNATUGA FA'ALEAGAGA MAI TOTONU O LE LOTO, O Ā MEA E TOLU O LE A FA'ATUMAUIA AI LO TATOU MALOSI I LE ALI'I MA FA'AMALOSI ATU FO'I I ISI?

Ia oli'oli i le fa'amoemoe, ia onosa'i i le puapuagā, ia finafinau i le tatalo. **Roma 12:12**

Mau e tau i ai: Filipi 4:4

E fa'anaunau Keriso ia tatou fa'aali atu le matagofie o Lana galuega. Ia fa'aali i le Fa'aola agaalofa tofotofoga lilo o le loto ma mea ua tu'u'ese atu mai iā i tatou. Tu'u uma 'avega i lalo o le satauro ma alu fiafia i Lona alofa, auā na muā'i alofa mai Ia iā te 'oe. Atonu o le a lē iloa lava e tagata galuega o lo'o faia pea i le vā o le agaga ma le Atua, a e o le i'uga o le galuega a le Agaga PA'ia i luga o le loto o le a fa'atinoia i tagata uma, ona o Ia "o lo'o silasila i le mea lilo, na te avatu fa'aaliali se tau i te 'oe" (Mataio 6:18).

'Ou te fa'afetai e mafai ona 'ou fa'afeso'ota'i ma lo'u Tamā fa'alelagi i so'o se taimi ma i so'o se mea.

Li'o le Tali: **Ioe** **Lē Mautonu**

Ua 'ou iloa e 'ese'ese itū'aiga tatalo ma taimi tatau mo tatalo ta'itasi. E aofia ai tatalo e fa'alautasi i se mea lilo; tatalo e mafai ona fai i so'o se taimi pe so'o se mea; ma tatalo e faia fa'alaua'itele i taimi ma nofoāga e tatau ai.

Li'o le Tali: **Ioe** **Lē Mautonu**

'Ou te iloa le tāua o le tatalo e fai to'atasi mai le ta'ele o lo'u loto, ina ia fa'afofoga mai lo'u Tamā alofa ma le fa'amaoni ma e tali tatalo o lo'o i le lagi.

Li'o le Tali: **Ioe** **Lē Mautonu**

'Ou te matuā fa'afetai i le Atua i Lona alofa iā te a'u, e pei lava e na o a'u Lona atali'i/afafine ma e fa'afofoga mai i a'u tatalo uma ma tali mai e fa'atatau i Lana silafaga.

Li'o le Tali: **Ioe** **Lē Mautonu**

'Ou te iloa o a'u tatalo po o anapogi e lē maua ai se tusaga fa'apitoa ma le Atua, a e peita'i e saunia ai lo'u loto ia talia Lana meaalofa o le salamō ma tosina ai a'u ia 'ou lata atu iā te Ia.

Li'o le Tali: **Ioe** **Lē Mautonu**

E ala i le alofa tunoa o le Atua, ua 'ou filifili ai ia oli'oli i le fa'amoemoe, ia onosa'i i puapuagā, ma tumau pea i le tatalo ina ia mafai ona fa'amalosia ai lo'u fa'atuatua, ma ia mafai ona 'avea a'u ma puluvaga mo o'u aiga ma isi o i lo'u si'osi'omaga.

Li'o le Tali: **Ioe** **Lē Mautonu**

Manatu o Su'esu'ega

Tatalo e Mana'omia

Tali o Tatalo

O Fea o i ai Lau 'Oa?

Lesona 24

O lenei lesona e fa'avae i luga o le Mataio 6:19, 20.

(1) O FEA LE NOFOĀGA E AUPITO SILI E TEUFA'ASAO AI A TATOU "'OLOA" FA'ALELALOLAGI?

A ia outou tolo'a'i 'oa mo outou i le lagi, e lē o i ai se mogamoga, po o se 'ele e fa'aumatia ai; e lē o i ai fo'i tagata gaoi e 'eli atu, ma gaoi ai. Mataio 6:20

Mau e tau i ai: Mataio 19:21; Luka 12:33, 34; I Timoteo 6:17-19

E lē tumau 'oa e teu i le lalolagi; e osofa'ia ma gaoia e faomea; e fa'aleagaina e mogamoga ma le 'ele; e fa'aumatia e le afi pe 'ave'esea fo'i āu mea uma e le afā.

(2) O LE Ā LE SO'OTAGA I LE VĀ O LE NOFOĀGA O LO'O I AI A TATOU 'OA MA O TATOU LOTO?

Auā o le mea ua i ai lo outou 'oa, e i ai atoa fo'i ma o outou loto. Mataio 6:21

Mau e tau i a: II Korinito 4:18; Kolose 3:2

Ma "o le mea ua i ai lo outou 'oa, e i ai atoa fo'i ma o outou loto" (Mataio 6:21). O 'oa e fa'aputu i le lalolagi o le a fa'aālu uma i ai le mafaufau a e lē amana'ia ai mea fa'alelagi.

(3) O LE Ā LE LAPATA'IGA A LE TUSI PA'IA E FA'ATATAU I LE POGAI O MEA LEAGA UMA, MA UA MAFUA AI ONA Ō 'ESE LE TO'ATELE MAI LE FA'ATUATUĀGA?

Auā o le mana'o i tupe, o le pogai lea o mea leaga uma lava; ua manana'o tele i ai nisi, ona sesē ai lava lea o i latou i le 'upu o le fa'atuatua, ua tu'ia ai ua āti i latou e i latou i puapuagā e tele. I Timoteo 6:10

Mau e tau i ai: Fa'ata'oto 1: 19, 31; Mika 3:11; Tito 1:11

O le mana'o i tupe sa fai ma tu'inanau na pulea tupulaga o Iutaia i ia ōna pō. Sa tu'u'ese mai le Agaga o le Atua ma talitonuga a e sui i ai mea fa'alelalolagi, ma o lo'o fa'apea lava i le asō. O le mana'otele i le 'oa ua matuā tosina 'ese ai le olaga ma i'u ai i le fa'aaogāsesē o uigatamāli'i ma fa'aleagaina ai uigafa'aletagata, se'ia o'o ina lofia i malaia. O le galuega a Satani e fai ma le fa'aeteete, e lē mautonu, ma e faigatā; ma o le 'oa o lo'o galue malosai ai le tagata ia maua i le lalolagi, e mo na o se vaitausaga pu'upu'u lava.

(4) O LE Ā LE LAPATA'IGA A LE TUSI PA'IA I LE MEA E LĒ TATAU ONA FAI MA POGAI O A TATOU GALUEGA, MA AISEĀ?

'Aua e te galue fa'apuapuagā ia mau'oloa ai; tu'u ia o lou lava taofi. E te tulimata'i atu ea i le mea ua leai? Auā e faia lava e ia ona apa'au; e pei o le aeto ona lele atu o ia i le lagi. Fa'ata'oto 23:4, 5

Mau e tau i ai: Salamo 119:36, 37

Sa fetalai Iesu, "A ia outou tolo'a'i 'oa mo outou i le lagi, e lē o i ai se mogamoga, po o se 'ele e fa'aumatia ai; e lē o i ai fo'i tagata gaoi e 'eli atu, ma gaoi ai; auā o le mea ua i ai lo outou 'oa, e i ai atoa fo'i ma o outou loto" (Mataio 6:20, 21).

Fai mai le fa'atonuga ia "ia outou toloa'i 'oa mo outou i le lagi." E mo lou lava lelei ona teu o āu 'oloa fa'alelagi, auā e pau lea o mea totino a 'oe lava ia. O 'oa e fa'aputu i le lagi e lē mafai ona fa'aleagaina. E lē mafai ona fa'aumatiaina e se afi po o se lolovai, e lē gaoia e se faomea, e lē 'elea pe 'aina e mogamoga; auā e i ai i lalo o le tausiga a le Atua.

(5) O LE Ā LE MEA E FINAGALO LE ALI'I IA SILI ATU LE TĀUA I LO 'OA UMA, MA O LO'O IA NAUNAU E TU'U MAI E FAI MA TOFI MO LANA FANAU?

O le tagata lilo o le loto, ia teua lea i le mea e lē pala, o le loto agamalū ma le filemū, o le mea tau tele lava lea i luma o le Atua. I Peteru 3:4

Mau e tau i ai: Salamo 51:5; Efeso 4:22-24; Kolose 3:10

O lenei 'oa sa fa'atatauina e Keriso e sili le tāua i lo mea uma, o "le faula'igamea lelei o i Lana tofiga ua silisili mo le 'au pa'ia" (Efeso 1:18). Sa ta'uina so'o o Keriso o Āna ma'a tāua, o Āna 'olova pele ma fa'apitoa. Na fetalai o Ia, "E fai i latou ma ma'a o le paleali'i" (Sakaria 6:18). Ma "'Ou te fa'ato'aitiitia tagata e sili i le auro lelei, o tagata lava e sili ona to'aitiiti i le auro o Ofeira (Isaia 13:12). O lo'o silasila ifo Keriso i Ōna tagata i lo latou tulaga mamā ma ato'atoa, o le tau i o Ōna mafatiāga, Lona fa'alumaina, ma Lona alofa, ma le fa'a'atoāga o Lona mamalu - o Keriso, le totonugalemū o mea uma, o lo'o susulu mai ai 'ave o mamalu uma.

(6) E FA'APEFEA ONA TOE MAUA LE 'OA TELE, O LE UIGA MAMĀ LEA, INA IA I AI SO TATOU VAEGA I LE GALUEGA O LE FA'AOLATAGA MA IA SAUNI AI MO LONA AFIO MAI?

Ia iā te outou fo'i lea lava manatu sa iā Keriso Iesu. Filipi 2:5

Mau e tau i ai: I Peteru 1:13; I Korinito 2:16; Kolose 3:12

O lo'o fa'ataga mai i tatou e so'ofa'atasi ma Ia i le galuega tele o le fa'aolataga, ma ia tofusua ma Ia i 'oa na manumalo ai mai Lona mafatiāga ma Lona maliu. Sa tusa le aposetolo o Paulo i Kerisiano o Tesalonia, "Auā se ā ea so matou fa'amoemoe, ma se fiafia, ma se pale e mitamita ai? E lē o outou ea i luma o lo tatou Ali'i o Iesu Keriso, i Lona afio mai? Auā o outou lava o lo matou vi'iga ma lo matou 'oli'oli" (I Tesalonia 2:19, 20). O lenei le 'oa sa fa'atonu mai Keriso e tatou te galulue ia maua. O le selesalega e aupito tāua o le olaga o le amio lea. O 'upu uma ma gaoioiga e fai, e ala i le alofa tunoa o Keriso, o le a fafaguina ai se agaga e tasi ina ia 'a'apa a'e aga'i i le lagi, o taumafaiga uma e faia ia aga'i ai i le fausia o le amio e fa'apei o Keriso, o 'oa ia o lo'o fa'aputuina i le lagi.

(7) O LE Ā LE MEA E TUPU PE A TATOU FA'ASOA LO TATOU TAIMI MA 'OLOA E FA'ASALALAU ATU AI LE TALA LELEI MO LE MANUIA O ISI?

Afai fo'i e te alofa atu i lē ua fia'ai, ma e fafaga ia ma'ona o lē ua tigā; ona alu a'e lea o lou malamalama i le pouliuli, ma lou pogisā e pei o le aoauli ia. E ta'ita'iina fo'i 'oe e lē aunoa e Ieova; e fa'amālie fo'i o Ia iā te 'oe pe a oge vai, ma fa'amalosia ōu ivi; e 'avea fo'i 'oe e pei se fanua ua fa'asūsūina, e pei o le punāvai fo'i e lē mate ōna suāvai. Isaia 58:10-11

Mau e tau i ai: Isaia 58:6-9; Failauga 11:1

O le mea o lo'o i ai le 'oa, o lo'o i ai fo'i le loto. O taumafaiga uma mo le lelei o isi, e manuia ai fo'i ma tatou. O tupe po o le taimi e tu'u atu mo le fa'asalalauina o le tala lelei, o le a faia lea mo lo tatou lava lelei, ma tatalo ai fo'i mo le galuega ina ia o'o atu ai i isi agaga; o galuega lelei o le a afāina ai isi, ma o le a fa'amalosia ai le fia galue mo le Atua, ina ia mafai ai ona fa'atele atu fo'i galuega lelei e faia.

(8) I LE LAGI, O LE A TATOU SI'OMIA LE NOFOĀLI'I O LE ATUA MA VA'AIA 'OA, O AGAGA UA FA'ASAOINA ONA O A TATOU GALUEGA, MA O LE A FA'ATASI MA LE 'AU "TOEA'INA," O LE Ā LA TATOU MEA E TATAU ONA FAI E AVATU AI FA'AALOALOGA UMA I LE ATUA?

Ona fa'apa'u ai lea o toea'ina e to'aluafulu ma le to'afā i luma o Lē ti'eti'e i le nofoāli'i, ma ifo atu i Lē soifua e fa'avavau e fa'avavau lava, ma lafo o latou pale i luma o le nofoāli'i, o lo'o fa'apea atu, Le Ali'i e, e tatau lava 'Oe ina ia tu'u atu iā te 'Oe le vi'iga, ma le fa'ane'ene'ega, ma le mana; auā na e faia mea uma lava, ona o Lou finagalo fo'i e i ai i latou ma ua faia. Fa'aaliga 4:10-11

Mau e tau i ai: Fa'aaliga 7:11

I le aso mulimuli pe a ua fa'aumatia 'oa uma o le lalolagi, o le a va'aia e le tagata sa fa'aputu 'oa i le lagi mea na ia maua i lona olaga. Pe afai sa tatou fa'alogalo ma usita'i i fetalaiaga a Keriso, o lea a o tatou si'omia le nofoāli'i pupula, o le a va'ai atu i agaga sa fa'asaoina e ala i a tatou galuega, ma iloa atu isi na latou fa'asaoina, ma isi fo'i i talatu - o se motu o tagata na aumaia i le mapusaga filemū e ala i a tatou galuega, ua lafoina o latou paleali'i i lalo o 'a'ao o Iesu, ma vivi'i a'e iā te Ia e

fa'avavau. O le a lagona le fiafia e lē na galue mo Keriso, i le va'ai atu i le 'au fa'asaoina ua tofusua i le mamalu o le Fa'aola! O le a iloa le tāua o le lagi e i latou sa fa'amaoni i le galuega mo le lavea'iina o agaga!

'Ou te iloa o le mea o i ai lo'u loto o le a teu ai fo'i la'u 'oa ma o 'oloa o i le lalolagi e lē saogalemū ma o le a faigatā ona o le gaoi ma e fa'aumatiaina.

Li'o le Tali: **Ioe** **Lē Mautonu**

'Ou te fa'afetai ona o lo'o iā te a'u le avanoa e mafai ona 'ou filifili pe fa'aaogā lo'u taimi ma a'u mea fa'alelalolagi uma i le lagi, e ala i le teuina i le malō o le Atua o lo'o i le lalolagi.

Li'o le Tali: **Ioe** **Lē Mautonu**

O le fa'anaunauga o lo'u loto ia maua mai le Ali'i le 'oa e aupito sili i mea uma - o le loto ua fa'apa'iaina ma le amio ua fa'amamāina. 'Ou te tatalo, e ala i Lona alofa tunoa, ia mafai ona 'ou toe tu'u atu iā te Ia mea e tāua iā te Ia - o le loto ua fa'au'u ia fa'apitoa ma le mamalu iā te Ia mai lo'u ola.

Li'o le Tali: **Ioe** **Lē Mautonu**

Ua 'ou naunau mo le aso o le a 'ou tū atu ai i luma o le nofoāili'i o le Atua ma lafo i lalo o Ōna 'a'ao lo'u paleali'i, ma avatu iā te Ia le vi'iga ma le mamalu mo mea uma na Ia faia mo a'u.

Li'o le Tali: **Ioe** **Lē Mautonu**

Manatu o Su'esu'ega

Tatalo Mana'omia

Tali o Tatalo

[illegible]

Sa'ili le Malamalama, 'Au'auna i le Matai e Tasi

Lesona 25

E fa'avae lenei a'oa'oga i le Mataio 6:22, 24.

(1) PE A TATOU TU'U MA LE ATO'ATO'A O TATOU OLA IĀ KERISO, E PEI O PAULO, O LE Ā LA TATOU TALI PE A O'O MAI FA'AFITAU LI?

*O lo'o molitino mai e le Agaga Pa'ia i lea 'a'ai ma lea 'a'ai, o lo'o fa'a'apea mai, ua fa'atali mai noanoāga ma puapuagā iā te a'u. A e 'ou te lē manatua se tasi mea, o lo'u lava ola fo'i 'ou te lē naunau i ai, se'i o'u fa'auma lo'u momo'e ma le oli'oli, atoa ma le faiva ua 'ou maua mai le Ali'i o Iesu, 'ou te molitino atu le tala lelei o le alofa tunoa o le Atua. **Galuega 20:23-24***

Mau e tau i ai: Galuega 21:13; II Korinito 12:10; 4:10-17

E tasi le fuafuāga ma le loto fa'amaoni atoa'atoa i le Atua, o le tulaga lea sa fa'asino i ai fetalaiga a le Fa'aola. Ia fa'amaoni le ala ma ia mautonu le iloa o le 'upu moni ma ia usita'i i ai, e tusa pe o le ā le tau, ona e maua lea o le malamalama fa'alelagi. O le usita'i moni e amata pe a ua fa'agata māliega uma ma le agasala. O le a ō gatasi le gagana o le loto ma le aposetolo o Paulo, "O le mea e tasi 'ou te faia, 'ou te fa'agalogalo i mea ua tuana'i, 'ou te momo'e punou a'i fo'i i mea o lumana'i, 'ou te tausisi atu i le fa'ailoga, ia maua ai le tau na vala'auina ai a'u mai lugā e le Atua iā Keriso Iesu" (Filipi 3:13, 14). Ma "'O lo'u manatu ua lē aogā mea uma lava ona o le silisili 'ese o le poto i la Keriso Iesu lo'u Ali'i; ona o Ia ua 'ou fa'alēaogāina mea uma, ma 'ou manatu o otaota lava ia mea, ina ia 'ou maua Keriso" (Filipi 3:8, 9).

(2) O LE Ā LE MEA UA VALA'AUINA SO'O O KERISO IA FAIA INA IA MAFAI AI ONA ILOA LE MALAMALAMA FA'ALEAGAGA E I LATOU UA FA'ATAUASOINA E LE ALOFA FA'APITO MO LATOU LAVA?

*E fa'apupula i mata o ē tauaso, e aumaina i fafo nai le fale puipui lē ua fusifusia, atoa ma ē ua nonofo i le pogisā ia aumaia i latou nai le fale ua taofiina ai. **Isaia 42:7***

Mau e tau i ai: Isaia 42:6; 35:5; 9:2; 61:1

Pe a fa'atauasoina mata ona o le manatu iā te 'oe lava, e na o le pōuliuli e i ai. "Afai e leaga ou mata, e pouliuli uma ai lou tino" (Mataio 6:23). O le pogisā mata'utia lenei sa si'omiaina Iutaia i le lē talitonu, sa lē mafai ai ona latou iloa le uiga ma le galuega a Ia Lē na afio mai e lavea'i latou mai a latou agasala.

(3) O LE Ā LE MEA E MAFAI ONA TATOU FAIA IA MAUA AI LE MALOSI E FA'ATO'ILALO AI FA'AOSOOSOGA MA E MAUA AI PEA LE FILEMŪ ATO'ATO'A MA LE FA'ALAGOLAGO I LE ALI'I?

*E te leoleoina ia fīfilemū lava lē ua mausalī lona loto; auā ua ia fa'atuatua iā te 'Oe. Inā fa'atuatua ia outou iā Ieova e fa'avavau lava; auā o Ioa Ieova, o le Papa e fa'avavau ia. **Isaia 26:3-4***

Mau e tau i ai: Isaia 57:19-21

O le gaua'i i fa'aosoosoga e amata lea ina ua lē mautonu le mafaufau, ia lē fesuisuia'i lou fa'atuatua i le Atua. Pe a lē filifili e tu'u atu ma le atoa i tatou i le Atua, o le a i ai loa tatou i le pogisā. O le a tatou fa'amatala le faitoto'a e ulu mai ai Satani pe a tatou tolopō se mea, ona ia ta'ita'i sesē lea o i tatou e ala i āna fa'aosoosoga. E na te iloa pe a mafai e ia ona fa'anenefu la tatou va'ai, ina ia lē mafai e mata o le fa'atuatua ona iloa atu le Atua, ma o le a leai loa se pā e puipuia ai mai le agasala.

(4) O LE Ā LE I'UGA PE A TATOU FILIFILI E UI PEA I LE ALA POGISĀ O TU'INANAU MA FA'ANAUNGA E LĒ MAMĀ?

*O ana amio leaga e maua ai lava lē ua agasala; o maea o ana agasala e taofia ai o ia. **Fa'ata'oto 5:22***

Mau e tau i ai: Fa'ata'oto 1:18; 11:3, 5; Salamo 7:15, 16; Kalatia 6:7, 8

O le malosi o le naunauta'iga agasala, e fa'aali mai ai manatuga sesē o le agaga. A fa'amalieina lea tu'inanau o le a mautinoa ai le liliu'ese o le agaga mai le Atua. Pe a mulimuli i le ala ua filifilia e Satani, o le a si'omia i tatou e le leaga ma o le a ta'ita'iina la'asaga uma i le loloto o le pōuliuli ma atili fa'atauasoia ai le loto.

E tasi lava le tulafono e aogā i le ola fa'aleagaga fa'apea le lalolagi o mea na foafoaina. O lē e tumau i le pogisā o le a 'ave'esea mai iā te ia le mana e va'ai ai ma iloa. O le a si'omia o ia i se pōuliuli e sili atu i lo'o le pogisā o le vaeluagāpō, ma o le a leai se malamalama e mafai ona iloa e ia i le sususlu o le lā o le aoauli. O ia e "i le pouliuli o ia, o lo'o savali fo'i i le pouliuli, e lē iloa fo'i e ia le mea e alu i ai, auā ua fa'atauasoia ona mata e le pouliuli" (I Ioane 2:11). Pe a teuloto pea le leaga, ma lē amana'ia ōlega alofa a le lagi, o le a lē iloa e le tagata agasala alofa mo le lelei, pe naunau mo le Atua, e mafai ai ona maua le malamalama o le lagi. E fa'atumulua pea le alofa e le vala'au a le alofa tunoa, o lo'o susulu pea le malamalama e pei ona muā'i fa'asusuluina i luga o lona agaga. A e peita'i ua tau mai nei le si'ufofoga i taliga ua punitia, ma le malamalama i mata ua fa'atauasoia.

(5) E FA'APEFEA LE FINAGALO O LE ATUA PE A LĒILOA SE TO'ATASI O LANA FANAU?

E lē fa'atuai mai le Ali'i i le mea na folafolaina mai, fa'apei o le manatu a isi tagata i le fa'atuai; a e peita'i ua onosa'i mai lava o Ia iā i tatou, ona ua lē finagalo ia fano se tasi, a ia o'o uma lava i le salamo. II Peteru 3:9

Mau e tau i ai: Esoto 34:6; Salamo 86:15; Roma 2:4; I Timoteo 1:16

E leai se agaga e vavae'ese mai le Atua ma tu'u ia faia lona lava loto, a e o lo'o i ai pea se fa'amoemoe mo lona fa'aolataga. "E liliu 'ese le tagata mai le Atua, a e lē o le Atua mai iā te ia." O lo'o feso'ota'i mai pea le Tamā fa'alelagi iā i tatou ma ōlega, o lapata'iga, ma ta'utinoga o Lona alofa fa'apalepale se'ia o'o ina te'ena pea ia avanoa ma tatou lē amana'ia lava. O le 'avega lea e i luga o le tagata agasala. Ina ua te'ena le Agaga o le Atua i le asō, o le a ia saunia loa le ala e tete'e ai le malamalama pe a tu'uina mai ma le mana e malosi atu. O le a fa'asolosolo pea ona ui o ia i la'asaga 'ese'ese o le tete'e se'ia i'u ai ina lē toe i ai se malamalama e fa'atosina ai, ma o le a lē toe tali ai i so'o se taumafaiga a le Agaga o le Atua. E o'o lava i "le malamalama sa iā te ia" ua liu i le pogisā. O 'upu moni uma o lo'o tatou iloa ua fa'aleagaina ma ua atili fa'atauasoia ai le agaga.

(6) O LE Ā LE FOLAFOLAGA OFOFOGIA E MAFAI ONA TAPA I AI A O TATOU FA'ASALALAU MA LE AGAGA TATALO FATU O LE TALA LELEI IĀ I LATOU UA FA'ATAUASOINA E LE AGASALA?

O lē ua alu atu ma tagi fano, o lo'o 'ave le saito e lūlū, e fo'i mai lava ia ma le 'alaga fiafia, o lo'o au mai ana fusi saito. Salamo 126:6

Mau e tau i ai: Isaia 55:11; 32:20; Iopu 11:13-17; Ioane 4:36

(7) O LE Ā LE MEA E TATAU ONA TATOU ILOA MA FESOASOANI ATU AI INA IA MALAMALAMA AGAGA UA FA'ATAUASOINA?

E leai sē na te mafaia ona 'au'auna i ali'i e to'alua; auā e 'ino 'ino o ia i le tasi, a e alofa atu i le tasi; a lē o lea, e fa'apipi'i atu ia i le tasi, a e fa'alēaogā i le tasi. Tou te lē mafaia ona 'au'auna i le Atua atoa ma mamone. Mataio 6:24

Mau e tau i ai: Iosua 24:15; Luka 16:13

E le'i fetalai mai Keriso o le a lē 'au'auna se tagata i ni matai e to'alua, a e peita'i e lē mafai e ia ona faia lea mea. E leai se so'otaga pe talafeagai fuafuāga a le Atua ma mamone (tamāo'aiga). O le uiga fa'apito o le tagata fa'alelalolagi o le a la'asia ai le laina o lo'o lapata'i ai le loto fuatiaifo o le Kerisiano ia 'aua le faia, ia te'ena ia lava, ma ia onosa'i. I le isi itū o lo'o i ai le so'o e mulimuli iā Keriso; o le isi itū o le tagata tu'inanau fa'alelalolagi, e femulimulia'i i teuga 'ese'ese, mana'o i fa'afiafiāga, ma fa'amalieina i tu'inanau o le tino. O le itū lea o le laina e lē mafai ona ūlu i ai le Kerisiano fa'amaoni.

(8) ONA E LEAI SE ITŪ E FA'APITO, O LE Ā LE MOLIMAU FA'AMAONI MAI O TATOU LOTO PE AFAI UA TATAU ONA TATOU SA'OLOTO MAI LE PULE A SATANI?

Ua fa'asatauroina fa'atasi i ma'ua ma Keriso; a e 'ou te lē toe ola a'u, a o Keriso o lo'o ola i totonu iā te a'u; o le ola fo'i 'ou te ola ai nei i le tino, 'ou te ola ai lava i le fa'atuatua i le Ālo o le Atua, o Lē na alofa mai iā te a'u, ma foa'iina mai o Ia e Ia e fa'i mo'u sui. Kalatia 2:20

Mau e tau i ai: Kalatia 5:24; Roma 6:4-6; Kolose 2:13

E leai se tasi e mafai ona i se tulaga fa'alēogalua; e leai se ogātotonu, o se tasi e lē alofa i le Atua pe lē 'au'auna i le fili o le amiotonu. E afio Keriso i Lana 'au faigaluega ma galue e ala i a latou taleni ma mea e mafai ona latou faia. E tatau ona latou gaua'i i Lona finagalo, ma galulue fa'atasi ma Lona Agaga. O le a lē toe ola lava i latou ia, a e o Keriso e soifua i totonu o i latou. O lē e lē tu'u atu ato'atoa o ia i le Atua, e i lalo o le isi puleaga, e fa'alogo i le isi leo o lo'o ta'u mai ai mea e matuā 'ese o latou uiga.

O galuega e faia fa'a'afa'afa e tu'u ai le tagata i le itū a le fili ma e 'avea ia o se so'o o 'au a le pōuliuli. O tagata e ta'u mai o latou o fitafita a Keriso a e tau i le itū a Satani, ma fesoasoani i lana itū, o le a fa'amaonia o latou o fili o Keriso. E 'avea i latou o se so'otaga i le vā o Satani ma fitafita fa'amaoni, ma e ala i nei sui o le a galue pea le fili e tosina 'ese atu loto o fitafita a Keriso.

(9) O LE Ā LE LAPATA'IGA MATA'UTIA NA TU'U MAI LAVA E KERISO IĀ I LATOU O LO'O FA'ATOSINA SE AGAGA VAIVAI INA IA AGASALA?

Ai sē na te fa'atausui se tasi o i latou nei e fa'atauva'a o ē fa'atutua iā te A'u, e lelei i lea tagata pe ana nonoa se ma'aolo tele i lona ua, ma fa'agotoina o ia i le moana loloto. Mataio 18:6

Mau e tau i ai: Roma 14:21; 15:1, 2; I Korinito 8:9-13; II Tesalonia 1:6-9

O le amioleaga e sili le malosi i lo tatou lalolagi, e lē o le olaga agasala a le tagata agasala po o le agaga ua sē maulalo. A e o le olaga lea e foliga mai e mamā, e fa'amaoni ma agatonu, peita'i o lo'o fofō a'e ai le agasala e tasi, e fa'amalieina ai le amioleaga e tasi. Mo le agaga o lo'o fete'ennai fa'alilolilo ma se fa'aosoosoga tele, o lo'o tū ma le lē mautonu i luga o le mea e mātī'eti'e, o se fa'ata'ita'i e pito malosi lea e tosina atu ai ia agasala. O lē ua tu'u i ai fuafuāga maoa'e o le olaga ma le 'upu moni ma le mamalu, a e ua ia solia se tulafono e tasi o poloa'iga pa'ia a le Atua, ua ia fa'alēaogā Āna meaaloa tāua ona o se mailei ia agasala ai. O le poto, o taleni, o le tigāalofa, e o'o lava i le agalelei ma le limafoā'i, e mafai ona 'avea ma mailei a Satani e fa'atosina atu ai nisi agaga ia fa'aleagaina ai mo lenei olaga ma le ola o i lumana'i.

(10) PE AFAI TATOU TE SA'ILI I ASO TA'ITASI LE MALAMALAMA E ALA I LE FILIFILI O KERISO E 'AVEA MA O TATOU MATAI, O Ā MAILEI E TOLU A SATANI O LE A TATOU 'ALO 'ESE MAI AI?

'Aua tou te manana'o i le lalolagi, po o mea o i ai i le lalolagi. Pe afai e mana'o se tasi i le lalolagi, e lē o iā te ia le alofa i le Tamā. Auā o mea uma lava o i le lalolagi, o le tu'inanau o le tino, ma le tu'inanau o mata, ma le fa'alialia o lenei olaga, e lē mai le Tamā ia, a e mai le lalolagi. I Ioane 2:15, 16

'Ou te tatalo mo le mana o le Agaga Pa'ia i lo'u olaga ina ia 'ou tumau i le Malamalama, o Keriso lava lea, ma ia 'ou fa'atasi atu iā te Ia. Ua 'ou filifilia fa'amanuiāga a le lagi, a e lē o o'u lava tu'inanau.

Li'o le Tali: Ioe Lē Mautonu

O le fa'anaunauga o lo'u loto ia fa'aaogāina e le Ali'i a'u e tatala mata o ē tauaso fa'aleagaga ma ia fa'aasino i ē o fai ma pagotā a le agasala le sa'olotoga e mafai ona latou maua iā Keriso.

Li'o le Tali: Ioe Lē Mautonu

'Ou te iloa ma talitonu e naunauta'i lo'u Tamā fa'alelagi ina ia leai lava se tasi e lēiloa o Lana fanau fa'alelalolagi. 'Ou te fiafia e fesoasoani i isi ina ia iloa e leai se tulaga fa'alēogalua; ona e tatau iā i tatou le filifili e 'avea Ia ma Matai po o le i ai i lalo o le pule a Satani.

Li'o le Tali: Ioe Lē Mautonu

Ua 'ou filifili e tu'u ato'a lo'u ola iā Keriso ma tatalo ina ia 'ou mulimuli i le Malamalama ma filifili e fai Keriso ma o'u Matai, ina ia mafai ona i'u ma le fiafia le tausinioga ma oli'oli ai i Lana galuega.

Manatu o Su'esu'ega

Tatalo Mana'omia

Tali o Tatalo

'Aua le Popole i se Mea e Tasi

Lesona 26

O lenei lesona e fa'avae i luga o le Mataio 6:25, 33.

(1) O LE Ā LE MEA NA FETALAI MAI KERISO IA 'AUA NE'I TATOU FAIA E FA'ATATAU I MEA TATOU TE MANA'OMIA I ASO TA'ITASI?

O le mea lea 'Ou te fai atu ai ia te outou, 'aua ne'i outou popole i o outou ola, i mea tou te 'a'ai ai, ma mea tou te inu ai, po o outou tino, i mea tou te 'o'ofu ai. E lē sili ea le ola i le mea e 'ai, ma le tino i le 'ofu? Mataio 6:25

Mau e tau i ai: Filipi 4:6, 7

E silafia e le Atua na tu'u le ola iā te 'oe mea'ai e mana'omia mo le tausiga o 'oe. E lē galo e Lē na faia lou tino e te mana'omia ofu e lavalava ai. Mata o Ia Lē na tu'u maia le Meaalofa e aupito sili o le a lē tu'u mai fo'i le mea e mana'omia ina ia fa'aato'atoa ai?

(2) O AI LE POGAI E AUMAIA MEA LELEI UMA?

Lo'u agaga e, ia e fa'amanū atu iā Ieova; Ieova e, lo'u Atua, e matuā silisili lava 'Oe, e ofu 'Oe i le vi'iga ma le matagofie... O lo'o fa'atalitali ia mea uma iā te 'Oe, ina ia e avatu i ai la latou mea e 'ai i ōna aso e tatau ai. Salamo 104:1, 27

Mau e tau i ai: Salamo 104; 103:5; Kenese 1:30; Iopu 38:41

(3) O Ā MEAOLA SA FETALAI MAI KERISO E MAFAI ONA TATOU VĀ'AI I AI E FAI MA FA'ATA'ITA'I O LE TAUSIGA A LE TAMĀ MO I TATOU?

Ia outou va'ava'ai i manu felelei; latou te lē lūlū saito, pe selesele, pe fa'aputu i fale saito, a e fagaina i latou e lo outou Tamā o i le lagi. E lē sili ea o outou lelei i lo latou? Mataio 6:26

Mau e tau i ai: Mataio 10:29-31

Na fa'asino e Iesu le 'au fa'alologologo i manulele a o pepese a latou vi'iga, e lē o fa'alavelavea i manatu e uiga i le tausiga, ona e "latou te lē lūlū saito, pe selesele" (Mataio 6:26a); peita'i e aumaia e le Tamā mea e latou te mana'omia. Ma na fesili o Ia, "E lē sili ea o outou lelei i lo latou?" (F. 26c).

"E leai se manulele e pa'ū mai Lana tausiga,
Auā o Ia e fa'atasi ai ma i tatou i so'o se mea;
E leai se agaga e punoa ifo a e lē o silafia e Iesu,
Ma e Na te fa'ailoga loimata uma e pa'ū;
Ma o le a lē mafai lava ona Ia lē tausia
Pe tu'ulafoa'i se agaga e fa'atuatua iā te Ia."

(4) O LE Ā LE ISI FA'ATA'ITA'I I LE NATURA NA FA'ASINO I AI KERISO E FA'AALIA AI LE SILAFAGA ALOFA A LO TATOU TAMĀ FA'ALELAGI?

Ia outou mafaufau i lautalotalo pe fa'apefea ona tupu; latou te lē galue, e lē milo fo'i; a 'Ou te fai atu ia te outou, e le'i 'ofu lava Solomona ma lona matagofie tele pei o le tasi o nā mea. Luka 12:27

Mau e tau i ai: Mataio 6:28

Ua fa'amalamalamaina atumauga ma le lau'ele'ele e fugāla'au, ma a o fa'asino atu iā i latou i le fotu mai o le taeao, na fetalai Iesu, "Ia outou mafaufau i lautalotalo pe fa'apefea ona tupu" (Luka 12:27). Atonu e mafai i le poto o le tagata ona tusi ata o la'au ma fugāla'au i o latou lanu 'ese'ese, a e o le ā le lima e mafai ona tago ma tu'u atu le ola i se fugāla'au po o se lau o le mutia? O fuga uma e i le ala e ola latou mai le mana lava e tasi o lo'o taofia fa'amaua luga lalolagi o fetū.

E ala mai mea uma na foafoaina o lo'o pogai mai ai le ola e tasi mai le Atua. O lo'o fa'aofuina fugāla'au o le fanua e Ōna 'a'ao i la'e'i e sili ona tele le tau i lo o mea e fa'aaogā e tupu o le lalolagi. Ma "Afai e fa'apea ona fa'a'ofuina e le Atua le vao o le fanua, o ola mai i le asō, a e lafoina a taeao i le ogāumu; e lē sili ea ona fa'a'ofuina o outou e fa'atuatua itiiti?" (Mataio 6:30).

O Ia Lē na faia fugāla'au ma na tu'u i le manuiti lana pese, ua fetalai mai, "Ia outou mafaufau i lautalotalo" (Luka 12:27), ma "Ia outou va'ava'ai i manu felelei" (Mataio 6:26).

(5) O LE Ā LE MEA E MAFAI E LE ATUA ONA FAI A E LEAI LAVA SE TASI MALŌ, PULEAGA, PO O SE TAGATA OLA E MAFAI ONA FA'ATAUNU'UINA?

*Ona fetalai ane lea o le Atua, Inā tatou faia ia o le tagata i lo Tatou fa'atusa, ia foliga iā i Tatou; ia pule fo'i i latou i i'a i le sami, ma manu felelei, ma manu vaefā, ma le lau'ele'ele uma, atoa ma mea fetolofi uma e fetolofi i le 'ele'ele. **Kenese 1:26***

*Ona faia lea e Ieova le Atua o le tagata i le efuefu o le "ele'ele, ma ua mānava i ōna pogā'iisu o le mānava ola, ona 'avea ai lea o le tagata ma tagata ola. **Kenese 2:7***

Mau e tau i ai: I Korinito 8:6; Eperu 1:2; Ioane 1:1-3; Kolose 1:16

(6) O Ā NI FA'AMANUIĀGA O LE FOAFOĀGA NA TU'U MAI E LE ATUA I LE AIGĀTAGATA, I LONA MANA MA LE ALOFA OFOFOGIA, MO LO TATOU FIAFIA, OLI'OLISAGA, MA LE POTO?

*Ua 'auina atu e Ia o vaipuna i vanu, ua tafe ia i va o mauga... Ua fa'atupu e Ia mutia mo manu vaefā, atoa ma mea totō e aogā i tagata; e fa'atupu mai le mea e 'ai i le 'ele'ele; ma le uāina e fa'afiafia ai loto o tagata, ina ia pupula ai o latou mata e sili i le suāu'u, o le mea e 'ai fo'i e malosī ai tagata. Ua lauolaola la'au o Ieova, o arasi o Lapanona na totōina e Ia... Na Ia faia le masina e atofaina ai aso; ua iloa e le lā le mea e goto i ai... O lenei sami telē ma le lautele, o i ai mea fetolofi e lē masino, o meaola iti atoa ma ē tetele. **Salamo 104:10, 14-16, 19, 25***

I le matagofie o mea o le foafoāga, atonu o le a e a'oa'o atili ai e fa'atatau i le poto o le Atua e matuā sili nai le mea e iloa e tagata a'oa'oina. Na tusia e le Atua se fe'au mo 'oe i lau o le lautalotalo, e tusia i le gagana e mafai ona faitauina e le loto a o tu'u'esea a'oa'oga o le lē talitonu, o le manatu fa'apito, ma le lē mafaufau i isi.

Aiseā ua Ia tu'u atu ai iā te 'oe manu e pepese ma fugāla'au e ola mālū, vaganā e mai le finagalo alofa o le Tamā, ina ia fa'amalamalamaina ma fa'afiafia ai lou ala o le olaga? Se manū e aumaia mea uma e mana'omia mo lou ola a e leai ni fugāla'au ma manufelelei, peita'i e le'i fiafia le Atua e aumai na o ni mea ia tau o le ola. Ua Ia fa'atumulia le 'ele'ele ma le 'ea ma le vā nimonimo i va'aiga matagofie e ta'u atu ai iā te 'oe Lona finagalo alofa mo 'oe. O le matagofie o mea uma na foafoaina e na o se va'aiga mai le pupula o Lona mamalu. Pe afai ua Ia tu'u mai le poto e lē gata i luga o mea o le foafoāga, mo lou fiafia ma le oli'olisaga, e mafai la ona e masalosalo o le a Ia tu'u iā te 'oe fa'amanuiāga uma o lo'o e mana'omia?

(7) INA UA PA'Ū LE AIGĀTAGATA, O LE Ā LE MEA O LO'O FA'ANAUNAU LE ATUA E TOE FA'AFOUINA I TOTONU O LANA FANAU?

*'Ou te avatu fo'i ia te outou le loto fou, ma 'Ou tu'u i totonu ia te outou le agaga fou; 'Ou te 'ave'esea le loto ma'a'a ai o outou tino, ma 'Ou avatu ia te outou le loto 'a'ano. **Esekielu 36:26***

Mau e tau i ai: Esekielu 11:19; 18:31

"Ia outou mafaufau i lautalotalo." O fugāla'au uma e matala ōna lau i 'ave o le lā e usiusita'i i tulafono lava e tasi o lo'o ta'ita'iina fetū, ma o lea ola e fa'apea le faigofie ma suāmaliē ma ofoofogia! E ala mai fugāla'au o lo'o fa'ailoa mai e le Atua iā i tatou le matagofie o le amio e fa'apei o Keriso. O Ia Lē na tu'uina mai lea matagofie i fuga o la'au, ua sili atu ona naunau ia fa'a'ofuina le agaga i le matagofie o le uiga o Keriso.

Ua fetalai mai Iesu e mafaufau pe fa'apefea ona tupu le lautalotalo; e fa'apefea, ina ua oso a'e mai le 'ele'ele mālūlū ma le pogisā, po o le palapalā o le 'auvai, e fa'apefea ona matala a'e ai la'au e matagofie ma manogi. O ai e manatu e mafai ona

tupu a'e se mea matagofie mai le ā'a o le lautalotalo e 'ena'ena ma e talatala? Peita'i pe a mātala mai le ola mai le Atua, lea e nātia i totonu, i Lana vala'au i le timu ma le susulu o le lā, o le a va'aia ma maofa ai tagata i le matagofie ma le ofoofogia. E fa'apea fo'i ona mātala mai le ola o le Atua i agaga uma pe a gaua'i atu i le galuega a Lona alofa tunoa, o lea e maua fua pei o le timu ma le susulu o le lā, ma e sau ma fa'amanuiāga mo tagata uma.

(8) O FEA LE ISI MEA E MAFAI ONA TATOU SA'ILIA MO SE FA'AMAONIGA O LE SILISILI'ESE MA LE ALOFA O LE ATUA?

*Ua tala mai e le lagi le mamalu o le Atua; ua fa'aalia fo'i e le vā nimonimo le galuega a Ōna 'a'ao. **Salamo 19:1***

Mau e tau i ai: Salamo 97:6; 50:6; 36:5, 6

(9) O Ā 'UPU AMATA E TOLU O NEI FUAI'UPU E 'AVEA MA FA'AMAONIGA O LE POGAI O LE MANA FOAFOA O LE ATUA?

*Ua fetalai mai le Atua, Ia malamalama; ona malamalama ai lea. **Kenese 1:3***

*Ua fetalai mai fo'i le Atua, Ia i le vā o vai le vānimonimo, e vā a'i isi vai ma isi vai. **Kenese 1:6***

*Ua fetalai mai fo'i le Atua, Ia potopoto i le mea e tasi o vai i lalo o le lagi, ia iloa fo'i le 'ele'ele matūtū; i le ua fa'apea lava. **Kenese 1:9***

Mau e tau i ai: Kenese 1:11, 14, 20, 24, 29

O le afioga a le Atua e faia fugāla'au, ma o le afioga lava lea e tasi o le a aumaia i le tagata meaalofo a Lona Agaga.

(10) ONA O LE FOAFOĀGA NA FAIA IA TAUSI TULAFONO O LE ALOFA A LE ATUA, MA IA AUMAIA MEA E MANA'OMIA MO MEAOLA UMA, O LE Ā LE T'UGA PE A MULIMULI FO'I LANA FANAU MA TAUSI NEI TA'IALA E LĒ O FA'APITO?

*A o lē matuā matamata i le tulafono o le sa'olotoga ua ato'atoa ona lelei, ma ua tumau i ai o ia, e lē se fa'alogologo ma le fa'agalogalo lenā tagata, a o le 'ana'ana i le galuega, e manuia o ia i lona lava 'ana'ana. **Iakopo 1:25***

Mau e tau i ai: Roma 13:10

O le tulafono a le Atua o le tulafono o le alofa. Ua Ia si'osi'omia 'oe i le matagofie ina ia a'oa'o atu ai 'oe e le'i tu'ua 'oe i le lalolagi ia na ona faia mea mo 'oe lava, ia 'eli ma fausia, ia galue ma femilosa'i, a e ina ia gaosia se olaga e malamalama ma fiafia ma matagofie i le alofa o Keriso - fa'apei o fugāla'au, e fa'afiafiaina ai nisi agaga e ala i galuega alofa.

(11) O FEA SE ISI MEA E MAFAI ONA TATOU SA'ILIA E A'OA'O AI LE FE'AU O LE ALOFA O LE ATUA MO I TATOU, MA E FA'ATUMULIA AI MEA UMA O LANA FOAFOĀGA?

*A e peita'i inā e fesili ia i manu vaefā, latou te a'oa'o mai ia te 'oe; ma manu felelei, latou le fa'ailoa mai ia te 'oe. Pe ia e tautala i le lau'ele'ele, e a'oa'o mai ai o Ia ia te 'oe; e fa'amatala mai fo'i ia te 'oe e i'a o le sami. Po o ai ea e lē iloa i nei mea uma ua faia ia mea e le 'a'ao o Ieova? Ua i ai i Lona 'a'ao o le ola o meaola uma, ma le mātala a tagata ola uma lava. **Iopu 12:7-10***

Mau e tau i ai: Ieremia 8:7; Isaia 1:3; Fa'ata'oto 6:6

Tamā e ma tinā, ia maua se a'oa'oga a le fanau mai fugāla'au. Taumafai e 'ave latou e va'ava'ai i la'au 'ese'ese i fa'ato'aga ma laufanua po o vaomatua, ma ia a'oa'o i latou e faitau i le natura le fe'au o le alofa o le Atua. Ia feso'ota'i mafaufauga e fa'atautau iā te Ia ma manufeleei ma fugāla'au ma la'au. Ta'ita'i le fanau ina ia va'aia i le matagofie ma le lelei o mea uma o lo'o fa'aalia mai iā i latou le alofa o le Atua. Ia fa'ailoa iā i latou le lelei o lau talitonuga e ala i lau molimau. Ia tu'u mai i ōu laugutu le tulafono o le alofa.

Ia a'oa'o le fanau ona o le alofa e tele na'uā o le Atua, o le a suia ai o latou uiga moni ina ia feso'ota'i Lona uiga. A'oa'o i ai o le a Ia fausia o latou olaga ia matagofie ma ōnomea e pei o fugāla'au. A o latou āoina fua manogi, a'oa'o i ai e sili atu le matagofie o Lē na faia fugāla'au ma i latou, ma o le a fa'apea ona felavasa'i o latou loto fa'atasi ma Ia. O Ia Lē e "ato'atoa

ona lelei" (Pese a Solomona 5:16) o le a 'avea ma pa'aga ma se uō iā i latou i aso ta'itasi uma, ma o le a liua o latou olaga i le fa'atusa o Lona soifuāga mamā.

'Ou te va'ai i le Atua e lē na o Lē na faia a'u, a e o le Pogai alofa o mea uma. 'Ou te fa'afetai ona e lē tatau ona 'ou popole i se mea e mana'omia, auā e maua mea uma pe a 'ou tu'u atu ma le fa'atuatua lo'u ola i Ōna 'a'ao.

Li'o le Tali: **Ioe** **Lē Mautonu**

'Ou te fa'afetai i lo'u Tamā fa'alelagi, o Lē ua tu'u mai le ola fa'apea punāvai i vanu, o la'au, o atumauga, o meamata ua Ia tu'u mai mo a'u mea'ai ma isi mau mea e tele na'uā.

Li'o le Tali: **Ioe** **Lē Mautonu**

E sili a 'e ai lo'u fa'afetai mo se loto fou ua Ia tu'u mai iā te a'u. 'Ou te tatalo ia ala mai Lona Agaga, ia 'ou mulimuli pea i ta'iala e fa'atatau i le foa'i atu mo le lelei o isi, fa'apei o mea uma na Ia foafoa.

Li'o le Tali: **Ioe** **Lē Mautonu**

Manatu o Su'esu'ega

Tatalo Mana'omia

Tali o Tatalo

O le Malō o le Lagi

Lesona 27

E fa'avae lenei lesona i luga o le Mataio 6:33.

(1) O FEA NA A'OA'O MAI KERISO E TATAU ONA MUĀ'I AMATA MAI AI LE MALŌ O LE ATUA?

E lē fai ane fo'i tagata, Fa'auta, o i inei! pe fa'apea, Fa'auta, o i'ilā! auā fa'auta, ua i ai lava ia te outou le malō o le Atua.

Luka 17:21

Mau e tau i ai: Luka 12:34; II Korinito 4:18

O tagata sa fa'alogologo i fetalai a Keriso ua fa'atalitali pea mo se fa'aaliga e fa'ataui i le malō fa'alalolagi. A o tatala atu e Iesu iā i latou 'oa o le lagi, o le fesili sa aupito mamafa i o latou mafau, A i ai se so'otaga ma Ia, o le a fa'apefa ona aga'i i luma o matou fa'amoemoe i le lalolagi? Na fa'ailoa atu e Iesu ua matuā atuatuva i latou ma ua fa'atāua mea a le lalolagi, ma ua pei i latou o malō fa'apaupau latou te tuā'oi, e ola fa'apei e lē o i ai le Atua, Lē o lo'o tausia Āna meaola uma.

(2) E FA'APEI LAVA O MALŌ SA SI'OMIA I LATOU, O Ā MEA SA FA'APUTU E IUTAIA MO LATOU LAVA IA A E SA TATAU ONA LATOU MUĀ'I SA'ILI LE MALŌ FA'ALEAGAGA A LE ATUA?

'Aua tou te tolo'a'i 'oa mo outou i le lalolagi, o i ai le mogamoga ma le 'ele e fa'aumatia ai; o i ai fo'i tagata gāoi e 'eli atu, ma gaoi ai. Mataio 6:19

Mau e tau i ai: Eperu 13:5; Luka 19:11

(3) O FEA NA FETALAI KERISO IA TATOU TU'U FA'AMUAMUA MA AFAI TATOU TE FAIA FA'APEA, O LE Ā LE FOLAFOLAGA E MAFAI ONA TATOU TAPA I AI?

A ia outou muā'i sa'ili le malō o le Atua ma Lana amiotonu; ona fa'aopoopoina atu lea o ia mea uma iā te outou. Mataio 6:33

Mau e tau i ai: Mataio 6:25-32; I Tupu 3:11-13; Ioane 6:27

Na fetalai atu Iesu, "Auā o mea uma ia ua sa'ilia e nu'u o le lalolagi" (Luka 12:30). Ma "O mea uma ia ua sa'ilia e nu'u ese. Auā ua silafia e lo outou Tamā o i le lagi e aogā ia mea uma iā te outou. A ia outou mua'i sa'ili le malō o le Atua ma Lana amiotonu; ona fa'aopoopoina atu lea o ia mea uma iā te outou" (Mataio 6:32, 33). Na 'Ou sau e tatala atu iā te outou le malō o le alofa ma le amiotonu ma le filemū. Ia tatala mai o outou loto e talia lenei malō, ma faia lenei galuega ma mea e sili ona tāua iā te 'oe. E ui lava o se malō fa'aleagaga, a e 'aia e te fefe i fa'apea o le a lē maua mea e te mana'omia e tausi ai 'oe i lenei olaga. Pe a tu'u atu 'oe i le galuega a le Atua, o Ia Lē e Ōna mana uma i le lagi ma le lalolagi, o le a aumaia mea e te mana'omia.

(4) A O TATOU SA'ILI LE MALŌ O LE ATUA, O LE Ā LE 'UPU A PAULO IA FA'AILOA ATU AI PE FA'APEFEA A TATOU AMIO I MEA UMA TATOU TE FAIA?

O mea uma fo'i tou te faia i le tautalatala, po o le amio, ia faia uma lava ia mea i le suafa o le Ali'i o Iesu, ma le fa'afetai i le Atua le Tamā ona o Ia. Kolose 3:17

Mau e tau i ai: Kolose 3:23

E lē o fa'ataga mai e Iesu i tatou ia lē taumafai, a e o lo'o a'oa'o ai ia tatou fa'amamalu o Ia, fa'amulimuli, ma fa'asili i mea uma. Ia tatou lē galulue, lē sa'ili fa'afiafiāga, lē mulimuli i tu'inaanau e fa'afaigatā ai le galuea'iina o Lana amiotonu i o tatou amio ma olaga. So'o se mea tatou te faia ia fai ma le loto atoa, ia pei e faia mo le Atua.

A o afio Iesu i le lalolagi ma Ia fa'aalia le tāua o le soifua i mea uma e ala i le fa'amamaluina o le Atua i luma o tagata, ma le gaua'i i le finagalo o Lona Tamā. Pe a tatou mulimuli i Lana fa'ata'ita'i, o Lana ta'utinoga iā i tatou, e "fa'aopoopoina atu

lea" (Mataio 6:33) o ia mea uma e mana'omia i lenei olaga. O le mativa po o le mau'oa, o le ma'i po o le soifua malōlōina, faigofie po o le poto - o nei mea uma e aumaia i le folafolaga o Lona alofa mutimutivale.

(5) O Ā FILIFILIGA FA'APITOA E TOLU E MAFAI ONA TATOU FAIA O LE A FA'ATAGA AI ONA TA'ITA'I E LE ATUA O TATOU ALA UMA A O TATOU SA'ILI LE MALŌ O LE LAGI?

*Ia e fa'atuatua ia Ieova ma lou loto atoa; a e 'aia le fa'alagolago i lou lava atamai. Ia e manatua o Ia i ōu ala uma, ona fa'atonuina ai lea e Ia lava ōu ala. **Fa'ata'oto 3:5-6***

Mau e tau i ai: Fa'ata'oto 3:1-35; Salamo 37:5-7; 62:8; 115:11; 146:3-9

E si'osi'omia e le 'a'ao e fa'avavau o le Atua le agaga e liliu atu iā te Ia mo le fesoasoani, e ui lava o lea agaga e vaivai. E fa'aumatia mea tāua o atumauga, a e o le agaga e ola mo le Atua o le a fa'atasi pea ma Ia. "O le a mavae atu fo'i le lalolagi, atoa ma lona tu'inaanau, a o lē fai le finagalo o le Atua, e tumau lea e fa'avavau" (I Ioane 2:17).

O le a tatala mai faitoto'a fa'a-auro o le 'a'ai o le Atua e talia o ia lē na a'oa'oina a o i le lalolagi e fa'alagolago i le Atua mo le ta'ita'iga ma le poto, mo le fa'amafanafanaga ma le fa'amoemoe, e ui ina mafatia ma ua lē iloa. O le a fa'afeilo'ai ia e pesega a agelu, ma o le a fua mai le la'au o le ola mo ia. "Auā e mavae atu o atu mauga, e lūlūina fo'i mauga; a o Lo'u alofa e lē mavae atu lea nai iā te 'oe, ma La'u feagaiga e manuia ai e lē lūlūina lea, ua fetalai mai ai Ieova o Lē alofa iā te 'oe" (Isaia 54:10).

(6) PE A TATOU FA'ATUATUA I LE ATUA MA MUĀ'I SA'ILI LONA MALŌ, O LE Ā LE MEA NA FETALAI MAI KERISO IA TATOU LĒ FAIA E FA'ATATAU I A TAEAO?

*O lenei, 'aia tou te popole i le aso a taeao; auā e popole le aso a taeao i ana lava mea. E tataui i le aso lona lava leaga. **Mataio 6:34***

Mau e tau i ai: Mataio 6:25; Salamo 104

Pe a ua e tu'u 'oe lava i le Atua, ia faia Lana galuega, e leai se mea e tataui ona e popole ai mo taeao. O 'oe le 'au'auna a Lē e silafia le i'uga mai le amataga. O mea e tutupu a raeao, o lo'o lilo mai lau va'ai, a e o lo'o matala atu i fofoga o Ia Lē e Silisili 'ese.

(7) O LE Ā LE VALA'AU E LUA ŌNA VAEGA MA LE FOLAFOLAGA NA TU'U MAI E KERISO IĀ I LATOU O Ē O LO'O MAFATIA I 'AVEGA MAMAFI O AIĀ O LENEI LALOLAGI?

*Ia outou ō mai iā te A'u, o outou uma o ē tigāina ma mafatia i 'avega, o A'u fo'i e malōlō ai outou. Ia outou amoina La'u amo, ma ia outou fa'aa'oa'oa o ia te A'u, auā o A'u lē agamalū ma le loto maulalo; ona maua lea e outou o le malōlōga mo outou agaga. Auā e 'avegofie La'u amo, o La'u 'avega fo'i e māmā ia. **Mataio 11:28-30***

Mau e tau i ai: Salamo 116:7; Eperu 4:1

Pe a tatou tau'ave i o tatou lava lima ia fa'ataunu'u mea e tataui ona faia, ma fa'alagolago ia manuia ona o lo tatou lava poto, ua tatou 'ave le 'avega e le'i tu'u maia e le Atua iā i tatou ma ua taumafai e tau'ave a e leai Sana fesoasoani. Ua tatou 'ave i o tatou lava luga le tiute tau'ave a le Atua, ma o lea ua tu'u i tatou lava i Lona afio'aga. Ona tatou maua lea o le popole ma taupule i faigatā ma tigā e o'o mai, auā e mautinoa o ia mea o le a pa'ū i o tatou luga. Peita'i pe a tatou matuā talitonu e alofa le Atua iā i tatou ma e finagalo ia faia mea lelei mo i tatou, o le a tatou lē toe popole e fa'atatau i le lumana'i. O le a tatou fa'atuatua i le Atua e pei ona talitonu le tamaitiiti i le mātua alofa. O le a te'a'ese a tatou fa'afitauli ma mea e fa'atigā mai, ona o tatou loto o le a natia i le finagalo o le Atua.

(8) O LE Ā LE FOLAFOLAGA E MAFAI ONA TATOU TAPA I AI, E LĒ NA O MANA'OGA O LE TATOU OLA FA'ALETINO O ASO TA'ITASI, A E SILI ATU FO'I LE TĀUA O MEA E MANA'OMIA O TATOU OLA FA'ALEAGAGA?

*O le alofa o Ieova ua lē fa'aumatia ai i tatou, ona ua lē mavae o Lona alofa mutimutivale; e fou mai Ia i taeao uma; e tele Lou fa'amaoni. **Auēga 3:22-23***

Mau e tau i ai: Eperu 10:23; Isaia 33:2; Salamo 103:4, 11, 17

E le'i folafola mai e Keriso se fesoasoani ia tau'ave ai i le asō 'avega o lle aso a taeao. Ua fetalai mai o Ia, "O Lo'u nei alofa tunoa e lava lea e fesoasoani iā te 'oe" (II Korinito 12:9); a e pei ona tu'uina mai le manai i le vaomatua, e aumai Lona alofa tunoa i aso ta'itasi, mo mea e mana'omia mo lea aso. E fa'apei o le to'atele o Isara'elu a o latou i ai i le olaga o tagata femalagaa'i, atonu o le a tatou maua i taeao ta'itasi le areto o le lagi e mana'omia mo le aso.

(9) ONA O IA E TAUSIA I TATOU, O LE Ā LE MEA O LO'O VALA'AU MAI LE ALI'I IA TATOU FAIA I ASO TA'ITASI?

Ia tu'uina atu ia te Ia mea uma tou te popole ai, auā o lo'o manatu mai o Ia iā te outou. I Peteru 5:7

Mau e tau i ai: Salamo 55:22; 56:3, 4; 37:5

E na o le tasi lava le aso mo i tatou, ma e tataua ona tatou ola mo le Atua i lea aso. Auā o lenei aso e tasi e tataua ona tatou tu'u atu i 'a'ao o Keriso, i le 'au'aunaga, o tatou fuafuāga ma fa'amoemoe uma, ma ia lafo mea uma e tatou te popole ai i Ōna luga, ona o lo'o manatu o Ia iā i tatou. "Auā o A'u nei, ua 'Ou iloa manatu ua 'Ou manatu ai iā te outou, o manatu i le manuia, a e lē o le malaia, o lo'o fetalai mai ai Ieova, e foa'iina atu iā te outou le i'uga e i ai le fa'amoemoe" (Jeremia 29:11). Ma "O le liliu mai ma le filemū e fa'aolaina ai outou, o le filemū ma le fa'atuatua o lo outou malosi lea" (Isaia 30:15).

(10) PE A TATOU TU'U IĀ KERISO I ASO UMA MEA TATOU TE POPOLE AI MA SA'ILI LONA MALŌ, O LE Ā LE FOLAFOLAGA E MAFAI ONA TATOU TAPA I AI?

'Aua ne'i popole outou i se mea e tasi, a ia fa'a'ailoa atu o outou mana'o i mea uma lava i le Atua, i le tatalo, ma le fa'atoga, atoa ma le fa'afetai. O le manuia fo'i mai le Atua, o lo'o silisili lava i mea uma e manatu i ai, e leoleoina ai o outou loto atoa ma o outou mafaufau iā Keriso Iesu. Filipi 4:6, 7

Mau e tau i ai: Salamo 29:11; 62:8; 55:17

Pe afai o le a e sa'ili le Ali'i ma liua 'oe i aso ta'itasi; afai o le a filifili lava 'oe fa'aleagaga ia sa'oloto ma fiafia i le Atua; pe ana fai e malie i ai lou loto i Lana vala'au alofa ia e sau ma tau'ave le amo a Keriso, - le amo o le ususita'i ma le 'au'aunaga, - o le a fa'afilemūina āu muimuiga, o le a 'ave'esea ōu faigatā uma, o fa'afitauli o lo'o fetaia'i ma 'oe o le a fa'aleleia.

'Ou te filifili e fa'atuatua i le Atua ma lo'u loto atoa, ia lē fa'alagolago i lo'u lava malamalama, ma i o'u ala uma ia 'ou fa'a'ailoa o lo'o fa'atasi ai Ia ina ia mafai ai ona Ia galue i lo'u olaga ma ta'ita'i i o'u ala uma.

Li'o le Tali: **Ioe** **Lē Mautonu**

'Ou te filifili ina ia 'ou lē fefe e fa'atatau i le humana'i, ia sa'ili le malō o le Atua i aso ta'itasi, ma e ala i le fa'atuatua ia tu'u lo'u ola i Ōna 'a'ao. Fa'afetai Tamā mo mea o lo'o o'u mana'omia i aso ta'itasi ma Lau ta'ita'iina o a'u i Lou malō.

Li'o le Tali: **Ioe** **Lē Mautonu**

Manatu o Su'esu'ega

Tatalo Mana'omia

Tali o Tatalo

O le Tatalo a Le Ali'i

Lesona 28

E fa'avae lenei lesona i luga o le Mataio 6:9.

"O lenei, ia fa'apea ona outou tatalo..." (Mataio 6:9).

O le tatalo a le Ali'i e fa'alua ona tu'uina mai e lo tatou Fa'aola, na muamua i le motu o tagata i le Lauga i luga o le Mauga, ma toe faia fo'i ina ua mavae ni nai masina, i le 'au so'o. Na le'i fa'atasi le 'au so'o ma lo latou Ali'i i se taimi pu'upu'u, ma ina ua toe fo'i mai na latou maua o Ia a o Ia feso'ota'i ma le Atua. Ua foliga na te le'i silafia lo latou fa'atasi atu, a o Ia fa'aauau pea Lana tatalo. O fofoga o le Fa'aola na pupula i le malamalama fa'alelagi. Na pei o lo'o Ia fa'atasi i luma o Lē e lē mava'aia, ma sa i ai le mana i Āna 'upu e pei o se tasi o lo'o talanoa ma le Atua.

(1) INA UA MAVAE LE MOLIMAUINA O LE FESO'OTAGA MATAGOFIE A KERISO MA LONA TAMĀ I LE LAGI, MA VA'AIA LE FILEMŪ MA LE MANA NA IA MAUA I LONA SOIFUĀGA, O LE Ā SE MANA'OGA NA FA'AILOA E LE 'AU SO'O?

*Ona fai mai lea iā te Ia o le tasi o Lona 'au so'o, Le Ali'i e, ia e a'oa'o mai iā te i matou i tatalo; e fa'apei o Ioane fo'i ona a'oa'o i ōna so'o. **Luka 11:1***

O loto o le 'au so'o na fa'alogologo ua matuā fa'agaē'etia. Sa latou matauina le tele o taimi e masani ona Ia fa'aaluina le tele o itulā i le la mafutaga ma Lona Tamā. O Ōna aso sa fa'aaogaina i le 'au'aunaga i le motu o tagata na vevesi atu iā te Ia, ma fa'aalia ai le taufa'asesē ma le fa'alata o le 'au a'oa'o. O lenei galuega e faifai pea ua masani ona i'u ai ina matuā mafatia ma vaivai ai, ma ua manatu ai Lona tinā ma Ōna uso, e o'o fo'i i Lona 'au so'o ua latou fefefe ai ina ne'i afāina ai Lona soifua.

Peita'i a o Ia fo'i mai le tele o itulā tatalo ma tapunia ai le aso o galuega mamafa, na latou matauina le va'aiga filemū i Ōna fofoga, o le lagona o le fa'afouina ua pei na fa'atumulia ai o Ia. O itulā na fa'aalu e mafuta ai ma Lona Tamā na Ia maliu mai ai i taeao ta'itasi, ina ia aumai le malamalama o le lagi i tagata. Na ō mai le 'au so'o ina ia fa'afeso'ota'i itulā na Ia tatalo ai ma le malosi o Āna fetalaiga ma Āna galuega. I lenei taimi, a o latou fa'alogologo i Āna fa'atoga, na maofa ma ua fa'amaulaloina o latou loto. Ina ua fa'ai'uina Lana tatalo, na 'o'otia o latou loto ma iloa ai le matuā loloto o o latou mana'oga, na latou fa'apea atu ai, "Le Ali'i e, ia e a'oa'o mai iā te i matou ia tatalo" (Luka 11:1).

(2) O LE Ā LE TALI A IESU I LE MOTU O TAGATA I LANA LAUGA I LUGA O LE MAUGA FA'APEA MA LE TALOSAGA A LE 'AU SO'O?

*O lenei, ia fa'apea outou ona tatalo, Lo matou Tamā e, o i le lagi, ia pa'ia Lou suafa. **Mataio 6:9***

Mau e tau ia i: Luka 11:1; Mataio 6:6

E le'i tu'uina atu e Iesu iā i latou se itu'aiga tatalo fou. O le mea na Ia a'oa'o iā i latou muamua na Ia toe tu'uina atu, e pei ua Ia toe fa'apea atu, E mana'omia ona tou malamalama i lea na 'Ou tu'u atu muamua. O le loloto o le uiga e tou te le'i maua.

O le Fa'aola e le'i fa'apea ua Ia fa'atapula'a ia tatou fa'aaogā na o 'upu ua tu'uina mai. E pei ona tasi o Ia ma le fanau a tagata, ua Ia tu'uina mai lava Lana Ia fa'ata'ita'iga o le tatalo, 'upu e faigofie e mafai lava ona fa'aaogā e le tamaitiiti, peita'i e lautele ma o le uiga loloto e lē mafai ona malamalama ato'atoa i ai ē mafaufau aupito mauualuluga.

(3) O Ā VAEGA TĀUA E TOLU O LE TATALO NA A'OA'O E KERISO I LE LAUGA I LE MAUGA, I LE TATALO A LE ALI'I, MULIMULI ANE SA FAIA E PAULO I TAGATA O FILIPI?

*'Aua ne'i popole outou i se mea e tasi, a ia fa'ailoa atu o outou mana'o i mea uma lava i le Atua, i le tatalo, ma le fa'atoga, atoa ma le fa'afetai. **Filipi 4:6***

Mau e tau i ai: Efeso 5:20; Kolose 4:2; 3:15, 17; I Tesalonia 5:17, 18; Salamo 51

Ua a'oa'oina i tatou ia ō atu i le Atua ma le fa'afetai, ma fa'ailoa o tatou mana'oga, ia fa'aali a tatou agasala, ma ōle atu mo Lona alofa tunoa e tusa ai ma Āna folafolaga.

(4) O LE Ā LE SUAFA NA A'OA'O ATU E KERISO O LE A I AI LE AVANOA TATOU TE FA'AAOGĀ I LE ATUA?

Pe a outou tatalo, ia outou fai atu, Lo matou Tamā e o i le lagi, ia pa'ia Lou suafa. Luka 11:2

Mau e tau i ai: I Ioane 3:1, 2; Roma 8:15; Mataio 6:9; Kalatia 4:6

Ua a'oa'o tatou ia ta'ua Lona Tamā o lo tatou Tamā. E lē masiasi o Ia e ta'ua tatou o Ōna uso (Eperu 2:11). E sauni, e naunau, o le finagalo lea o le Fa'aola e talia fialia tatou o totino le aiga o le Atua, o lea la o ulua'i 'upu tatou te fa'aaogā a o fa'alatalata atu i le Atua ua Ia tu'u mai ai le mautinoaga o lo tatou feso'ota'iga fa'alelagi, "Lo matou Tamā."

(5) A O LE'I TU'UINA ATU LONA SOIFUA E TOGIOLA AI TATOU, O LE Ā LE TATALO A IESU NA FA'AILOA MAI AI LO TATOU MAUTINOĀGA O LENEI FESO'OTA'IGA FA'ALE-ATUA A LE TAMĀ MA LE ĀLO?

Na e 'auina mai A'u, ma e alofa mai iā te i latou, fa'apei ona e alofa mai iā te A'u. Ioane 17:23

Mau e tau i ai: Ioane 1:12; Jeremia 3:19; Hosea 1:10; I Ioane 1:3

O le folafolaga lenei o le 'upu moni matagofie, e tumu i le fa'amalosi'au ma le fa'amafanafanaga o le Atua alofa iā i tatou e pei ona Ia alofa i Lona Ālo. O le mea lea na fetalai atu ai Iesu i Lana tatalo mulimuli mo Lona a'u so'o, "ma e alofa mai ia te i latou, fa'apei ona e alofa mai iā te A'u" Ioane 17:23).

O le lalolagi na maua e Satani ma na pulea ma le sauā tele, a o le Ālo o le Atua, o le mea maoa'e lea e tasi na 'ausia, ua si'omiaina i Lona alofa ma toe fa'afeso'ota'i atu i le nofoāli'i o leova. O kerupi ma serafi, ma 'au e lē mafaitaulia o lalolagi uma e le'i pa'u'ū, ua pepese i vi'iga o le Atua ma le Tama'i Mamoe ina ua mautinoa le manumalo. Na latou oli'oli i le auala o le fa'aolataga na tatalaina i le fanau a tagata ua pa'ū ma o le lalolagi o le a togiolaina mai le fetu'u o le agasala. E lē sili atu ea fo'i ona matuā oli'oli i latou o ē ua fa'aolaina o lenei alofa ofoofogia!

(6) O LE TAMĀ MA LE ĀLO E LĒ FA'AMALOSIA I TATOU, A E AFAI TATOU TE FILIFILI E TALIA I LA'UA, O LE Ā LE IGOA FA'AMANUIAINA O LE A TATOU MAUA?

A o i latou uma ē na talia o Ia, ma fa'atuatua i Lona suafa, na Ia avatu i ai o lea manuia, ia 'avea i latou ma fanau a le Atua. Ioane 1:12

Mau e tau i ai: Mataio 10:40; Isaia 56:5; Kalatia 3:26; 4:6

E fa'aapefa ona iā i tatou le masalosalo ma le lē mautonu pea, ma lagona o tatou e mātua oti? Ona o i latou ia o ē na solia le tulafono ua 'aveina ai e Iesu le itū tagata; na 'avea o Ia e pei o i tatou, ina ia tatou maua le filemū ma le mautinoāga. E i ai lo tatou Fautua i le lagi, ma so'o se tasi e talia o Ia e 'avea ma Fa'aola e lē tu'ua ia o se mātua oti e tau'ave le avega o ana ia lava agasala.

(7) AFAI TATOU TE FILIFILI E TOE FA'ATASI I LE AIGA O LE ATUA, O LE Ā LE FA'AMANUIĀGA UA FOLAFOLAINA MO I TATOU?

Ia i'u i le tofi e lē pala, e leai se leaga o i ai, e lē mamae lava, o lo'o teu i le lagi mo i tatou. I Peteru 1:4

Mau e tau i ai: Mataio 25:34; Galuega 20:32; Kolose 1:12

"Le 'au pele e, o le fanau i tatou a le Atua...a e le'i fa'aalia mai nei le uiga o i tatou a amulī; a ua tatou iloa, pe a fa'aali mai o Ia, ona foliga ai lea o i tatou iā te Ia, auā tatou te iloa tino ai lava o Ia" (I Ioane 3:2). Ma "Afai fo'i o fanau i tatou, o suli fo'i, o suli lava o le Atua, o suli fa'atasi ma Keriso; pe afai tatou te tigā fa'atasi ma Ia, ina ia fa'amanuiaina fo'i i tatou fa'atasi ma Ia" (Roma 8:17).

(8) O LE Ā LE MEA E FAIA MUAMUA E LE ATUA MO II TATOU INA IA I AI LE NAUNAU MA LE LOTOTELE E FA'ALATALATA ATU AI IĀ TE IA?

E lē mafai se tasi ona sau iā te A'u, pe a lē tosina mai e le Tamā ua 'auina mai A'u. Ioane 6:44

Mau e tau i ai: Ioane 12:32; Ieremia 31:3; Hosea 11:4; Efeso 2:4, 5

O le la'asaga muamua o le fa'alatalata i le Atua o le iloa ma talitonu i Lona alofa iā i tatou (I Ioane 4:6); auā e ala i le tosina e Lona alofa e mafai ai ona ta'ita'i i tatou ia ō atu iā te Ia.

(9) ONA O FANAU A LE ATUA, MO AI O LE A IA TU'UINA I O TATOU LOTO IA TATOU TATALO?

Ia fefa'aalia'i a outou agasala, ma tatalo le tasi mo le tasi, ina ia fa'amalōlōina outou. Ua aogā tele le tatalo fa'atauānau a le tagata amiotonu. Iakopo 5:16

Mau e tau i ai: Kolose 1:9; Mataio 5:44; 9:38; 15:22; I Ioane 5:15, 16; I Timoteo 2:1, 2

O le iloa o le alofa o le Atua e galue ia tete'e ai i le alofa fa'apito. O le vala'auina o le Atua o lo tatou Tamā, ua tatou iloa ai o o tatou uso uma Lana fanau. O tatou uma o se vaega o le tu'ufa'atasia o le fanau a tagata, o tagata totino o le aiga e tasi. I a tatou fa'atoga tatou te aofia ai ō tatou tuā'oi fa'apea fo'i tatou lava. E leai se tasi e tatalo e sa'ili se fa'amanuiāga mo na o ia lava.

(10) O LE Ā LE FOLAFOLAGA MATAGOFIE O MAFAI ONA TATOU MAUA PE A TATOU FA'ALATALATA I LE NOFOĀLI'I O LO TATOU TAMĀ I LE LAGI I LE TATALO?

O lenei fo'i le fa'amalosi ua tatou maua i Ōna luma, pe afai tatou te ole atu ai se mea e tusa ma Lona finagalo, e fa'afofoga mai o Ia iā te i tatou. Afai fo'i ua tatou iloa, e fa'afofoga mai o Ia ia te i tatou e se mea tatou te fa'atoga atu ai, ua tatou iloa e maua e i tatou mea tatou te fa'atoga atu ai iā te Ia. I Ioane 5:14, 15

Mau e tau i ai: Salamo 145:18; I Ioane 3:22; Ieremia 29:12, 13; Mataio 7:7-11

O le Atua e leai se gata'aga, na fetalai ai Iesu, e fai ma ōu avanoa e fa'alatalata atu iā te IA i le suafa o le Tamā. Ia malamalama o mea uma e fa'ailoa mai. E leai se mātua fa'alelalolagi e sili atu lana ōle fa'atauānau i se tasi o le fanau ua sesē na i lo o le ōle a Lē na faia 'oe, i lē ua solitulafono. E leai se tagata alofa na tuli tatao se tasi e lē salamō ma le vala'au alofa. E afio le Atua i fale uma; e fa'afofoga Ia i 'upu uma e lafo, e fa'afofoga i tatalo uma ua faia, e lagona fa'anoanoāga ma mo'omo'oga ua lē taulau o agaga uma ta'ito'atasi. e silafia le faiga e tu'uina atu i tamā, tinā, uso, uō, ma tuā'oi. Na te silafia mea tatou te mana'omia, ma o Lona alofa ma Lona alofa tunoa ma le agalelei e fa'aauau pea ona tafe mai e fa'amalieina ai o tatou agaga.

(11) O LE Ā LE TALI MASANI A LE LOTO O LĒ UA TALIA LE TOSINA A LE ATUA?

Ia e fa'atuatua iā Ieova ma lou loto atoa; a e 'aua le fa'alagolago i lou lava atamai. Ia e manatua o Ia i ōu ala uma, ona fa'atonuina ai lea e Ia lava ōu ala. Fa'ata'oto 3:5-6

Mau e tau i ai: Fa'ata'oto 16:3; 23:17

A e afai tou te vala'au i lo outou Tamā ma ta'u atu o outou Lana fanau, ina ia ta'ita'i e Lona poto ma ia usiusita'i i mea uma lava, ma ua iloa o Lona alofa e lē masuia. O le a e talia Āna fuafuāga mo lou olaga. Ona o le fanau a le Atua, o le a e taofi i Lona mamalu, o Lana amio, o Lona aiga, Lana galuega, o mea e aupito tāua ia iā te outou. O se mea e aupito oli'oli ai i lou iloa ma fa'atāuaina lou vā feagai ai ma lou Tamā ma totino uma o Lona aiga. O le a e fiasia e faia so'o se gaoioiga, po o le ā lava le fa'atauva'a, e mata o le a vi'ia ai Lona mamalu po o le lelei fo'i o se tasi o lou aiga.

(12) O FEA NA FA'AMATALA MAI E IESU O LO'O I AI LE AFIO'AGA A LE ATUA?

Lo matou Tamā e o i le lagi. Luka 11:2

O Ia o lo'o vala'aulia e Keriso ia tatou va'ai atu i ai ma ta'u o "Lo matou Tamā," "o i le lagi lava Ia; ua faia e Ia o mea uma ua Ia finagalo i ai" (Salamo 115:3). O Lana tausiga e mafai ona tatou malōlō saogalemū ai, i le ua fa'apea mai, "O le aso 'ou te mata'u ai, 'ou te fa'atuatua ai iā te 'Oe" (Salamo 56:3).

(13) O Ā 'UPU FA'AALOALO TATOU TE TA'UA AI LE SUAFA O LE TAMĀ?

O lenei, ia fa'aapea outou ona tatalo, Lo matou Tamā e, o i le lagi, ia pa'ia Lou suafa. Mataio 6:9

Mau e tau i ai: Salamo 111:9; Ne'emias 9:5

O le fa'apa'iaina o le suafa o le Ali'i e mana'omia 'upu tatou te tautala e fa'ataui i le Silisili 'Ese ina ia fa'aaogā ma le āva. "E pa'ia ma le mata'utia Lona suafa" (Salamo 111:9). E lē tatau i so'o se ala ona manatu māmā le suafa po o mea tau i le Atua. O le tatalo e tatou te ulufale atu ai i luma o le afio'aga o Lē Silisili 'Ese; ma e ao ina tatou ō atu i Ōna luma ma le āva ma le fa'aaloalo e tatau ai. O agelu e latou te ufiufi o latou mata i Ōna luma. O le kerupi ma le serafi e pupula ma pa'ia e fa'alatalata atu i Lona nofoāli'i ma le matuā fa'aaloalo e tatau ai. E lē tatau ea la iā i tatou, o tagata agasala ona ō atu ma le āva ma le fa'aaloalo e tatau ai i luma o le Ali'i, o Lē na faia i tatou? A e o le fa'apa'iaina o le suafa o le Ali'i e sili atu nai lo lenei mea.

(14) ONA O TATOU O KERISIANO O LO'O TAU'AVE LE SUAFA O KERISO, O LE Ā LE MEA E TATAU ONA TATOU FA'AETEETE IA 'AUA TATOU TE FAIA?

'Aua e te ta'u fua le suafa o Ieova lou Atua; auā e lē fa'asaoina e Ieova o lē ta'u fua i Lona suafa. Esoto 20:7

Mau e tau i ai: Teuterenome 5:11

Atonu o tatou, e pei fo'i o Iutaia i aso o Iesu, e aliali mai i fafo le matuā fa'aaloalo i le Atua, a e peita'i e fa'alausoso'o ona ta'u fua Lona suafa. "O le suafa o Ieova" o Ia e " alofa mutimutivale ma le alofa fua, e telegese Lona to'asā, a e tele le alofa ma le fa'amaoni... o Lē fa'amagalo fo'i i le amiolētonu ma le solitulafono ma le agasala" (Esoto 34:5-7). O lo'o tusia e fa'ataui i le tapuā'iga a Keriso, "O le igoa fo'i lenei e ta'ua ai o Ia, O IEOVA LA TATOU AMIOTONU" (Jeremia 33:16). O le suafa lenei e tau'ave e i latou uma ta'ito'atasi o ē mulimuli iā Keriso. O le tofi lea o le atali'i o le Atua. O le aiga e ta'ua i le suafa o le Tamā. O le perofeta o Jeremia, i le taimi o puapuagā ma le atuatuvaale o Isara'elu, na tatalo ai, "Ua ta'ua i matou i Lou suafa; 'aua e te tu'ua i matou" (Jeremia 14:9).

(15) PE AFAI TATOU TE TAU'AVE LE SUAFA O LE ALI'I, O AI TATOU I LE LALOLAGI, AUĀ E LĒ O TUSIA I SE VAITUSI A E O LE AGAGA O LE ATUA SOIFUA?

O outou o la matou tusi, o tusia i o matou nei loto, ua iloa ma faitaulia e tagata uma. O lo'o fa'aalia outou, o outou o le tusi a Keriso ua saunia e i matou, e le'i tusia i le vaitusi, a o le Agaga o le Atua soifua; ua lē tusia i papatusi ma'a, a o papatusi 'a'ano o le loto. II Korinito 3:2-3

Mau e tau i ai: Roma 1:8; I Korinito 10:31; 6:19, 20

O le suafa lenei e fa'apa'iaina e agelu o le lagi, ma ē nonofo i lalolagi e le'i agasala. A tatou tatalo, "Ia pa'ia Lou suafa," ua e ōle atu ia pa'ia i lenei lalolagi, ia pa'ia iā te 'oe. Ua Ia fa'a'ailoa 'oe i luma o tagata ma agelu, o 'oe Lona atali'i; tatalo ina ia 'aua ne'i 'upu leagaina "le suafa lelei ua igoa a'i outou" (Iakopo 2:7).

Ua 'auina outou e le Atua o Ōna sui i le lalolagi. I gaoioiga uma o le olaga ia outou fa'a'ailoa atu le suafa o le Atua. O lenei olaga o lo'o vala'auina 'oe ia maua Lana amio. E lē mafai ona fa'apa'iaina Lona suafa, e lē mafai ona 'avea 'oe ma sui i le lalolagi vaganā i le olaga ma le amio e te sui i le soifuāga ma le amio a le Atua. O lou talia o le alofa tunoa ma le amiotonu a Keriso, ona pau lenā o le auala e te mafai ai.

(16) PE A PUPULA O TATOU MATA FA'ALEAGAGA I LE MATA'UTIA O LE AGASALA, O LE Ā LA TATOU TATALO E PULEA AI A TATOU GAOIOIGA E FA'ATATAU I LE MALŌ O LE ATUA?

Ia o'o mai Lou malō. Ia faia Lou finagalo i le lalolagi, e pei ona faia i le lagi. Mataio 6:10

Mau e tau i ai: Mareko 11:10; Tanielu 2:44

O le Atua lo tatou Tamā, o Lē alofa ma tausii iā i tatou Lana fanau; o Ia fo'i le Tupu o le atulaulau. O mea e fa'atāua i Lona malō o mea fo'i ia tatou te fa'atāua; ma e ao ina tatou galulue mo lona atina'e.

O le 'au so'o o Keriso na latou tulimata'i mo le o'o vave mai o le malō o Lona mamalu, a o le tu'uina atu iā i latou o lenei tatalo ua a'oa'o atu ai e Iesu o le malō e le'i o'o i le taimi e fa'atū ai. E ao ina latou tatalo mo lona o'o mai o se mea e tupu a e o i lumana'i. Peita'i o lenei talosaga ua o se folafolaga mo i latou. E ui ina latou te lē va'aia le o'o mai o le malō i lo latou taimi, o le mea moni na fetalai atu ai Iesu ia latou tatalo auā o le fa'amaoniga e o'o mai lava i le taimi a le Atua.

(17) I LE TAIMI O LE AFIO FA'ALUA MAI, O LE A FA'ATŪINA LE MALŌ O LE ATUA I LE LALOLAGI, A E MO I TATOU O LE A AOFIA AI, O FEA E TATAU ONA MUĀ'I FA'AVAEINA AI?

*Fa'auta, ua i ai lava ia te outou le malō o le Atua. **Luka 17:21***

Mau e tau i ai: Mataio 12:28; mareko 10:14, 15; Luka 11:20

O le malō o le alofa tunoa o le Atua o lo'o fa'atūina nei, o lea aso ma lea aso o agaga na fa'atumulia i le agasala ma le fouvale ua tu'uina atu i le pule o Lona alofa. Peita'i o le fa'amautūina o le malō o le Atua o Lona mamalu e le'i o'o mai se'iloga ua afio fa'alua mai Iesu i le lalolagi. "O le malō, ma le pule, atoa ma le mamalu o le malō i lalo ifo o le lagi uma, e tu'uina atu ia i le nu'u o le 'au pa'ia a Lē Silisili 'Ese" (Tanielu 7:27). E fai mo latou tofi le malō ua saunia mo latou "a o le'i fa'avaeina le lalolagi" (Mataio 25:34). Ma o le a 'aveina e Keriso Lona Ia lava mana ma o le a Ia nofotupu.

(18) O Ā FA'AMANUIĀGA FA'ALE-ATUA E TOLU O LE A MOLIMAUINA PE A I TOTONU O I TATOU LE MALŌ O LE ATUA?

*O le malō o le Atua, e lē o mea e 'ai ma mea e inu; a o le amiotonu, ma le filemū, ma le 'oli'oli i le Agaga Pa'ia. **Roma 14:17***

Mau e tau i ai: I Korinito 6:9-11; 3:16

(19) O LE Ā LE FA'AMANUIĀGA FA'ALETINO O LE A MAUA E FAI MA TOFI A LE FANAU A LE ATUA I SE ASO O LO'O LATA MAI?

*Ona fai atu ai lea o le Tupu i ē o i Lona itū taumatau, Ō mai ia, o outou ua fa'amanuiaina e Lo'u Tamā, ia fai mo outou tofi le malō ua saunia mo outou a o le'i fa'avaeina le lalolagi. **Mataio 25:34***

Mau e tau i ai: II Timoteo 2:12; Iakopo 2:5

O le a toe si'itia i luga faitoto'a o le lagi, ma e fa'atasi ma afe ni afe, e mano ni mano o le 'au pa'ia, o le a afio mai lo tatou Fa'aola o le Tupu o tupu ma le Ali'i o ali'i. O Ieova Emanuel e fai ma "Tupu i le lalolagi uma lava; o lea aso ua na o Ieova ai lava, ma Lona suafa e āu tasi lea" (Sakaria 14:9). Ma o le a "fa'atasi ma tagata le fale fetafa'i o le Atua, e mau fo'i o Ia ma i latou; e fai fo'i i latou Mona nu'u, e ia te i latou le Atua lava, o lo latou Atua ia" (Fa'aaliga 21:3).

(20) ONA O TATOU O TOTINO O LE MALŌ, O LE Ā LE VALO'AGA O LO TATOU AVANOA FA'APITOA E FESOASOANI IA FA'ATAUNU'U MA E MO AI?

*E tala'iina atu fo'i lenei tala lelei o le malō i le atu laulau uma, e fai ma molimau i nu'u uma; ona o'o mai ai lea o le gata'aga. **Mataio 24:14***

Mau e tau i ai: Mataio 10:7

Peita'i a o le'i afio, na fetalai Iesu, "E tala'iina atu fo'i lenei tala lelei o le malō i le atu laulau uma, e fai ma molimau i nu'u uma..." (Mataio 24:14). O Lona malō e lē o'o mai se'ia o'o atu le tala lelei o Lona alofa tunoa i le lalolagi uma. O lea a o tu'u atu tatou lava i le Atua, ma manumalō i isi agaga mo Ia, tatou te mafai ona fa'avaveina le o'o mai o Lona malō.

Na o i latou o ē tu'u atu latou lava i Lana galuega e fa'apea atu, "O a'u lenei, inā 'auina atu a'u" (Isaia 6:8), e fa'apupula mata o ē tauaso, ia liliu mai tagata "mai le pouliuli i le malamalama, mai le pule fo'i a Satani ia liliu i le Atua; latou te maua ai le fa'amagaloina o agasala, ma le tofi fa'atasi ma i latou ua faapaiaina" (Galuega 26:18) - na o i latou ia e tatalo ma le fa'amaoni, "Ia o'o mai Lou malō."

(21) INA UA MAE'A ONA A'OA'OINA TATOU E TATALO IA O'O MAI LE MALŌ O LE ATUA, O LE Ā LA TATOU TATALO E FAI FA'ATATAU I LE FINAGALO O LE ATUA?

*Ia o'o mai lou malō. Ia faia Lou finagalo i le lalolagi, e pei ona faia i le lagi. **Luka 11:2***

Mau e tau i ai: Mataio 6:10

(22) UA FA'APEFEA ONA FA'AILOA MAI IĀ I TATOU E LE ATUA LONA FINAGALO MA TA'IALA O LE LAGI, INA IA PEI O AGELU O LE LAGI, E FIAFIA E 'AU'AUNA IĀ TE IA MAI LE ALOFA?

*Ia e mata'u iā Ieova lou Atua, e te tausiusi ai i Āna tulafono ma Āna poloa'iga uma 'Ou te fai atu ai ia te 'oe, o 'oe, ma lou atali'i, ma le atali'i o lou atali'i i aso uma o lou olaga, ina ia fa'alevavevaina ai ōu aso. O lenei, Isara'elu e, ia e fa'alologologo mai, ma ia e tausi i ai ia faia, ina ia manuia ai 'oe, ma ia matuā fa'ato'ateleina ai outou, fa'apei ona fetalai mai ai ia te 'oe o Ieova le Atua o ōu tamā, i le nu'u o lo'o tafe ai le suāsusu ma le meli. **Teuterenome 6:2, 3***

Mau e tau i ai: Teuterenome 6:3-18; Iakopo 1:21-27; 2:16; Roma 2:13

O le finagalo o le Atua o lo'o fa'ailoa i Āna fa'atonuga o Lana tulafono pa'ia, ma o ta'iala o lenei tulafono o ta'iala ia o le lagi. O agelu o le lagi e leai se isi potō e sili a'e ona maua nai lo le iloa o le finagalo o le Atua, ma o le faia o Lona finagalo o le 'au'aunaga aupito maua lea e mafai ona fa'aaogaina ai lo latou malosi.

A o le lagi, o le 'au'aunaga e lē faia ona o le agaga ua fa'amalosi. Ina ua fouvale Satani e fa'asagatau i le tulafono a Ieova, o le manatu sa i ai se tulafono na o'o mai i agelu e pei o se fa'ate'i i se mea e le'i mafaufau i ai. I la latou galuega o agelu e lē pei o ni 'au'auna, a e o atali'i. Sa ato'atoa le so'ofa'ataasi o i latou ma Lē na faia i latou. O le usiusita'i e lē o se mea faigatā iā i latou. O le alofa i le Atua na fai ai le latou 'au'aunaga ma se fiafiāga. O le mea lea o agaga uma e afio ai Keriso, o le fa'amoemoe o le ola, o Āna fetalai e fa'alogoina pea, "Lo'u Atua e, 'Ou te fiafia e fai Lou finagalo; o lo'o i totonu lava iā te A'u Lau tulafono" (Salamo 40:8).

O le ōlega, "Ia faia Lou finagalo i le lalolagi e pei ona faia i le lagi," o le tatalo mo le fa'ai'uina o le pule a le ti'āpolo i lenei lalolagi, o le agasala e i'u ina fa'aumatia, ma ia fa'avaeina le malō o le amiotonu. Ona fa'ataunu'uina ai lea i le lalolagi e pei ona faia i le lagi, "ma ia fa'a'ato'atoaina e Ia ma le malosi le loto fiafia uma o le agalelei, ma le galuega a le fa'atuatua" (II Tesalonia 1:11).

(23) A O FA'AAUAU E KERISO LA TATOU A'OA'OGA I LE TATALO, MA UA ILOA O LO'O SA'ILI SATANI E FA'AUMATIA LE POGAI O MANUIA A LE FANAU A LE ATUA, O LE Ā LANA FA'AMALOSI'AGA MO I TATOU I LE TATALO?

*Ia e foa'i mai iā te i matou i le aso nei a matou mea e 'ai e tatau ma le aso. **Mataio 6:11***

Mau e tau i ai: Mataio 6:11

O le vaega muamua o le tatalo a Iesu ua a'oa'o tatou e fa'atatau i le suafa ma le malō ma le finagalo o le Atua - e tatau ona fa'amamaluina Lona suafa, ia fa'atūina Lona malō, ma ia faia Lona finagalo. Pe afai e te fa'amamua ona fa'atāua le galuega a le Atua, e mafai ona e ōle atu ma le mautinoa o ōu mana'oga fo'i o le a fa'ataunu'uina. Afai e te fa'afitia 'oe lava ma tu'uina atu 'oe lava iā Keriso, o 'oe o se tasi e totino a le aiga o le Atua, ma o mea uma i le maota o lou Tamā e mo 'oe lea. O mea tāua uma a le Atua e tatalaina iā te 'oe, e aofia ai le lalolagi i le taimi nei ma lea o le a o'o mai. O le 'au'aunaga a agelu, o le meaalofo a Lona Agaga, o le galuega a Āna 'au'auna - e mo 'oe uma lava. O le lalolagi ma mea uma o i ai, e ā 'oe lea pe afai e mo lou lelei. E o'o lava i le fai o 'oe ma fili o ē amioleaga, e 'avea ma fa'amanuiāga ina ia a'oa'oina ai 'oe mo le lagi. Afai "e o Keriso fo'i outou," o "mea uma o ā outou ia" (I Korinito 3:23, 21).

(24) O LE Ā LE FOLAFOLAGA MAI LE AFIGA A LE ATUA E MAFAI ONA TATOU TAOFI I AI MA LE MAUTINO A E FA'ATATAU I O TATOU MANA'OGA I ASO TA'ITASI?

*O outou na o Ōna tagata pa'ia, ia outou matata'u iā Ieova, auā e leai se mea e mativa ai ē ua matata'u ia te Ia. E oge mea leona ta'anoa, ma latou fia 'a'ai; a e e leai se mea lelei e mativa ai i latou o ē sa'ili iā Ieova. **Salamo 34:9, 10***

Mau e tau i ai: Salamo 33:18, 19; Mataio 7:7-11; I Timoteo 6:8; Isaia 33:15, 16

Peita'i o 'oe o se atali'i e le'i o'o i le tulaga e pulea ai lona tofi. E le'i tu'uina atu iā te 'oe lau meatotino tāua, ne'i fa'aseseina 'oe e Satani i āna togafiti potō, e pei ona ia faia iā Atamu ma Eva i Etena. O lo'o tausia e Keriso mo 'oe, e saogalemū ai ia

lē āu i ai le fa'aleaga mea. E pei o le tamaitiiti, e te maua i aso ta'itasi mea e tataua mo mana'oga o le aso. O aso uma ia e tatalo, "Ia foa'i mai iā te i matou mea e 'ai e tataua ma le aso." 'Aua e atuatuva le pe afai e lē lava mo taeao. Ua iā te 'oe le mautinoāga o lea folafolaga, "Ia e fa'atuatua iā Ieova, ma e faia amio lelei; ia e nofo i le nu'u, ma tausisi i le fa'amaoni." Ma fa'apea mai Tavita, "Ua 'ou toea'ina a'u nei, sa a'u taule'ale'a; a 'ou te le'i iloa se tagata amiotonu na lafoa'iina, po o ana fanau ua 'aiisi i latou" (Salamo 37:3, 25).

O le Atua na 'auina oreva e fafaga Elia i le Ālia o Kirita e aofia uma lava tagata ta'ito'atasi e fa'amaoni o Lana fanau. O ia lē savali ma le amiotonu ua fa'apea ona tusia ai, "e foa'iina iā te ia ana mea e 'ai, e tumau pea iā te ia le vai" (Isaia 33:16). "E lē mamā i latou i le aso vale; e ma'o'ona fo'i i latou i ona pō e i ai le oge" (Salamo 37:19). Ma "O Ia lava sa na lē fa'asaoina Lona lava Ālo, a ua tu'uina mai o Ia e sui a'i i tatou uma lava, e lē foa'i fua mai ea e Ia iā te i tatou mea uma lava fa'atasi ma Ia i se ā?" (Roma 8:32).

(25) ONA O TATOU E MULIMULI I LE FA'ATONUGA IA TAU'AVEINA LANA GALUEGA, O LE Ā LA TATOU TALI IĀ I LATOU O Ē PUAPUAGĀTIA I LE FIA 'A'AI?

*E le o lenei ea? ona ia tofitofi āu mea e 'ai i lē ua fia 'ai, ia 'au mai i lou fale ē ua matitiva ma fa'asauāina; a e iloa lē ua lē lavalavā e te fa'aofuina o ia, 'aia fo'i e te lafi ia i latou o lou lava aiga. **Isaia 58:7***

Mau e tau i ai: Salamo 112:9; Iakopo 2:15, 16; I Ioane 3:17, 18; Fa'ata'oto 22:9

O Ia Lē na tau'ave le 'avega ma le popole o lona tinā ua tu'u na o ia na fesoasoani iā te ia i le tausia o le aiga i Nasareta, ma alofa mutimutivale i tinā uma o lo'o taumafai malosi ia maua mea'ai ma lana fanau. O Ia na alofa mutimutivale i le motu o tagata ina ua "lailoa i latou ma tu'ulafoa'iina" (Mataio 9:36), o lo'o alofa mutimutivale pea fo'i i ē mafatia ona o le mativa. O Lona 'a'ao o lo'o 'a'apa atu iā i latou ma fa'amanuiāga; ma i le tatalo tonu lea na tu'uina atu i Ōna so'o, ua a'oa'o ai tatou ia tatou manatua ē matitiva.

(26) O AI LE POGAI O LO'O AUMAIA MEA UMA TATOU TE MAUA?

*E ta'itasi fo'i le tagata ua foa'iina e le Atua iā te ia le tamao'aiga ma le 'olua tele, ma ua foa'i e Ia iā te Ia ia mafai ona 'ai ai; ia fai fo'i lona tofi, ma 'oli'oli i lana galuega; o le mea foa'iina e le Atua lea. **Failauga 5:19***

Mau e tau i ai: Teuterenome 8:17, 18; Salamo 104

Pe a tatou tatalo, "Ia e foa'i mai iā te i matou i le aso nei a matou mea e 'ai," ua tatou fa'atoga fo'i mo isi e aofia ai ma tatou. Ma tatou fa'ailoa fo'i o ā mea e tu'uina mai e le Atua iā i tatou a e lē mo na o i tatou lava. Ua tu'uina mai ma le talitonuga e tatou te fafaga nisi e fia 'a'ai. O Lona agalelei ua saunia fo'i mo ē matitiva (Salamo 68:10). Ma ua Ia fetalai, "Pe a e sauni se faiga'ai, po o se talisuāga, 'aia e te tala'i i āu uō, po o ōu uso, po o tagata o lou aiga, po o tagata mau'oa tou te tuā'o'i....Peita'i o 'oe, pe a e sauni le faiga'ai, inā tala'i ia i ē matitiva, i ē mumutu, i ē pipili, ma ē tauaso; e manuia ai 'oe; auā latou te lē mafaia ona tau mai iā te 'oe; a e tauia 'oe i le toe tutū mai o ē amiotonu" (Luka 14:12-14).

(27) O LE Ā LE I'UGA UA FOLAFOLA MAI PE A TATOU FAIA I LE SUAFA O LE ALI'I, E FA'AMALIEINA AI MANA'OGA O ISI?

*Afai fo'i e te alofa atu i lē ua fia'ai, ma e fafaga ia ma'ona o lē ua tigā; ona alu a'e lea o lou malamalama i le pouliuli, ma lou pogisā e pei o le aoauli ia. E ta'ita'iina fo'i 'oe e lē aunoa e Ieova; e fa'amālie fo'i o Ia iā te 'oe pe a oge vai, ma fa'amalosia ōu ivi; e 'avea fo'i 'oe e pei se fanua ua fa'asūsūina, e pei o le punāvai fo'i e lē mate ōna suāvai. **Isaia 58:10-11***

Mau e tau i ai: Isaia 58:12; Failauga 11:1, 2; Fa'ata'oto 28:27

"E mafai fo'i e le Atua ona fa'afaula'i ia te outou o mea alofa uma; o lo'o fa'alavaina i aso uma o mea uma ia te outou i mea uma lava, ina ia faula'i ia te outou o galuega lelei uma." Ma "O lē ua itiiti ana saito e lūlū, e itiiti fo'i ana e selesese mai; a o lē ua tele ana e lūlū, e tele fo'i ana e selesese mai" (II Korinito 9:8, 6).

(28) MO LE Ā LE ISI ITU'AIGA "MEA 'AI" E AO ONA TATOU TATALO FA'ATAUĀNAU AI, E TA'ITA'I AI I LE OLA E FA'AVAVAU?

O A'u le areto ola na alu ifo mai le lagi; pe a 'ai se tasi i lenei areto ona ola ai lea o ia e fa'avavau. O le areto fo'i 'Ou te avatua, o Lo'u tino lea, 'Ou te avatua ma ola o le lalolagi. Ioane 6:51

Mau e tau i ai: Ioane 6:32, 33, 50, 54-58

O le tatalo mo mea e 'ai i aso ta'itasi e lē na o mea'ai e tausi ai le tino, a e o le mea e 'ai fa'aleagagag e fafagaina ai le agaga e o'o i le ola e fa'avavau. Ua fa'ailoa mai e Iesu iā te i tatou, "'Aua tou te galulue i mea e 'ai e pala, a o mea e 'ai e tumau i le ola e fa'avavau" (Ioane 6:27). Ma na toe fetalai fo'i, "O A'u le areto ola na alu ifo mai le lagi; pe a 'ai se tasi i lenei areto ona ola ai lea o ia e fa'avavau" (Verse.51). O lo tatou Fa'aola o le areto o le ola, ma e ala i le tatou va'a'ia o Lona alofa, ma talia i totonu o o tatou loto, ona fafagaina ai lea o i tatou i le areto na afio mai le lagi.

(29) O LE Ā LE ISI SUAFA O IESU, LE POGAI O LA TATOU "ARETO OLA" O ASO TA'ITASI?

Sa i le amataga, le Lokou, sa i le Atua le Lokou, o le Atua fo'i le Lokou. O Ia lava sa i le Atua i le amataga. Ioane 1:1-2

Mau e tau i ai: Ieremia 15:16; Ioane 1:14; I Ioane 5:7

Tatou te talia Keriso e ala i Lana afioga, ma o le a tu'uina mai le Agaga Pa'ia e tatala ai le afioga a le Atua mo lo tatou malamalamaga, ma aumai ai ōna 'upu moni i o tatou loto. E ao ina tatou tatalo i aso ta'itasi a o tatou faitauina Lana afioga, ia 'auina mai e le Atua Lona Agaga e fa'ailoa iā te i tatou le 'upu moni e fa'amalosia ai o tatou agaga mo mana'oga o le aso.

(30) O LE Ā LE TA'U O LE AFIOGA A LE ATUA MA O LE POGAI O LE A FA'AMALIEINA LO TATOU MATELĀINA MA LE GĀLALA I LE FIA INU FA'ALEAGAGA?

Ia e taumafai ina ia 'avea 'oe ma lē ua fiafia mai i ai le Atua, o le faigaluega e leai se mea e mā ai, na te vavaetonuina le 'upu moni. II Timoteo 2:15

Mau e tau i ai: II Korinito 6:7

I le a'oa'oina o tatou ina ia ōle atu i aso ta'itasi mo mea e mana'omia - e aofia ai fa'amanuiāga fa'aletino ma le fa'aleagaga - e i ai le mafuaaga a le Atua ia fa'ataunu'uina mo lo tatou lelei. Ua Ia finagalo ia tatou iloa lo tatou fa'alagolago iā te Ia mo Lana tausiga i taimi uma, auā o lo'o Ia sa'ili ia tosina i tatou i le feso'ota'iga ma Ia. O le mafutaga lenei ma Keriso, e ala i le tatalo ma le su'esu'e i 'upu moni e tele ma le tāua o Lana afioga, o le a fafagaina ai o tatou agaga o fia'a'ai; o ē fia ina, o le a fa'afouina i le puna o le vai o le ola.

(31) UA FA'ATONUINA E KERISO I TATOU E FA'AMAGALO I LATOU UA AGALEAGA MAI IĀ I TATOU. O LE Ā LE PĀ PUPUNI E TAOFIA AI LE ATUA MAI LE FA'AMAGALOINA O A TATOU SESE?

Ia e fa'amagalo iā te i matou i a matou agasala; auā fo'i matou te fa'amagaloina atu ia i latou uma o ē agaleaga mai iā te i matou. Luka 11:4

Auā afai tou te fa'amagaloina atu tagata i a latou agasala, e fa'amagaloina fo'i outou e lo outou Tamā o i le lagi. A e afai tou te lē fa'amagaloina atu tagata i a latou agasala, e lē fa'amagaloina fo'i e lo outou Tamā a outou agasala.

Mataio 6:14-15

Mau e tau i ai: Mareko 11:25, 26; Luka 6:37, 38

Ua a'oa'o mai Iesu tatou te maua le fa'amagaloga mai le Atua a o tatou fa'amagalo isi. O le alofa o le Atua e tosina atu ai i tatou iā te Ia, ma o lenei alofa e lē mafai ona pa'i mai i o tatou loto pe afai e lē tupu a'e le alofa mo tatou uso.

Ina ua mae'a le tatalo a le Ali'i, na fa'aopoopo atu Iesu, "Afai tou te fa'amagaloina atu tagata i a latou agasala, e fa'amagaloina fo'i outou e lo outou Tamā o i le lagi. A e afai tou te lē fa'amagaloina atu tagata i a latou agasala, e lē fa'amagaloina fo'i e lo outou Tamā a outou agasala" (Mataio 6:14-15). O lē e lē fa'amagalo atu ua ia motusia le ala e tasi e mafai ona ia maua ai le alofa tunoa mai le Atua.

(32) O LE Ā LE FA'AA'OA'OGA NA TU'U MAI E KERISO PE FA'APEFEA ONA TATOU FAIA I LATOU O Ē SA AGALEAGA MAI IĀ I TATOU, A E LATOU TE LĒ TALOSAGA MAI MO SE FA'AMAGALOGA?

*Ona fetalai atu lea o Iesu, Lo'u Tamā e, ia e fa'amagaloina atu ia te i latou; auā ua latou lē iloa le mea ua latou faia. Ua tufatufa e i latou Ōna ofu, ona fai ai lea o le vili. **Luka 23:34***

Mau e tau i ai: Galuega 7:54-60

E lē tatou ona tatou manatu vaganā ua fa'aalia mai e i latou o ē na afāina ai tatou i a latou sesē, e tonu tatou i le tatou lē fa'amagaloina o latou. E lē taumate, o le latou vaega o le fa'amaulalo o latou loto i le salamō ma ta'u o latou sesē; peita'i e ao fo'i ona iā i tatou le agaga o le fa'apalepale mo i latou o ē na agaleaga mai iā i tatou, tusa pe fa'aali o latou sesē pe leai. E ui lava na latou fa'amanu'alia i tatou, ia tatou lē teuloto o tatou lava mafatiāga ma le tigāalofa mo tatou ona o tatou manu'a; peita'i ona tatou te fa'amoemoe ia fa'amagaloina o tatou sesē e fa'asaga i le Atua e ao ina tatou fa'amagalo latou uma ua faia mea leaga iā i tatou.

(33) O LE Ā LE I'UGA PE AFAI TATOU TE FILIFILIA LE AGAGA O LE LĒ FA'AMAGALO IĀ I LATOU O Ē NA AGALEAGA MAI I A I TATOU?

*O le loto fiafia, e fai ma vaila'au aogā lea; a o le loto fa'anoanoa e mamago ai ivi. **Fa'ata'oto 17:22***

Mau e tau i ai: Fa'ata'oto 12:25; 15:13

(34) INA IA FESOASOANI IA TATOU MALAMALAMA I LE UIGA LAUTELE O LE FA'AMAGALOGA MA SUIA AI O TATOU LOTO, O LE Ā LE MEAALOF A LE ATUA I LONA AGALELEI O LE A IA TA'ITA'I I AI TATOU?

*Po ua fa'atauva'a ea ia te 'oe le faula'i o Lona agamalū, ma Lona fa'apalepale, ma Lona onosa'i, o lo'o e lē iloa e ta'ita'iina 'oe e le agamalū o le Atua i le salamō? **Roma 2:4***

Mau e tau i ai: Esekielu 36:31; 20:43; Roma 6:15; Galuega 5:31

Peita'i e i ai le uiga e lautele atu o le fa'amagalo na i lo le manatu o le to'atele. Ina ua tu'uina mai le folafolaga a le Atua, "Na te matuā fa'amagaloina," na Ia fa'aopoopo atu, peiseā'i o le uiga o lenei folafolaga e sili a'e i mea uma e mafai ona tatou malamalama i ai, "Auā o O'u manatu e lē o outou manatu, o O'u ala e lē o outou ala, ua fetalai mai ai Ieova. Auā e pei ona sili ona maua o le lagi i le lalolagi, ua fa'apea ona sili ona maua o O'u ala i o outou ala, ma O'u manatu e sili i o outou manatu" (Isaia 55:7-9).

O le fa'amagaloga a le Atua e lē na o se gaoioiga tau fa'amasinoga e Na te fa'asa'oloto ai tatou mai le fa'asalaga. E lē na o le fa'amagaloina mai le agasala, a e o le toe lavea'i mai le agasala. O le alofa ua taumasuasua e suia ai le loto. Na malamalama lelei Tavita i le amataga moni o le fa'amagaloga ina ua ia tatalo, "Le Atua e, ia e faia se loto mamā mo a'u; ma ia e fa'afouina se loto mau i totonu iā te a'u" (Salamo 51:10). Na ia toe fa'apea mai, "E pei ona vāvā mamao o sasa'e ma sisifo, e fa'apea lava ona fa'amamao e Ia iā i tatou o a tatou solitulafono" (Salamo 103:12).

(35) INA UA TATOU ILOA LO TATOU LAVA LĒ TUSA AI MO LE FA'AMAGALOGA, PE A TATOU ŌLE ATU IĀ TE IA, O LE Ā LE MEA O LE A TU'UINA E LE ALI'I I TOTONU O TATOU LOTO E FA'ATATAU I ISI?

*O lenei, ia o'ofu outou i le alofa mutimuti vale, ma le agalelei, ma le loto maua, ma le agamalū, ma le onosa'i, fa'apei o ē ua filifilia e le Atua, o ē ua pa'ia ma ua alofaina; ia fefa'apalepalea'i, ma ia fefa'amagaloa'i outou, pe afai ua agaleagaina se tasi e se tasi; fa'apei ona fa'amagalo mai Keriso iā te outou, ia fa'apea fo'i outou. **Kolose 3:12, 13***

Mau e tau i ai: Fa'ata'oto 19:11; Iakopo 1:19; Mataio 5:39-45

O le Atua, e ala iā Keriso na tu'uina mai Ia lava mo a tatou agasala. Na puapuagātia i le maliu tigā i le satauro, na tau'ave le 'avega o le solitulafono, "o le amiotonu mo le amiolētonu," ina ia fa'ailoa iā i tatou Lona alofa ma tosina ai tatou iā te Ia. Ma ua Ia fetalai mai, "A ia outou feagaleleia'i, ia femutimutivalea'i lo outou alofa, ia fefa'amagaloa'i outou, fa'apei ona fa'amagaloina outou e le Atua iā Keriso" (Efeso 4:32).

Ia fa'ataga Keriso, le Soifua pa'ia, e afio i totonu iā te 'oe ma ia auala atu iā te 'oe, ia fa'ailoa le alofa e fanau mai le lagi e fa'aosofia ai le fa'amoemoe i lē ua leai se fa'amoemoe, ma aumai ai le filemū o le lagi i le loto ua pagātia i le agasala. A o

tatou ō atu i le Atua, o le tulaga lea e fa'afeiloā'ia tatou i le faitoto'a, e maua le alofa tunoa mai iā te Ia ma tatou gaua'i atu ia fa'a'ailoa Lona alofa tunoa i isi.

(36) O LE Ā LE MEA E TASI E MATUĀ TĀUA MO I TATOU IA MALAMALAMA AI I LA'ASAGA O LE FA'AMAGALOGA, MA O LE MEA E TASI E LĒ O FA'AVAIVAI SATANI E TAUMAFAI PEA E FA'ASESĒ AI I TATOU?

O i tatou fo'i, ua tatou iloa ma ua fa'atuatua i le alofa ua i le Atua ia te i tatou. O le Atua, o le alofa lava ia. I Ioane 4:16

Mau e tau i ai: I Ioane 4:9, 10; 3:16

E tasi le mea e mana'omia mo tatou ina ia mafai ona tatou maua ma tu'uina atu le alofa o le Atua, o le iloa lea ma talitonu i Lona alofa mo i tatou. O lo'o galue Satani i tau'asesē uma e mafai ona ia faia, ina ia lē mafai ai ona tatou malamalama i lenā alofa. O le a ia ta'ita'i tatou ia manatu oa a tatou mea sesē ma solitulafono ua matuā mamafa lava ma o le Ali'i o le a lē talia a tatou tatalo ma o le a lē fa'amanuia ma fa'asaoina i tatou.

O i tatou lava e leai se mea tatou te va'aia a e na o le vaivai, leai se mea e ta'ulelei ai tatou i le Atua, ma ua ta'u mai e Satani iā i tatou ua leai lava se aogā; e lē mafai ona togafitia fa'alētonu o a tatou amio. Pe a tatou taumafai e ō atu i le Atua, o le a musumusu mai le fili, E leai se aogā e te tatalo ai; e te le'i faia ea lenē mea leaga? E te le'i agasala ea i le Atua ma sesē ai i lou loto lava fuatiaifo? A e mafai ona tatou ta'u atu i le fili, "o le toto fo'i o Iesu Keriso Lona Ālo e fa'amamāina ai i tatou i agasala uma lava" (I Ioane 1:7).

Pe a tatou lagona ua tatou agasala ma lē mafai ona tatalo, o le taimi tonu lenā e tatalo ai. E mafai ona tatou lagona le masiasi, a e ao ina tatou tatalo ma talitonu, "O le 'upu moni lenei, e tataua lava ona matuā talia, na maliu mai Keriso Iesu i le lalolagi, na te fa'aolaina o ē agasala; ua sili musa a'u nei iā i latou" (I Timoteo 1:15). O le fa'amagaloga, fa'aleleiga ma le Atua, e o'o mai iā i tatou, e lē o se tau'i mo a tatou galuega, e lē maua ona o se tau'i e tataua i tagata agasala, a e o se meaalofoa mo i tatou, ua maua ona o le amiotonu e leai se ponā a Keriso o le fa'avae lea o le foa'ifua mai.

(37) AFAI TATOU TE Ō ATU IĀ KERISO MA TA'UTA'U MA LE SALAMŌ FA'AMAONI AGASALA, O LE Ā LE FOLAFOLAGA MATAGOFIE E MAFAI ONA TATOU MAUA?

Afai tatou te fa'aali a tatou agasala, e fa'amaoni o Ia, ma le amiotonu e fa'amagalo ai a tatou agasala, ma fa'amamā mai iā i tatou i amiolētonu uma lava. I Ioane 1:9

Mau e tau i ai: Salamo 103:3, 10-14; II Nofoa'iga Tupu 7:14

E lē tataua ona tatou taumafai e fa'a'aititiia lo tatou manatu nofosala i le fai o 'alofaga mo le agasala. E tataua ona tatou talia le tau o le agasala i le Atua, ma e matuā mamafa lava. Na o Kalevario e mafai ona fa'a'ailoa le mata'utia o le telē o le agasala. Pe ana fai tatou te tau'aveina lo tatou lava nofosala, se manū e olopalaina ai tatou. Peita'i o Lē e leai Sana agasala na suia i tatou; e ui lava e leai se mafuaga e tataua ai, na Ia tau'aveina a tatou solitulafono. "Afai tatou te fa'aali a tatou agasala," o le Atua "e fa'amaoni o Ia, ma le amiotonu e fa'amagalo ai a tatou agasala, ma fa'amamā mai iā i tatou i amiolētonu uma lava" (I Ioane 1:9). Vi'i'a le 'upu moni! - e fa'amaoni i Lana Ia lava tulafono, a e o Lē Amiotonu iā i latou uma e talitonu iā Iesu. "O ai ea se Atua e tusa ma 'Oe o Lē fa'amagalo agasala, ma ua lē manatua solitulafono a ē o totoe o Lona tofi? Na te lē fa'amoemoe pea i Lona to'asā, auā e fiafia o Ia i le alofa" (Mika 7:18).

(38) O AI E MAFUA MAI AI FA'AOSOOSOGA I LE LEAGA?

Ona 'aveina a'e lea o Iesu i le vao e le Agaga, ina ia fa'aosoosoina e le ti'apolo. Mataio 4:1

Mau e tau i ai: Mataio 4:3; Luka 4:2; I Tesalonia 3:5

(39) O AI TATOU TE MAUTINOA E LĒ MAFA'AOSOOSOINA MA E NA TE LĒ FA'AOSOOSOINA FO'I SE TASI?

A fa'aosoosoina se tasi, 'aua le fa'apea, Ua fa'aosoosoina a'u mai le Atua; auā e lē mafai ona fa'aosoosoina o le Atua i mea leaga, e lē fa'aosooso atu fo'i o Ia i se tasi. Iakopo 1:13

Mau e tau i ai: Iakopo 1:14-15

O le fa'aosoosoga o le tosina lea o le mana'o ia agasala, ma e lē mafua mai i le Atua, a e mai iā Satani ma le leaga o o latou lava loto. "E lē mafai ona fa'aosoosoina o le Atua i mea leaga, e lē fa'aosooso atu fo'i o Ia i se tasi" (Iakopo 1:13).

(40) O LE Ā LE IGOA UA TA'U AI SATANI ONA O LO'O IA FA'AAUAU PEA OSOFA'IGA I UIGA A LE FANAU A LE ATUA?

Ua lafo i lalo lē na molia o tatou uso, o lē na molia i latou i luma o lo tatou Atua i le ao ma le po. Fa'aaliga 12:10

E sa'ili Satani ia aumaia i tatou i fa'aosoosoga ina ia fa'aalia le leaga o a tatou amio i luma o le tagata ma agelu, ina ia ona maua tatou mo ia. I le valo'aga fa'afa'atusa a Sakaria, ua va'aia ai Satani i le itū taumatau o le Agelu a le Ali'i, o lo'o molia Iosua le faitaulaga sili, o lo'o ofu i ofu 'ele'elea, ma na tete'e i le galuega o lo'o naunau le Agelu e faia mo ia. O i nei ua fa'aailoa mai ai le uiga o Satani e fa'ataui i agaga uma o lo'o sa'ili Keriso e tosina atu iā te Ia.

(41) O LE Ā LE MEA E FAIA E LE PULE A KERISO IĀ SATANI MA E FA'APEFEA ONA FA'ATO'ILALOINA O IA?

Na 'ou fa'alogofa'i i le leo tele i le lagi, ua fa'apea, O ōna pō nei ua o'o mai ai le olataga, ma le mana, ma le malō o lo tatou Atua ma le pule a lona Keriso; auā ua lafo i lalo lē na molia o tatou uso, o lē na molia i latou i luma o lo tatou Atua i le ao ma le pō. A ua latou manumalō iā te ia ona o le toto o le Tama'i mamoe, ma le 'upu a la latou mau. Fa'aaliga 12:10-11

Mau e tau i ai: Kalatia 1:4; I Korinito 15:57; Roma 8:37; I Peteru 1:5

O le fili na te ta'ita'i tatou i le agasala, ona ia molia lea o tatou i luma o le lagi ma le atulaulau fa'apea e lē tatau ai mo le alofa o le Atua. Peita'i "Na fetalai atu lea o Ieova iā Satani, Ia a'oa'i atu Ieova iā te 'oe Satani, ia a'oa'i atu iā te 'oe Ieova, o lē ua filifili i Ierusalem; e lē o le motumotu ea lenei na se'ia mai le afi?" Ma ua fetalai atu iā Iosua, "Fa'auta, ua 'Ou 'ave'esea āu amiolētonu i ōu luga; 'Ou te fa'a'ofu fo'i iā te 'oe i le ofu matagofie" (Sakaria 3:1-4).

(42) E UI LAVA E LĒ O LE ATUA LE AUTŪ O FA'AOSOOSOGA MA TOFOTOFOGA, AISEĀ, I LONA POTO MAOA'E, NA TE FA'ATAGA AI IA MEA I NISI TAIMI?

O lea ua outou 'oli'oli ai, e ui lava ona fa'anoanoa o outou i nai aso nei, (pe afai e tatau ai,) i tofotofoga 'ese'ese. O le tofotofoga fo'i o lo outou fa'atuatua, e silisili ona aogā i le auro e fa'aumatia, e ui lava ina tofotofoina i le afi, e 'avea ma mea e i'u i le vi'iga, ma le mamalu, ma le manuia pe a fa'aalia mai Iesu Keriso. I Peteru 1:6, 7

Mau e tau i ai: Iakopo 1:2-4; Malaki 3:3

O le Atua i Lona alofa tele na'uā o lo'o sa'ili ia atina'e iā i tatou le tāua o le alofa tunoa o Lona Agaga. Na te fa'atagaina i tatou e fesāga'i ma fa'afitāuli, sauāga ma faigatā, e lē o se fetu'u, a e o le fa'amanuiāga aupito sili mo o tatou olaga. O fa'aosoosoga uma e tete'e i ai, o tofotofoga uma e tau'ave fa'amalosi, e aumai ai le iloa ma tatou aga'i ai i luma i le galuega o le fausia o le amio. O le agaga, e ala i le malosi fa'aleagaga e tete'e ai fa'aosoosoga, o le a fa'aailoa i le lalolagi ma le atulaulau le tāua o le alofa tunoa o Keriso.

(43) O AI E MAFUA AI TOFOTOFOGA MA FA'AOSOOSOGA I LE TELE O TAIMI, MA E TATAU ONA TU'U I AI LE I'UGA?

Na latou 'ino'ino i le poto; ua latou lē mana'o fo'i i le mata'u iā Ieova; na latou lē mafafai i la'u pule; ua latou 'ino'ino i la'u a'oa'iga uma lava; o le mea lava lea latou te 'a'ai ai i le fua o a latou amio; e ma'o'ona fo'i i latou i a latou togafiti. Auā o le liliu 'ese o ē faigofie e fasiotia ai i latou; o le nofo fa'atalanoa o ē valelea e fano ai i latou. A o lē fa'alogofa mai iā te A'u, e nofo o ia ma le fifilemū; e filemū o ia, e lē fefe i se mea leaga. Fa'ata'oto 1:29-33

(44) AISEĀ, I NISI TAIMI, E PUAPUAGĀTIA AI I TOFOTOFOGA MA SAUĀGA TAGATA E LĒ O SALA, MA I LATOU E LE'I MAFUA AI IA MEA?

E tutusa ona o'o o mea uma i tagata uma; e tasi lava le mea e o'o i lē ua amiotonu ma lē ua amio leaga, i lē ua lelei, ma lē ua mamā ma lē ua lē mamā, o lē na te faia taulaga, ma lē na te lē faia taulaga; e pei ona o'o i le tagata amio lelei, e fa'apea fo'i ona o'o i le tagata agasala; e pei ona o'o i lē na te tautō, e fa'apea fo'i ona o'o i lē ua mata'u i le tautō.

Failauga 9:2

Ua 'ou toe iloa fo'i i lalo o le lā, ua lē sini i le tausiniōga ē ua tele vavave, ua lē malō i le taua ē ua malosī, ua lē i ai fo'i i ē ua popoto le mea e 'ai, ua lē i ai i ē ua fa'autauta le 'oloa tele, ua lē i ai fo'i i ē ua atamamai le alofaina mai; a o le tausaga ma le mea e tupu ai e o'o iā te i latou uma. **Failauga 9:11**

(45) O LE Ā LE FOLAFOLAGA E MAFAI ONA TATOU MAUA MA E MAUTINOĀ E FA'ATAUNU'UINA E LE ATUA?

Ua lē maua outou e se tofotofoga e 'ese i lo tagata; a ua fa'amaoni le Atua, o Lē na te lē tu'uina atu outou i le tofotofoga e sili i se mea ua outou lavatia, a e sauni fo'i fa'atasi ma le tofotofoga se mea e sao ai, ina ia outou lavā 'o'ono. **I Korinito 10:13**

Mau e tau i ai: Salamo 124:7; Iakopo 5:11

(46) INA IA MAFAI ONA MAUA LE MANUMALŌ I FA'AOSOOSOGA E ALA IĀ KERISO, O Ā MEA E LUA E TATAU ONA TATOU FAI?

A ia outou 'o'ofu i le Ali'i o Iesu Keriso; 'aia fo'i le sauniuni mo le tino, e o'o ai ona tu'inanau. **Roma 13:14**

Mau e tau i ai: Iakopo 4:7

Peita'i e ui ina e lē tatau ona tatou femēmēa'i i faigatā, tusa lava po o le ā le 'o'ona, a ao ina tatou tatalo i le Atua ia 'aia ne'i fa'atagaina tatou ina ia 'avea i tatou i se mea e o'o i le tosina 'ese ai e mea e naunau i ai o tatou loto agasala. I le ofoina atu o le tatalo na tu'uina mai, tatou te tu'u atu ai tatou lava i le ta'ita'iga a le Atua, ōle atu iā te Ia ia ta'ita'i tatou i ala e saogalemū. E lē mafai ona fai atu lenei tatalo ma le fa'amaoni, a e filifili e savali i so'o se ala tatou te filifili i ai. Ia tatou fa'atalitali mo Lona 'a'ao e ta'ita'i i tatou; o le a tatou fa'alogi i Lona si'ufofoga, ua fa'apea mai, "O le ala lava lenei, ia outou savavali ai" (Isaia 30:21).

E lē saogalemū mo i tatou le fa'atuai ia mafaufau loloto i avanoa e selesese ai e ala i le gaua'i atu i musumusuga a Satani. O le agasala e i'u ai i le ta'uvala ma puapugā, o mea e o'o i agaga uma e fiafia i ai; peita'i o lona uiga moni e fa'atauaso ma taufa'asesē, ma o le a fa'alata ai tatou i uiga fa'atosina. Pe afai tatou te fia tofotofo i le lau'ele'ele a Satani o le a leai se mautinoāga o le puipua o tatou mai lona malosī. O le mea lea, e tatau iā i tatou ona tapunia auala uma mata e mafai ai e le taufa'asesē ona maua mai tatou.

(47) O LE Ā LE MEA E MAFAI ONA TATOU TALITONU MA LE MAUTINOĀ O LE A FAIA E LE ATUA MO I TATOU PE AFAI E TU'U ATU ATO'ATOĀ O TATOU OLAGA I LANA TAUSIGA?

Ua silafia e le Ali'i se mea e laved'i mai ai i ē amio Atua ai le fa'aosoosoga, a e taofi i ē amio leaga e o'o i le aso fa'amasino ina ia fa'asalaina i latou. **II Peteru 2:9**

O le tatalo, "'Aia fo'i e te ta'ita'iina i matou i tofotofo," o se folafolaga lava lea. Afai tatou te tu'uina ato'atoa i tatou i le Atua tatou te maua le mautinoāga, e "Na te lē tu'uina atu outou i le tofotofo e sili i se mea ua outou lavatia, a e sauni fo'i fa'atasi ma le tofotofo se mea e sao ai, ina ia outou lavā 'o'ono" (I Korinito 10:13).

(48) O LE Ā LE MEA E TASI E MALU AI MAI FA'AOSOOSOGA?

Inā tumau ia o outou iā te A'u, o A'u fo'i iā te outou. Fa'apei o le lā e lē mafai ona fua pe a na o ia, pe afai e lē mau i le vine; a fa'apea fo'i outou, pe afai tou te lē tumau iā te A'u. O A'u nei o le vine, o lā outou. O lē tumau ia te A'u, ma A'u iā te ia, o ia lava e fua tele mai; auā e lē mafaia e outou ona fai o se mea e tasi pe a A'u lē i ai. **Ioane 15:4, 5**

Mau e tau i ai: I Ioane 5:4; Ioane 8:31, 32; I Ioane 4:16; Efeso 6:12-18; Luka 8:15

E pau le mea tatou te malu ai mai le ti'apolo o le afio tumau lea o Keriso i le loto e ala i le fa'atuatua i Lana amiotonu. A i ai le alofa fa'apito i o tatou loto o le a manumalō loa fa'aosoosoga iā i tatou. A e afai e tatou te iloa le alofa tele na'uā o le Atua, o le a fa'aailoa le matagā ma le 'inosia o le uiga fa'apito, ma o le a tatou naunau ia tuli'esea mai le agaga. E pei ona fa'amamaluina Keriso e le Agaga Pa'ia, o le a maulalo ma malūlū o tatou loto, o le a leai se malosī o le fa'aosoosoga, ma o le a suia le amio e le alofa tunoa o Keriso.

(49) AFAI TATOU TE SA'ILI PEA LE FESOASOANI A LE LAGI, O AI E 'AUINA MAI E LE ALI'I E LAVEA'I TATOU A O TŪ LATALATA I TATOU I LE TOFĒ O LE AGASALA?

E tō lauapi le agelu a Ieova e si'osi'omia ai ē o matata'u ia te Ia, e lavea'i fo'i o Ia iā te i latou. Salamo 34:7

Mau e tau i ai: Fa'aaliga 3:10; II Korinito 10:4, 5; Eperu 1:14

E lē mafai ona tu'ulafoa'i e Keriso le agaga na Ia maliu ai. Atonu o le a tu'ua Ia e le agaga ma ua to'ilalo i fa'aosoosoga, peita'i e lē mafai e Keriso ona liliu'ese mai lē na Ia totogia ai le togiola i Lona Ia lava soifua. Pe ana mafai ona fa'ate'ia la tatou va'aiga fa'aleagaga, se manū e mafai ona tatou va'ai atu i agaga o lo'o punou ifo i lalo o puapuagā ma mafatia i fa'anoanoa, ua taomia e pei o se ta'avale toso i lalo ifo o 'avega mamafa, ma ua sauni e oti ona ua leai se fa'amoemoe.

E ao ina tatou va'aia agelu o felelei fa'avavevave e avatu se fesoasoani iā i latou nei ua fa'aosoosoina, ē o lo'o tutū i autafa o le tofē. O agelu mai le lagi o lo'o tete'e atu i 'au a le amioleaga ua si'omia nei agaga, ma ta'ita'i i latou e fa'atutū o latou vae i le fa'avae e mausalī. O le taua o lo'o tau i le vā o nei 'au tau e lua e moni pei o taua o lo'o tauina e vaega'au a lenei lalolagi, ma o le mata'upu a le taua fa'aleagaga e fa'alagolago i ai le i'uga e fa'avavau.

(50) O AI UA FA'ATO'ILALO TOFOTOFOGA UMA MA LE MALOSI O LE AMIOLEAGA, MA UA FINAGALO MALIE E FA'AAOGĀ LONA MANA E SUI AI TATOU MO LE MANUMALŌ MA AUMAI IĀ I TATOU LE FILEMŪ?

Ua 'Ou fai atu nei mea iā te outou, ina ia outou maua le manuia ia te A'u; e maua fo'i outou e le puapuagā i le lalolagi, a ia outou loto tetele, ua 'Ou manumalō i le lalolagi. Ioane 16:33

Mau e tau i ai: Ioane 14:27; Salamo 85:8-11

Mo i tatou, e pei fo'i o Peteru, na tu'u mai ai le fetalaiga, "ua mana'o tele Satani iā te outou, ia lūlū iā te outou pei o le saito; a ua 'Ou fa'atoga mo 'oe, ina ne'i mavae lou fa'atuatua" (Luka 22:31, 32). Fa'afetai i le Atua e lē tu'ua na o i tatou. O Ia Lē "Ua fa'apea lava ona alofa mai... i le lalolagi, ua Ia 'au mai ai Lona Atali'i e to'atasi, ina ia lē fano se tasi e fa'atuatua iā te Ia, a ia maua e ia le ola e fa'avavau" (Ioane 3:16), o le a Ia lē tu'ulafoa'i tatou i le taua ma le fili a le Atua ma tagata. Ua Ia fetalai, "Fa'auta, 'Ou te foa'i iā te outou le pule e soli ai gata ma akarava ma le malosi uma o le fili; e leai lava se mea e leaga ai outou" (Luka 10:19).

(51) O Ā NISI AUALA E TATOU TE MAFAI AI, E ALA IĀ KERISO I TOTONU O I TATOU, ONA FA'ATO'ILALO FA'AOSOOSOGA?

O le mea lea ia outou gaua'i ai i le Atua; ia outou tete'e atu i le ti'apolo, ona sola 'ese ai lea o ia iā te outou. Ia outou fa'alatalata atu i le Atua, ona fa'alatalata mai lea o Ia iā te outou. Tagata agasala e, inā fafano ia o outou lima, o outou ē fa'alotolotolua e, inā fa'amamā ia o outou loto. Iakopo 4:7-8

'Ou te lē tu'u i o'u luma se mea leaga. Salamo 101:3

O lē ua fa'autauta, na te iloa atu le leaga, ma lafi ai; a o ē ua faigofie, e ō atu pea i latou, ona fa'asalaina ai lea. Fa'ata'oto 22:3

Le 'au uso e, o le toe 'upu lenei; o mea uma ua moni, o mea uma ua ta'uleleia, o mea uma ua tonu, o mea uma ua mamā, o mea uma ua matagofie, ma mea uma ua logoleleia, afai fo'i o se isi amio lelei, po o se tasi mea e vi'ia, ia outou manatunatu i ia lava mea. Filipi 4:8

Ua 'ou teu i lo'u loto lau afioga, ina ne'i 'ou agasala iā te 'oe. Salamo 119:11

Ia outou mataāla ma tatalo, ina ne'i o'o mai le fa'aosoosoga iā te outou; ua mana'o i ai le loto, a o le tino ua vaivai. Mataio 26:41

Fa'auta, o le agasala nei a lou uso o Sotoma, na iā te ia ma āna tama, o le fa'amauualuga, o le tele o mea e 'ai, ma le matuā nofonofo fa'atalanoa, na ia lē fesoasoani fo'i i lē puapuagā, ma lē mativa. Esekielu 16:49

'Ou te fa'afetai iā Ieova i aso uma lava; e lē aunoa Ōna vi'iga i lo'u gutu. Salamo 34:1

'Aua ne'i popole outou i se mea e tasi, a ia fa'a'iloa atu o outou mana'o i mea uma lava i le Atua, i le tatalo, ma le fa'atoga, atoa ma le fa'afetai. O le manuia fo'i mai le Atua, o lo'o silisili lava i mea uma e manatu i ai, e leoleoina ai o outou loto atoa ma o outou mafaufau iā Keriso Iesu. Filipi 4:6-7

(52) O LE Ā LE FOLAFOLAGA E MAFAI ONA TATOU 'A'APA I AI PE AFAI TATOU TE FILIFILI E OLA MA SE SO'OTAGA VĀ LALATA PEA MA KERISO I TAIMI UMA?

O la'u tusi lenei i ē ua fa'apa'iaina e le Atua le Tamā, ma leoleoina e Iesu Keriso ma vala'auina. Ia fa'ateleina iā te outou le alofa, ma le manuia, ma le agalelei. Iuta 1:1, 2

O lenei, ia iā te Ia na te mafaia ona leoleo iā te outou ina ne'i pa'uu, ma tu'uina atu iā te outou ua lē ponā i luma o Lona lava mamalu ma le fiafia tele. Iuta 1:24

Mau e tau i ai: Eperu 2:18; Mika 7:19; II Peteru 1:3, 4; Isaia 59:19; II Korinito 10:4

Ia ola feso'ota'i ma le Keriso soifua, ona Ia taofimau lea iā te 'oe e le 'a'ao e lē fa'amamulu 'oe. Ia iloa ma talitonu i le alofa o le Atua mo i tatou, ma e te saogalemū ai; o lea alofa o le 'olo e lē mafai ona fa'ato'ilaloina e taufa'asesē ma osofa'iga a Satani. "O le suafa o Ieova, o le 'olo malosi lea; e sola atu i ai lē amiotonu, ona sao ai lea o ia" (Fa'ata'oto 18:10).

(53) I LE TAIMI O LE TAUPE AFAI TATOU TE TAUTEVATEVA MA PA'U'Ū AI I LLE AGASALA, O Ā FOLAFOLAGA OFOFOGIA E MAFAI ONA TATOU TAPA I AI?

Afai tatou te fa'aali a tatou agasala, e fa'amaoni o Ia, ma le amiotonu e fa'amagalo ai a tatou agasala, ma fa'amamā mai iā i tatou i amiolētonu uma lava. I Ioane 1:9

Si a'u fanau e, 'ou te tusi atu nei mea iā te outou, ina ne'i agasala outou; pe afai fo'i e agasala se tasi, o iā te i tatou le fautua i luma o le Tamā, o Iesu Keriso lea, o Lē amiotonu. I Ioane 2:1

E Ōu le malō, ma le mana, atoa ma le vi'iga, e fa'avavau lava, Amene. Mataio 6:13

(54) A O FA'AI'UINA LE TATALO A IESU, O Ā 'UPU O LE FOLAFOLAGA NA IA TU'U MAI MA ŌLE MAI IA TATOU TATALO IA FA'AMALOSIA AI LO TATOU FA'ATUATUA MA LE FA'AMOEMOE I LE O'O MAI O LE MALŌ O LE ATUA?

Auā e Ōu le malō, ma le mana, atoa ma le vi'iga, e fa'avavau lava, Amene. Mataio 6:13

Mau e tau i ai: Fa'aaliga 19:1; 5:13

O le fuai'upu mulimuli e pei o le fuai'upu muamua o le Tatalo a le Ali'i, e fa'asino lea i lo tatou Tamā e sili a'e i malosi uma ma pule ma igoa uma ua ta'ua. Na silasila le Fa'aola i tausaga o lo'o fofola mai i luma o Ōna so'o, e lē pei ona latou moemiti i ai, i le ta'atia malōlō i le matagofie o tamaoā'iga fa'alelalolagi ma vi'iga, a e peita'i e pogisā mai afā o le matau'a fa'aletagata ma le ita fa'asatani. I totonugalemū o le fevaevaea'i ma le fa'aumatiāga o le malō, o la'asaga o le 'au so'o o le a si'omia i faigatā, ma o le tele o taimi e maua ai o latou loto i le mafatia ona o le fefe. O le a latou va'ai i le fa'atafunaina o Ierusalem, o le malumalu o le a lepetia ma tafi'esea, o ōna tapua'iga o le a fa'ai'uina e fa'avavau, ma o le a fa'ata'ape'apeina Isara'elu i le lalolagi atoa, e pei o va'atu'ia i luga o matāfaga tu'ufua.

Na fetalai Iesu, "E fa'alogu outou i taua ma tala o taua,... e si'i le taua e lē tasi nu'u i le tasi nu'u, ma le tasi malō i le tasi malō; ona o'o mai ai lea o ōge, ma fa'ama'i, ma mafui'e i lea mea ma lea mea. O nā mea uma o le amataga ia o puapuagā" (Mataio 24:6-8). A e o ē mulimuli iā Keriso e leai se mea e tatau ona fefefe ai ona ua leai so latou fa'amoemoe pe ua tu'ulafoa'iina e le Atua le lalolagi. O le mana ma le mamalu e ā Ia lea ma o Āna fuafuāga e fa'ataunu'uina, e leai se mea e fa'alavelavea ai le fa'amae'aina. I le tatalo o lo'o fa'a'iloa atu ai mana'oga o aso ta'itasi, sa fa'atonuina 'au so'o o Keriso ia va'ai i luga a'e o le malosi ma le pule o le ti'apolo, i le Ali'i lo latou Atua, o Lona malō e pule aoao i mea uma, ma o Ia lo latou Tamā ma o le Uō e fa'avavau.

(55) E UI INA A O LE'I O'O I LE TAUF'A'AI'UGA O LE TALA FA'ASOLOPITO O LE LALOLAGI, O LE A FOLIGA MAI O LE A TO'ILALO LE MALŌ O LE ATUA, O LE Ā LE FOLAFOLAGA E MAFAI E TATOU O Ē MULIMULI IĀ TE IA ONA TAPA I AI?

E lē mafaia fo'i e faitoto'a o seoli ona manumalō i ai. Mataio 16:18

Mau e tau i ai: Isaia 54:17; Ioane 10:27-30; Eperu 12:28; Fa'aaliga 11:15

O le fa'atafuna'iina o Ierusalemā o le fa'atusa o le fa'atafunaga mulimuli o le a maofa ai le lalolagi. O valo'aga na mai se vaega o le fa'ataunu'uina o le fa'ato'ilaloina o Ierusalemā e i ai le uiga e fetai tonu i ōna aso e gata ai. O lo'o tatou tutū nei i le faitoto'a o mea e tetele ma le uiga 'ese. E i ai mea o le a tutupu e mana'omia ai fa'ai'uga e faia ma le fa'autauta o lo'o i o tatou luma, e le'i molimauina muamua e le lalolagi. A e suāmalie iā i tatou, e pei o le ulua'i 'au so'o, ona o'o mai o le mautinoāga e pulea mea uma e le malō o le Atua.

O le fa'asologa o mea e tutupu i le lumana'i o lo'o i 'a'ao o Lē na faia i tatou. O le Tupu o le lagi e i ai le i'uga o malō, fa'a'apea ma mea e fa'atatau i Lana ekalesia, e i Lana lava pule. O le A'oa'o e i ai Lona itū Atua o lo'o fetalai atu i Ōna sui uma lava i le fa'ataunu'uina o Āna fuafuāga, e pei ona la fetalai atu iā Kuresa, "Ua 'Ou fusia 'oe, a o e le'i iloa A'u" (Isaia 45:5).

(56) PE A TAU'AVE E I LATOU E MULIMULI IĀ KERISO LE FE'AU MA LE AVANOA E 'AVE AI LE TALA LELEI I LE LALOLAGI, O AI O LE A MAUA MAI AI LE I'UGA MANUIA?

E lē o le fītafita, e lē o le malosi, a o Lo'u Agaga, ua fetalai mai ai Ieova o 'au. Sakaria 4:6

Mau e tau i ai: Salamo 33:16; 44:3-7

I le fa'aaliga a le perofeta o Esekielu, na i ai le va'aiga o le lima i lalo o apa'au o le kerupi. O lenei mea sa a'oa'oina ai Āna 'au'auna o le mana fa'aleagaga lea e tu'uina iā te i latou manuia. O i latou e fa'aaogāina e le Atua e fai ma Āna 'avefe'au e llē tataua ona i ai le lagona o Lana galuega e fa'alagolago iā te i latou. O tagata e lē tu'ulafoa'iina na o latou e amoina lenei tiute tau'ave. O Ia e lē tofā lava, o lo'o Ia galue pea mo le fa'amae'aina o Āna fuafuāga mo le aga'i i luma o Lana galuega.

O le Atua na te fa'asalāvei fuafuāga a tagata amioleaga, ma avatu le lē mautonu i taupulepulega a latou o ē manatunatu i faiga leaga e fa'atatau i Ōna tagata. O Ia o le Tupu, o le Ali'i o ali'i, o lo'o afio i le vā o kerupi, ma i totonugalemū o le fevaevaea'iga ma le vevesi o malō, e Na te puipuia pea Lana fanau. O Ia lē e pule i le lagi, o lo'o tatou Fa'aola o Ia. Na te fuatia tofotofoga uma, Na te silasila i le afi mumū e tataua ona tofotofoina ai agaga ta'ito'atasi. Pe a o'o ina lafotūina 'olopuipui malosi o tupu, pe a ati 'aū o Lona to'asā i fatu o Ōna fili, a o Ōna tagata o le a saogalemū pea i Ōna 'a'ao.

(57) I SE ASO UA LATA MAI, O LE Ā LE MEA O LE A FAIA E TULIVAE O MEA UMA NA FOAFOAINA, MA O Ā 'UPU O LE A 'ALAGAINA?

Ina ia to'otuli o tulivae uma lava i le suafa o Iesu, o ē o i le lagi, ma ē o i le lalolagi, ma ē o i lalo o le lalolagi; ma ia ta'uta'u atu e laulaufaiva uma lava o Iesu Keriso o le Ali'i lava ia, ia i'u ina vi'ia ai le Atua le Tamā. Filipi 2:10, 11

"Ieova e, e Ōu le silisili 'ese, ma le malosi, ma le matagofie, ma le mamalu, ma le maluali'i; auā o iā te 'Oe mea uma o i le lagi ma le lalolagi.... Mai iā te 'Oe le 'olua ma le mamalu, o 'Oe e te pule i mea uma lava; o i ai fo'i i Lou 'a'ao le mamana ma le malosi, o iā te 'Oe fo'i e fa'ateleina ma fa'amalosia tagata uma lava" (I Nofōā'iga Tupu 29:11, 12).

'Ou te fa'afetai ona o a'oa'oga a Keriso pe fa'a'apefa ona tatalo ma ia malamalama i le vaega o le olaga e 'a'afia pe afai e tatalo ma le fa'atuatua i lo'i Tamā i le lagi.

Li'o le Tali: Ioe Lē Mautonu

O lenei lesona ua fesoasoani iā te a'u ina ia 'ou malamalama ma talitonu o le Tamā e i ai le mana, e silisili 'ese, ma e mulimuli ane o Lona malō o le a manumalō i le lalolagi fa'a'apea fo'i ma le lagi.

Li'o le Tali: Ioe Lē Mautonu

Ua naunauta'i lo'u loto mo lea aso ma o la'u tatalo, "Ia vave ona e afio mai lo'u Ali'i e, Iesu, ma fa'atūina Lou malō!"

Li'o le Tali: Ioe Lē Mautonu

E Lē o le Fa'amasino Atu a o le Faia

Lesona 29

O lenei a'oa'oga e fa'avae i le Mataio 7:1-3.

(1) O LE Ā LE LAPATA'IGA NA TU'UINA ATU E KERISO E FA'ATATAU I MANATU TATOU TE MAFAUFAU I AI E FA'ATATAU I ISI?

'Aua tou te fa'amasino atu, ina ne'i fa'amasinoina outou. Mataio 7:1

Mau e tau i ai: Luka 6:37

(2) O LE Ā LE MEA E LĒ AUMAIA LE FA'AOLATAGA INA NE'I O TATOU MITAMITA AI?

Auā o le alofa tunoa ua fa'aolaina ai outou i le fa'atuatua; e lē mai iā te outou fo'i lea, a o le mea ua fofa'iina mai e le Atua; e lē ona o galuega, ina ne'i mitamita se tasi. Auā o Lana lava galuega i tatou, na faia i tatou iā Keriso Iesu, ina ia faia galuega lelei, na saunia anamua e le Atua, ina ia tatou savavali ai. Efeso 2:8-10

Mau e tau i ai: Tito 3:5; Roma 4:2; 11:6; II Timoteo 1:9

O le taumafaiga e sa'ili le fa'aolataga i galuega a le tagata lava ia e mautinoa e ta'ita'i ai tagata ia fa'aputu manatu fai fa'amalosi e 'avea ma pā pupuni i le agasala. Auā a va'ai atu ua lē mafai ona tausia le tulafono, o le a fuafua loa a latou lava tu'utu'uga ia fa'amalosi ai le usiusita'i i tulafono. O nei mea uma o le a liliu'ese ai le mafaufau mai le Atua i le tagata lava ia. O Lona alofa o le a mavae 'ese mai le loto, ma mate ai le alofa mo ona uso ā tagata.

O se faiga lea e fuafuaina i manatu fa'aletagata, e aofia ai ma le anoanoa'i o faiga fa'amalosi, o le a ta'ita'i ai i latou e lagolagoina le fa'amasinoina o i latou uma e lē 'ausia le tapula'a ua tu'uina atu e tagata. O le si'osi'omaga o le alofa fa'apito ma le faitio o le a tineia ai lagona lelei ma le agaalofoa, ma 'avea ai tagata o fa'amasino e fa'aailoga tagata ma va'ava'ai vale.

(3) O LE Ā LE Ā'A E MAFUA AI ONA TATOU PA'Ū 'ESE MA LĒ ILOA AI LO TATOU LAVA VAIVAI, ONA TATOU FAITIO AI LEA MA TA'U SALA ISI TAGATA?

Ua fetalai atu fo'i o Ia lenei fa'ata'oto i nisi tagata ē na fa'atuatua iā te i latou fa'i ua amiotonu, a e fa'alēaogāina nisi. Luka 18:9

Mau e tau i ai: Luka 16:15; Fa'ata'oto 30:12; Roma 10:3, 4

O Faresaio e aofia ai i le vaega lenei. E ō mai mai a latou tapua'iga, e lē fa'amaulalo ona o le tulaga o o latou vaivaiga, e lē fa'afetai ona oo le avanoa tāua ua tu'uina atu e le Atua iā i latou. Latou te ō mai ma agaga ua fa'atumuina i le mitamitavale, ma o lo latou manatu autū, "O a'u, o o'u lagona, o lo'u atamai, o 'ou lava ala." O mea ua 'ausia mai lo latou lava tomai ua 'avea ma tapula'a e fa'atusatusa i ai isi. Ua latou la'e i ofu talaloa o le mamalu o le tagata lava ia, ua nonofo i le nofoa fa'amasino e faitio ma fa'asala.

(4) O LE Ā LE FAUTUĀGA UA TU'UINA MAI E PAULO I LANA TUSI I TAGATA FILIPI, PE AFAI E MULIMULI I AI, O LE A TAOFIA AI TATOU IA 'AUA NE'I 'AVEA MA FA'AMASINO MANATU FA'APITO O ISI?

'Aua ne'i faia se mea e tasi ma le finau vale, ma le mitamita fua; a ia ta'itasi outou ma manatu ma le loto maualalo, ua sili nisi uma ia te ia. Filipi 2:3

Mau e tau i ai: Kalatia 5:26; Iakopo 4:5, 6; I Timoteo 6:4; Luka 18:14

O tagata ua 'au ai le to'atele i le agaga lava lea e tasi, ua sosopo i le vaega o le loto fuatiaifo ma fa'amasino solo ai isi i matā'upu e i le vā o le tagata ma le Atua. O le tagata ma le masaniga lea na fa'atatau i ai le fetalaiga a Iesu, "'Aua tou te fa'amasino atu, ina ne'i fa'amasinoina outou" (Mataio 7:1). O le mea lea, ia 'aia ne'i e tu'uina 'oe lava e fai ma tapula'a. 'Aua le 'avea ōu manatu, o lau va'ai i tiute, o lau fa'aliliuga o le Afioga a le Atua, e fai ma tapula'a mo isi, ma i lou loto o le

a e fa'amasinoina ai latou pe afai e latou te lē 'ausia lau tapula'a. 'Aua e te faitioina isi, ma tau matemate mafuaga o latou fuafuāga ma e fa'amasinoina ai latou.

(5) O AI LE FA'AMASINO E SA'O MA AMIOTONU, MA I LANA LAVA TAIMI, E AUMAIA MEA UMA LAVA I LO LATOU MALAMALAMA MONI?

O lenei, 'aua tou te fa'amasino i se tasi mea a o lē o'o mai ona pō, se'ia afio mai le Ali'i, o Lē na te fa'amalamalamaina mea lilo io i le pouliuli, ma fa'aalia filifiliga o loto; e i ai ona ta'itasi ma ta'uleleia e le Atua. I Korinito 4:5

Mau e tau i ai: I Korinito 4:3-5; Roma 2:16; Fa'ata'oto 29:26

Tatou te lē mafai ona faitauina le loto. O tatou fo'i e i ai sesē, tatou te lē agava'a e nofo i le nofoāga e fa'amasinoina isi tagata. O tagata e latou te fa'amasinoina na o le va'aiga mai fafo. Na o Ia e to'atasi e Na te silafia manatu lilo o mafuaga o gaoioiga, o Āna faiga e fa'apalepale ma le tigāalofa, ua tu'uina i ai ia faia le fa'ai'uga o tagata ta'ito'atasi.

(6) PE A TATOU FA'AMASINOINA ISI, O LE Ā LE MEA UA TATOU FAIA IĀ I TATOU LAVA?

O le mea lea ua e lē mautali ai 'oe le tagata o lē fa'asalaina atu, auā o lou fa'asalaina atu i se tasi, ua e fa'asalaina ai 'oe e 'oe; auā o 'oe lē fa'asalaina atu, ua e faia ia lava mea. Roma 2:1

Mau e tau ia i: Roma 2:2, 3; Iopu 9:20

O le mea lea o i latou o ē ta'usalaina pe faitio i isi, ua fa'ailoa atu o latou lava ua nofosala, auā e latou te faia fo'i lea lava mea e tasi. I le ta'usalaina o isi, ua latou ta'usala ai latou lava, ma e fa'ailoa mai e le Atua le tonu o le fa'asalaga. E talia e Ia la latou fa'ai'uga e fa'asaga iā i latou lava.

(7) O LE Ā LE FA'ATA'ITA'IGA AOGĀ NA FA'AAOGĀINA E KERISO E FA'AILOA AI LE FA'AFOLIGA E FOLASIA I LE FAITOTO'A PE A TATOU FA'AMASINOINA NISI?

Se ā le mea e te va'ai atu ai i se fāsi la'au i le mata o lou uso a e te lē iloa e 'oe le utupoto i lou lava mata? Mataio 7:3

Mau e tau i ai: Mataio 7:4, 5

E o'o i le fuai'upu, "O 'oe lē fa'asalaina atu, ua e faia ia lava mea" (Roma 2:3), e lē 'ausia le telē o le agasala a lē manatu e faitio ma ta'usalaina lona uso. Na fetalai Iesu, "Se ā le mea e te va'ai atu ai i se fāsi la'au i le mata o lou uso a e te lē iloa e 'oe le utupoto i lou lava mata?" (Mataio 7:3).

O Āna 'upu e fa'amatala mai ai se tasi e vave ona ia iloa fa'alētonu i isi. Pe a ia manatu ua ia va'aia se sesē i le amio po o le olaga o lo'o matuā ma'elegā e taumafai e fa'asino atu; a e o lo'o fa'ailoa mai e Iesu o le uiga tonu lenā o le amio ua atina'e ia faia a e lē tusa ai ma le galuega a Keriso, pe a fa'atusatusa atu i le sesē ua faitioina, e pei o le utupoto pe a fa'atusatusa i le fasi la'au. O lē e leai se agaga o le fa'apalepale ma le alofa o le a ta'ita'iina ia e faia se se mea telē mai se mea e matuā itiiti lava.

(8) O LE Ā LE MEA E AO INA TATOU MUĀ'I FAI INA IA MAFAI AI ONA TATOU FA'ATA'ITA'I I LE ALOFA LĒ FA'AMASINO O KERISO I ISI?

A o ē o iā Keriso, ua fa'asatauroina e i latou le tino, ma ōna mana'o, ma ōna tu'inanau. Kalatia 5:24

Mau e tau i ai: Iakopo 4:7-10; Roma 10:3; Filipi 3:9

O i latou o ē le'i o'o i le salamō ma le tu'uina atu ato'atoa iā Keriso e lē mafai i o latou olaga ona fa'ailoa le lagona o le alofa o le Fa'aola. Latou te fa'auigasesē le agaga malū ma le fa'aaloalo o le tala lelei, a e fa'amanu'a agaga tāua na maliu ai Keriso. E fa'atatau i le fa'atusa na fa'aaogā e le Fa'aola, o lē e fiafia e fa'aali le agaga o le faitio e ta'usalaina ua sili atu lana agasala na i lo o lē na ia molia, auā e lā gata ua ia faia le agasala lava lea e tasi, a e fa'aopoopo i ai le loto fa'amaua ma le va'ava'ai vale.

(9) PE AFAI TATOU TE FA'AMASINO I NISI E FA'ATATAU I A TATOU LAVA TAPULA'A, O LE NOFOĀGA O AI UA TATOU NONOFO AI?

O lē tete'e atu, ma fa'amaualugaina e ia iā te ia e sili i mea uma lava ua ta'uatuaaina, ma mea uma ua ifo i ai tagata, o lea ua ti'eti'e ai o ia i le malumalu o le Atua, peiseā'i o le Atua o ia, o lo'o fa'aali mai o ia, o le Atua lava o ia. II Tesalonia 2:4

Mau e tau i ai: Esekielu 28:2

E na o Keriso le tapula'a moni e fua i ai le amio, ma o sē e tu'uina o ia e fai ma fua mo isi ua tu'u ia lava i le tulaga o Keriso. Talu ai o le Tamā "ua Ia tu'u mai i le Atali'i, le fa'amasinoga uma lava" (Ioane 5:22), o ai lava e manatu e na te fa'amasinoina mafuaga o fuafuāga a isi ua toe 'ave fa'alētatau le pule fa'apitoa a le Ālo o le Atua. O nei fa'amasino fa'afoliga ma le 'au faitio ua latou tu'uina latou lava i le itū o le anetikeriso, "O lē tete'e atu, ma fa'amaualugaina e ia iā te ia e sili i mea uma lava ua ta'uatuaaina, ma mea uma ua ifo i ai tagata, o lea ua ti'eti'e ai o ia i le malumalu o le Atua, peiseā'i o le Atua o ia, o lo'o fa'aali mai o ia, o le Atua lava o ia" (II Tesalonia 2:4).

O le agasala e ta'ita'i ai i i'uga e silisili ona fa'anoanoa, e mālūlū, e faitio, o le agaga e lē fa'amagalo e pei o amio a le 'au Faresaio. Afai o le lagona i le tapua'iga e aunoa ma se alofa, e lē o i ai Iesu i lea mea; o le malamalama o Lona fa'atasi ai e lē i ai fo'i. Pe o le ā lava le tele o gaoioiga po o le naunau a e a lē i ai Keriso, e lē mafai ona fa'atumuina lea avanoa. E mafai ona matagofie le mataāla ia iloa ai pona ma ila o isi, peita'i o so'o se tasi e fiafia i lea agaga, ua fetalai mai Iesu, "O oe na le pepelo, ia e mui tiā'i le utupoto i lou lava mata, ona e iloa lelei ai lea e 'eu'eseina atu le fāsi la'au i le mata o lou uso" (Mataio 7:5).

(10) INA UA MAVAE LO LA PA'Ū, O AI NA TU'UA'I E ATAMU MA EVA MO LE LA AGASALA?

Ona fa'aapea mai lea o Atamu, O le fafine na e 'aumai iā te a'u, ua na 'aumai iā te a'u le fua o le la'au, ona 'ou 'ai ai lea. Ona fetalai atu lea o Ieova le Atua i le fafine, Se ā lenā mea ua e faia? Ona tali mai lea o le fafine, Na fa'asesē mai le gata iā te a'u, ona 'ou 'ai ai lea. Kenese 3:12-13

Mau e tau i ai: Esoto 32:21-24; I Samuelu 15:3, 20, 21; Luka 10:29

O ia lē nofosala i le sesē e muamua masalomia i le sesē. O lē e ta'usalaina se isi, o ia lea o lo'o taumafai e ufiufi pe fai se 'alofaga o le leaga o lona ia lava loto. O le agasala na ala ai ona maua le iloa o le leaga; ina ua agasala loa le ulua'i tagata, na amata lea ona tau tu'ua'i e le isi le isi, ma o le uiga moni fa'aletagata lea o le a fa'aailoa pe afai e lē pulea e le alofa tunoa o Keriso.

(11) O LE Ā LE MEA E I'U INA TA'ITA'I I AI LE AGAGA E LĒ FA'AMAGALO MA TAUMOLIMOLI, MA O LE A FAI MA FA'AMANUIĀGA E O'O MAI I Ē LAVĀTIA ONOSA'I MA LE LOTO MAMĀ?

'Amu'ia ē sauāina ona o le amiotonu; auā e ō latou le malō o le lagi. Mataio 5:10

Mau e tau i ai: Salamo 37:12; Luka 26:22; 21:12; Ioane 15:20

Pe a fa'ataga ma fīfīa le tagata i lenei uiga va'ava'ai vale, o le a lē malie i le fa'asino atu le mea e manatu o se fa'alētonu i lona uso. Afai e lē manuia faiga faifai lemū a e lē mafai ona ia faia mea latou te manatu e tatau ona faia, o le a fai loa faiga fa'amalosi. O le a faia le mea sili ona mafai i lo latou malosi e fa'amalosia ai tagata ia feagai ma o latou manatu pe o le mea lea e sa'o. O le mea lea na faia e Iutaia i ōna pō o Keriso ma o le mea fo'i lenā sa faia e le ekalesia talu mai le taimi na sē 'ese ai mai le alofa tunoa o Keriso. Ina ua ia iloa ua mavae 'ese le mana o le alofa, na ia 'a'apa atu loa i le lima malosi o le malō e fa'amalosia ai āna a'oa'oga ma fa'ataunu'uina āna poloa'iga. O le mea lilo lenei a tulafono uma tau tapuā'iga ua fa'atulafonoina, ma o le mea lilo o sauāga uma lava mai le taimi o Apela e o'o mai lava i o tatou taimi.

(12) O LE Ā LE MEA UA ŌLE MAI LE ALI'I IA TATOU FAIA I LE AGAGA O LE LONA ALOFA MA O LO TATOU FA'AA'OA'O, A E LĒ O FAIGA FA'AMALOSI INA IA FA'AMASINO E TA'USALAINA AI?

O lo'o o fa'aapea mai Ieova, Ō mai ia, inā tatou filifili ia, e ui lava ina pei o ofu mūmū a outou agasala, e sisina ia e pei o le kiona; e ui lava ina mūmū ia e pei o le 'ie'ula'ula, e 'avea e pei o fulufulu mamoe. Isaia 1:18

O Keriso na te lē tulia a e tosina tagata iā te Ia. E pau le fa'amalosiga na te fa'aaogāina o le taofi o le alofa. Pe a amata ona sa'ili le ekalesia e fa'alagolago i le pule fa'alelalolagi, o le fa'aailoga lenā ua matuā leai lava se malosi o Keriso - ua mavae le alofa fa'ale-Atua.

(13) O LE Ā LE NAUNAUTA'IGA O LE ALI'I IA FAIA I LOTO O ŌNA TAGATA?

'Ou te foa'i atu fo'i ia te i latou le loto e tasi, ma 'Ou foa'i atu le loto fou i totonu iā te outou; 'Ou te 'ave'eseina le loto fatu ai totonu i o latou tino, ma 'Ou foa'i atu le loto 'a'ano iā te i latou. Esekielu 11:19

Mau e tau i ai: Esekielu 36:26; Ieremia 31:33; Efeso 4:23, 24

O le faigatā ua tula'i mai i tagata o le ekalesia, ma o iinei e ao ina maua se fofō. Ua fa'ailoa mai e Iesu e ao i lē faia le tu'ua'iga ona muamua 'ave 'ese le utupoto i lona ia lava mata, 'ave 'ese lona agaga va'ava'ai vale, fa'aali ma lafoa'i ana ia lava agasala, a e lē muamua taumafai e fa'asa'o isi. Auā "E leai fo'i se la'au lelei e fua mai i fua leaga; e leai fo'i se la'au leaga e fua mai i fua lelei" (Luka 6:43). O lenei agaga taumolimoli o lo'o e fiafia i ai o le fua leaga, ma e fa'ailoa mai o le la'au e leaga. E lē aogā ona outou fausia a'e outou lava i le fa'afiaamionotonu. Tou te mana'omia le suia o le loto. E tatau ona o'o lenei tulaga iā te outou a e le'i feagai ma le fa'asa'oina o isi; auā "auā o le tele o mea i le loto e tautala mai ai le gutu" (Mataio 12:34).

(14) O LE Ā LE TATALO E AO INA TATOU TATALO AI INA IA LAVEĀ'I MAI AI TATOU MAI LE AGAGA FAITIO, MA IA MAUA SE AMIO LELEI E TOSINA AI NISI?

Le Atua e, ia e faia se loto mamā mo a'u; ma ia e fa'afouina se loto mau i totonu iā te a'u. 'Aua e te lafoa'iina a'u i Ōu luma; 'aua fo'i e te 'ave'eseina Lou Agaga Pa'ia iā te a'u. Ia e fa'afo'isia mai iā te a'u le 'oli'oli o le olataga mai iā te 'Oe; ia e taofimauiina fo'i o a'u ma le loto fiafia. Salamo 51:10-12

Mau e tau i ai: Salamo 51

Pe a o'o mai se taimi faigatā i le olaga o se tagata, ma e taumafai e avatu se fautuāga po o se a'oa'iga, o āu 'upu e pau le mamafa po o le tāua mo le lelei e fua i āu fa'ata'ita'iga ma le agaga na e maua fo'i e 'oe. E tatau ona e lelei a e te le'i faia se mea lelei. E te lē mafai ona e tu'uina atu se mea o le mafai ona suia ai nisi se'i vaganā ua fa'amaulalo ma fa'amamāina ma fa'amalūlūina lou loto e le alofa tunoa o Keriso. Pe afai e o'o mai lenei suiga iā te 'oe, o le a faigofie iā te 'oe ona e ola e fa'amanuiaina ai nisi e pei o le rosa e sasala atu lona manogi po o le vine ma ōna fuifuivine.

(15) PE AFAI E AFIO KERISO I O TATOU LOTO, O LE A FA'APEFEA A TATOU 'UPU A O TATOU SA'ILI E FESOASOANI I NISI?

O le 'upu ua fai fa'atatauina, o moli auro ia i ato ario togitogi fa'amamanuina. Fa'ata'oto 25:11

Mau e tau i ai: Fa'ata'oto 15:23; 24:26; Failauga 12:10; Isaia 50:4

Pe afai e i ai Keriso iā te 'oe "o le fa'amoemoe o le mamalu," o le a leai se tulaga e mātā'i ai isi, ia fa'alauiloa o latou sesē. O le a lē sa'ili e molia ma ta'usala, a o le a e fuafua e fesoasoani, ia fa'amanuia, ma lavea'i. I le feagai ai ma ē ua sesē, o le a e fa'atāua le fa'atonuga ma le lapata'iga, "ma ia fa'aeteete 'oe ina ne'i fa'aosoosoina fo'i 'oe" (Kalatia 6:1). O le a e manatua le tele o taimi na e sesē ai ma le faigatā o le maua o le auala tonu ina ua e alu 'ese mai ai. O le a lē tuleia lou uso i le pouliuli e sili atu, a e peita'i o le a e alu atu, ma le loto ua tumu i le alofa, ma ta'u iā te ia le faigatā ua ia i ai.

(16) O AI E TATAU ONA TATOU VA'AVA'AI I AI E TAOFIA TATOU MAI LE AGAGA O LE FAITIO PO O LE LOTO FA'AMAUALUGA?

Ma ia va'ava'ai atu iā Iesu o Lē na te ta'ita'iina ma Lē na te fa'a'ato'atoaina le fa'atuatua; o Lē na onosa'i i le satauro, na fa'atauva'a iā te Ia le mā, ona o le 'oli'oli sa tu'u i Ōna luma, ua nofo fo'i o Ia i le itū taumatau o le nofoāli'i o le Atua. Eperu 12:2

Mau e tau i ai: Eperu 12:3; Iuta 1:21

O ia lē e va'ava'ai so'o i le satauro o Kalevario, ma manatunatu o ana agasala ua tu'uina ai le Fa'aola i inā, e lē mafai lava ona ia taumafai e fa'atusatusa le tele o lona solitulafono i isi. Na te a'ea le nofoa fa'amasino ina ia aumai le moliaga e fa'asaga i se isi. E lē mafai ona i ai se agaga o le faitio pe o le fa'aeaina o ia lava i le vaega o i ai latou o ē o lo'o savavali i le ata o le satauro o Kalevario.

(17) O LE Ā LE AGAGA TATALO E AO INA IĀ I TATOU PE AFAI TATOU TE I LE TULAGA E FAUTUAINA I LATOU O Ē UA VA'AIA UA Ō SESĒ MAI LE AUALA?

O lenei, le 'au pele e, ia outou fa'aeteete iā te outou, auā ua mua'i iloa e outou, ne'i ta'ita'i'eseina outou i le sesē o ē fa'alētaupulea, tou te pa'u'ū ai i le mea sa outou tumau ai. II Peteru 3:17

Se'i vaganā ua e lagona e te mafai ona fai fa'ataulaga ofo lou lava uiga fia mamalu, ma tu'uina atu lou ola ina ia laveā'i ai lou uso ua sesē, ia e lafoā'i le utupoto mai lou mata ina ia mafai ona e sauni e fesoasoani i lou uso, ona mafai lea ona e fa'alatalata iā te ia ma pa'i atu i lona loto. E leai lava se tasi ua toe maua mai nai le tulaga sesē e ala i le fa'asala ma le a'oa'i atu i ai; a e to'atele ua tulia 'ese mai iā Keriso ma ta'ita'i ia fa'amautūina i o latou loto ia tete'e i le mea moni.

O le agaga maulalo, filemū, ma le uiga tausa'afia, atonu e mafai ona laveā'i mai ai lē ua sesē ma ufiufi ai agasala e tele. O le fa'aalia o Keriso i lau lava amio o le a fai ma malosi'aga e suia ai i latou uma tou te feiloā'i. Ia fa'atinoina iā te 'oe Keriso i aso uma, ma o le a fa'aailoa e ala iā te 'oe le mana foafoa o Lana afioga - e agamalū ma le uiga fa'atosina, a e malosi le galuega o le toe fa'afouina o isi agaga i le matagofie o le Ali'i lo tatou Atua.

Na 'ou ōle i le Atua ia fa'amamā mai lo'u loto ma aumai iā te a'u Lona alofa mo isi, ina ia mafai ona 'ou va'ai iā i latou e ala i Ōna fofoga ma alofa iā i latou mo i latou lava e aunoa ma le faitio po o le ta'usalaina.

Li'o le Tali: **Ioe** **Lē Mautonu**

Pe afai e vala'auina a'u e faufautua i nisi o ē ua sē 'ese mai le auala, 'Ou te ōle i le Atua ia aumai iā te a'u Lona Agaga ia 'ou lē pa'ū atu i lea lava agasala e tasi.

Li'o le Tali: **Ioe** **Lē Mautonu**

'Ou te filifili e tu'u 'ese le galuega a le fa'amasino iā te Ia Lē na te fa'aali mea uma ma aumai le fa'ai'uga tonu i tagata uma.

Li'o le Tali: **Ioe** **Lē Mautonu**

Manatu o Su'esu'ega

Tatalo Mana'omia

Tali o Tatalo

'Aua le Lafoina a Outou Penina i Luma o Puā'a

Lesona 30

O lenei lesona e fa'avae i luga o le Mataio 7:6.

(1) O LE Ā LE FAUTUĀGA NA TU'UINA ATU E KERISO E FA'ATATAU I LE FELAFOLAFOLA'IGA MA I LATOU O LO'O MANATU IA TAUEMU I LE TALA LELEI?

'Aua tou te avatu le mea pa'ia i uli; 'aua fo'i tou te lafo a outou penina i luma o puā'a, ne'i latou soli ai i o latou vae, ma liliu mai, i le saeia ai outou. Mataio 7:6

Mau e tau i ai: Mataio 22:3-6; II Timoteo 4:14, 15; Eperu 10:29

Na fetalai sa'o Iesu iinei i le vaega o ē e leai so latou naunau e sosola 'ese mai le pologa o le agasala. Ina ua latou fialia i le leaga ma latou uiga lē mamā ua matuā maulalo ua o'o ai i se tulaga inosia, ua pipi'i i le ti'āpolo ma o le a lē toe vavae 'ese mai ai. O 'au'auna a Keriso e lē tatau ona fa'atagaina i latou na e fai ma fa'alavelave ina ua latou fai le tala lelei e na o se mea e fefinaua'i ma fa'atauemu ai.

(2) O FEA E AGA'I I AI FELAFOLAFOLA'IGA MA Ē VĀLEA, MA O LE Ā LE AUALA A KERISO E AO INA TATOU UI AI?

Auā e lē tatau ona finau o le 'au'auna a le Ali'i, a ia agamalū i tagata uma, ia mafaia ona a'oa'o atu, ma ia onosa'i, ia a'oa'o atu ma le agamalū i ē o finau mai; pe mafai lava le Atua ona foa'i atu iā te i latou le salamō, ina ia latou iloa lelei le 'upu moni. II Timoteo 2:24-25

(3) O LE Ā LE MEA E TATAU ONA TATOU FAIA A E LĒ O LE 'AVEA MA FA'AMASINO PE O AI O LE A TALIA LE TALA LELEI PE LE LEAI?

Inā tatalo ia mo i matou fo'i, ina ia fa'aavanoa mai e le Atua se faitoto'a o le 'upu mo i matou, e tautala atu ai i le 'upu iā Keriso sa lilo, ona o lea fo'i ua noanoatia ai a'u, ina ia 'ou fa'a'ailoa atu ai, fa'apei ona tatau ona 'ou tautala atu ai. Kolose 4:3-4

A o le Fa'aola e Na te lē tu'ua se agaga e tasi, po o le ā lava le loloto o le agasala ua goto i ai, o lē e loto malie e talia 'upu moni tāua a le lagi. I telona ma fafine talitane o Āna afioga o le amataga o se olaga fou. O Maria le Maketala, o lē na tuli'ese ai agaga leaga e to'afitu, o ia le tagata mulimuli i le tu'ugamau o le Fa'aola ma na muamua fa'afeiloā'i iā te Ia i le taeao o Lona toe tū. O Saulo fo'i o Tasese, o se tasi na sili ona tinoū o fili o le tala lelei, na 'avea o Paulo le 'au'auna fa'amaoni a Keriso. I lalo ifo o foliga o le ita ma le ino'ino, e o'o lava i lalo ifo o le amioleaga ma le ta'uvalea, o lo'o natia ai se agaga e mafai ona laveā'i e le alofa tunoa o Keriso ina ia pupula e pei o se ma'atāua i le paleali'i o le Fa'aola.

(4) E ALA I LE MANA O LE AGAGA PA'IA, O LE Ā LE MEA O LE A FAIA E LE ALI'I E TALIA AI A TATOU TATALO MO LANA TA'ITA'IGA?

Ia lē aunoa a outou 'upu ma le alofa, ia fa'amāi i le masima, ia iloa e outou ona fai fa'atatau se tali i tagata e ta'ito'atasi uma. Kolose 4:6

(5) PE AFAI O LE A LĒ AOGĀ 'UPU, O LE Ā LE MEA O LE A FAI IA FA'ALOLOGO AI LE VALEA O TAGATA PŌULIULI?

Auā o le finagalo lea o le Atua, o la outou amio lelei ia fa'alologo ai le valea o tagata pouliuli. I Peteru 2:15

(6) PE AFAI TATOU TE FA'ATAUNU'UINA LE GALUEGA TELE O LE FA'ASOA ATU O LE TALA LELEI MA LE FA'AMAULALO MA LE FA'AUTAUTA, O Ā FOLAFOLAGA E MAFAI ONA TATOU TAPA I AI?

O Ia fo'i na sauni i matou ia tatau ona fai ma 'au'auna o le feagaiga fou, e lē o le tusi, a o le Agaga; auā e ā le tusi e fasioti, a e ā le Agaga e fa'aola. II Korinito 3:6

E fa'aapea fo'i La'u 'upu e alu atu ai Lo'u gutu, e lē fo'i mai fua iā te A'u; a e peita'i e faia le mea 'Ou te loto i ai, e manuia fo'i i le mea 'Ou te 'auina atu ai. Isaia 55:11

*O le galuega a lē amiotonu, e i'u lea i le ola; a o mea e maua e lē ua amio leaga, e i'u lea i le sala. **Fa'ata'oto 10:16***

*E mafai fo'i e le Atua ona fa'afaula'i iā te outou o mea alofa uma; o lo'o fa'alavaina i aso uma o mea uma iā te outou i mea uma lava, ina ia faula'i iā te outou o galuega lelei uma. **II Korinito 9:8***

*O lenei, o Lē ua foa'i tele mai saito i lē ua lūlū ai, ma le mea e 'ai e 'ai ai, ia foa'i mai e Ia, ma ia fa'ateleina la outou fua, ma fa'atupu e Ia le fua o la outou amiotonu. **II Korinito 9:10***

*A e afai ua tupu mai le Atua, tou te lē mafai ona fa'aumatia; ina ne'i iloa ua outou fai taua i le Atua lava. **Galuega 5:39***

*Ona maliliu ane ai lea o Iesu, ua fetalai atu iā te i latou, ua fa'aapea atu, Ua tu'uina mai iā te A'u le pule uma lava i le lagi ma le lalolagi... ia outou a'oa'oa atu iā te i latou ia tausi i mea uma ua 'Ou fai atu ai iā te outou; fa'auta fo'i, 'Ou te iā te outou i aso uma lava, e o'o lava i le gata'aga o le lalolagi. **Mataio 28:18, 20***

(7) E UI LAVA E IĀ I TATOU LE TOFI E 'AVEA O IPU MA VA'A ATOFAINA, E AO INA TATOU MANATUA O AI NA TE FA'ATUPUINA MEA UMA?

*O lenei, e lē o lē totō, e lē o lē fa'asūsū; a e peita'i o le Atua o Lē na te fa'atupuina. A o lē totō fo'i ma lē fa'asūsū, e tasi lava i la'ua; a e ta'itasi ma lona lava tau e maua, e tusa ma lana lava galuega. Auā o le 'au faigaluega i matou fa'atasi ma le Atua; o outou o le fa'ato'aga a le Atua o outou o le fale o fai o le Atua. **I Korinito 3:7-9***

O lenei ua 'ou malamalama i le fautuāga a Iesu i le a'oa'oina o a'u ina ia 'aia 'ou te 'au ai i se finauga e fa'atatau i le tala lelei. 'Ou te tatalo mo le poto ia iloa ai le taimi e tautala ai ma le taimi e lē tautala ai; ma ia ta'ita'i e Ia lo'u laulaufaiva i 'upu e tautala atu ai pe a ua tatau ai.

Li'o le Tali: Ioe Lē Mautonu

Ua 'ou iloa le tāua o le fa'atonuina e le Agaga Pa'ia o 'upu 'ou te tautala ai ma ia fa'amāi i le masima ina ia mafai ona susulu atu ai le malamalama ma le fa'amoemoe iē o lo'o i le pōuliuli, ma 'aia ne'i latou tofoina ai le 'o'ona i o latou fofoga.

Li'o le Tali: Ioe Lē Mautonu

'Ou te tatalo, pe a talfeagai ai, ia 'ou tautala i gaoioiga a e lē na o 'upu. Tau ina ia fa'atumuina a'u e le Agaga Pa'ia ia mafai ai ona 'avea a'u o se molimau malos iā i latou uma matou te fetaia'i.

Li'o le Tali: Ioe Lē Mautonu

'Ou te fa'afetai mo le tele o folafolaga e mafai ona 'ou 'a'apa i ai a o o'u fa'asoa le tala lelei i isi. 'Ou te tatalo ia 'ou iloa i taimi uma lava o "fa'ateleina" e mai le Atua ma ia tu'uina iā te Ia le vi'iga.

Li'o le Tali: Ioe Lē Mautonu

Manatu o Su'esu'ega

Tatalo Mana'omia

Tali o Tatalo

Ōle, Sa'ili, ma Tu'itu'i

Lesona 31

Fa'avaeina lenei lesona i le Mataio 7:7.

(1) O LE Ā LE FOLAFOLAGA E TOLU ONA VAEGA NA TU'UINA ATU E KERISO IĀ I LATOU UMA O Ē TALIA?

Ia outou ōle atu, ona foa'iina mai ai lea iā te outou; ia outou sa'ili, ona outou maua ai lea; ia outou tu'itu'i atu, ona tōina ai lea iā te outou. Mataio 7:7

Mau e tau i ai: Mataio 21:22; 6:33

E leai se avanoa mo le lē talitonu, lē malamalama, po o le fa'auigasesēina o Āna 'upu, ona na toe fetalai mai le Ali'i le folafolaga e fai fa'atolu. E naunau iā i latou o ē sa'ili le Atua ma talitonu iā te Ia Lē e mafai ona faia mea uma lava. O lea na Ia fa'aopoopo atu ai, "Auā ai se ōle atu, e maua e ia; o lē sa'ili fo'i, e iloa e ia; e tōina fo'i i lē tu'itu'i atu" (Mataio 7:8).

(2) O LE Ā LE TOFI UA SAUNIA MO I TATOU, E UI LAVA E TATOU TE LĒ TUSA AI?

O le mea lea ia tatou fa'alatalata atu ai ma le fa'amalosi i le nofoāli'i o le alofa tunoa, ina ia alofaina ai o i tatou, ia maua ai fo'i le alofa tunoa e fesoasoani mai i ōna aso e tatau ai. Eperu 4:16

Mau e tau i ai: Efeso 3:12; 2:18

E lē āu'ili'ili mai e le Ali'i ni tu'utu'uga vaganā ua e fia maua Lona alofa tunoa, mana'omia Lana fautuāga, ma naunau i Lona alofa. "Ōle." O le ōle, e fa'ailoa ai ua e mautinoa lou mana'omia; ma afai e te ōle atu i le fa'atuatua, o le a e maua. Ua folafola mai le Ali'i i Lana afioga, ma e lē mafai ona lē taunu'u. Afai e te sau ma lou salamō fa'amaoni e lē mana'omia lou lagona ua e manatu fa'asausili i le ōle atu mo se mea na folafolaina e le Ali'i. Afai e te ōle atu mo fa'amanuiāga e te mana'omia, ina ia e maua le ato'atoa o le amio e pei o Keriso, e ta'utino le Ali'i iā te 'oe auā o lo'o e ōle atu e pei o le folafolaga o le a fa'amaonia.

(3) PE AFAI TATOU TE FA'AALI A TATOU AGASALA MA ŌLE ATU MA LE LOTO FA'AMAONI, O LE Ā LE FOLAFOLAGA MATAGOFIE E MAFAI ONA TATOU FA'ALAGOLAGO I AI?

A e afai tatou te fa'aali a tatou agasala, e fa'amaoni o Ia, ma le amiotonu e fa'amagalo ai a tatou agasala, ma fa'amamā mai iā i tatou i amiolētonu uma lava. I Ioane 1:9

Mau e tau i ai: II Nofoā'iga Tupu 7:14, 15

O lou lagona ma iloa o 'oe o le tagata agasala e lava le mafuaga lenā mo le ōle atu mo Lona alofa tunoa ma le fa'apalepale. O le tulaga o lo'o e i ai e mafai ona e sau ai i le Atua e lē ona o le a e pa'ia, peita'i ona o lou naunau ia fa'amamā 'oe mai agasala ma solitulafono uma lava. O le finauga e mafai ona tatou 'ai'o'i atu nei o lo tatou mana'oga aupito sili lenā, o lo tatou tulaga e matuā lē mafai ona tatou faia se mea, o le a 'avea ai o Ia ma Lona malosī e togiola ai, o lo tatou mana'oga muamua lea.

(4) PE AFAI TATOU TE SA'ILI LE ALI'I, O LE Ā LE FOLAFOLAGA MATAGOFIE E MAFAI ONA TATOU MAUA?

Auā ai sē ōle atu, e maua e ia; o lē sa'ili fo'i, e iloa e ia; e tōina fo'i i lē tu'itu'i atu. Mataio 7:8

Mau e tau i ai: Ioane 6:37; Salamo 102:17; Isaia 55:7

"Sa'ili." Ia lē na o le naunau mo Āna fa'amanuiāga, a e o Ia lava. "Ia e fa'amasani ma Ia, e te filemū ai; o le mea lea e o'o mai ai le manuia iā te 'oe" (Iopu 22:21). Sa'ili, ona e maua ai lea. O lo'o sa'ili le Atua iā te 'oe, ma o le fa'anaunauga o lo'o e lagona ia e sau iā te Ia, o le tosina a Lona Agaga. Ia gaua'i iā te Ia. O lo'o talosaga o Ia mo ē ua fa'aosoosoina, o ē ua

sesē, ma ē lē fa'atuatua. O lo'o Ia sa'ili ina ia si'itia i latou ia mafuta ma Ia. "Afai e te sa'ili atu iā te Ia, ona e maua ai lea o Ia" (I Nofoā'iga Tupu 28:9).

(5) A TATOU FA'ALOGO LOA I LE VALA'AU A LONA SI'UFOFOGA, E FA'APEFEA ONA TATOU SA'ILI I LE ALI'I PE AFAI TATOU TE NAUNAU FA'AMAONI IA MAUA O IA?

*E sa'ili mai outou iā te A'u, tou te maua fo'i, pe a outou sa'ili mai iā te A'u ma outou loto atoa. **Jeremia 29:13***

Mau e tau i ai: Salamo 119:2; Ioelu 2:12

"Tu'itu'i." Tatou te ō atu i le Atua ona o le vala'aulia fa'apitoa, ma o lo'o Ia fa'atali mai e talia i tatou i Lona afio'aga. O le 'au so'o muamua na mulimuli iā Iesu e le'i mālilie i se talanoāga fa'avavevave ma Ia i le ala; na latou fai atu, "Rapi e,... o fea e te mau ai?... Ua la ō ane, ma matamata atu i le mea ua mau ai o Ia; ona latou nonofo lea ma Ia i le aso" (Ioane 1:38, 39). E mafai fo'i ona talia tatou i se mafutaga vavā lalata ma le Atua. "O lē nofo i le mea lilo o i ai Lē Silisili 'ese, e mau o ia i le paolo o Lē e ōna le malosi uma lava" (Salamo 91:1).

O i latou uma o ē fa'anaunau i le fa'amanuiāga a le Atua ia tu'itu'i ma fa'atalitali i le faitoto'a o le alofa tunoa ma le mautinoāga, e fa'apea atu, 'Auā o 'Oe le Ali'i e, na fetalai mai, "Ai sē ōle atu, e maua e ia; o lē sa'ili fo'i, e iloa e ia; e tōina fo'i i lē tu'itu'i atu" (Mataio 7:8).

(6) O LE MEA MONI LAVA, O AI LĒ E MUAMUA TU'ITU'I?

*Fa'auta, 'Ou te tū atu i le puipui ma tu'itu'i atu; ai se tasi e fa'alogo mai i Lo'u leo, ma tatala mai le puipui, 'Ou te ulufale atu iā te ia, ma te tali sua fo'i ma ia, o ia fo'i ma A'u. **Fa'aaliga 3:20***

Mau e tau i ai: Luka 12:36; Ioane 14:23

(7) INA IA FESOASOANI IA TATOU MALAMALAMA, O LE Ā LE FESO'OTA'IGA FA'ALELALOLAGI NA FA'ATUSATUSA I AI E IESU LE FINAGALO MALIE O LE TAMĀ E FA'AFETAIA'I MANA'OGA FA'ALEAGAGA MA LE FA'ALETINO O LANA FANAU?

*O ai fo'i se tagata o outou pe a ōle mai lona atali'i se areto, na te avane ea iā te ia se ma'a?... O lenei, o outou e leaga, afai ua iloa e outou ona avatu o mea lelei mā a outou fanau, e lē sili ea ona foa'iina mai e lo outou Tamā o i le lagi o mea lelei i ē ōle atu ai iā te Ia? **Mataio 7:9, 11***

Mau e tau i ai: Luka 11:11-13

Na silasila atu Iesu iā i latou na fa'apotopoto atu e fa'alogologo i Āna 'upu, ma ua Ia fa'anaunau ina ia fa'atāua e le motu o tagata le alofa tunoa ma le agalelei o le Atua. Mo se fa'ata'ita'iga o latou mana'oga ma le finagalo o le Atua e foā'ifua atu, na Ia tu'uina atu i o latou luma se tamaitiiti o lo'o ōle atu i lona tamā fa'alelalolagi mo se areto. Ua fetalai atu Ia, "O ai fo'i se tagata o outou pe a ōle mai lona atali'i se areto, na te avane ea iā te ia se ma'a?" (Mataio 7:9). Na Ia fa'atagisia le alofa fa'apalepale, o le uiga moni o le alofa fa'amātua mo lona atali'i, ma Ia fa'apea atu, "O lenei, o outou e leaga, afai ua iloa e outou ona avatu o mea lelei mā a outou fanau, e lē sili ea ona foa'iina mai e lo outou Tamā o i le lagi o mea lelei i ē ōle atu ai iā te Ia?" (Mataio 7:11).

E leai se tagata e i ai le loto o le tamā o le a liliu 'ese mai lona atali'i o lo'o fia 'ai ma o lo'o ōle mai mo se areto. E latou te manatu ea e mafai e lea tamā ona fa'apea e lē tāua lona atali'i, e fa'alili ia i le fa'apea o lea o le a maua a e mulimuli ane e leai se areto? E na te folafola o le a avatu se mea 'ai lelei, ona avatu lea i ai se ma'a? E tatou e se tasi ona fa'alumaina le Atua i le manatu Na te lē tali i mana'oga o Lana fanau?

(8) O LE Ā LE MEA E FA'ANAUNAU LO TATOU TAMĀ I LE LAGI E MATUĀ FOĀ'I MAI IĀ I TATOU?

*O lenei, o outou e leaga, afai ua iloa e outou ona avatu o mea lelei mā a outou fanau, e lē sili ea ona foa'iina mai e lo outou Tamā o i le lagi o mea lelei i ē ōle atu ai iā te Ia? **Mataio 7:11***

Mau e tau i ai: Mataio 6:30; Ioane 4:10

(9) O LE Ā LE MEAALOFA E SILISILI I MEAALOFA UMA MA O LEA E FA'ANAUNAU O IA E TU'UINA MAI MO I TATOU?

*O lenei, o outou e leaga, afai ua iloa e outou ona avatu o mea lelei mā a outou fanau; e lē sili ea ona foa'iina mai e lo outou Tamā o i le lagi le Agaga Pa'ia i ē ōle atu ai iā te Ia? **Luka 11:13***

Mau e tau i ai: Fa'ata'oto 1:23; Ioane 7:37-39; Iakopo 1:17

Afai o outou o tagata ma e leaga, "ua iloa e outou ona avatu o mea lelei mā a outou fanau; e lē sili ea ona foa'iina mai e lo outou Tamā o i le lagi le Agaga Pa'ia i ē ōle atu ai iā te Ia?" (Luka 11:13). O le Agaga Pa'ia, Lona sui, o le meaalofo e aupito sili i meaalofo uma. O "mea lelei" uma e aofia ai iinei. O Ia Lē na foafoa mea uma na lē mafai ona tu'uina mai se isi mea e tele atu, se isi mea e sili atu. Afai tatou te fa'atoga atu i le Ali'i ina ia alofa mai iā i tatou i o tatou mafatiāga, ma ia ta'ita'i tatou e Lona Agaga Pa'ia, e lē mafai ona Ia liliu'ese mai iā tatou talosaga.

(10) ATONU O O TATOU MĀTUA FA'ALELALOLAGI E MAFAIA, A E O LE Ā LE MEA E LĒ MAFAI E LE ATUA ONA FAI?

*E galo ea i le fafine lana tama ua susu, na te lē alofa i le tama a lona lava manava? ai lava e galo iā te i latou, a e lē galo lava 'oe iā te A'u. **Isaia 49:15***

Mau e tau i ai: Eperu 13:5; Salamo 139:13-18; 94:14; 37:28; 27:10

E mafai fo'i e se mātua ona liliu 'ese mai lana tama ua fia'ai, a o le Atua e lē mafai ona Ia te'ena le tagi o le loto a lē ua matelāina ma pagātia. Ua Ia fa'amatalaina Lona alofa fa'apalepale! Mo i latou o ē i ōna pō o le pōuliuli na lagona ai fa'apea o le Atua ua lē manatua i latou, o le fe'au lenei mai le finagalo o le Tamā: "A ua fai mai Siona, Ua lafoa'iina a'u e Ieova; ua galo mai a'u i le Ali'i. E galo ea i le fafine lana tama ua susu, na te lē alofa i le tama a lona lava manava? ai lava e galo iā te i latou, a e lē galo lava 'oe iā te A'u. Fa'auta, **ua 'Ou taia lou fa'atusa i O'u alofilima**; e tumau ōu pā i O'u luma" (Isaia 49:14-16).

(11) PE AFAI TATOU TE ŌLE ATU E TUSA AI MA LONA FINAGALO, O LE Ā LE FOLAFOLAGA E MAFAI ONA TATOU TAPA I AI?

*O lenei fo'i le fa'amalosia ua tatou maua i Ōna luma, pe afai tatou te ōle atu ai se mea e tusa ma Lona finagalo, e fa'afofoga mai o Ia iā te i tatou. Afai fo'i ua tatou iloa, e fa'afofoga mai o Ia iā te i tatou e se mea tatou te fa'atoga atu ai, ua tatou iloa e maua e i tatou mea tatou te fa'atoga atu ai iā te Ia. **I Ioane 5:14-15***

Mau e tau i ai: I Ioane 3:22; Ieremia 33:3; Efeso 3:20

O folafolaga uma i le afioga a le Atua ua aumai ai ma matā'upu mo talosaga, e tu'u mai ai ma ta'utinoga a Ieova e fai ma fa'amaoniga. O a lava manuia fa'aleagaga tatou te mana'omia, o lo tatou avanoa lea e tatou te tapa i ai e ala iā Iesu. E mafai ona tatou tali i le Ali'i, ma le manatu fa'afaigofie e pei o le tamaitiiti, le mea tonu o tatou mana'omia. E mafai ona tatou fa'a'ailoa iā te Ia o tatou mana'oga fa'aletino, ōle atu iā te Ia mo mea'ai ma lavalava fa'apea fo'i ma le areto o le ola ma le ofu o le amiotonu o Keriso. O lou Tamā i le lagi e silafia e te mana'omia mea uma ia, ma ua vala'auina 'oe ia ōle atu iā te Ia e fa'atatau i ia mea. O le suafa o Iesu e ala ai ona maua mea uma. O le Atua na te fa'amamaluina lea suafa, ma o le a maua ai mea uma tatou te mana'omia mai le tamā'o'aiga o Lona 'a'ao māfola.

(12) E UI INA SOLO MAI MAUGA I O TATOU AUTAFA, O LE Ā LE MAUTINOĀGA UA TATOU ILOA E FA'ATATAU I LE FA'APALEPALE MA LE ALOFA TUNOA O LE ATUA?

*E fou mai Ia i taeao uma; e tele Lou fa'amaoni. **Auēga 3:23***

Mau e tau i ai: Auēga 3:21-26

Ia 'a'ua ne'i galo i lou sau i le Atua o Ia le Tamā, ia e iloa lou vā feagai ma Ia e pei o 'oe o se tamaitiiti. E lē gata ina e talitonuina Lona agalelei, a e ia e gaua'i i Lona finagalo i mea uma, ina ua e iloa e lē suia Lona alofa. E te tu'u atu 'oe lava ia faia Lana galuega. O i latou o ē na Ia fetalai atu i ai ina ia mua'i sa'ili le malō o le Atua ma Lana amiotonu, na tu'u atu i ai e Iesu le folafolaga, "Inā ōle atu ia, ona outou maua ai lea" (Ioane 16:24).

(13) O LE Ā LE MEAALOFA E LĒ MAFA'AMATALAINA NA AUMAI E LE ATUA E 'AVE'ESEA SO'O SE ATA LAFOIA O LE MASALOSALO ONA O LO'O IA FA'ANAUNAU E FOA'IFUAINA MAI IĀ I TATOU MEA LELEI UMA?

O Ia lava sa na lē fa'asaoina Lona lava Ālo, a ua tu'uina mai o Ia e sui a'i i tatou uma lava, e lē foa'i fua mai ea e Ia iā te i tatou mea uma lava fa'atasi ma Ia i se ā? Roma 8:32

Mau e tau i ai: II Korinito 5:21

O mea alofa uma a Lē ōna le malosi i le lagi ma le lalolagi o lo'o teuina mo le fanau a le Atua. O meaalofo e matuā tāua ua tu'uina mai mo i tatou e ala i le taulaga taugatā o le toto o le Fa'aola; o meaalofo e fa'amalieina ai mo'omo'oga o le loto, meaalofo e o'o i le fa'avavau, o le a maua ma fīfīa ai latou uma o ē ō atu i le Atua e pei o tamaiti laiti. Ia talia folafolaga a le Atua mo 'oe, folasia i Ōna luma o Āna lava 'upu, ma o le a e maua ai le fīfīa ato'atoa.

Ua 'ou fa'afetai tele mo le folafolaga afai tatou te ōle, sa'ili, ma tu'itu'i, tatou te mautinoa o le a tatou maua ona o le alofa tele ma le tausiga a lo'u Tamā i le lagi.

Li'o le Tali: **Ioe** **Lē Mautonu**

'Ou te fa'afetai tele i le meaalofo silisili, o Iesu ma Lona Agaga Pa'ia; ma 'ou te ōle atu mo nei meaalofo tāua o lo'o Ia naunau e liligi mai i o'u luga.

Li'o le Tali: **Ioe** **Lē Mautonu**

'Ou te fa'afetai i le Tamā ona e lē pei 'Oe o mātua i le lalolagi, o ē i nisi taimi, e tu'ulafoa'i matou, a o lo'o e naunau e foa'i fua mai mea lelei uma mo a'u.

Li'o le Tali: **Ioe** **Lē Mautonu**

Ua 'ou fa'afetai tele ina ua 'ou iloa afai 'ou te sa'ili iā te Ia e mafai ona 'ou malōlō ina ua 'ou mautinoa o le a 'ou maua o Ia; ma e sili Lona amana'ia o o'u mana'oga fa'aleagaga ma fa'aletino nai lo mātua fa'alelalolagi.

Li'o le Tali: **Ioe** **Lē Mautonu**

Manatu o Su'esu'ega

Tatalo Mana'omia

Tali o Tatalo

O le Tulafono Fa'a-Auro

Lesona 32

O lenei lesona e fa'avae i luga o le Mataio 7:12.

(1) O LE Ā LE TA'IALA FA'AVAE NA TU'UINA ATU E KERISO E FA'ATATAU I LO TATOU VĀ FEAGAI AI MA ISI?

O mea uma fo'i tou te loto i ai ia faia e tagata iā te outou, ia fa'apea lava ona outou faia iā te i latou; auā o le tulafono lea ma le 'au perofeta. Mataio 7:12

Mau e tau i ai: Luka 6:31

O le fa'amaoniga o le alofa o le Atua iā i tatou, ua soso'o fa'atasi e Iesu le alofa o le tasi i le tasi i le tu'u aofa'iga o le ta'iala e aofia ai le vā feāloā'i o le mafutaga a le fanau a tagata.

Na popole Iutaia po o le ā se mea e tatau ona latou maua; o le avega o lo latou fa'aātu o le saogalemū lea o mea na latou manatu e tatau ona latou maua, o le pule, me le fa'aaloalo, ma le 'au'aunaga. A e ua a'oa'o mai Keriso e lē tatau ona tatou popole ai fa'apea, Pe o le ā le tele o le vaega o le a tatou maua? peita'i, O le ā le tele e mafai ona tatou avatu? O le fua o lo tatou tiute mo nisi e maua i le mea tatou te fa'atatau o lo latou tiute lava lea mo i tatou.

(2) INA IA MALAMALAMA O TATOU MAFAUFAU LOTO TAU LAVA O IA, O LE Ā LE FA'AMALAMALAMAGA NA FA'AAOGĀ E KERISO E FA'AMAUSALĪ AI LE TA'IALA NA TA'UA O LE TULAFONO FA'A-AURO?

E fa'apenā fo'i lona lua, E te alofa atu i lē lua te tuā'oi, ia pei o 'oe lava iā te 'oe. Mataio 22:39

Mau e tau i ai: Levitiko 19:18; Sakaria 7:10; 8:16, 17

I lo outou fa'atasitasi ai ma isi, tu'u 'oe lava ia i le tulaga o lo'o latou i ai. Tu'u 'oe i o latou lagona, o o latou fa'afitāuli, o fa'amoemoega ua lē taunu'u, o o latou fiafia, ma fa'anoanoāga. Tu'u fa'atasi ōu lagona ma i latou, ma faia iā i latou e peiseā'i ua fesui'a'i le mea ua e i ai ma i latou, pei ona e mana'o ia latou faia iā te 'oe. O le tulafono moni lenei o le uiga fa'amaoni. O le isi fa'aaliga lea o le tulafono. "E te alofa atu i lē lua te tua'oi, ia pei o 'oe lava iā te 'oe" (Mataio 22:39). Ma o le 'a'ano lenā o a'oa'oga a le 'au perofeta. O lea le fa'avae o le lagi, ma o le a tuputupu a'e iā i latou uma o ē ua fetāui lelei ma Lana mafutaga pa'ia.

(3) E FA'APEFEA ONA FA'AMATALA E LE PEROFETA O MIKA LEA TA'IALA?

Sole, ua fa'aali atu e Ia iā te 'oe le mea lelei; se ā fo'i se mea e finagalo ai Ieova iā te 'oe, pe a lē o ia mea, ia fai le amiotonu, ia naunau i le alofa, ma ia feoa'i ma lou Atua ma le loto fa'amaulalo? Mika 6:8

Mau e tau i ai: I Timoteo 1:5; Iakopo 2:20

(4) PE A MOLIMAUINA, E ALA I LE MANA O LE AGAGA O LE ATUA, I O TATOU OLAGA I ASO TA'ITASI LE MALAMALAMA O GALUEGA LELEI, MATA O LE Ā LE FA'AI'UGA?

Ia fa'apea ona pupula atu lo outou malamalama i luma o tagata, ina ia latou iloa la outou amio lelei, latou te vivi'i atu ai i lo outou Tamā o i le lagi. Mataio 5:16

Mau e tau i ai: Fa'ata'oto 4:18; I Tesalonia 5:5; Filipi 2:15

O le tulafono fa'a-auro o le fa'avae lea o le fa'aaloalo moni, ma o le fa'ata'ita'iga moni e va'aia i le soifuāga ma le uiga o Iesu. Ioe, o 'ave o le filemū ma le matagofie na susulu atu i aso ta'itasi i le soifuāga o lo tatou Fa'aola. O le suamalie na tafe atu mai Lona fa'atasi ai. O le agaga lava lea e tasi o le a fa'aalia i Lana fanau. O i latou e afio ai Keriso o le a si'omia i le si'osi'omaga fa'alelali. O o latou ofu mamā o le a sasala mai ai le manogi mai le fa'ato'aga a le Ali'i. O le a ātagia mai Lona ppupula i o latou foliga, e fa'amalamalama ai le auala mo vae ua tau tevateva ma ua vaivai.

(5) INA IA FESOASOANI IA TATOU MAUTŪ E FA'AILOA ATU LE TIGĀALOFA MA LE ALOFA MUTIMUTIVALE O KERISO, O LE Ā LE ITU'AIGA MANATU E AO INA IĀ TE I TATOU E FA'ATATAU I ISI?

E moni, 'Ou te fai atu iā te outou, auā na faia e outou i le tasi o ē aupito itiiti o O'u uso nei, o A'u lea na outou faia i ai. Mataio 25:40

Mau e tau i ai: Fa'ata'oto 19:17; I Ioane 4:20, 21; Efeso 5:30

E leai se tagata e iloa atoa po o ā mea e aofia i le amio e ato'atoa, o le a lē fa'aalia le tigāalofa ma le alofa fa'apalepale o Keriso. O le 'a'afiāga o le alofa tunoa e fa'amalūlūina ai le loto, e fa'alelei ma fa'amamāina ai lagona, e tu'u atu ai le tofo lelei fa'alelagi ma le tulaga e talafeagai ai.

(6) O Ā NISI AUALA LELEI E MAFAI ONA TATOU FA'ATINOINA AI LE TULAFONO FA'A-AURO?

E lē o lenei ea? ona ia tofitofi āu mea e 'ai i lē ua fia 'ai, ia 'au mai i lou fale ē ua matitiva ma fa'asauāina; a ē iloa lē ua lē lavalavā e te fa'a'ofuina o ia, 'aua fo'i e te lafi iā i latou o lou lava aiga. Isaia 58:7

Mau e tau i ai: Isaia 58:6-11; Iakopo 2:14-20; Fa'ata'oto 3:27, 28

(7) E FA'APEFEA ONA FA'ALAUATELE ATU LE FA'AAOGĀINA O LE TULAFONO FA'A-AURO I TALA ATU O LE UIGA FA'ALETINO I PULEAGA FA'ALEAGAGA?

Ia ta'ito'atasi ma 'au'auna o le tasi i le tasi i lea lava mea, e pei ona maua e ia o le mea alofa, e pei o 'au'auna pule e lelei i le alofa tunoa uiga 'ese'ese o le Atua. I Peteru 4:10

Mau e tau i ai: I Korinito 3:10; 15:10; Eperu 6:10; Efeso 3:8; Isaia 58:6, 7

A e i ai le mea e sili atu ona lolto ma tāua i le tulafono fa'a-auro. O i latou uma o ā ua fai ma 'au'auna tausī mea i le matalasi ma le tele o le alofa tunoa o le Atua ua vala'auina ina ia fa'ailoa atu i agaga lē malamalama ma pōuliuli pe ana fai e i ai fo'i ia i lea tulaga, se manū ua ia fa'anaunau fo'i ia ia tufa mai iā te ia. Ua fa'apea mai le aposetolo o Paulo, "Ua iā te a'u mea a Eleni atoa ma nu'u 'ese, o ē popoto atoa ma ē valelea" (Roma 1:14).

O outou uma ua iloa le alofa o le Atua, o lea ua outou maua ai le tamaō'aiga o meaalofo o Lona alofa tunoa e sili a'e i agaga e aupito pōuliuli ma lē tau'aloaina i le lalolagi, o lo'o e nofo aitalafu i le agaga lenā e ao ina fa'asoa atu nei meaalofo iā te ia.

(8) O AI I LO TATOU LALOLAGI O LO'O MANA'OMIA FA'APITOA LE FA'AALIA MA FA'ATINOINA I AI LE ALOFA?

O lenei lava le amio Atua e lelei ma le fa'amaoni i luma o le Atua o le Tamā lea, ina ia tauasiasi atu i ē mātua oti ma fafine ua oti a latou tane i o latou tigā, ia leoleo fo'i o ia iā te ia, ina ne'i pisai mai o ia i le lalolagi. Iakopo 1:27

Mau e tau i ai: Iopu 29:12, 13; Salamo 68:5; Isaia 1:17; Fa'ata'oto 24:11

E fa'apea fo'i ma meaalofo ma fa'amanuiāga o lenei olaga; o ā lava mea ua e maua e sili atu i ōu uso a tagata ua tu'uina ai 'oe i le tulaga nofo aitalafu iā i latou uma e tū maulalo ifo. Po ua iā i tatou ea le tamāō'aiga, e o'o lava i mea e fa'afaigofie ai le olaga, ua tatou i lalo o le tiute tāua o le tausiga o ē puapuagātia i ma'i, o le fafine ua oti lana tane, ma ē ua mātua oti e pei lava ona tatou naunau ia latou faia iā i tatou pe ana fai e fesuia'i tulaga tatou te i ai.

(9) PE AFAI TATOU TE 'AU'AUNA ATU I MANA'OGA O Ē FIA 'A'AI MA PUAPUAGĀTIA, O LE Ā SE I'UGA MANUIA?

Afai fo'i e te alofa atu i lē ua fia 'ai, ma e fafaga ia ma'ona o lē ua tigā; ona alu a'e lea o lou malamalama i le pōuliuli, ma lou pogisā e pei o le aoauli ia. E ta'ita'iina fo'i 'oe e lē aunoa e Ieova; e fa'amālie fo'i o Ia iā te 'oe pe a oge vai, ma fa'amalosia ōu ivi; e 'avea fo'i 'oe e pei se fanua ua fa'asūsūina, e pei o le punavai fo'i e lē mate ōna suāvai. Isaia 58:10-11

Mau e tau i ai: Failauga 11:1; Fa'ata'oto 11:24, 25; 22:9

O le tulafono fa'a-auro e a'oa'o mai, e ala i le aofia ai, le 'upu moni lava lea o lo'o a'oa'o mai fo'i i le Lauga i luga o le Mauga, e fa'a'apea, "o le fua tou te fuaina atu ai, e toe fuaina mai ai iā te outou" (Roma 2:1). Pe o le ā lava le mea tatou te faia i isi, pe lelei pe leaga, o le a toe fo'i mai lava iā i tatou, i le fa'amanuia po o le fetu'u. So'o se mea tatou te tu'uina atu, e tatou te toe maua fo'i. O fa'amanuiāga fa'alelalogi tatou te fa'asoa atu i isi, atonu ma e masani lava ona toe tauia mai. O ā mea latou te tu'uina atu, i taimi e mana'omia ai le fesoasoani, e masani lava ona toe maua mai pe fa'afā pe sili atu le fa'ateleina. A e sili atu fo'i i lenā, o mea alofa uma e toe tauia, e o'o lava i le olaga nei, i le tafe mai ma le tumu o Lona alofa, o le tu'uaofa'iga uma o le mamalu o le lagi ma āna mea tāua.

(10) E FA'APEFEA ONA AFĀINA I LENEI FA'AVAE I LATOU O Ē FILIFILI E MANATU FA'APITO MA OLA MATAPE'APE'A?

O lē ua foa'i atu i le tagata mativa, e lē mativa o ia; a o lē 'alo ai ōna fofoga e lāufetu'uina o ia. Fa'ata'oto 28:27

Mau e tau i ai: Fa'ata'oto 11:26; II Korinito 9:6

(11) PE AFAI E SILI A'E LE FA'ASAUĀ I ISI I LO O LE ALOFA, O LE Ā LE MEA E I'U I AI?

O le tagata alofa ua agalelei o ia iā te ia lava; a o lē ua sauā, na te fa'atigāina lona lava tino. Fa'ata'oto 11:17

Mau e tau i ai: Fa'ata'oto 11:27; 17:5

Ma o le tu'uina atu o le leaga, e toe fo'i mai lava le leaga. O i latou uma ua sa'oloto e ta'usala pe fa'avaivai i nisi, o le a o'o fo'i iā te ia le mea lava lea e tasi ma o le a ia savali i le lafanua na māfua ai ona la'asia e isi le auala lea; o le a ia lagona le mafatiāga na o'o iā i latou ia auā o lea fo'i ua ia mana'omia le tigāalofa ma le alofa fa'apalepale.

(12) PE AFAI TATOU TE LĒ MAFAI ONA FA'AALI LE FA'APALEPALE I NISI, O LE Ā LE MEAALOFA ONA O LE ALOFA O LE ATUA E TA'ITA'IINA AI TATOU?

Po ua fa'atauva'a ea iā te 'oe le faula'i o Lona agamalū, ma Lona fa'apalepale, ma Lona onosa'i, o lo'o e lē iloa e ta'ita'iina 'oe e le agamalū o le Atua i le salamō? Roma 2:4

Mau e tau i ai: Galuega 5:31; Fa'aaliga 3:19

O le alofa o le Atua iā i tatou na Ia finagalo malie ai ia faia lea. Na te ta'ita'i tatou ia tatou ino'ino i lo tatou loto ma'a'a, ma ia tatala o tatou loto ina ia ulufale mai Iesu e afio ai. Ma o le mea lea, ua te'a i fafo le leaga, ua o'o mai le mea lelei, ma ua foliga mai o se fetu'u ua 'avea o se fa'amanuiāga.

(13) O LE Ā LE TA'U A LE AFIGA A LE ATUA I LE "AMIO ATUA" MA O LE FA'ATINOINA O LE TULAFONO FA'A-AURO?

O lenei lava le amio Atua e lelei ma le fa'amaoni i luma o le Atua o le Tamā lea, ina ia tauasiasi atu i ē mātua oti ma fafine ua oti a latou tane i o latou tigā, ia leoleo fo'i o ia iā te ia, ina ne'i pisai mai o ia i le lalolagi. Iakopo 1:27

Mau e tau i ai: Isaia 58:6-11; Mataio 25:34-40; Iakopo 2:15-17

O le tapula'a o le tulafono fa'a-auro o le tapula'a moni lenā fa'a-Kerisiano; afai e lē 'ausia, o se mea tau fa'asesē lenā. O le tapuā'iga e ta'ita'i tagata e tu'u maulalo isi tagata, o ē na fa'atāua e Keriso na Ia tu'uina mai ai Ia lava mo i latou; o se tapuā'iga e ta'ita'i tatou ia lē amana'ia mana'oga, puapuagā, po o aiā o tagata, o le tapuā'iga fa'afoliga lea. I le ta'u fa'atauva'aina o mana'oga oē matitiva, o ē puapuagātia, ma ē agasala, ua tatou fa'amaonia ai o tatou lava o ē fa'alata iā Keriso.

Talu ai o tagata ua latou tau'aveina le suafa o Keriso, a e o latou olaga e fa'afitia Lana amio, o le mea lea ua fa'aitiitia ai lava le malosi o le fa'a-Kerisiano i le lalolagi. O le suafa o le Ali'i ua tauemua lava ona o nei mea.

(14) NA FA'APEFEA ONA OLA AI LE ULUA'I EKALESIA I LENEI FA'AVAE O LE FA'A-KERISIANO, MA O SE FA'ATA'ITA'IGA E MATUĀ LELEI O LE LĒ ALOFA FA'APITO, MO TATOU I NEI ASO?

*Ua fa'atasia fo'i ē ua fa'atuatua uma lava, ua tu'u tele a latou mea uma lava; ua fa'atau atu fo'i o latou fanua ma 'oloo, ma ua tufatufa le tau o ia mea i tagata uma, ua fa'atatau i le mativa o le tagata. **Galuega 2:44, 45***

Mau e tau i ai: Galuega 11:29; Luka 18:22

O le ekalesia a le 'au aposetolo, i na aso lelei o le susulu o le mamalu o le Keriso ua toe tū mai i o latou luga, o lo'o tusia "ua lē fai mai fo'i e se tasi i se isi ana mea, o lana lea,...Ua leai fo'i so latou e mativa." " Ua molitino atu e le 'au aposetolo ma le mana tele i le toe tū mai o le Ali'i o Iesu; ua alofateleina fo'i i latou uma" (Galuega 4:32, 34, 33). Ma "Ua latou nonofo pea ma le loto gatasi i le malumalu i lea aso ma lea aso, ua tofitofi fo'i le areto i lea fale ma lea fale, ua latou 'a'ai a latou mea e 'ai ma le fiafia ma le loto fa'amaoni, ua latou vivi'i atu i le Atua, ma ua alofaina e le nu'u uma lava. Ua fa'aopoopoina i le ekalesia e le Ali'i i aso fai so'o o ē ua fa'aolaina" (Galuega 2:46, 47).

Sa'ili le lagi ma le lalolagi, e leai se isi 'upu moni e sili atu ona malosai nai lo le fa'aailoa atu i galuega o le alofa iā i latou o ē mana'omia lo tatou alofa ma le fesoasoani. O le 'upu moni lenā iā Keriso. Pe a fa'atino e i latou o ē tau'ave le suafa o Keriso fa'avae o le tulafono fa'a-auro, o le mana lava lenā e tasi o le a i ai i le tala lelei e pei o taimi o le 'au aposetolo.

Ua 'ou iloa ta'iala fa'avae a le lagi e mafai ona ta'uaofa'i i gaoioiga e lua. Muamua, e mana'mia ona 'ou alofa i le Ali'i lo'u Atua ma lo'u loto atoa. O le lua e fa'atatau i "Le Tulafono Fa'a-auro" ma ia 'ou alofa i lo'u tuā'oi pei ona 'ou alofa iā te a'u lava, ma ia faia iā i latou pei ona 'ou mana'o e fai mai e isi iā te a'u.

Li'o le Tali: **Ioe** **Lē Mautonu**

Ou te alofa i le Ali'i ma 'ou te mana'o e fa'afiafia iā te Ia ma lo'u loto atoa, peita'i e lē mafai i lo'i lava malosai ona fa'atino lenei ta'iala. 'Ou te ōle iā te Ia ina ia afio i totonu iā te a'u ma fa'aalia ai Lona alofa ma Lona fa'apalepale iā te a'u.

Li'o le Tali: **Ioe** **Lē Mautonu**

O la'u tatalo lenei, "Le Ali'i e, fesoasoani ia 'ou va'ai i isi pei ona e silasila, ma o'u lima o Ōu 'a'ao e fafaga i ē fia 'a'ai, fa'alavalava i ē lē lavalavā, talia ē leai ni aiga, ma fa'asoa atu le tala lelei."

Li'o le Tali: **Ioe** **Lē Mautonu**

Manatu o Su'esu'ega

Tatalo Mana'omia

Tali o Tatalo

E Vā Apiapi le Faitoto'a

Lesona 33

E fa'avae lenei lesona i le Mataio 7:14.

I le taimi o Keriso na nonofo tagata Palesitina i 'a'ai e puipui i pā, e tele ina fausia i luga o mea e mauti'eti'e po o mauga. E tapunia faitoto'a i le goto o le lā, o auala e o'o atu i ai e gaoā ma tofē, ma o le tagata e malaga i lona aiga i le fa'ai'uga o le aso e masani ona tinoū ia fa'anatinati i le a'ega faigatā ina ia mafai ona taunu'u i le faitoto'a a o le'i pogisā. O le tagata e faiaāga e nofo i fafo.

(1) NA FA'APEFEA ONA FA'ATUSATUSAINA E IESU LE TULAGA O LE OLAGA MONI I LE AUALA FA'ALEAGAGA O LE KERISIANO?

Auā e vā apiapi le faitoto'a, e lauitiiti fo'i le ala e tau atu i le ola, e to'aitiiti fo'i i latou o ē maua. Mataio 7:14

Mau e tau i ai: Isaia 35:8; Fa'ata'oto 4:26, 27; Mataio 16:24, 25

E vā apiapi ma a'ega le auala e tau atu i le aiga ma le malōlōga na maua ai e Iesu se fa'atusa tāua e fa'ataui i ala o le Kerisiano. O le auala ua 'Ou tu'u atu i o outou luma, o Lana fetalai lea, e vā apiapi, o le faitoto'a e faigatā ona ūlu atu i ai, auā o le tulafono fa'a-auro e lē fa'atagaina ai ē fa'asausili ma manatu fa'apito. E i ai fo'i le ala lautele; o lona i'uga o le malaia. Pe afai e te a'e i auala o le olaga fa'aleagaga, e tataui lava ona e a'e'e pea i taimi uma; auā o le ala e aga'i i luga. E ao ina tatou o fa'atasi ma i latou e to'aitiiti, auā o le to'atele o le a latou filifili i le auala e aga'i i lalo.

(2) E UI INA UA SAUNIA E LE ALI'I LE AUALA, E TO'AFIA E LOTO MALIE E FA'AFITIA I LATOU LAVA INA IA LATOU MAUAINA?

Ua fai mai le tasi iā te Ia, Le Ali'i e, e to'aitiiti ea e fa'aolaina? Ona fetalai atu lea o Ia iā te i latou, Ia outou finafinau ina ia ulu atu i le faitoto'a vā apiapi; auā 'Ou te fai atu iā te outou, e to'atele latou te sa'ili ina ia ulu atu, a e lē mafai lava.

Luka 13:23-24

Mau e tau i ai: Mataio 7:14; Roma 9:32

O le auala i le oti, atonu o le a o'uma i ai le to'atele, fa'atasi ai ma lo latou fa'alelalolagi, o latou manatu fa'apito uma, o latou fa'amaua uma, lē fa'amaoni, ma le ola e lē taupulea. E i ai le avanoa mo manatu ma talitonuga o tagata ta'ito'atasi, o le avanoa e mulimuli ai i ōna ia lava manatu, ina ia faia so'o se mea e mana'o lona alofa fa'apito e fai. Ina ia alu i le auala e taunu'u i le malaia, e lē mana'omia ia sa'ili se auala, auā e vā tele le faitoto'a, e lautele fo'i le ala, ma o vae o le a savavali lava aga'i i le ala e fa'ai'u i le oti.

(3) O Ā FILIFILIGA E TOLU E AO INA TATOU FAIA IA ULU ATU AI I LE FAITOTO'A E SA'O MA FA'AAUAU ATU I LE ALA VĀ APIAPI?

Ua fetalai atu Ia i tagata uma, A fia mulimuli mai se tasi iā te A'u, 'aia le usiusita'i o ia iā te ia, a ia 'ave e ia lona satauro i aso fai so'o, i le mulimuli mai ai iā te A'u. Luka 9:23

Mau e tau i ai: Mareko 10:21; 8:34

O le auala i le ola e lauitiiti le faitoto'a, e vā apiapi fo'i le ala. Afai e te taofimau i se agasala e fiafia i ai, o le a iloa e vā apiapi tele mo lou ūlu atu i ai. O ōu lava ala, o lou lava mana'o, o āu amioga ma masaniga e lē lelei, e tataui ona tu'u 'ese pe afai e te tausi i le ala o le Ali'i. O lē o le a 'au'auna iā Keriso e lē mafai ona mulimuli i manatu fa'alelalolagi po o le a 'ausia tapula'a a le lalolagi. O le ala i le lagi e vā apiapi tele mo tulaga maua ma tamaō'aiga e mana'omia, e lauitiiti tele mo lē e fia tele ma e manatu fa'apito, e gaoā ma tofē tele mo ē fiafia i le auala e faigofie. O le galue malos, onosa'i, o le manatu i isi, o le fa'alumaina, mativa, o le tete'e mai o tagata agasala e fa'asagatau iā te Ia, o le tofi lenā a Keriso, o lo tatou vaega fo'i lea pe afai tatou te fia o'o atu i le Parataiso o le Atua.

(4) O LE Ā LE MEA E FA'AMAONI LE ATUA E TU'UINA MAI PE AFAI E O'O MAI FA'AOSOOSOGA, MA AFAI E FILIFILIA, O LE A FA'ASAOINA I TATOU MAI LE ALA LAUTELE E TAU ATU I LE MALAIA?
Ua lē maua outou e se tofotofoga e 'ese i lo tagata; a ua fa'amaoni le Atua, o Lē na te lē tu'uina atu outou i le tofotofoga e sili i se mea ua outou lavatia, a e sauni fo'i fa'atasi ma le tofotofoga se mea e sao ai, ina ia outou lavā 'o'ono. I Korinito 10:13

Mau e tau i ai: Iuta 1:24; Filipi 1:6

(5) E UI LAVA O TATOU UIGA MONI E TA'ITA'I AI TATOU I LE AUALA LAUTELE E TAU ATU AI I LE MALAIA, E FA'APEFEA EA LENEI AUALA?
O le mafau fau lelei e tupu mai ai le alofa; a o le ala o ē amio leaga ua faigatā lea. Fa'ata'oto 13:15

Mau e tau i ai: Fa'ata'oto 15:10; Ieremia 2:19; Roma 6:21

E ui i lea, 'aua ne'i fai le fa'ai'uga fa'apea o le auala e aga'i i luga e faigatā ma o le auala e aga'i i lalo o le ala faigofie lea. O le auala fo'i e aga'i i le oti e i ai tigā ma fa'asalaga, e i ai fa'anoanoāga ma fa'amoemoega lē taunu'u, e i ai lapata'iga ia 'aua le fa'aauau pea. O le alofa o le Atua e fa'afaigatā ai i ē lē fa'alogi ma loto ma'a'a ona fa'aumatia i latou lava.

(6) O Ā NI VAEGA TETELE SE TOLU UA POTO ONA FA'AFOLIGA'ESE O AUALA O TOFOTOFOGA E FA'AOGĀINA E LE TI'ĀPOLO E FAI AI LANA AUALA E FOLIGA LELEI A E TA'ITA'I UMA LAVA I LE I'UGA E MATUITUI?
Auā o mea uma lava o i le lalolagi, o le tu'inanau o le tino, ma le tu'inanau o mata, ma le fa'alialia o lenei olaga, e lē mai le Tamā ia, a e mai le lalolagi. I Ioane 2:16

Mau e tau i ai: Iakopo 3:15; Salamo 119:36, 37; I Peteru 2:11; Kalatia 5:17

E moni o le auala a Satani e foliga mai e matagofie i le va'ai, peita'i e tau fa'asesē uma lava; i le auala a le ti'apolo e 'o'ona le toe manatu i mea leaga ua fai. E mafai ona tatou manatu e mālīe le mulimuli i le fa'alialia ma le fiatele i le fa'alelalolagi, a e o le i'uga o le tigā ma fa'anoanoāga. O fuafuāga e fai ma le manatu fa'apito e mafai ona fa'aali ma folafolaga fa'avi'ivi'i ma tu'u mai le fa'amoemoe o fiafiāga, peita'i o le a tatou iloa mulimuli o lo tatou fiafia ua fa'a'o'onaina ma o tatou olaga ua 'o'ona i fa'amoemoega e ogātonu ai ia lava. O le ala e aga'i i lalo atonu e matagofie ōna 'autafa i fugāla'au, peita'i e i ai mea tuitui i le auala. O le malamalama o le fa'amoemoe lea e susulu mai i le faitoto'a e mōu atu i le pōuliuli o le atuatuale, ma o le agaga e mulimuli i lea ala e tu'u atu i ata o le pō e lē gata.

(7) AFAI TATOU TE FA'ATAGA LE ALI'I E FAI MO TATOU TA'ITA'I I LE ALA VĀ APIAPI, O Ā MEA E LUA O LE A I'U I AI?
E fa'amalamalama ai i ē nonofo i le pouliuli ma le ata o le oti, e ta'ita'i i o tatou vae i le ala o le manuia. Luka 1:79

Mau e tau i ai: Fa'ata'oto 3:5, 6, 17; Salamo 25:10; 37:11; Isaia 26:3

O gaoioiga uma o le ususita'i iā Keriso, o gaoioiga uma e fa'amuumua ai mana'oga o isi ona o Lona suafa, o tofotofoga uma e onosa'i ai, o manumalō uma mai fa'aosoosoga, o se la'a lenā i le savaliga i le mamalu o le manumalō fa'ai'u. Afai tatou te 'avea Keriso mo tatou ta'ita'i, o le a la ta'ita'iina ma le saogalemū i tatou. O le tagata e aupito agasala e lē sesē 'ese mai lona auala. E leai sē e sa'ili ma le gatete e lē manuia lana savaliga i le malamalama e mamā ma pa'ia. E ui lava ina vā apiapi le ala, e matuā pa'ia ina ia lē mafai ona o'o atu i ai le agasala, a e ua uma ona maua le avanoa mo tagata uma, ma e leai se agaga e masalosalo, e mata'u ma fa'apea, "E lē alofa le Atua iā te a'u."

(8) E UI INA VĀ APIAPI LE ALA PE A TATOU FA'AFITIA TATOU LAVA MA E FOLIGA E FAIGATĀ, A E ALA I LE FA'ATUATUA, TATOU TE FA'ATAGA KERISO IA AFIO I TOTONU IĀ I TATOU MA 'AVEA O LA TATOU TA'ITA'I, O LE Ā LE FA'AI'UGA MULIMULI?
E sōloi'esea fo'i e le Atua loimata uma i o latou mata; e leai fo'i se toe oti, po o se fa'anoanoa, po o se auē, e leai fo'i se toe puapuagā; auā ua mavae atu mea muamua. Ua fetalai mai fo'i Lē ti'eti'e i le nofoāli'i, Fa'auta, 'Ou te faia ia fou mea uma lava. Ua fetalai mai fo'i o la iā te a'u, la e tusi; auā o 'upu nei e moni ma le fa'amaoni ia. Fa'aaliga 21:4-5

Amu'ia i latou o ē faia ana poloa'iga, ina ia taga iā i latou le la'au o le ola, ma ia latou ulu atu i le 'a'ai i ōna faitoto'a.
Fa'aaliga 22:14

Mau e tau i ai: Luka 12:32; I Peteru 1:6, 7

E mafai ona gaoā ma a'ega le ala; atonu e i ai ni mailei i le itū taumatau fa'apea fo'i le itū tauagavale; atonu e tataua ona onosa'i i faigatā i la tatou malaga; pe a ua vaivai ma mo'omo'o i se malōlōga, atonu e tataua lava ona tatou galulue pea; a lē lavā, atonu e ao ina tatou finau pea; a loto vaivai, e ao lava ina i ai pea lo tatou fa'amoemoe; a e a i ai Keriso o lo tatou ta'ita'i, o le a lē fesiligia le tatou taunu'u i le lagi i le i'uga. O Keriso lava ia na muā'i uia le ala gaoā, e muamua iā i tatou ma na fa'alaulelei ai le ala mo o tatou vae.

(9) O LE Ā LE MEA E FA'ATUSA I AI E LE TUSI PA'IA LE ALA O I LATOU UA TA'UAMIOTONUINA I LE FA'ATUATUA, E ALA I LE TOTO O KERISO?

A o le ala o ē amiotonu, e tusa ia ma le malamalama o le ao, o lo'o tupu pea lona malamalama e o'o i le tutonu o le lā.
Fa'ata'oto 4:18

Mau e tau i ai: Iopu 11:17; Hosea 6:3

Ma o le auala e aga'i maua luga i le ola e fa'avavau e i ai vai'eli ola o le 'oli'oli e fa'afouina ai ē ua vaivai. O i latou e savavali i ala o le poto, e ui i puapugā, a e 'oli'oli lava; auā o la Lē e pele i o latou agaga, e savali, e lē mava'aia, i o latou tafatafa. O la'a uma ta'itasi aga'i i luga, e latou te iloa lelei ma manino le pa'i o Lona 'a'ao; o la'asaga ta'itasi uma e pupula le malamalama o le mamalu mai Lē e lē o va'aia o susulu mai i lo latou ala; ma o latou pese o vi'iga ua alu a'e e so'ofa'atasi ma pesega a agelu i luma o le nofoāli'i. "A o le ala o ē amiotonu, e tusa ia ma le malamalama o le ao, o lo'o tupu pea lona malamalama e o'o i le tutonu o le lā" (Fa'ata'oto 4:18).

Ua 'ou malamalama nei ina ia 'a'ua 'ou te mulimuli i o'u lagona fa'anatura e fa'atatau i le ala lautele ma le mata'utia o le lalolagi.

Li'o le Tali: Ioe Lē Mautonu

'Ou te fa'afetai ona o le alofa tele o le Atua na te fa'ataga ai tofotofoga e fa'afagu ai a'u pe a 'ou savali aga'i i le ala sesē e tau atu i le fa'afanoga.

Li'o le Tali: Ioe Lē Mautonu

Ua 'ou iloa i mea ua tutupu e lē mafai ona 'ou lavea'i iā te a'u lava ia e ala i a'u lava taumafaiga. E ao ina 'ou filifili le ala vā apiapi i le ola ma fa'ataga Keriso ia afio tumau i totonu iā te a'u ma ola ai i se olaga manumalō i mana'oga o lo'u lava uiga moni.

Li'o le Tali: Ioe Lē Mautonu

'Ou te fa'anaunau mo le aso o le a vala'au mai ai a'u e le Atua i Lona malō e i ai le filemū moni ma le fiafia o le a maua e i latou uma o ē savavali ma la.

Li'o le Tali: Ioe Lē Mautonu

Manatu o Su'esu'ega

Tatalo Mana'omia

Tali o Tatalo

Finafinau mo le Faitoto'a Vā Apiapi

Lesona 34

O lenei lesona e fa'avae i le Luka 13:24.

(1) E MULIMULI MAI 'UPU O LE LAPATA'IGA, A E O LE Ā LE FUAI'UPU NA MATUĀ FA'AMALOSI AI E KERISO Ē NA MULIMULI IĀ TE IA INA IA SA'ILI LE FAITOTO'A I LONA MALŌ?

*Ia outou finafinau ina ia ulu atu i le faitoto'a vā apiapi; auā 'Ou te fai atu iā te outou, e to'atele latou te sa'ili ina ia ulu atu, a e lē mafai lava. **Luka 13:24***

Mau e tau i ai: Kolose 1:29; Roma 10:3

O le tagata malaga ua fa'atuai, e fa'avavevave ina ia taunu'u i le faitoto'a o le 'a'ai i le taimi e goto ai le lā, e lē mafai ona afe i autafa mo so'o se gaoioiga fa'atosina. O lona mafaufau atoa ua mautū i le fuafuāga e tasi o le ulu atu i le faitoto'a. Na fetalai Iesu, e fa'apea le matuā tāua o le fuafuāga e mana'omia i le olaga fa'a-Kerisiano.

Ua 'Ou tatala atu iā te outou le mamalu o le amio, o le mamalu moni lenā o Lo'u malō. E lē o'foina at ai iā te outou ni folafolaga o le pule fa'alelalolagi; peita'i e ao ina e fa'asili i ai le fa'atāua o le naunau ma taumafaiga. 'Ou te lē vala'au atu outou ina ia tau mo le pulea o malō sili o le lalolagi, a e 'a'ua ne'i fai se fa'ai'uga fa'apea e leai se taua e tauina, po o ni manumalō e tatau ona maua. 'Ou te fai atu iā te outou ina ia outou finafinau, ia vilivilita'i ina ia ūlu atu i Lo'u malō fa'alelagi.

(2) O E ALA E TASI E MAFAI ONA MAUA AI LE MANUMALŌ FA'ALEAGAGA I LE LOTO O LE TAGATA, O LE TU'UINA ATU ATO'ATO A LEA. O LE A FA'APEFEA, I LE I'UGA, ONA MANUMALŌ I LENEI TAUA MA LE ALOFA FA'APITO?

*O le afioga lenei a Ieova iā Serupapelu, o lo'o fa'apea mai, E lē o le fītafīta, e lē o le malosī, a o Lo'u Agaga, ua fetalai mai ai Ieova o 'au. **Sakaria 4:6***

Mau e tau i ai: Tito 3:5; I Peteru 1:22

O le olaga o le Kerisiano o se taua ma o se savaliga. A e o le manumalō e ao ina maua e lē mai le malosī o le tagata. O le laufanua o fete'ena'iga o le loto lea. O le taua e tatau ona tauina - o le taua e aupito tele na tauina e le tagata - o le tu'uina atu lea o ia lava i le finagalo o le Atua, o le tu'uina atu o le loto i le malō o le alofa. O le uiga tuai, na fanau i le toto ma le mana'o o le tino, e lē mafai ona fai mōna tofi le malō o le Atua. O mana'oga i le itū tagata, o masaniga tuai, e tatau ona lafoa'i.

(3) O LE Ā LLE I'UGA MULIMULI PE AFAI TATOU TE FA'ATAGAINA LO TATOU UIGA MONI FA'ALETINO E 'AVEA MO TATOU TA'ITA'I A E LĒ O LE AGAGA O LE ATUA?

*O ana amio leaga e maua ai lava lē ua agasala; o maea o ana agasala e taofia ai o ia. **Fa'ata'oto 5:22***

Mau e tau i ai: Iakopo 1:14, 15; Fa'ata'oto 1:31; 11:3; 1:18; Salamo 7:15, 16; 9:15

O lē e filifili e ulufale i le malō fa'aleagaga o le a ia iloa o le malosī ma mana'oga uma o le uiga lē fa'afouina, e lagolagoina e 'au o le malō o le pōuliuli, e fa'asagatau lea iā te ia. O le alofa fa'apito ma le mitamita vale o le a tula'i e fa'asagatau i so'o se mea e fa'ailoa atu iā i latou le agasala. E lē mafai e tatou lava ia ona fa'ato'ilalo mana'oga ma amio leaga o lo'o taumafai ia 'avea ma pule. E lē mafai ona tatou manumalō i le mata'utia o le fili o lo'o taofimau tatou i lona malosī.

(4) O Ā GAOIOIGA O LA'ASAGA E LUA UA FA'AMATALA MAI E IAKOPO E MAUA AI LE MANUMALŌ? MĀTAU LE FA'ASOLOGA E TATAU ONA FAIA E MAUA AI I'UGA O LE MANUMALŌ.

*O le mea lea ia outou gaua'i ai i le Atua; ia outou tete'e atu i le ti'apolo, ona sola 'ese ai lea o ia iā te outou. **Iakopo 12:4***

Mau e tau i ai: Roma 10:3

E na o le Atua e mafai ona tu'uina mai le manumalō iā i tatou. E fa'anaunau o Ia ia iā i tatou le pule iā i tatou lava, i o tatou lava loto malie ma o tatou ala. Peita'i Na te lē mafai ona galue i totonu iā i tatou e aunoa ma lo tatou loto malie ma le galulue fa'atasi. O le Agaga Pa'ia e galue i totonu o le mafaufau ma le malosi ua tu'uina i le tagata. O lo tatou malosi e mana'omia ia galulue fa'atasi ma le Atua.

(5) O LE Ā LE TELE O LE MALOSI TATOU TE FINAFINAU AI I LENEI TAUA E TETE'E AI I LE AGASALA?

Ua o'o i nei ona pō ua outou lē tete'e atu e o'o i le fa'asasa'aina o outou toto i lo outou tete'e atu i le agasala. Eperu 12:4

Mau e tau i ai: II Timoteo 4:6, 7; Fa'aaliga 12:11; Mataio 16:25

(6) O LE Ā LE FAUTUĀGA UA TU'U E KERISO IA FA'ATO'ILALO AI 'OLO MALOLOS I SATANI O LO'O I TOTONU O TATOU MAFAUFAU MA ITŪTINO?

Ia outou mataāla ma tatalo, ina ne'i o'o mai le fa'aosoosoga iā te outou; ua mana'o i ai le loto, a o le tino ua vaivai. Mataio 26:41

Ona fetalai atu lea o Ia iā te i latou, Ua na o le tatalo ma le anapogi e mafai ai ona ō 'ese o mea fa'apenā. Mareko 9:29

O le manumalō e le'i maua e aunoa ma le matuā tatalo fa'atauānuu, e aunoa ma le fa'amaulalo o le tagata lava ia i la'asaga uma.

(7) O LE Ā SE MEA E TATAU ONA TATOU LOTO MALIE INA IA FA'ATAGA LE ATUA E FAIA I TOTONU IĀ I TATOU A O LE'I MANUMALŌ I LE TAGATA LAVA IA?

Auā o le Atua, o Ia lē galue i totonu iā te outou i Lona finagalo alofa, ina ia outou loto ma galulue i ai. Filipi 2:13

Mau e tau i ai: Filipi 2:12

O o tatou loto e lē tatau ona fa'amalosia ia galulue fa'atasi ma sui o le lagi, a e ao ina ōfo atu. Pe ana mafai ona una'i fa'amalosi 'oe i se malosi e sili atu i le fa'aselau e le Agaga o le Atua, o le a lē 'avea lava 'oe o se Kerisiano, o sē e tatau mo le lagi. O le 'olo a Satani o le a lē mafai ona lepetia.

O le loto e tatau ona i le itū a le finagalo o le Atua. E lē mafai e 'oe lava ia ona tu'u atu āu fuafuāga ma fa'anaunauga ma lagona ia gaua'i atu i le finagalo o le Atua; a e afai e te "loto malie ina ia e loto malie," e mafai e le Atua ona fa'ataunu'u le galuega mo 'oe, e o'o lava i le "lepeti i lalo masalosologa, ma mea maualuluga uma ua fa'asiasia i le matā'upu a le Atua, o lo'o fa'ato'ilaloina manatu uma ia 'ana'ana iā Keriso" (II Korinito 10:5). O le a outou "galulue a'ia'i ma le mata'ū atoa ma le gatete, ina ia fa'aolaina outou. Auā o le Atua, o Ia Lē galue i totonu iā te outou i Lona finagalo alofa, ina ia outou loto ma galulue i ai" (Filipi 2:12-13).

(8) O Ā MEA FA'ATOSINA E TOLU E I'U INA TO'ILALO AI I LATOU O Ē ATONU E TOSINA I LE MATAGOFIE O KERISO A E LĒ TU'UINA ATU ATO'ATO A LATOU LOTO?

Auā o mea uma lava o i le lalolagi, o le tu'inanau o le tino, ma le tu'inanau o mata, ma le fa'alialia o lenei olaga, e lē mai le Tamā ia, a e mai le lalolagi. I Ioane 2:16

Mau e tau i ai: Numera 11:34; Roma 13:14; I Korinito 10:6

A e to'atele i latou e tosina i le matagofie o Keriso ma le mamalu o le lagi, o ē 'alo 'ese mai tulaga pe a na'o i latou o le a mafai fo'i ona i'u latou fa'apea. E toa'ele i latou i le ala lautele e lē o maua le malie ato'atoa i le auala o lo'o latou savavali ai. O lo'o fa'anaunau ia ō 'ese mai le pologa o le agasala, ma i lo latou lava malosi o lo'o sa'ili e malō i le fete'ena'iga ma latou uiga agasala. Latou te va'ai atu aga'i i le ala ma le faitoto'a vā apiapi; peita'i o tu'inauga o le tino, o le fiasia i le lalolagi, fa'amaua, mitamitavale, o le lē fa'apa'iaina, ua fai ma pā pupuni i lo latou vā ma le Fa'aola.

Pe a lafoa'i o latou lava mana'o, o mea ua latou filifilia e alolofa ma fiafia i ai, e mana'omia ia vavae 'ese ona a fa'atuai ma tau pa'ū ua leai se malosi, o le a toe fo'i loa i tua. "E t'otele latou te sa'ili ina ia ulu atu, a e lē mafai lava" (Luka 13:24). Latou te naunau i le lelei, ma tau taumafai ina ia maua; peita'i latou te le'i filifili i ai; latou te le'i faia se fa'ai'uga mautū ia saogalemū ai mai le tau o mea uma.

(9) O LE Ā LE TATALO A KERISO I LE FA'ATO'AGA O KETESEMANE E TATAU ONA FAI MA A TATOU TATALO, PE AFAI TATOU TE TUMAU I LE AUALA VĀ APIAPI E TAU ATU I LE OLA E FA'AVAVAU?

Ua maliu fa'aitiiti atu i luma, ona fa'apa'ū faō ai lea o Ia ma tatalo, ua fa'apea atu, Lo'u Tamā e, afai e mafai, ia 'ave 'ese lenei ipu iā te A'u; a e 'aia le faia Lo'u loto, a o Lou finagalo.... Ua toe maliu ane Ia o le atu lua lea, ua tatalo, ua fa'apea atu, Lo'u Tamā e, a lē mafai ona 'ave 'ese o lenei ipu iā te A'u se'ia 'Ou inu ai, ia faia Lou finagalo. Mataio 26:39, 42

Mau e tau i ai: Ioane 5:30; 6:38

E pau lo tatou fa'amoemoe pe afai tatou te fia manumalō o le so'ofa'atasi o tatou loto ma le finagalo o le Atua ma galulue fa'atasi ma Ia, i itulā ta'itasi ma aso ta'itasi. E lē mafai ona tatou taofimau tatou lava a e ūlu atu i le malō o le Atua. Pe afai tatou te 'ausia le fa'apa'iaina, o le a maua e ala i le lafoa'i o le alofa fa'apito ma le talia o le finagalo o Keriso. O le fa'amauauga ma le manatu e lē mana'omia se fesoasoani e ao ina fa'asatauroina. Tatou te malilie ea e totogi le tau e mana'omia mai iā i tatou? Tatou te malilie e tu'u atu o tatou loto ia ō gatasi ato'atoa ma le finagalo o le Atua? Se'i vaganā ua tatou loto atu i ai, o le a lē mafai ona fa'aailoa iā i tatou le alofa tunoa o le Atua e fa'afouina ai.

(10) O LE Ā LE MEA E FA'ATUSA I AI E LE APOSETOLO O PAULO LE TAUIVIGA FA'ALEAGAGA?

Ia e tau le taua lelei i la le fa'atuatua, tago atu ia i le ola fa'avavau, na vala'auina ai fo'i 'oe, ma ua e ta'utino atu i le ta'utinoga lelei i luma o molimau e to'atele. I Timoteo 6:12

Mau e tau i ai: II Timoteo 4:7

O le taua o lo'o tatou 'afia ai o le "taua lelei i la le fa'atuatua" (I Timoteo 6:12). Ua toe fa'apea mai fo'i le aposetolo o Paulo, "O le mea lea 'ou te galue ai ma finafinau e tusa ma Lana lava galuega, o lo'o galue lava i totonu iā te a'u ma le mana" (Kolose 1:29).

(11) O LE Ā LE ŌLEGA A IAKOPO A O FINAU MA LONA FA'AOLA I LE TATALO, MA E AO FO'I INA FA'APEA I TATOU PE AFAI E FIA 'AVEA TATOU MA Ē MANUMALŌ?

Ua fa'apea mai fo'i o ia, Tu'u mai ia o A'u a 'Ou alu, auā ua ao. A ua tali atu ia, 'Ou te lē tu'uina atu lava 'Oe se'ia e fa'amanuia mai iā te a'u. Kenese 32:26

Mau e tau i ai: I Nofoā'iga Tupu 4:10

O Iakopo, i le faigatā tele o lona olaga, na fa'asaga ai i le tatalo. Na fa'atumuina o ia i le naunauta'i e pulea le fuafuāga e tasi - e sa'ili ia suia lana amio. Peita'i a o ia ōle fa'atauānu i le Atua, na ia fa'apea o le fili lea ua pa'i atu lona lima iā te ia, ma o le pō atoa na ia tauivi mo lona ola. A e o le pogai o lona agaga e le'i suia mai faigatā o le olaga lava ia. Ina ua lata ina uma lona malosi, na tu'uina atu e le Agelu Lona malosi fa'alelagi, ma o le pa'i atu lenā na iloa ai e Iakopo Lē na la tauivi.

Ua manu'a ma lē mafai se mea, na ia fa'apa'ū i le Fa'aola ma ōle atu mo se fa'amanuiāga. E lē toe liliu 'ese o ia, pe fa'agata ai lana 'ai'oi, ma na talia e Keriso le ōlega a lenei agaga salamō ua lē mafai se mea, ma e tusa ai ma Lana folafolag, "Pe se'i tago o ia i Lo'u malosi, ia mā lelei ma ia, e lelei fo'i o ia ma A'u" (Isaia 27:5). Na ōle atu Iakopo ma le agaga atoa, "'Ou te lē tu'uina atu lava 'Oe se'ia e fa'amanuia mai iā te a'u" (Kenese 32:26).

(12) O AI O LE A TATOU MAUA AI LE MANUMALŌ I O TATOU UIGA LĒ ATO'ATO MA FA'ANAUNAGA O LE FIA MAUALUGA?

A e fa'afetai i le Atua, o Lē na te foa'iina mai le manumalō iā te i tatou talu lo tatou Ali'i o Iesu Keriso. I Korinito 15:57

Mau e tau i ai: Ioane 15:5; II Korinito 2:14; Iuta 1:24; Isaia 42:6

O le agaga o le finafinau na fa'aosofia e Ia Lē na fagatua ma le pateriaka. O Ia na tu'uina iā te ia le manumalō, ma Na suia lona igoa mai iā Iakopo iā Isara'elu, ma fa'apea atu, "E lē toe ta'ua lou igoa o Iakopo, a o Isara'elu, auā e pei o se ali'i ua e finau i le Atua atoa ma tagata, ma ua e manumalō" (Kenese 32:28). O le mea fo'i na finau maua'i ai Iakopo i lona ia lava malosi na malō ai e ala i le tu'uina atu o ia ma le fa'atuatua mau. "O lenei fo'i le manumalō e manumalō ai i le lalolagi, o lo tatou fa'atuatua lava" (I Ioane 5:4).

Ona o le alofa e maofa ai ma le taulaga ōfo a Keriso mo a'u, 'ou te mana'o e mulimuli i Lana vala'au ia ūlu atu i le ala sa'o ma le faitoto'a vā apiapi i Lona malō.

Li'o le Tali: **Ioe** **Lē Mautonu**

O le faitoto'a vā apiapi o le tu'uina atu lea o a'u lava i Lona finagalo ma le fa'amamāina o la'u amio. Ua 'ou iloa o lenei filifiliga e aofia ai se taua fa'aleagaga e mata'utia ma o lo'u mafaufau o le fanua e tau ai.

Li'o le Tali: **Ioe** **Lē Mautonu**

Ua 'ou va'ai i le tulaga o le mea moni lenei mo a'u, e ala i le toto o Keriso, ia manumalō, e tataui iā te a'u ona muamua tu'uina atu a'u ma mea uma o iā te a'u iā te Ia.

Li'o le Tali: **Ioe** **Lē Mautonu**

O le taimi nei 'ou te filifili e tu'uina atu a'u ma 'ou tatalo mo le poto ma le iloa ia fa'aauau le filifiliga i le faitoto'a vā apiapi. 'Ou te fa'anaunau ina ia maua le vi'iga i Lona suafa ona o lo'u olaga ma e i ai le aso e ūlu atu ai i Lona malō.

Li'o le Tali: **Ioe** **Lē Mautonu**

Manatu o Su'esu'ega **Tatalo Mana'omia** **Tali o Tatalo**

Fa'aeteete i Perofeta Pepelo

Lesona 35

E fa'avae lenei lesona i le Mataio 7:15.

(1) A O TATOU MALAGA I LE AUALA LAUITIITI AGA'I I LE FAITOTO'A VĀ APIAPI, O LE Ā LE MEA NA LAPATA'I MAI KERISO IA TATOU 'ALO 'ESE AI?

Ia outou ma perofeta pepelo, o ē ō mai iā te outou i ofu fa'amamoe, a o totonu o luko fe'ai lava i latou. Mataio 7:15

Mau e tau i ai: Mataio 24:11; I Ioane 4:1; II Peteru 2:1, 2

O a'oa'o o le mea sesē o le a tula'i mai e tosina outou mai le auala lauitiiti ma le faitoto'a vā apiapi. Ia fa'aeteete iā i latou, ona e ui ina fa'alilo i latou i ofu fa'amamoe, a o totonu o luko fe'ai lava latou.

(2) O LE Ā LE FETALAIGA A IESU IA MAFAI AI ONA TATOU ILOA LE 'ESE'ESEGA O LE MEA SESĒ MA LE MEA MONI, INA IA LĒ FA'ASESĒINA AI TATOU?

Tou te iloa i latou i o latou fua. Pe tau mai ea tagata se fuifui vine mai le la'au tuitui, po o mati mai le la'au talatala?

Mataio 7:16

Mau e tau i ai: Mataio 7:20; 12:33; Luka 6:43-45; Iakopo 3:12

Na tu'u mai e Iesu le ala e mafai ai ona iloa le 'ese'ese o a'oa'o pepelo mai ē moni. Na Ia fetalai, "Tou te iloa i latou i o latou fua. Pe tau mai ea tagata se fuifui vine mai le la'au tuitui, po o mati mai le la'au talatala? (Mataio 7:16).

(3) O LE Ā LE ILOILOGA FA'ALE-TUSI PA'IA MO PEROFETA, O FAUTUA, MA A'OA'O FA'ALEAGAGA?

Inā sa'ili ia i le tulafono ma le mau; afai latou te lē tautala e tusa ma ia 'upu, ua leai lava se malamalama iā te i latou.

Isaia 8:20

E lē o fa'atonu mai ia fa'amaonia i latou i a latou gagana mālie ma tulaga mauualuluga, a e iloiloia i latou i le Afioga a le Atua. "Inā sa'ili ia i le tulafono ma le mau; afai latou te lē tautala e tusa ma ia 'upu, ua leai lava se malamalama iā te i latou" (Isaia 8:20). Ma "Lo'u atali'i e, soia e te fa'alogi i le a'oa'o atu e fa'asesē ai i 'upu e poto ai" (Fa'ata'oto 19:27).

O le ā le fe'au o lo'o aumai e nei a'oa'o? E ta'ita'i ai 'oe ia āva ma mata'u i le Atua? E ta'ita'iai ea 'oe ia e fa'atinoina lou alofa mo Ia e ala i lou fa'amaoni i Āna poloā'iga? Pe afai e lē lagona e tagata le mamafa o le tulafono tau le amio; afai latou te manatu māmā i fa'atonuga a le Atua; pe a latou fa'aleaga se tasi lava o Āna poloā'iga, ma latou a'oa'o ai tagata, o le a leai so latou tūa i le silafaga a le lagi (Mataio 5:19; Iakopo 2:10). Tatou te iloa e leai se fa'avae o a latou matā'upu. O lo'o latou faia le galuega sa amataina e le ali'i o le pogisā, o le fili lea o le Atua.

(4) O LE Ā LA TATOU VAEGA E TATAU ONA FAI INA IA MAFAI AI ONA TATOU FA'AAOGĀINA LE ILOILOGA FA'ALE-TUSI PA'IA?

Ua latou talia le 'upu ma le fiafia tele, ua sa'ili i Tusi i lea aso ma lea aso, pe moni ia mea. Galuega 17:11

Mau e tau i ai: II Timoteo 3:15; Ioane 8:32; 7:17; Galuega 11:1; Iopu 23:12

(5) O LE Ā LE FETALAIGA A KERISO I LE FA'AMASINOGA MULIMULI I LE TO'ATELE O I LATOU NA TALITONU O LO'O I LUGA O LE ALA VĀ APIAPI MA A'OA'O ATU LE 'UPU MONI A E LE'I FA'APEA?

Ona 'Ou ta'utino atu ai lea iā te i latou, 'Ou te le'i iloa lava outou; inā ō 'ese ia outou iā te A'u, o outou o ē fai amio leaga. Mataio 7:23

Mau e tau i ai: Mataio 25:12; Luka 13:25; II Timoteo 2:19

E lē o i latou uma e ta'uta'u Lona suafa ma fa'aaogā Lana fa'ailoga e ā Keriso i latou. Na fetalai Iesu, o le to'atele na a'oa'o atu i Lo'u igoa o le a maua i latou e māmāsagia i le taimi mulimuli. "E to'atele latou te fai mai iā te A'u i lea aso, Le Ali'i e, le Ali'i e, matou te le'i perofeta ane ea i Lou igoa, o Lou igoa fo'i na matou tulia ai temoni, o Lou igoa fo'i na matou fai ai vavega e tele? Ona 'Ou ta'utino atu ai lea iā te i latou, 'Ou te le'i iloa lava outou; inā ō 'ese ia outou iā te A'u, o outou o ē fai amio leaga" (Mataio 7:22-23).

(6) INA UA UMA ONA TE'ENA LE 'UPU MONI MA LANA MEAALOFA O LE SALAMŌ, O LE Ā LE MEA O LE A FAIA MULIMULI E LE ATUA?

Ona 'Ou tu'uina atu ai lea o i latou i o latou loto finau vale; na latou savavali i mea na latou filifili i ai. Salamo 81:12

Mau e tau i ai: Roma 1:24; Galuega 14:16

E i ai tagata e talitonu o latou lava e sa'o, a e o lo'o sesē. A o fa'ailoa mai o Keriso lo latou Ali'i ma fa'apea o lo'o latou faia galuega tetele i Lona suafa, o latou o le 'au faigaluega a le amioleaga. "Ua latou alolofa fua i o latou gutu, a ua mafuli o latou loto i lo latou manumanu." O lē e ta'u mai o le afioga a le Atua e pei "ua tusa...ma se pese mālīe a lē ua leo mālīe, ma lē ta mālīe i le la'aupese; auā latou te fa'alologologo i Āu 'upu, a e latou te lē 'ana'ana i ai" (Esekielu 33:31, 32).

(7) PE AFAI TATOU TE SA'ILI MA USIUSITA'I I LE FINAGALO O LE ATUA MA LE LOTO FA'AMAONI, ONA O LE 'UPU MONI LEA, O LE Ā LE FOLAFOLAGA E MAFAI ONA TATOU TAPA I AI?

Ai se tasi e fia fai lona finagalo, e iloa ai e ia le matā'upu, pe mai le Atua, pe 'Ou te tautala fua lava A 'u. Ioane 7:17

Mau e tau i ai: Ioane 8:31, 32; Salamo 25:8-9

(8) O LE Ā LE FETALAIGA A KERISO E FA'AMAONIA AI O POLOA'IGA UMA A LE ATUA O 'UPU MONI MA O LO'O TATAU PEA E 'AVEA MA ILOILOGA MONI O LE ALOFA MA LE FAI MA SO'O I ASO NEI?

Afai tou te alofa mai iā te A'u, ia outou tausi mai i A'u poloa'iga. Ioane 14:15

Mau e tau i ai: I Ioane 5:2, 3; 2:3-5; Salamo 40:8

E leai se aogā pe a tau o le ta'uta'u mai o 'oe o le so'o. O le fa'atuatua iā Keriso e fa'asaoina ai le agaga e lē o fa'atinoina e le to'atele. Fai mai latou, "Ia talitonu, a e lē mana'omia e te tausi le tulafono." Peita'i o le talitonu e lē ta'ita'i atu i le usiusita'i, a e na o le fa'afoliga.

(9) O LE Ā LE A'OA'OGA A KERISO, E ALA I LE AFIGA A LE ATUA, E FA'AILOA AI LE SESĒ MA LE MATA'UTIA O LE A'OA'O ATU, O TULAFONO PO O SE TULAFONO E TASI O TULAFONO A LE ATUA, UA LĒ TOE AOGĀ?

Auā e moni, 'Ou te fai atu iā te outou, e mavae atu le lagi ma le lalolagi, a e lē mavae atu lava se iota po o sina fāsi mata'itusi o le tulafono, se'ia taunu'u mea uma. Mataio 5:18

Auā o sē tausi le tulafono uma, a e agasala i se mea e tasi, ua nofo sala ia i mea uma. Iakopo 2:10

E magumagu le mutia, e to'ulu le fuga; a o le afioga a lo tatou Atua, e tumau lea e fa'avavau. Isaia 40:8

Mau e tau i ai: Salamo 119:152; I Peteru 1:25; Luka 21:33; 16:17

Ua fa'apea mai le aposetolo o Ioane, "O sē fa'apea, Ua 'ou iloa o Ia, a e lē tausi e ia i Āna poloa'iga, o le pepelo lava lea, e lē o i totonu iā te ia le 'upu moni" (I Ioane 2:4). Ia 'aia ne'i teuloto e se tasi le manatu o manuia fa'apitoa po o fa'aaliga fa'avavega o fa'amaoniga o a latou galuega po o manatu o lo'o latou lagolagoina (II Peteru 1:20). O tagata o le a ta'umāmāina le afioga a le Atua, ma fa'atulaga o latou lava manatu, lagona, ma gaoioiga i luga a'e o le tapula'a fa'aleagaga, o le a mafai ona tatou iloa e leai se malamalama iā i latou.

(10) E PAU LO TATOU SAOGALEMŪ O LE FAI LEA O LE AFIGA A LE ATUA MA TATOU PULE AOA, ONA E TELE MANATU 'ESE'ESE. O LE Ā LE LAPATA'IGA UA TU'U MAI E FA'ATATAU I LE FA'ATAGAINA O 'UPUTU'U E SUIA AI A'OA'OGA O LE AFIGA A LE ATUA?

Ia outou, ne'i fa'atagataotauaina outou e se tasi i le poto lē aogā e fa'asesē ai, e tusa ma le 'uputu'u a tagata, e tusa ma matā'upu muamua a le lalolagi, a e lē tusa ma matā'upu a Keriso. **Kolose 2:8**

Mau e tau i ai: Kolose 2:22; II Peteru 3:17; Mataio 16:6; Efeso 5:6; Eperu 13:9; Roma 16:18

(11) PE AFAI TATOU TE VA'AIA LE 'UPU MMONI I LO TATOU POTO A E LĒ IĀ I TATOU LE TALITONUGA ATO'ATO A IA MULIMULI AI, O LE Ā LE FOLAFOLAGA E MAFAI ONA TATOU 'A'APA I AI?

Ma 'Ou avatu iā te outou le loto 'a'ano. 'Ou te tu'ina atu Lo'u Agaga i totonu iā te outou, tou te savavali ai i A'u tulafono, tou te 'ana'ana fo'i i A'u fa'amasinoga, ma outou faia. **Esekielu 36:26-27**

Maue tau i ai: Esekielu 11:19-20; Teuterenome 30:6; Efeso 4:23, 24

O le usiusita'i le iloiloga o le 'avea ma so'o. O le tausi o poloā'iga e fa'amaonia ai e fa'amaoni lo tatou alofa. Pe afai o le talitonuga ua tatou talia e fa'aumatia ai le agasala i le loto, e fa'amamā ai le agaga mai le 'ele'elea, fua mai fua o le fa'apa'iaina, o le a tatou iloa ai o le 'upu moni lea a le Atua. Pe afai e iloa ma fa'atinoina i o tatou olaga le lima foa'i, agalelei, fa'apalepale, ma le tigāalofa; pe a fa'afiafiaina o tatou loto i le faia o mea lelei; pe a tatou fa'aeaina Keriso a e lē o tatou lava, o le a tatou iloa o lo'o tulaga sa'o lo tatou fa'atuatua. "O le mea fo'i lea tatou te iloa ai ua tatou iloa o Ia, pe afai tatou te tausi i Āna poloā'iga" (I Ioane 2:3).

(12) O LE Ā LE FA'AMATALAGA I LE TUSI O FA'AALIGA O LO'O FA'AMAONIA AI O LE EKALESIA MONI A LE ATUA I TAIMI O LE 'UGA E LATOU TE TAUSI POLOĀ'IGA A LE ATUA?

Ua ita fo'i le tarako i le fafine, ona alu atu ai lea o ia e tau le taua ma i latou ua totoe o lana fanau, o ē ua tausi i poloā'iga a le Atua, ma ua taofi le mau iā Iesu Keriso. **Fa'aaliga 12:17**

Mau e tau i ai: Fa'aaliga 14:12; 22:14

(13) O LE Ā TONU LE FA'AVAE O LE A MAUTINO A PE O TATOU NA FA'ASESĒINA MA UA LĒ ILOA, PE O MULIMULI I LE 'UPU MONI MA UA FA'ASAOINA?

Ma mea fa'asesē uma o le amio leaga i ē a fano; auā ua latou lē talia le 'upu moni ma le fiafia i ai, ina ia fa'aolaina ai i latou. **II Tesalonia 2:10**

Mau e tau i ai: Fa'ata'oto 1:7; 4:5-6; Roma 6:17; Ioane 8:32

Ua 'ou malamalama nei i le faigatā o le ta'ita'i 'ese mai le 'upu moni e ala i a'oa'o ma perofeta pepelo, a e ua 'ou filifili e 'avea le Tusi Pa'ia o la'u pule aoao ma fa'amaonia mea o lo'o a'oa'o mai ai.

Li'o le Tali: **Ioe** **Lē Mautonu**

'Ou te alofa i le Ali'i ma 'ou naunau e fa'aalia lea e ala i le usiusita'i i le 'upu moni ma Āna poloā'iga. 'Ou te tatalo ia 'ou maua le alofa fa'amaoni i lo'u loto mo le 'upu moni e na o Ia e mafai ona tu'uina mai.

Li'o le Tali: **Ioe** **Lē Mautonu**

Manatu o Su'esu'ega

Tatalo Mana'omia

Tali o Tatalo

Fa'avae i Luga o le Papa

Lesona 36

E fa'avae lenei a'oa'oga i le Mataio 7:25.

(1) O LE Ā LE LAPATA'IGA A KERISO I TAGATA E FA'ATATAU I TA'ITA'I FA'ALEAGAGA MA A LATOU A'OA'OGA, E LĒ GATA I LENĀ ASO I LUGA O LE MAUGA A E FA'APEA TAIMI UMA A O FAIA LANA GALUEGA?

Ona latou lagona ai lea, e lē o le mea fa'afefete o le areto na fetalai atu ai o Ia ia matuā 'alo 'ese ai, a o le matā'upu a le 'au Faresaio ma le 'au Satukaio. Mataio 16:12

Mau e tau i ai: Mataio 16:6; Mareko 8:15; Luka 12:1

Sa matuā lagona e tagata le tāua o fetalai a Keriso. O le matagofie fa'alelagi o ta'iala o le 'upu moni na tosina ai i latou; ma na tu'u iā i latou o lapata'iga uigā a Keriso e pei o le si'ufofoga o le Atua o lo'o sa'ili i agaga. O Āna afioga na o'o ifo i le ta'ele o o latou manatunatuga ma taofi na i ai muamua; o le usiusita'i i Āna a'oa'oga e mana'omia ai le suia o a latou manatu ma gaoioiga uma e masani ai. o le a tu'u ai i latou i le tulaga e feto'ai ai ma o latou a'oa'o fa'aleagaga; auā o le a 'a'afia ai le lafotūina o fa'avae atoa o lo'o fausia ai a'oa'oga a a'oa'o o le malumalu mai le tele o augātupulaga. O le mea lea, e ui ina talia i loto o tagata Āna fetalai, e to'aitiiti na sauni e talia ia mea e fai ma ta'iala o le olaga.

(2) I LE FA'AI'UGA O LANA LAUGA I LUGA O LE MAUGA, O FEA NA FETALAI ATU KERISO IS FAUSIA AI LE FA'AVAE O LO LATOU FA'ATUATUA MA TALITONUGA INA IA LĒ FA'ALĒAOGĀINA PE A AGI MAI AFĀ O FETAUA'IGA FA'ALEAGAGA?

Ona tō mai lea o uāga, ua o'o mai fo'i tafega, ua agi mai fo'i o matagi, ua pesi mai i lea fale, a e le'i pa'ū lava ia; auā ua fa'avaeina i luga o le papa. Mataio 7:25

Mau e tau i ai: Salamo 71:3; 31:3; 18:2

Na fa'ai'u e Iesu Lana a'oa'oga i luga o le mauga i le tala fa'atusa e fa'ailoa manino ai le tāua o le fa'atinoina o 'upu na Ia fetalai atu ai. Na fa'atasi ai i le motu o tagata na lolofi atu ma si'osi'omia le Fa'aola le to'atele o i latou na soifua a'e i autafa o le Sami o Kalilaia. A o latou nonofo i autafa o le mauga e fa'alogologo i fetalai a Keriso, na latou vā'ai atu i vanu ma tofē o lo'o tafe ai vai mai le mauga aga'i i le sami. I le tau mafanafana o nei vai e gālo atu a e fa'atumuina i le pefu ma le 'ele'ele le auvai matūtū. A o'o mai matagi ma le timu o le tau malūlū i luga o mea maupu'epu'e, e i ai taimi a tetele tafega e tafe'ese atu ai mea uma o lo'o i ai i le ala. E o'o lava i fale e fausia e tagata faifa'ato'aga i 'ele'ele laugatasi, e manatu latou atonu o le a saogalemū, e tafe 'esea fo'i.

A e i ai le fale e tutū i luga o mea maupu'epu'e na fausia i luga o le papa. I nisi vaega o le lau'ele'ele o lo'o i ai fale na fausia atoa i ma'a, ma o le tele o latou e lē afāina lava i afā i le afe o tausaga. O nei fale na galulue ai ma le malosi ma le faigatā. E le'i faigofie le ala i ai, ma o latou tulaga e foliga mai e faigatā ona o'o i ai e lē pei o le fanua laugatasi. Peita'i na fausia i latou i luga o le papa, ma e le'i afāina i latou ina ua o'o mai afā ma tāfega.

(3) O LE Ā LE PAPA MAUTŪ E MAFAI ONA TATOU TŪ MA LE MAUTINOĀ E FA'ATUATUAINA MO LO TATOU FA'AOLATAGA, MA AISEĀ?

O le Atua, e sao lava Lona ala; ua se ario ua te'a ma le otaota afioga a Ieova; o Ia lava o le talitā o i latou uma o ē fa'atuatua ia te Ia. Salamo 18:30

A o le afioga a le Ali'i e tumau lea e fa'avavau lava. O le afioga fo'i lea ua folafolaina atu iā te outou na. I Peteru 1:25

Na fetalai Iesu, e fa'apei o ē na fauina nei fale i luga o le papa, e fa'apea lē talia le 'upu na Ia fetalai atu ai ona 'avea lea ma fa'avae o lana amio ma lona olaga. I le tele o seneturi ua mavae, na tusia ai e le perofeta o Isaia e fa'apea, "O le afioga a lo tatou Atua, e tumau lea e fa'avavau" (Isaia 40:8); e fa'apea ona toe fa'amanatu mai e Peteru nei 'upu ma toe fa'aopoopo i ai, a e ua leva ona mavae le Lauga i luga o le Mauga, "O le afioga fo'i lea ua folafolaina atu ia te outou na" (I Peteru

1:25). E pau le mea e tumau o lo'o iloa e la tatou lalolagi o le Afioga lea a le Atua. O le fa'avae mautū lea e mautinoa e tumau. Na fetalai Iesu, "E mavae atu le lagi ma le lalolagi, a o A'u 'upu e lē mavae atu lava ia" (Mataio 24:35).

(4) O AI LE AFIOGA MA LE PAPA FA'ALEAGAGA E MAFAI ONA TATOU FAUSIA SAOGALEMŪ AI I LUGA?

*Auā na latou inu i le papa fa'aleagaga sa mulimuli atu ia te i latou, o lenā papa fo'i o Keriso lea. **I Korinito 10:4***

Mau e tau i ai: Ioane 1:1; Salamo 92:15

O ta'iala tetele o le tulafono, o le uiga moni o le Atua, o lo'o fa'atinoina i fetalaiga a Keriso i luga o le mauga. So'o se tasi e fauina ai i luga o ia ta'iala. O lo'o fausia lea i luga o Keriso, le Papa o Tupulaga. Tatou te talia Keriso pe a ua tatou talia le 'upu. Ma e na o i latou e talia Āna afioga o lo'o fausia i Ōna luga. "Auā e lē mafaia e se tasi ona tu'u se isi fa'avae i lē ua uma ona tu'uina, o Iesu le Keriso lea" (I Korinito 3:11). Ma "E leai fo'i se tasi ua i ai le ola; e leai lava se isi igoa i lalo o le lagi ua foa'iina mai i tagata e mafaia ona fa'aolaina ai o i tatou" (Galuega 4:12). O Keriso, o le 'Upu, o le fa'aaliga o le Atua - o le fa'atinoina o Lona uiga, o Lana tulafono, o Lona alofa, o Lana soifuāga - e na o le pau lea o le fa'avae e mafai ona tatou fausia ai le amio o le a tumau.

(5) E FA'APEFEA ONA TATOU FAUSIA I LUGA O LE FA'AVAE MAUTŪ O KERISO - LE PAPA FA'ALEAGAGA, MA AISEĀ E TĀUA AI?

*Tou te le'i iloa ea, o lē tou te tu'uina atu i ai outou e fai ma 'au'auna e 'ana'ana i ai, o ana 'au'auna outou tou te 'ana'ana i ai, po o le agasala e o'o ai le oti, po o le 'ana'ana e o'o ai le amiotonu? **Roma 6:16***

Mau e tau i ai: Galuega 5:29; Eperu 5:9

Tatou te fausia i luga o Keriso e ala i le usiusita'i i Lana afioga. E lē o ia e na ona fiafia i le amiotonu, o ia lea e amiotonu, a e o lē e faia le amiotonu. O le pa'ia e lē na o se lagona aliali; o le i'uga o le tu'u atu atoa o mea uma i le Atua, ma o le faia o le finagalo o lo tatou Tamā fa'alelagi. A o tolauapi le fanauga a Isara'elu i tuā'o'i o le Nu'u o le Folafolaga, e le'i leva ona na ona latou iloa le lau'ele'ele o Kanana, pe na ona pepese vi'iga o Kanana. E lē na o lea o le a mafai ai ona latou maua le pule i tovine ma fanua olive o lenei lau'ele'ele lelei. E pau le mea o le a mafai ai ona latou maua moni ai pe a fa'ataunu'u tu'utu'uga ma tausi tulaga ua tu'u mai, ia tausisi i le fa'atuatua i le Atua, ia fa'aaogāina Āna folafolaga mo i latou, a o latou usiusita'i i Āna fa'atonuga.

(6) O LE Ā LE MEA E TATAU ONA TU'U FA'ATASI MA LO TATOU FA'ATUA'TUA IA 'AVEA AI TATOU MA Ē MULIMULI FA'AMAONI IĀ KERISO?

*E fa'aapea fo'i le fa'atuatua, pe afai e lē i ai galuega, e mate lava ia ina ua na o ia. **Iakopo 2:17***

Mau e tau i ai: Iakopo 2:14-26; 1:27

O le tapua'iga e aofia ai le faia o mea o lo'o fetalai mai ai Keriso; e lē faia ina ia maua ai le alofa e fa'apitoa o le Atua, a e ona ua tatou maua fua le meaalofo o Lona alofa. Ua tu'uina e Keriso le fa'aolataga o le tagata, e lē na o le fia fa'aailoa atu, a e i luga o le fa'atuatua o lo'o fa'atinoina i galuega o le amiotonu. O le faia, a e lē na o 'upu, o lo'o mana'omia e i latou e mulimuli iā Keriso. E ala i gaoioiga ma mea e fai e fausia ai le amio.

(7) O AI O LE A TU'U I AI E LE ATUA LE AGAGA PA'IA IA FA'AMALOSIA AI I LATOU E FAIA GALUEGA LELEI MA FUAFUĀGA MAMĀ?

*O Āna molimau fo'i i ia mea o i matou, atoa fo'i ma le Agaga Pa'ia, Lē ua foa'iina atu e le Atua i ē 'ana'ana ia te Ia. **Galuega 5:32***

Mau e tau i ai: Galuega 1:8; Roma 8:5, 9

"Auā o i latou uma ua ta'ita'iina e le Agaga o le Atua, o atali'i i latou o le Atua" (Roma 8:14). E lē o i latou ua pā'ia e le Agaga o latou loto, e lē o i latou e gaua'i fa'a'afa'afa i Lona mana, a o i latou o lo'o ta'ita'iina e le Agaga, o fanau latou a le Atua.

(8) E FA'APEFEA LE MAFAI ONA TATOU TUTUPU I LE FA'ATUATUA MA IA FOLIGA I LE UIGA O KERISO?

O lenei, e tupu le fa'atuatua i le taalogologo atu, o le taalogologo atu fo'i o i le afioga a le Atua lea. Roma 10:17

Mau e tau i ai: I Tesalonia 2:13; II Tesalonia 2:14; Iakopo 1:21

E te naunau ia 'avea 'oe ma so'o o Keriso, peita'i e lē iloa pe fa'aapefea ona amata? O e i ai ea i le pouliuli a e lē iloa pe fa'aapefea ona maua le malamalama? Ia e mulimuli i le malamalama o lo'o iā te 'oe. Tu'u atu lou loto ia usiusita'i i mea o lo'o e iloa o le afioga a le Atua. O Lona mana, o Lona soifua, e mau i Lana afioga. A o e talia le 'upu e ala i le fa'atuatua, o le a e maua ai le malosi e usita'i ai. Pe a e gauua'i i le malamalama o lo'o iā te 'oe, e fa'ateleina le malamalama e o'o mai. Ua e fausia i luga o le afioga a le Atua, ma o le a atia'e lau amio e fa'apei o le uiga o Keriso.

(9) pE AFAI E TATOU TE SA'ILI E FAUSIA LE MA'A O A TATOU AMIO I LUGA O LE FA'AVAE O LE PAPA O KERISO, E ALA I LE MANA O LE AGAGA PA'IA, O LE Ā LE MEA O LE A TUPU?

Ua fa'atatauina iā te Ia le fale atoa, o lo'o alu a'e, ina ia fai ma malumalu pa'ia i le Ali'i. Efeso 2:21

Mau e tau i ai: Efeso 2:19-22

O Keriso le fa'avae moni, o le ma'a ola; o Lona soifua e aumaia iā i latou uma o ē fausia i Ōna luga. "O outou fo'i, ua atiina a'e outou pei o ma'a ola, o le fale fa'aleagaga" (I Peteru 2:5). Ma "Ua fa'atatauina ia te ia le fale atoa, o lo'o alu a'e, ina ia fai ma malumalu pa'ia i le Ali'i" (Efeso 2:21). O ma'a uma ua 'avea e tasi ma le fa'avae; ona o le ola e tasi ua iā i latou uma. E lē mafai e se afā ona fa'aleagaina lea fale; auā "O mea e fa'asoa i le soifua o le Atua, e ola lelei pe a fa'atasi ma Ia."

(10) O LE Ā LE MEA O LE A O'O I LE FA'ATUATUA O I LATOU O Ē FAUSIA A LATOU AMIO I LE FA'AVAE ONEONE E FESI'ITA'I O LENEI LALOLAGI?

'Ou te faia le fa'amasinoga ia fa'atatauina i le fua fa'ata'oto, 'Ou te faia fo'i le amiotonu ia fa'atatauina i le fua fa'atautau; e tafea le malu o le tala pepelo i le uato'a, e lofia fo'i le lafitaga i le vai. Isaia 28:17

Mau e tau i ai: Isaia 28:2

O fale uma e fausia i luga o se isi fa'avae a e lē o le afioga a le Atua, o le a pa'ū i lalo. O ia, e pei o Iutaia i ōna pō o Keriso, ua fausia i luga o fa'avae o manatu ma taofi fa'aletagata, o faiga ma sauniga e fofoa i mafaufau o tagata, pe o isi itu'aiga galuega e mafai ona ia faia e aunoa ma le alofa tunoa o Keriso, ua fa'atūina le fa'avae o lana amio i luga o le oneone e fesi'ita'i. A o'o mai afā malolosi o fa'aosoosoga o le a tafea 'ese ai le fa'avae oneone a e tu'u ai na o lona fale malepe i le matāfaga o le taimi.

"O lenei, o lo'o fa'apea ona fetalai mai o le Ali'i o Ieova,... 'Ou te faia le fa'amasinoga ia fa'atatauina i le fua fa'ata'oto, 'Ou te faia fo'i le amiotonu ia fa'atatauina i le fua fa'atautau; e tafea le malu o le tala pepelo i le uato'a, e lofia fo'i le lafitaga i le vai" (Isaia 28:16-17).

(11) E FA'APEFEA LE LAGONA A LE ATUA E FA'ATATAU I LANA FANAU O Ē UA FILIFILI E FAUSIA O LATOU FA'AVAE I LUGA O LE ONEONE O LE FA'AFANOAGA?

Fai atu ia iā te i latou, O lo'o fetalai mai le Ali'i o Ieova, 'Ou te ola A'u, 'Ou te lē fiafia lava i le oti o lē amio leaga, a ia liliu mai lē amio leaga ai lona ala, ma ola ai; liliu ia outou, inā outou liliu 'ese ia i o outou ala leaga; auā pe se ā ea le mea tou te fia oti ai, le aiga o Isara'elu e? Esekielu 33:11

Mau e tau i ai: Esekielu 18:21-24

A o le aso nei o lo'o ōle mai pea le alofa tunoa i le tagata agasala. O le si'ufofoga o lo'o fetalai mai nei i le tagata loto ma'a'a o le si'u fofoga o Lē na mafatia Lona finagalo a o Ia silasila atu i le 'a'ai pele ma Lona alofa: "Ieruselema e, Ieruselema e, o lē fasiotia perofeta, ma fetogi i ma'a ē na 'a'uina atu iā te 'oe; ua tele lava O'u mana'o e fa'apotopoto i lau fanau, e pei o le moa ona o faofata'i i lana toloa'i i lalo i ona apa'au, a e lē mafafai outou. Fa'auta, e tu'ua lo outou fale, e fa'atafunaina;..." (Luka 13:34-35). O Ieruselema na silasila ai Iesu i le ata fa'atusa o le lalolagi na te'ena ma 'ino'ino i Lona

alofa tunoa. Na tagi Iesu mo 'oe, lē loto ma'a'a! Pe ana salamō lava Ieruselema, e ui ina maligi loifofoga o Iesu i luga o le mauga, se manū e fa'asaoina mai lona malaia. Mo sina avanoa itiiti na fa'atali pea le Meaalofa a le lagi mo lona taliaina.

(12) O LE Ā LE MEA O LO'O FAIA PEA MA LE ONOSA'I E LE ALI'I I FAITOTO'A O TATOU LOTO INA IA MAFAI ONA TATOU TUTŪ MALOSI IĀ TE IA - O LE PAPA, A O LE'I O'O MAI LE AFĀ MULIMULI?

Fa'auta, 'Ou te tū atu i le puipui ma tu'itu'i atu; ai se tasi e fa'alogo mai i Lo'u leo, ma tatala mai le puipui, 'Ou te ulufale atu ia te ia, ma te tali sua fo'i ma ia, o ia fo'i ma A'u. Fa'aaliga 3:20

Mau e tau i ai: Luka 12:36; Ioane 14:23; Fa'aaliga 19:9

Lo'u agaga e, o lo'o fetalai mai pea Keriso i le si'ufofoga alofa: "Fa'auta, 'Ou te tū atu i le puipui ma tu'itu'i atu; ai se tasi e fa'alogo mai i Lo'u leo, ma tatala mai le puipui, 'Ou te ulufale atu iā te ia, ma te tali sua fo'i ma ia, o ia fo'i ma A'u" (Fa'aaliga 3:20). Ma "O lenei le tausaga e talileleia mai ai; fa'auta, o lenei le aso e fa'aolaina ai" (II Korinito 6:2).

(13) O LE Ā LE VALA'AU OFOFOGIA O LO'O OFO MAI PEA E LE ATUA MO I TATOU TA'TTO'ATASI?

Liliu mai ia iā te A'u, tou te ola ai, o outou tulu'iga uma o le lalolagi; auā o A'u o le Atua, a e leai lava se tasi. Isaia 45:22

Mau e tau i ai: Isaia 45:21; 55:1; Ioane 10:28-29; Mataio 11:28-30

O 'oe lē o tu'u pea lou fa'amoemoe i ōu lava luga, o lo'o fausia lea i luga o le oneone, peita'i e lē o tuai pe a e fia sola 'ese mai le malaia o lo'o fa'amālumu mai. A e le'i o'o mai le afā, ia e sola atu i se fa'avae e tumau. "O lo'o fa'apea ona fetalai mai o le Ali'i o Ieova, Fa'auta, 'Ou te tu'uina i Siona le ma'a e fai ma fa'avae; o le ma'a ua uma ona fa'ata'ita'iina, o le ma'a tulimanu tāua, o le fa'avae ua mau; o lē fa'atuatua iā te Ia e lē popole lava ia" (Isaia 28:16). "Liliu mai ia iā te A'u, tou te ola ai, o outou tulu'iga uma o le lalolagi; auā o A'u o le Atua, a e leai lava se tasi" (Isaia 45:22). "'Aua e te fefe, auā 'Ou te ia te 'oe; 'aua le fetepatepa'i, auā o A'u o lou Atua; 'Ou te fa'amalosia 'oe; e moni, 'Ou te fesoasoani iā te 'oe; e moni, 'Ou te taofia 'oe i Lo'u lima taumatau e i ai le amiotonu" (Isaia 41:10). Ma "Tou te lē mamā, tou te lē masiasi fo'i e fa'avavau fa'avavau lava" (Isaia 45:17).

'Ou te iloa le faigatā o le talia o manatu, o 'uputu'u, ma a'oa'oga a le tagata i luga a'e o le fa'avae mausalī a le Afioga a le Atua. E fa'apei lenei mea o le fale e fauina i luga o le oneone. O le a fesi'ita'i le fa'avae pe a lē o fa'amaluina mai afā ma timuga o le olaga.

Li'o le Tali: **Ioe** **Lē Mautonu**

Ua 'ou iloa o le ala e fausia ai i luga o le Papa o le fa'atasi atu lea iā te Ia ma usiusita'i i Lona si'ufofoga. E lē o ia lē e na ona fiafia i le amiotonu, e amiotonu, a e peita'i o lē e faia le amiotonu. O le tulaga fa'apa'iaina e maua pe a tu'u atu atoa mea uma i le Atua; o le faia o le finagalo o lo tatou Tamā o i le lagi.

Li'o le Tali: **Ioe** **Lē Mautonu**

'Ou te malamalama o le "fale" o la'u amio lea ma o le Papa o Iesu Keriso ma Lana Afioga. 'Ou te naunau ma 'ou tatalo, e ala i Lona alofa tunoa, o le a tū malosī la'u amio ma ia mautū i luga o Iesu le Papa mausalī.

Li'o le Tali: **Ioe** **Lē Mautonu**

O la'u ta'utinoga ma le tatalo ia mulimuli ma lo'u loto atoa i le malamalama o lo'o iā te a'u ina ia mafai ona tu'u mai e le Atua iā te a'u le malamalama e sili atu. o le ki lea e maua ai se amio e fauina ia fa'apei o le uiga o Keriso.

Li'o le Tali: **Ioe** **Lē Mautonu**

Manatu o su'esu'ega

Tatalo Mana'omia

Tali o Tatalo
